

354-10/8

A. ~~xxx~~1. m.

24933

PHILIPPI AMBROSII MARHERR

MED. DOCT. VINDOBON. IN ANTIQ. AC CELEB.

UNIVERSIT. PRAG. CAR. FERD. INSTIT.

MEDIC. PROFESS. R. P. O. ET ACAD.

IMP. NAT. CURIOS. SODAL.

PRÆLECTIONES

I N

HERMANNI BOERHAAVE

INSTITUTIONES MEDICAS

CUM PRÆFATIONE CRANTZII

EDITIO NOVA EMENDATIO.

T O M U S I I I .

MUSCULORUM ACTIO, CUTIS, NUTRITIO, INCRE-
MENTUM, DECREMENTUM, SENSUS EXTERNI,
INTERNI, SOMNUS.



LOVANI,
TYPIS ACADEMICIS.

M. D. CC. LXXIX.



Had-773
23/6/15





CONTENTA IN TOMO III.

<i>Musculorum actio.</i>	pag. I
<i>Functio cutis.</i>	67
<i>Sudoris excretio.</i>	81
<i>Sanctoriana perspiratio.</i>	88
<i>Nutritio, incrementum, decrementum.</i>	109
<i>De Tactu.</i>	156
<i>De Gustu.</i>	175
<i>De Olfactu.</i>	194
<i>De Visu.</i>	232
<i>De Auditu.</i>	368
<i>De Sensibus internis.</i>	430
<i>De Vigilia.</i>	464
<i>De Somno.</i>	ibid.

PHILIP. AMBROS. MARHERR
PRÆLECTIONES
I N
HERMANNI BOERHAAVE
INSTITUTIONES MEDICAS,
PARS III.

Tom. III.

A

MUSCULORUM ACTIO.

§. CCCLXXXVIII.

MUsculos vocamus partes corporis nostri organicas, ex fibris longis, carneis compositas, contractiles, a quibus motus in corpore animali peraguntur. De his nunc, absolutis viscerum functionibus, agemus, causasque scrutabimur tantarum virium & fabricam primo musculorum, tum leges modumque agendi & phaenomena motuum varia, experimentis detecta expendemus, ut quantum per hæc licet, in cognitionem causarum motricium assurgamus.

§. CCCLXXXIX.

Argumentum ipsum, quod nunc tractamus difficillimum est & abstrusissimum. Parum luminis anatome subministrat, parum microscopicae observationes & alia artificia profunt. Nullibi enim tanta minuties fabricæ, ut in musculis nervisque est. Nervos novimus fibrillis constare parallelis, celluloso involucro cinctis & colligatis; earum fibrillarum divisionem immensam esse novimus, finem tamen in progressu divisionis aliquem esse, ratione convincimur. Num cavæ sint fibrillæ, num solida substantia factæ, nec sensuum fide, nec directis experimentis constat; cavas esse & liquido subtilissimo perflui, ex phaenomenis quibusdam solo ratiocinio elicimus. Sed nec plura de musculis per anatomen & microscopia novimus. Videmus singulum musculum constare fibris parallelis, plerumque cellulosa tela cinctis, has constare sui similibus innumeris minoribus & adeo minutulis, ut ratio solum finem divisionis attingat, oculorum acies jam fere in principio subsistat. Ultima ergo musculorum fabrica penitus latet. Quis vero exponet actionem & modum causarumque agentis machinæ, cujus fabrica ignota sit?

Augent difficultatem phænomena celerrimi & expeditissimi motus & immensarum pene virium, quas a simplicibus adeo & minutilis fibrillis non exspectes. Hinc etiam factum est, ut in nulla alia quæstione tantum inter se dissentirent physiologi, tamque multiplices & miras hypotheses excogitarent, ut in hac ipsa de causis motuum muscularium difficultate. Et cum ultima fibrillarum muscularium fabrica penitus ignota sit, talem fere quisque proprio ingenio hanc sibi finxit, qualem suffecturam putabat præcipuis motuum phænomenis explicandis. Ergo alii fibrillas musculares ultimas cavos esse cylindrulos & uno tractu factos, alii interruptos, alii ex vesiculis meris compositas, alii fibris transversis connexas, alii sanguine repletas, alii exsanguies & solo liquido nerveo distentas, alii & sanguine & liquido nerveo influente expansas, alii electricas, alii solidas & impervias finxerunt. Omnes tamen hæc opiniones instabiles & brevis ævi fuere. Nam opinionum commenta delet dies, naturæ judicia confirmat.

§. C C C X C.

Omnes fere partes corporis humani solidæ moventur a musculis; paucis exceptis, in quibus nihil musculosi demonstrari potest, & quæ ab humore agitato moventur. Ita corpora cavernosa penis in viris, clitoris in fæminis, non vi musculari, sed influente per libidinem majore sanguinis copia moventur & turgescunt. Simili de causa papillæ mammarum eriguntur, nil ceterum musculosi nactæ. Imo & arteriæ ipsæ, licet fibris muscularibus præditæ, motum tamen diastolicum unice debent sanguini, eas perfluenti; & idem de diastole cordis perfecta verum est, etsi hoc pro parte se ipsum in laxitatem restituit. Hæc pauca exempla si exceperis, omnis in corpore humano motus a musculis peraguntur. Motus autem hi vel sunt *voluntarii* & ad animæ arbitrium exercentur, *animales* ideo dicti, vel sunt *spontanei*, qui sine mentis imperio sua sponte fieri videntur, etsi omnino sine

stimulo non oriantur, ut motus vitales cordis & arteriarum, motus item naturales ventriculi, intestinorum, parturientis uteri &c. vel denique sunt *mixti* ex voluntario motu & spontaneo, ut motus musculorum intercostalium & diaphragmatis & abdominalium, quorum actione respiramus; pergit etenim motus horum musculorum etiam nobis non advertentibus, neque consciis nostri, in somno, in apoplexia, lethargo; hinc reipsa spontaneus motus est; verum etiam per voluntatem possumus respirationem cohibere, accelerare, minuere, augere, variis modis mutare; hinc mixtus est motus ex spontaneo & voluntario; licet Cel. HALLERUS vere voluntariam hanc actionem fecerit.

§. C C C X C I.

Omnes muscoli, dum agunt, se ipsis breviores fiunt, atque ita partem mobiliorem, cui adnectuntur, ad minus mobilem adducunt. Tales sunt omnes muscoli artuum, capitis, colli, pectoris, spinæ dorsi. Alii vero dum agunt, solida vicina premunt, ut diaphragma & abdominales muscoli, qui agentes, dum ex curva linea in breviorē ac rectiorē se restituunt, viscera abdominalia potissimum premunt & alterne agitant, licet etiam costas inferiores, quibus nectuntur, detrahant. Sed sunt alii muscoli, nullis ossibus nexi & cavi & in cavum suum agentes, qui humores premendo expellunt. Hujusmodi muscoli sunt, sinus, auriculæ, ventriculi cordis; hujusmodi sunt tunicæ musculosæ ventriculi, intestinorum, vesicæ urinariæ, arteriarum.

§. C C C X C I I.

Si accurate perspectam haberemus fabricam musculi & causam contrahentem, facile motum musculorum explicarem, ut facile explicamus motus arteriarum, quarum fabricam satis novimus & quarum causæ motrices minus obscuræ sunt. Verum fabrica musculorum perpetuo nos

latebit, hinc & difficultas assignandæ fabricæ ultimæ perpetua erit. Exteriorem solum fabricam novimus per anatomen; sed parum prodest exteriora machinæ alicujus novisse, si interiorem structuram, partiumque dispositionem ignores. Hinc qui ex fabrica musculorum actiones eorundem explicare aggressi sunt, vana protulerunt somnia, dum ejusmodi fabricæ, quam imaginatio sua cuique suggessit, theoriam physiologicam superstruerent. Nos cautiore eam solum fabricæ muscularis partem assumemus, quæ per anatomen certo detecta est, quidquid intimam musculorum fabricam attinet, intactum relinquemus. Contra vero, quod alii neglexerunt, tanto diligentius experimenta in vivorum animalium nervis muscularisque instituta & phænomena experimentis detecta, expendemus, ut hac saltem ratione, quæ spes unica superest, in cognitionem causæ latentis deveniamus. Nam certe alia non est via, quæ in cognitionem causarum descendere liceat, quam per sollicitam observationem effectuum, phænomenorum & corollaria ex hisce aut sponte fluentia, aut necessitate mathematica inde deducta. Hac via magnus NEWTONUS claustra naturæ perfregit. Hac HALLERUS & Cl. alii nostra ætate Viri in ea naturæ mysteria penetrarunt, quæ nemo prioris ævi philosophorum, aut medicorum, speculationibus experientia vacuis, affecutus est.

§. C C C X C I I I.

Omnes muscoli compositi sunt ex lacertis pluribus, facile separandis, quos undique cellulosa pinguis tela ambit & involvit, in qua vasa arteriosa & venosa sanguifera & lymphatica & nervi distribuuntur. Lacertis eo pluribus constat musculus, ceteris paribus, quo moles ejus major est. Ipsi porro lacerti nihil sunt nisi congeries fibrarum, juxta longitudinem sibi accumbentium, in quarum intervalla ubique cellulosa tela se insinuat, cum vasculis in ea decurrentibus. Et fibra singula denuo ex innumeris aliis minoribus

fibi similibus, simili ratione componitur, ut lacerati ex fibris majoribus collectis fiunt; & inter ipsas fibrillas hasce minutissimas, simili ratione cellulosa tela se demittit, singulam involvens. Finem esse aliquem hujus divisionis ratio dicitur, sed oculus, optimis etiam microscopiis armatus finem illum non assequitur, etsi quidam ultimas fibrillas se vidisse putarint. Tertiæ ordinis fibrillas adeo subtiles vidit Cl. Muys, ut molecula 46ies globulo sanguineo minor per eas trajici non posset. Omnes hæ fibrillæ longitudinem musculi sequuntur, plerumque parallelæ, subinde tamen in quibusdam musculis obliquæ, ad se mutuo inclinatæ, maxime ubi ex ampliore carne in graciliorem finem musculus terminatur. Omnes etiam cylindricam figuram affectant, quamdiu oculis patent, unde & de invisibilibus minimis idem per analogiam concludere licet. Qui ex nodulis & vesiculis minimis connexis fabrefactas scripserunt, eos aut hypothesis ad id impulit, aut decepti fuerunt rugis, in quas, agente imprimis musculo, fibrillæ contrahuntur, quasque etiam in laxo musculo hinc inde strictior intercedens cellulosa efficere potest. De COWPERO vix dubium est, quin deceptus fuerit, quando cellulosam fibrillarum fabricam esse, eamque a se mercurio repletam fuisse, persuasus erat. In fibrillas certe musculares nulla penetrat injectio anatomica; sed interstitia fibrillarum utique repleri possunt & minus cauto observatori imponere. Transversæ fibræ, quæ longitudinales connecterent & adducerent, aliquibus auctoribus descriptæ, reipsa nullæ sunt; sed aut rugæ fibrillarum, aut fila cellulosæ telæ deprehenduntur, quas pro transversis fibrillis alii descripserunt. Tunicas autem musculares ab hac lege excipere oportet, œsophagi, ventriculi, intestinorum &c. Deinde etsi quidem fibrillæ omnes longitudinem musculi sequi solent, non tamen per totam musculi longitudi-

nem excurrunt, sed post breve iter unius forte pollicis extenuata fibrilla aut dextrorsum aut sinistrorsum ad latus intorta inter sui similes evanescit, acuto fine & multa cellulosa tela firmato. An cavæ sint fibrillæ, an solidæ & imperviæ, per experimenta determinari non potest. Plus roboris expectari posset a solidis fibrillis; cavas tamen esse, analogia a nervis deducta suadet. Ex his ergo fibrillis, cellulosa tela connexis, fiunt fibræ compositæ musculares, ex fibris plurimis aggregatis fiunt fasciculi carnei, seu lacerti, ex lacertis demum consurgunt muscoli. Cellulosa tela hinc inde laxior discrimen facit musculorum & lacertorum; eadem in cellulis suis adipem asservat & cum non inter lacertos modo, sed etiam inter fibras interque fibrillas minutissimas sese insinuet, pinguedine sua, quam continet, omnes fibrillas molles, flexiles, ad motum aptas conservat. Nimis tamen aucta pinguedo fibrillas nimium emollit, easdem a mutuo contactu longius separat, sic vires musculorum minuit, præterquam quod pondus corporis augeat; & hæc ratio est, cur obesi homines adeo ad motum tardi & inepti sint ad validos labores perferendos. Neque hoc solum telæ cellulosæ officium est, ut fibras musculares pinguedine sua lubricet, flexilesque conservet, sed eadem etiam vasa & nervos ad musculum adducit, quæ omnia muscoli molem insigniter augment, a natura tamen musculari penitus differunt, neque quidquam habent cum illis fibris carneis commune.

Nunc præter dicta hæc, quæ perpetua & omnibus musculis communia sunt, alia quædam notare oportet, quæ quidem frequentia, sed non perpetua deprehenduntur, nec omnibus musculis communia. Plerique nempe muscoli sic formati sunt, ut media horum caro fibrosa & rubra crassior & magis torosa sit, extrema vero hic & illic magis gracilescant. Mediam eam tumidiorem muscoli carnem ventrem anatomici appellant,

extrema ab antiquis inepte denominata fuerunt; alterum enim musculi extremum superius, quod propius esset trunco corporis & secundum, quod nervos subire putarunt, *caput* musculi dixerunt, alterum extremum gracilius & in partem a trunco corporis remotiorem insertum & mobilius *caudam* nominaverunt. Nobis altera extremitas musculi, qua firmiori parti nectitur, principium, altera, qua mobiliori inseritur, finis appellatur. Sed non omnes musculi a firmis partibus oriuntur, neque omnes in ossa inseruntur, exemplo cordis, auricularum, sinuum, fibrarum muscularium vesicæ, uteri, intestinorum &c. Porro extrema musculorum plerumque ex alia substantia fabrefacta sunt, multo duriore, magis compacta, alba, splendens, tenacissima, quam tendinem musculi anatomici vocant, eaque mediante ossibus ille firmiter cohæret. Musculi tamen qui nullis ossibus nectuntur, etiam vero tendine carent, ut sphincteres labiorum, ani, vaginæ muliebris, musculus lingualis, fibræ ventriculi, intestinorum, uteri, vesicæ, imo & cordis musculosa fabrica tendine vero caret, nam annulus ille, ostii utriusque venosi & arteriosi, unde fibræ cordis principium sumunt, verius ex compacta cellulosa, quam ex tendinea substantia factus est, ut alibi monui. Hinc utique aliqua limitatione textus BOERHAAVII indiget, dum singulo musculo tendinem tribuit, quasi hæc pars musculi essentialis esset.

§. C C C X C I V.

Cum fibræ musculares in homine & plerisque animantibus passim rubeant, facile quis credere posset, eas esse vascula sanguifera; nec obscuri fuerunt auctores, quibus hæc sententia placuit. Verum accuratior indago longe aliud docet. Namque per microscopicas observationes id certo constat, fibras musculares vasculis sanguiferis

sive arteriosis, sive venosis minimis, multo minores esse, adeo ut ex calculo Cl. Muys molecula 46ies globulo sanguineo minor per eas trahi non posset; & illæ quidem nondum sunt ultimæ. Non ergo rubra vascula sunt fibrillæ motrices, nec iis inest rubedo, sed a vasculis rubris cellulosæ telæ, quæ fibras involvit, omnis ea musculorum rubedo pendet; iisque vasculis aqua tepida injecta elutis pallet musculus. Et naturaliter pallent fibræ musculares ventriculi, intestinorum, arteriarum; & infecta, sanguine carentia, veras habent motrices fibras. Sed nec minoris seriei vascula arteriosa vel venosa esse videntur. Nemo umquam fibras musculares vere injectit; nemo iis morbis affectas vidit, quibus partes aliæ vasculosæ afficiuntur; non inflammatio, non suppuratio in fibris motricibus locum habet, quæ tamen in omni parte vasculosa oriri possunt. Sphacelo musculos consumi, mirum non est, cum is morbus vera putredo partium sit humani corporis & putredo nulli substantiæ animalis parcat. Sed omnis fibra muscularis irritabilis est, eaque proprietate ab omnibus aliis partibus vasculosis, ab omnibus visceribus, ab ipsis etiam nervis distinguitur. Si quæ alia pars corporis irritabilis est, ut intestina, ventriculus, uterus, &c. in tantum ejusmodi partibus irritabilitas data est, in quantum fibris muscularibus præditæ sunt. Adhæc arteriolas ubique venulasque vides mutuis anastomosibus inter se jungi & quo magis diminuuntur, eo pluribus inter se ramulis coire, inosculari & denique in teneritudinem & pulposam fere molliem evanescere; contra vero fibrillæ musculares, sibi quidem vicinissimæ, sed intercedente cellulosa tela manifeste disjunctæ, nullis inter se anastomosibus concurrunt, non in ramulos dividuntur, non in trunculos coalescunt, nihil habent, arteriolis aut venulis simile, etiam tunc, cum inter se rete formant mus-

culosum, ut in membranis musculosis viscerum; & eadem fibrillæ in tanta subtilitate, in tanta minutie, robur notabile & firmitatem & tenacem elasticam naturam retinent, dum arteriolæ venulæque minoris seriei fere tenuitati suæ respondentem habent molliem ac debilitatem. Sed & infecta arteriis venulisque carentia fibris tamen muscularibus prædita dantur. Si hæc non sufficiunt, pone fibrillas hæc esse arteriosa aut venosa vascula & rationem redde, cur unicum musculus solitarium movere possis, licet eadem arteria ramis suis pluribus musculis simul prospiciat & ex trunco suo in omnes ramos liquidum æquabiliter urgeat, quod perinde etiam de vena, sed inversa ratione, obtinet. Cur non omnes illi muscoli, qui ab eadem arteria, ab eadem vena, ramos habent, simul moventur? Non ad animam recurrere potes, quæ in arterias imperium non habet, neque in circulationem humorum arbitrio suo dominatur. Ergo victus fateare necesse est, fibrillas hæc non esse arteriosa, nec venosa vasa, nec lymphatica, verum alterius & peculiaris naturæ organa. — *An vesicularia? an uno tractu facta?* responsio ex prædictis patet. Vesiculas hypotheticas excogitavit imaginatio; autopsia severior repudiat; uno tractu factas ultimas fibrillas esse, non ideo tamen certo dici potest, cum intima fabrica nos lateat; sed analogia a majoribus fibris ad minimas deducta id suadet.

§. C C C X C V.

Nervis nullus musculus caret, ne in insectis quidem, quibus tamen venæ & arteriæ nullæ sunt. Et multo certe major nervorum copia ad musculos, quam ad viscera distribuitur, ut unus in manu pollex plus virium nervearum habeat, quam hepares toties vastius, observante Cel. HALLERO. Grandes etiam plerorumque musculorum nervi

sunt & passim arterias comitantur, earumque divisiones sequuntur, multa cellulosa tela obvoluti & firmi, paucis exceptis, qui molliores deprehenduntur, neque vaginas adeo tenaces habent, ut de cardiacis dictum est. Non longe a principio ad fere medium usque musculus & subinde ultra excurrunt, tum deposito involucro celluloso ramulis mollioribus, arteriarum fociis, ipsam musculi carnem subeunt, ac subito ex oculis ita evanescunt, ut ulterius eos nec scalpello, nec aliis artificiis prosequi possis; unde etiam, qua ratione fibras musculares subeant, quomodo per eas aut distribuantur, aut quomodo finiantur, dici non potest. Cel. BOERHAAVIUS credidit, fibrillas musculares minimas esse ultimam expansionem fibrillarum nervearum; singulam nempe fibrillam nerveam simplicissimam in musculis ultimo suo fine expandi in fibrillam simplicissimam muscularem cylindricam, cavam, in quam liquidum nerveum influat, quæque fibrilla majore liquidi nervei influxu distendatur in vesiculam, sic musculi longitudinem necessario abbreviari & inde contractionem fibrarum sequi, ut simul turgeat contractus musculus. Rationes cur hanc opinionem adoptarit, hæ sunt: *primo*: magna est analogia inter nervos & musculos & major quam inter nervos & arterias, aut inter hæc & musculos. Nam ut nerveus funiculus ex innumerabilibus, sibi mutuo accumbentibus & cellulosa tela tamen divisis fibrillis minimis componitur, ita & musculus ex innumerabilibus simplicissimis fibrillis, cellulosa tela intercedente obvolutis constat. Simplicitas fabricæ eadem in utroque est. *Secundo*: nervi ad musculos magni ac numerosi abeunt, pluresque multa ratione quam ad viscera; & nervo ligato vel discisso, motus musculi illico perit, vinculo nervi relaxato, motus musculo redditur; nervo irritato, musculus convellitur &c. ergo manifesta communicatio inter nervos & musculos & continuïtas sit oportet. Ve-

rum nervos fistulas esse cavas cylindricas, humorem subtilissimum vehentes, etsi cavitas nulla sub sensus cadat, ratiocinio tamen satis firmo evincitur, quod alibi jam dictum est; ergo & de fibrillis muscularibus idem licebit assumere, etsi cavitas fibrillarum sub sensus non cadat. Erunt adeo fibrillæ nerveæ continuæ fibrillis muscularibus & liquidum subtilissimum ex illis in has effundetur. *Tertio* : in aliis corporis partibus, maxime vero in organis sensoriiis omnibus, nervi ultimis suis finibus expanduntur in papillas, aut in pulpam molliissimam, aut speciem membranulæ subtilissimæ, ut horum fines visibiles sint. Verum ad musculos delati nervi, mox ita ex oculis evanescunt, ut fines horum prosequi nullatenus possit. Unde probabilissimum est, fines ultimos nervorum hic in ipsas fibrillas musculares expandi, maxime cum & singula fibrilla muscularis sensilis sit & vel hæc ipsa proprietate nerveam indolem prodat. Contra hanc Cel. Viri opinionem, contraque argumenta, ad ejus opinionis probationem allata, varia opponi possunt, nec levia rationum momenta. Atque *primo* exaggeratum id esse, quod BOERHAAVIUS ait, ita per omne musculi corpus distribui nervos, *ut nullum assignari queat punctum, in quo non inveniatur pars horum.* Nam id certe anatome non demonstrat, sed ex sensilitate fibrillarum muscularium ratiocinio solum concludi potest. *Secundo* : nimiam esse fibrarum musculi molem, si cum nervis comparetur & si etiam vasa musculi & cellulosa telam demas, esse tamen molem musculi majorem, quam possis a nervis accedentibus repetere. Atque hoc HALLERI argumentum est. *Tertio* : etsi magna sit analogia inter nervos & fibrillas musculares, tamen etiam differentiam essentialem intercedere; siquidem fibra nervea molliissima, fibra muscularis firma, tenax, elastica sit; fibra nervea non irritabilis, non contractilis, fibra muscularis omnis irritabilis sit & contrahatur.

sua sponte, dum irritatur. Et hoc præcipue movit Cl. KAUV, ut fibras musculares ultimas nervorum expansiones esse negaret. Si recte omnia dispicio, videtur quæstio fere ad litem de nomine extendi. Nam in eo quidem satis inter omnes physiologos convenit, nervorum fibrillas in musculares desinere, quocumque demum id modo fiat; sed ipsius nerveæ substantiæ expansionem fibrillas musculares non esse, evidenter docet manifesta substantiæ muscularis a nervea diversitas. Hinc si dixeris, fibrillas nerveas ultimis suis finibus in fibrillas musculares quocumque demum modo desinere, ita tamen, ut hæ ab illis fabrica differant, omnis protinus lis cessabit.

§. CCCXCVI. §. CCCXCVII.

Singulus musculus arteriosa vasa accipit & plures plerumque truncos, si major & longior est musculus. Illi in laxioribus lacertorum interval-
lis per cellulosa telam excurrunt, non sine serpentinis quidem flexibus, sed recto tamen in universum itinere & in hoc decursu ramos spargunt ad interstitia minorum lacertorum abeuntes, qui denuo similes minores edunt in interstitia fibrarum sese insinuant, donec circa minimas fibras ultimi ramuli evanescant. Hæ arteriolæ frequentibus inter se anastomosibus junguntur. Si materie ceracea injectum musculum videas, totum fere arteriis constare crederes. Minores arteriolæ plexus inter se reticulatos formant & in cellulosa telam oleum, seu liquidam pinguedinem deponunt, quæ fibras musculares lubricat. Facilem esse viam ex arteriis in cellulosa telam musculi, docent injectiones aquæ, aëris, mercurii vivi. Ita aqua per arterias injecta cellulosa tela repletur & quasi hydropica turgescit; ita aëre inflato tumet emphysematica, ut moles musculi insigniter augeatur.

Ceterum an ramuli arteriosi ultimi in ipsas fibrillas musculares desinant, nec ne, incertum est & dubitanter solum conjecturam proponit BOERHAAVIUS.

§. C C C X C V I I I.

Venæ musculorum arteriis suis sociæ plerumque incedunt, æque profundæ, aliæ ab arteriis magis remotæ & subcutaneæ supra musculos feruntur; & hæ & illæ ramulis suis inter se frequenter junctæ. Cordis venis exceptis, omnes aliorum musculorum venæ valvulosæ sunt, cujus mechanismi rationem alibi dixi. Denique & vasa lymphatica, ut a visceribus, ita a musculis oriuntur & lympham revehant a nutritione residuam.

§. C C C X C I X.

Tendinem vocamus partem musculi magis compactam, albicantem, splendidam, fibris carneis continuam, iis tamen multo tenaciorem, in unum plerumque teretem funiculum collectam; si vero in ampliores & planam superficiem expandatur, *aponeurosin* appellamus, vocabulo antiquitus usitato. Tendinis substantia perinde fit ex fibris oblongis, sed multo tenacioribus, magisque compactis, quam carneæ sint; interque fibras tendineas perinde cellulosa tela, ut inter carneas, se insinuat, sed multo strictior breviorque & firmior & macilentia, sine adipe; hinc tendo, etsi ex tot fibris, quot musculus constitit, componatur, ventre tamen musculi carneo gracilior est, quoniam interstitia fibrarum carnearum laxiora, tendinearum contra brevissima sunt, ut difficulter a mutuo contactu distrahantur. Et inde etiam tanta tendinum firmitas, tantumque robur est, ut validissima pondera sine ruptura sustineant. Porro ut non fibrillæ solum carneæ seorsim, sed totus etiam musculi venter cellulosa tela cingitur, ita

etiam superficies tendinis membrana cingitur tenera, cellulosa naturæ, quæ cum interiore fibrarum tendinearum cellulosa continuatur. Hanc *vaginam* tendinis appellant. Habet denique & tendo vascula arteriosa & venosa per vaginam exteriorem distributa, imo & in cellulosa, in fibrarum interstitia, vascula descendunt, non manifesta tamen, nisi per felicissimas injectiones anatomicas. Probabile est, fibras carneas multa distractione & compactione in tendineas paulatim mutari; nam in foetu tendines paucissimi sunt, neque splendidi adeo & compacti, neque multum a pallida carne diversi; augetur vero & moles tendinum & firmitas crescente ætate, ut in senio maxima sit. Ceterum vero tendines agente musculo inertes sunt, idque officium in animali corpore habent, quod funes in machinis mechanicis. Nam tendo irritabilis non est, neque contrahitur, sed unice a fibris carneis contractis trahitur, partemque annexam trahit. Neque sensibilis est, per numerosa experimenta & in vivis animalibus & in hominibus capta. In paucis contrariis experimentis, observatoribus sufficiens cautela defuit, ut vel carnem musculi sæpe sub tendine superficiali latentem vulnerarent, vel nervos supra tendinem excurrentes, aut illi vicinos læderent, unde dolor nasci potuerit, non ipsi adscribendus tendini, ad cuius substantiam nulli nervi penetrant. Apparet adeo ex hisce, tendinis naturam diversam esse ab ea carnis musculosa; neque tamen ideo repugnat, fibras carneas per multum laborem & distractionem in tendineas degenerare. Necessitas autem tendinum hæc erat, ut validissime ossibus necerentur muscoli, qui nexus per carnem musculosa multo laxior & debilior fuisset. In foetu tendines quidem solo periosteo necuntur, ut detracto periosteo una & tendines musculosque ab ossibus solvere possis; crescente ætate periosteum undique firmiter accrescit,

crefcit, tumque etiam tendines validiffime ad offa adhærefcunt, ut nulla diftractione inde feparari poffint. Imo manifeſte videmus, offa ubique, qua tendines infertos recipiunt, afperam habere fuperficiem, qua adhæſio tendinis magis firmatur & in tubercula producitur, quæ ipfa a valida & toties repetita tendinum tractione oriri videntur.

§. C C C C.

Rubor non pertinet ad mufculi effentiam. Ventricle, inteſtinorum agiliffimæ fibræ albæ funt. Albæ funt fibræ motrices inſectorum. Nec in iis etiam mufculis, qui homini & animantibus rubent plurimi, ipſis fibris mufcularibus ruborem inefſe credibile eſt, cum multoties vafculis rubris minores ſint fibræ mufculares. Omnis ergo rubedo mufculorum a cruore eſt & a rubris vafculis, quæ per cellulofam telam fibris circumfunduntur. Hinc elutis per aquam vafculis ſanguineis mufculus pallet. Etiam ſine hoc artificio carnes gallinaceas & vitulinas albas conſpicias.

Moles. Si conſideres numerum arteriarum & venarum mufculi, ſi telam cellulofam, totos lacertos ambientem, tum eam, quæ inter minimarum fibrillarum interſtitia ſe inſinuat & ſingulas involvit, expendas, ſi computes molem pinguedinis in eadem cellulofa aſſervatæ, ſi omnia hæc cum minutie fibrillarum mufcularium ſtupenda conſeras, facile videbis, id, quod in mufculo vere mufculoſum eſt, parvam omnino mufculi molem efficere, maximum vero voluminis augmentum a dictis partibus accedere. Hinc mirum non eſt, in ſenio & macie & in atrophia, conſumpta pinguedine, mufculos in exiguam molem redigi, mirum non eſt, idem fieri per *coſtionem diuturnam*, qua itidem omnis pinguedo & omnis fuccus ex carnibus extrahitur, ut vafa ſolum & fibræ cum inani cellulofa ſuperſint, multo minus

nunc volumen occupantia, quæ etiam in culinis & mensis nota observatio est.

§. C C C C I.

Exposita jam fabrica musculari, quantum per anatomen de illa constat, superest nunc, ut phænomena perpendamus, quæ observantur, dum musculi, vel horum partes, tendines, nervi, arteriæ, venæ, diversis modis afficiuntur.

Primo : fibræ fasciculi &c. Omni musculo inest vis elastica, quam cum tendinea substantia, cumque aliis plurimis corporis nostri partibus, communem habet. Potest enim musculus elongari, potest distrahi, tendi ad certos gradus sine ruptura, & cessante distractione se restituit. Discissus musculus hinc & inde se retrahit, ut amplo hiatu partes ejus nunc a se distent. Idque etiam in cadavere pluribus post mortem diebus contingit; sed nihil peculiare hac in re musculus habet, nam & arteria dissecta se retrahit & cutis incisa hiat ampliore vulnere, quam quod instrumento vulneranti respondeat. Neque multi momenti vis hæc est, certe non tanti, ut inde actionem musculi repetere possis, cum & in cadavere subsistat & aliis partibus non musculosis perinde insit.

Hinc semper sunt in statu sibi violento. Omnes fere musculi habent antagonistas, qui directione contraria & oppositis viribus agunt. Ita musculis, artum flectentibus, adversantur musculi extensores. Necessarium erat, antagonistas musculos iidem ossibus necti, ut secundum varias & oppositas directiones moveri possint, alioquin artus perpetuo flexi manerent, nisi oppositi essent musculi, qui hos extenderent, & vicissim extenti perpetuo manerent artus, nullis datis flexoribus. Cum itaque musculi oppositi sint & singulo mus-

culo insit vis elastica, qua se in brevius spatium contrahit discissus, sequitur, musculos antagonistas, etiam dum non videntur agere, contrario tamen nixu & opposita directione sibi mutuo obluſtari, atque adeo esse continuo tenſos, etiam dum quiescunt, esse adeo hoc sensu in statu sibi violento, *plus in vivo*, minus in mortuo. Res hæc verissima est; sed non a sola elasticitate pendet, ut BOERHAAVIUS credidit.

Præter hanc vim, quæ recte vis *mortua* dici potest, alia musculis omnibus vis vitalis inest, peculiaris, de qua BOERHAAVIUS nihil hic meminit, quæ tamen longe majorem attentionem meretur, quam vis elastica. Hæc est *irritabilitas* ad stimulum manifesta, in quæ præcipuum fundamentum actionis musculosæ latet. Omnis nimirum musculus, in vivo animale denudatus, si irritatur stimulo quodam, vel acri chemico liquore, vel acicula aut scalpelli apice, vel electrica scintilla, vel aliis denique irritamentis, contrahit sese, atque sub ea contractione fibræ ejus manifeste corrugantur, inque plicas undulatas quasi convolvuntur; has rugas non solum in majoribus fibris, sed & in minimis, quas oculo nudo assequi potes, fibrillis, evidenter conspicias. Sic necessario abbreviantur fibræ, totaque musculi longitudo diminuitur, eo magis, quo irritamentum fuerit validius, quo major fibrillarum corrugatio inducta fuerit musculo. Simul vero ita caro musculi crassescit & aliquanto magis tumescit; sed, quod probe notari debet, numquam insigne est augmentum crassitie, quod contracto musculo supervenit, neque illud incrementum umquam diminutæ longitudini respondet, siquidem etiam illi musculi, qui longissimi sunt, quique ad insignem brevitatem contrahuntur, non magnum crassitie incrementum capiunt. Unde ex hoc phænomeno, ad quod physiologi priores non satis animum adverterunt,

omnia auctorum systemata corruunt, qui actionem musculi ab interna expansione & turgescencia fibrillarum repetierunt; siquidem ex hac sententia Clar. Virorum, quæ & BOERHAAVII fuit, in tantum fibrillæ musculi abbreviarentur, in quantum illarum amplitudo secundum latera augeretur, adeoque & tantum esset in contrahente sese musculo crassitie incrementum, quanta est diminutio longitudinis; quod, ut videtis, ab ipsa natura per hoc phænomenon refellitur. Hoc per transennam hic moneo; nunc redeo ad irritabilitatem musculi. Patet ergo ex dictis, non soli cordi & intestinis, de quibus alias egimus, hanc vim propriam esse, sed etiam aliis musculis intrinsecam reperiri, nullo excepto. Neque aliæ partes corporis animalis, præter fibram muscularem, vere irritabiles deprehensæ sunt, adeo, ut, quidquid musculare est, id & irritabile sit & vice versa, quidquid irritabile deprehendis, id ipsum potentia musculari præditum esse, inferre possis, modo non laxiore sensu, quam decet, irritabilitatis vocabulum extendas. Hoc solum tenendum est, quod alias jam dixi, non omnibus musculis eundem gradum irritabilitatis inhærere, sed & in aliis vim hanc efficacius & pertinacius dominari, in aliis minus vividam esse & citius elanguescere & quidem præ omnibus aliis cor & intestina excellere, inde diaphragma sequi, tum reliquos deinde musculos. Porro quod de corde dictum est, id etiam de omnibus aliis musculis cum aliqua solum restrictione teneri debet. Nam ut in corde, ita & in aliis, post mortem adhuc superest irritabilitas & irritante stimulo manifesta sit, minus vivida tamen, minusque diuturna, quam in corde. Imo vero sunt auctores, qui satis diu post mortem, cum aquam tepidam in arterias musculi injecissent, hunc in manifestam contractionem cieri & artum musculo nexum adduci viderunt, quod distensionem cellulo-

sæ telæ potissimum adscripserunt, a qua tantas vi-
 res non facile expectes; sed forsitan omnino in
 superstitie irritabilitate musculi ratio phænomeni
 latebat. Si modo fides habenda est auctoribus,
 quando ipsos musculos inde contractos se vidisse
 scribunt. Denique si nervi musculi rescindantur,
 quo facto is illico sua mobilitate privatur, jamque
 æternum quieturus est, non ideo tamen rescisso
 nervo irritabilitas musculi sublata est, neque om-
 nis illi dempta motus potestas. Nam si talis mus-
 culus jam paralyticus irritetur, mox se contra-
 het & fibras suas adducet & palpitabit, idque
 spectaculum repetito stimulo tamdiu iterare po-
 teris, quamdiu irritabilitas musculi superest. In fri-
 gidis animantibus id plane manifestum & in vul-
 gus notum; piscium discissi in frustra musculi sæ-
 pe per horam alterne relaxantur & contrahun-
 tur. Sed & hoc mirum, quod musculus resecto
 nervo jam paralyticus illico in contractionem
 cieatur, si nervi resecti extremum scalpello, vel
 alio modo irritetur; licet ipse nervus irritabilis
 haud sit, licet in nervo nullam mutationem sen-
 sibilem contingere advertas, nervo tamen velli-
 cato statim musculus convellitur, in quo nullam
 amplius motus facultatem superesse, suspicatus
 fuisses. Ita nervo diaphragmatico digitis levissi-
 me deorsum presso jam quiescens diaphragma in
 motum concitatum Clar. Viri viderunt; ita in
 aliis musculis alii. Ita præscissa medulla spinali,
 dum animal quasi fulmine tactum concidit & om-
 nes infra occiput musculi corporis in momento
 resolvuntur, si stylo ferreo vel cultro pars discissa
 medullæ inferior, quæ colli vertebrae comprehen-
 ditur, irritetur, mox omnes totius corporis ex-
 cepto capite musculi contrahuntur & horrendis
 convulsionibus agitantur; & si idem fiat in occipitali
 medulla, omnes musculi capitis perinde afficiun-
 tur. In bobus jam jugulatis a dissecta spinali me-
 dulla totum corpus convelli vidit. Cel. SCHWENC-

KE. Nolo plura ejusmodi exempla cumulare. Satis, opinor, ex hisce patet, esse in unoquoque musculo præter vim elasticam, quam cum aliis partibus communem habet, vim aliam penitus distinctam, sive propriam muscolari fabricæ & intrinsecam, ut HALLERUS contendit, sive a nervis unice pendentem, ut nuper Cl. CRANTZIUS & ex eo discipuli WINTERL, TRABUCCHI, hanc esse irritabilitatem, quæ sua sponte nihil moveat, nec, nisi ad stimulum applicatum operetur; hanc & post mortem aliquo tempore superstitem esse & stimulo manifestari; stimulum autem sæpe exiguum sufficere & motum tamen ab exiguo stimulo magnum nasci; adeoque hanc vim omnibus viribus cognitæ mechanicis præcellere, & præcipuum esse fundamentum motus muscularis, licet hætenus a plerisque physiologis neglectum, licet etiam a BOERHAAVIO prætermisum, qui in corde tantummodo irritabilem naturam mirabatur. Et tamen hanc musculorum irritabilitatem jam veteribus notam fuisse, vel ex VIRGILIO disci potest, qui felicissimus naturæ imitator, phænomenon hoc pulcherrime expressit. Ita *L. I. v. 215.*

*Tergora diripiunt costis & viscera nudant;
Pars in frustra secant, verubusque trementia figunt.*

Et alibi *L. III. v. 626.* de Polyphema antropophago :

— *Vidi, atro, cum membra fluentia tabo
Manderet & tepidi tremerent sub dentibus artus.*

Et denique de manu homini amputata, adhuc palpitante. *L. X. v. 395.*

*Te decisa suum, Laride, dextera quærit,
Semianimesque micant digiti, ferrumque retrahant.*

Secundo : Tertio : Cerebro & cerebello compresso muscoli totius corporis paralytici fiunt. Et de

voluntariis quidem musculis res certa est. BOERHAAVIUS in ea opinione fuit, cerebri medullam sensibus & motibus voluntariis per nervos prospicere, cerebellum autem organis vitalibus præesse. Hinc cerebro fortiter compresso, contuso, obstructo, suppurato, exsecto, sensus omnes externos & internos perire & omnes musculos voluntarios resolvi; cerebello similiter affecto actionem musculorum vitalium cessare, quæ cerebro compresso adhuc permanet. Contra hanc sententiam jam alibi dixi, eam defendi non posse. Certum quippe est, sæpe solo cerebro læso subitam mortem sequi intacto cerebello & vicissim casus esse, ubi læso cerebello vita adhuc notabili tempore subsistat; imo & vulnera cerebelli curata apud auctores legi; & collectis observationibus id unum posse deduci, cerebelli læsiones ceteris paribus periculosiores esse, non vero ideo deduci posse, nervos cerebelli unice vitalibus organis impendi. Nam par quintum nervorum & quartum & septimi paris portio dura, manifeste a medulla cerebelli oriuntur & tamen ad sensus & motus voluntarios manifeste impenduntur. Sed & a cerebelli læsionibus musculorum voluntariorum paralysis observata legitur, adhuc superstite aliquamdiu vitalium functionum exercitio. In juvene, qui decimo quarto die morbi acuti perierat, inveniebatur abscessus magnus in dextro latere cerebelli, qui duas tertias partes substantiæ cerebelli consumpserat; pulsus tamen & respiratio satis bene se habebant morbi tempore, sed paralysis dextri lateris observabatur ante mortem; VAN SWIETEN *Commentar. Tom. III. §. 1009. pag. 254. 255.* Nunc recte contrarium ex BOERHAAVII theoria expectes. Iterum in alio homine resolutio crurum, vita per plures dies superstite, pulsu non febrili, respiratione naturali, aderat, cum delirio & lucidis quandoque mentis intervallis. Ex improvise animam egit. Secatur cada-

ver; & en! sinister cerebelli lobus pene totus scirrhusus reperitur. MORGAGNI *de sed. & caus. Epist.* 62. no. 15. Plura observata ex dissectis cadaveribus collegit Cel. SENAC, quæ docent, cerebello soli non posse vitalium motuum originem adscribi, consentiente etiam Ill. VAN SWIETEN. Canis dissecto cerebello per 20. horas supervixit in experimentis Cl. CHIRAC. A medulla cerebri cultro lacerata convulsiones horrendas in toto corpore canis vidit Cel. KAUV & post irritationem paralysem omnium musculorum, corde & respirationis musculis exceptis. Sed easdem convulsiones omnium musculorum, eandem paralysem idem Clar. Vir in alio cane observavit, cui simili ratione cerebellum læsit, ut in ejus medulla cultrum rotaret; permanente interim fatis diu motu cordis. Nunc vero neque convulsionem neque paralysem voluntariorum musculorum a cerebelli medulla læsa expectes, si id vitalibus unice famulatur, ut BOERHAAVIUS credidit. Ergo jam meliora edocti sic dicamus, cerebro, vel cerebello, vel utroque, compresso, contuso, obstructo, destructo &c. omnes totius corporis musculos resolvi, actione sua penitus privari, perire motum & sensum in toto corpore; vitales vero cordis motus non semper illico perire, nec intestinalium peristalticum motum, cujus phænomeni ratio jam alibi dicta est. Iterum, medulla oblongata, occipitali, similiter affecta, idem contingere & medulla spinali rescissa, vel compressa, musculos omnes infra locum affectum paralyticos fieri, porro irritata medulla vel cerebri, vel cerebelli, vel oblongata, musculos jam resolutos, jam paralyticos denuo convelli & idem fieri irritata medulla spinali, per experimenta Cl. KAUV & aliorum. Unde hoc corollarium fluit: primo causam quidem motus omnibus musculis a medulla cerebri, cerebelli, oblongata & spinali advenire; sed secundo hanc causam solam tantum

motum producere, quamdiu muscoli adhuc irritabiles sunt; extincta enim semel horum irritabilitate, nullus motus reproducitur, siue medullam irrites, siue ipsos musculos.

Quarto : nervo resecto si unus modo datus est musculo, si vero plures, iis omnibus præscissis, continuo musculus flaccidus resolvitur & motu privatur. Idem fit nervo compresso vel ligato; soluto autem vinculo redit musculo pristina mobilitas. Unde denuo corollarium sponte fluit. Causam motricem, quæ ab encephalo & spinali medulla, musculis advenit, iisdem per nervos advenire. Nunc vero nervo ligato, rescisso, compresso, paralyticus musculus adhuc in contractionem cieri potest, si vel ipse irritetur, vel nervi portio illi cohærens; donec evanuerit musculi irritabilitas. In corde & intestinis, ligatis, rescissis nervis non illico sequitur quies & paralyxis, ob rationes dudum dictas; in aliis musculis statim sequitur.

Quinto : *medulla spinali*. Paulo antea dixi. Experimenta in animalibus facta id evidenter demonstrant & morbi in hominibus. Fractis per lapsum gravem vertebri & compressa spinali medulla, quales casus visi sunt, continuo sensus & motus perit in partibus infra eum locum sitis, permanet in superioribus. Ratio phænomeni non est obscura.

Sexto : *arteria*. Ligata arteria, quæ ad musculos pergit & sine anastomosibus, solitarius truncus est, motus quidem musculorum, ab hujus arteriæ ramis irrigatorum, etiam perit, sed multo tardius, quam ligato nervo. Nam dum ligato vel resecto nervo motus illico perit, ligata arteria paulatim solum elanguescit, ut etiam dimidio circiter horæ quadrante mobilitatem suam conferrent muscoli. Ita BOHNIUS in suis experimentis

invenit. Et si quidem ab eo tempore motus periit, is relaxato vinculo non repente, sed eadem fere, qua cessaverat mora & eodem intervallo, redit, eodem teste. Si aorta supra iliacas ligetur, paulatim posteriora canis crura paralytica fiunt & relaxato vinculo paulatim motus in musculos redit. Post duo minuta horæ periit motus in experimento Cel. KAUV, citius adeo, quam in BOHNII; sed ligato nervo in momento motus perit. Rescissa arteria musculus paralyticum fieri, sed post aliquod demum intervallum, jam BARTHO-LINUS monuit. Observavit præterea laudatus Cel. KAUV, musculos ob interceptam arteriam sanguine defraudatos, quasi mortuos, brevi frigere in animale vivente, quæ pulchra observatio est. Inde discimus, non quidem immediatam motus muscularis causam in arteriis quærendam esse, sed esse tamen sanguinis arteriosi influxum, conditionem ad motum musculi & ad ejus vitalitatem requisitam. Nec solum motus, sed & sensus musculi perit arteria ligata, ita ut ferro & igne vexatis musculis nulla doloris signa edat animal KAUV *imp. fac.* pag. 226. Etiam ligata vena solitaria, a musculis reduce (dummodo aliæ anastomoses non sint) motus perit, sed tardius quam ligata arteria. Ita vena cava supra iliacas ligata paralyssis crurum canis multo tardius supervenerat, quam aorta ligata; sed tuebant crura & sanguine in cellulosa telam infarcto pessima necrosis brevi aderat. *Idem lib. cit.* pag. 228. §. 293.

Septimo : musculi agentis tendo vix ad sensum mutatur. Neque enim irritabilis tendo est, neque ipse contrahitur agente musculo, sed ad instar funis ductum trahentis carnis musculosæ sequitur, pondusque non sua sponte trahit. Non eo tamen rigore hæc accipienda sunt, ut nullam tendini mutationem agente musculo induci statuatur; nam, etsi nihil ipse agat, tamen a validiore nixu mus-

culi, aut a majore ponderis resistantia, dubium non est, quin gracilescat & aliquantulum elongetur tendo, etsi tenacissimus; cum etiam validissimum in toto corpore *tendinem Achillis* ab impetuoso saltu ruptum fuisse, non una observatione confitet.

Caro accurtatur, durescit, pallet, tumet &c. Dixi jam contractilem vim proprie fibris carneis inesse; & agente musculo omnes ejus fibras carneas accurtari, atque in rugas, quasi undulatas, convolvi; sic crassescere aliquantulum lacertos, sed numquam augmentum crassitie proportionale esse diminutæ longitudini. Duriorem simul carnem musculi fieri, pariter in phænomenis est; denique accurtata carne extrema musculi utrimque versus medium adduci, si utrumque extremum satis mobile sit; si vero alterum tendineum extremum multo fixius fuerit, id adduci, quod offi mobiliori inseritur. Hanc contractionem multo fortiolem esse, quam a vi insita musculi exspectare possis, etiam jam dictum est. Hinc superadditam esse, sponte sequitur. Atque de his inter omnes convenit. Sed scripserat BOERHAAVIUS agentem musculum *pallere*, scripserunt alii post illum physiologi. Hoc experientia refellit; nam in tot experimentis Cl. HALLERI, in tot aliorum tentaminibus, quæ in diversis vivorum animalium musculis instituta sunt, numquam palluit agens musculus, sed perinde ruber contractus & relaxatus visus est. Imo vero Cel. HAMBERGERUS etiam magis in actione, quam inertiae tempore musculum rubere contendit. Id hodie per omnes certum est, non pallere agentem musculum. Sed viderant cor in frigidis animantibus contractum pallere, hoc phænomenon, ut alibi dixi, ad cor humanum & aliorum animantium transfulerunt, de ulterioribus experimentis non solliciti; & cum cor musculum esse novissent, mox per licentiam

plusquam poëticam omnes musculos agentes pal-
lere scripserunt. Et confirmavit errorem præcon-
cepta opinio, quod agente musculo fibrillas car-
neas intrinsecus expandi & tumefieri, atque ita
ab his expansis vasa musculi sanguinea compri-
mi, sanguinem expelli, crediderunt, expulso ve-
ro sanguine necessario pallorem rubori succedere.
Sed nostra ætate, postquam desimus a verbis
præceptorum pendere, postquam in singula quæ-
que speciatim indagari cœptum est, etiam iste
error cum multis aliis sublatus est.

Octavo : musculi non agentis &c. Num muscu-
lus sponte sua se restituat, dum causa motrix in
eum agere cessat, num potius vi antagonistæ re-
stituatur, ut BOERHAAVIUS hic loci scribit, alio
loco examinabimus : nunc solum de phænome-
nis sermo est. Dum ergo musculus ex contractio-
ne in pristinum inertię statum redit, tendo ad
sensum idem manet, manet idem fere color ru-
ber musculi; fibræ autem carneæ antea accurtæ
& in rugas convolutæ, nunc se ipsis longiores
fiunt & evanescentibus rugis in pristinam men-
suram redeunt; simul & durities carnis contractæ
nunc emollitur, prout a contractione magis re-
mittit.

Nono : uno antagonista &c. Omnes fere muscu-
los, vitalibus & naturalibus exceptis, antagonis-
tas habere dictum est, qui mutuo sibi obluētan-
tur. Si jam antagonistæ musculi æquis utrimque
viribus agant sic, ut neuter horum prævaleat,
pars, quam trahunt, immobilis firmatur, nec
ullus sequitur motus in alterutram partem, quam-
diu hic status durat, licet maximos utrimque
conatus musculi exserant; nimirum, quia cona-
tus hi, licet validissimi, sibi ex adverbo æquili-
brantur. Id in tetano manifestum est; possumus
vero etiam per voluntatem id ipsum efficere.
Contra vero si alter antagonistarum agat, altero

quieto, sequitur motus, aut flexio articuli in eam partem, in quam agens musculus se retrahit. Pone, omnes flexores musculos alicujus artus fieri paralyticos; statim extendetur ille artus & perpetuo servabitur extentus; pone contrarium & perpetuo flexus retinebitur. Idem fit rescissis musculis antagonists ex una parte, ex altera relictis. Opistotonus & emprostotonus ex convulsione natus etiam exemplo est. Si neuter antagonistarum agat, pars mobilis cui nectuntur, actu non movetur, sed ad omnem motum apta & indifferens est, si causa movens alterutri antagonistarum applicata fuerit. Notandum tamen est, musculos flexores naturaliter extensoribus aliquantum prevalere; hinc in somno, ubi voluntarii musculi omnes quiescunt, solamque vim insitam retinent, articuli potissimum flexi sunt, non per voluntatem animæ, sed musculorum flectentium valore etiam in inertia prævalente. Et idem in paralyti observare licet, universum corporis truncum occupante.

Decimo : in tota carne simul &c. Musculus est aggregatum innumerabilium fibrarum carnearum; illæ fibræ omnes contrahuntur eodem tempore simul & simul relaxantur; atque adeo actio musculi consistit in contractione fibrillarum omnium minimarum, ex quibus totus musculus componitur. Fiunt autem mutationes hæ in minimo tempusculo & incredibili celeritate; quia inter voluntatem movendi e. g. brachium & inter ipsum brachii motum nullum sensibile tempusculum intercedit.

Undecimo : injecta tepida &c. Hæc COWPERI & aliorum quorundam observatio est, nempe musculos intumuisse & contractionem eorum motumque excitatum fuisse, dum aqua tepida per arterias injiceretur. Num ab irritabilitate musculorum hoc phænomenon pendeat, num a vi aquæ

in cellulosa musculorum telam effusæ, actione mechanica producat, difficile dictu est. Postremum Cel. HALLERUS tuetur, sed infirmis argumentis (*comment. ad prælect. BOERHAAV. §. CCCCI. not. 24.*) quæ non repetiit in novo opere physiologico, in quo & ipsum phænomenon sicco pede transivit. Quodsi vero etiam irritabilitatis superstitis effectus esset, non ideo sanguinis arteriosi in musculum influxus pro causa motus musculorum assumi posset, ut infra ostendam.

Duodecimo : moles auctior potius &c. Hoc ex hypothesi scriptum est, licet addatur, in omni experimento ita videri. Sed experimenta directa nulla sunt. Indirectis vero experimentis aut obscuris, aliqui musculos agentes mole sua augeri, alii non augeri, alii etiam volumine minui, contenderunt. Sunt ergo experimenta experimentis opposita, sed ejusmodi omnia, ut nihil horum quidquam evincat. Id certum est, omnem musculum agentem intumescere & duriores fieri; sed & pariter certum est oculorum judicio, musculi sese contrahentis abbreviationem majorem esse tumore ejusdem, qui ex contractione nascitur. Accedunt etiam lacerti magis ad se mutuo & versus axim musculi, dum is contrahitur, observante Cel. SIMSON. Fibrae musculi ne quidem intumescunt in actione, sed corrugantur solum. Neque in longissimis musculis, dum contrahuntur, notabilis tumor observatur, certe numquam tantus, ut diminutam longitudinem supplere videatur.

Decimo tertio : musculus flexor. Flexo per vim externam artu aliquo, musculus flexor tum laxus non manet, sed sponte contrahitur, quia nunc scilicet nullam ab antagonista suo resistantiam, nullam vim oppositam experitur. Contrahitur ergo sublato æquilibrio, licet voluntas nihil moveat. Sed hæc contractio multo debilior est, quam si

nixu voluntatis ageret. Ceterum hoc phaenomenon liquido demonstrat, musculos, etiam dum actu non moventur, tamen in perpetuo nixu constitutos esse, & ex vi insita perpetuo agere, exemplo ponderis in æquilibrio positi.

Decimo quarto : voluntate nihil determinante. Musculi omnes voluntarii quiescunt indifferentes ad motum quemcumque & æquilibrati, ob æquabilem in omnes liquidi nervei & sanguinis influxum.

§. C C C C I I.

Primo : debet posse abesse & adesse &c. Musculi voluntarii non perpetuo, sed ad arbitrium animæ motum imperantis agunt; musculi vitales perpetuo quidem, sed interrupto motu agunt, ut alternis contractionibus fibrarum alternæ relaxationes respondeant. Non ergo causa motrix musculis perpetuo applicatur; alioquin & perpetuo agerent efficaciter, nec relaxatio musculi locum haberet. Adeoque debet causa motrix posse abesse & adesse in musculo. Contrarium in spasmo vides.

Secundo : adeoque in eum ingredi, egredi ex eo. Ex supposito nimirum, quod fibræ musculares cavæ sint.

Tertio : aliunde in eum derivari, aliorsum exire. Hoc ideo statuit BOERHAAVIUS, quia non est probabile, per eandem viam, qua in musculos defertur causa motrix, iterum retrogredi & duos oppositos motus in eodem vase locum habere repugnat. Sed neque in musculo permanet, alioquin hujus contractio non desineret. Si ergo per idem vas, quo adfertur in musculum, non retrogreditur, si etiam in musculo non permanet, necesse est, ut inde aliorsum se subducatur.

Quarto : hocque nixu citius ipso &c. Volo brachium movere & in puncto temporis ipso movetur, volo, ut quiescat &, dum volo, quiescit,

volo, ut inter voluntatem meam & motum vel quietem musculi imperatam, nullum sensibile tempusculum intercedat. Ergo & applicatio causæ motricis & ejusdem ablatio celerrima sit oportet & instantanea.

Quinto : interne urgere foras ad omne punctum superficiei &c. Hoc neutiquam ex phænomeno sequitur; imo contrarium est phænomeno observato, quo constat fibras agente musculo neutiquam expandi & turgere, sed in rugas contrahi & inde musculum crassiores reddi. Hinc ipse musculus quidem agens tumet, quoniam corrugatae fibræ plus occupant spatii transversæ, quam in rectitudinem exporrectæ; non autem tumet expansis, aut intus dilatatis fibrillis, quemadmodum ex hypothese physiologi statuerunt, in vita & necquidquam reclamante natura.

Sexto : æquabiliter distribui per omnem carnem musculi. Istud quidem recte; nam singula fibrilla carnea seorsim agit & omnium fibrillarum actio simul sumpta est actio totius musculi. Cum ergo singula fibrilla ad actionem musculi suum pensum conferat; necesse est, causam motricem per omnem carnem musculi æquabiliter distribui. Verum æquabiliter distribui causa motrix potest, quin ideo fibras expandi necesse sit.

Septimo : itaque fibrarum membranas dilatare &c. Hoc iterum hypotheticum & ex phænomeno corrugationis falsum est.

Octavo : ab encephalo & a medulla spinali causam motus musculis præcipue voluntariis advenire & per nervos adferri, docent phænomena, quibus constat, musculorum actionem perire, quoties commercium horum cum encephalo & medulla spinali sublatum est; aut quoties nervi compressi, ligati, discissi, causam motricem adferre desinunt.

Superare

Superare eas resistentias &c. Musculi agentes non solum partem eam corporis, cui inferuntur, loco suo movent & adducunt, sed etiam pondus multarum sæpe librarum parti huic adnexum movent, elevant &c. hinc ingentes resistentias superare debent. Inde conclusit BOERHAAVIUS, causam motricem, seu liquidum nerveum, vi magna in musculos influere debere, ut superare possit omnes eas resistentias; præcipue cum crediderit, non aliter muscoli carnem accurtari posse, quam si fibrillæ undique a centro versus peripheriam expanderentur. Sed ex nostro systemate patebit, resistentias illas non adeo liquido nerveo oblucari, ut BOERHAAVIO visum est.

Nono. Fluidissimum, tenuissimum, celerrimum. Recte hoc. Motus enim musculorum (corde & intestinis exceptis) perit rescissis nervis; ergo causa motus musculorum per nervos advenit. Sed nervæ fibrillæ ultimæ invisibiles sunt & ultimæ quoque fibrillæ musculares sensum fugiunt; neque fibrillæ nervæ, neque musculares ad sensum intumescunt agente musculo; fluidum tamen per nervos in musculos influere, ex alibi dictis evincitur; necesse ergo est, ut fluidum hoc sit tenuissimum & fluidissimum; verum cum simul inter voluntatem efficacem & motum muscoli nullum sensibile tempusculum intercedat, etiam necesse est, ut fluidum hoc celerrime moveatur.

§. CCCCH — CCCCVII.

His absolutis ad eas opiniones transeamus, quæ hætenus ad explicationes actionis muscularis a celebrioribus physiologis assumptæ fuerunt. Licet vero multis inter se modis auctorum systemata differant, ad certas tamen classes facile revocari possunt. Alii enim quemcumque musculum ab anima cieri, quæ liquido nerveo non indigeat, professi sunt; alii a solo sanguine, a solo subti-

liffimo nervorum liquido alii, alii denique ab utroque simul actionem musculi repetiverunt. Et illi quidem de quibus primum dixi, fibrillas nerveas tamquam solidos funiculos considerant, qui variis modis & intendi, relaxari pro imperio mentis possint. His insuper credunt agitationem quamdam ab anima impertiri, quæ in muscolum usque propagata, ut ille contrahatur, efficeret; aut animam principium nervi trahere, qua mutatione & muscolum dein contrahi, necesse sit: subtile vero nervorum fluidum neque sensationum, neque motuum causam esse, sed eo solum chordas nerveas irrigari, ut in temperie ac tensione ad sensus motusque requisita persistent & fortassis etiam inde nutriantur. Sic STAHLIUS ejusque discipuli docuerunt. Verum hæc sententia non ex uno capite refelli potest. Et quidem pultacea nervorum substantia, eorundem laxitas peculiaris, prodigiosa ex tenui origine diffusio, inflexiones sæpe retrogradæ, gyri, circumvolutiones innumerabiles, liberrima per mollem cellulosa itinera, satis opinor evincunt, nullis hic vibrationibus, vel attractionibus locum esse. Sed neque discissus retrahitur nervus, quin contra magis prominet hujus pulpa membranis sese retrahentibus, quæ nervo pro involucro erant. Neque ligatura chordæ vibrationes impedit; & tamen ligatura & nervum & muscolum sua actione privat. Proinde id quod per nervos ad musculos defertur, fluidum quoddam sit oportet, cujus iter ligatura nervi intercipitur. Et quæ demum ratio palpitationum & motuum & evulsi jam post mortem cordis, evulsi intestini? quæ ratio motus resuscitati in musculo mortuo & de corpore resecto? Non STAHLIUS ullam dedit, non ejus affectu dabunt. Ut jam pluribus ad eam hypothesein refutandam opus non sit.

At qui vel ab arterioso sanguine solo, vel & a liquore nerveo cum rubris globulis confligente, musculorum actiones deduxere, quantam vim na-

turæ intulerint profecto non viderunt. Repugnat enim evidenter ipsa fibrillarum, quibus motus peragitur, simplicitas & minuties, quæ tanta quidem viris oculatissimis LEUWENHOECKIO atque MUYSIO visa est, ut longissime infra minutiem minimarum arteriolarum sit, quæ rubrum cruorem vehunt. Repugnat etiam exsanguium insectorum contemplatio, quibus tamen stupendam mobilitatem natura dedit, neque desunt in humano corpore motrices fibræ, etiam valentes, quamquam evidenter albidæ, quales imprimis per ventriculum & intestina diffunduntur; neque hætenus ulla fidei observatione musculus, qui pus intus concepisset, visus est; cum tamen sanguinea vasa frequentissime & inflammentur & suppuratione contabescant. Adhæc ligata vel rescissa arteria motus musculi adhuc diu superest, qui ligato vel rescisso nervo protinus velut incantamento tollitur. Non advertunt denique, sanguinem vi circulationis in omnes musculos æquabiliter distribui & ejusdem arteriæ truncum pluribus musculis prospicere; non posse ergo musculum aliquem solitarium moveri, sed aut omnes perinde ab arterioso sanguine in motum cieri debere, aut nullum. Quid jam de motibus exsecti & ab omni sanguine repurgati cordis? quid de motu resuscitato musculi, cujus arteria jam rescissa est? sed opiniones, quas natura repudiat, ulterius perstringere non lubet.

Subtiliores porro physiologi, quamquam a liquore nervorum solo mirabiles has actiones deducendas velint, tamen circa proprietates hujus fluidi & operantis modum, non consentiunt. Et alii quidem id electricæ virtutis esse, alii solum per leges hydraulicas dirigi contendunt & pressione sua fibrillas musculares distendere, unde earum abbreviationem sequi necesse sit; alii peculiare de hoc liquido revelationes, ut videtur, habent. Illa vero, quæ vim electricam tuetur, opinio, etsi prima fronte multum verisimilitudinis habet,

summis tamen obnoxia difficultatibus est. Lubens equidem dabo, ex nervo provocari posse materiem electricam : eamdem per animata corpora magis, quam per inanima diffusam : etiam hanc manifestius e viventibus quam e mortuis prolici : hac percussos, qui officio suo defunt, paralyticos musculos ad pristinos motus interdum resuscitari & quæ ejusmodi plura sunt. Verum idem subtile electricum fluidum per alia quæque corpora, per totam rerum universitatem disseminatum nusquam non est; itaque neque opus habet encephali fabrica, ut inde secernatur in viventibus; neque nervos adeo molles delicatos exigit, neque horum cavitatibus eget, cum & rigidissimas e ferro catenas sine difficultate permeet; neque satis intelligi potest, quomodo aut molli pulpa encephali, aut debilissimis nervorum parietibus coërceri hæc materia queat, quæ fulminea rapiditate per solidissima obstacula fugit. Etiam ratio deest, cur ligato nervo musculus moveri desinat, nam certe ligatura catenæ in experimentis physicis materiæ electricæ propagationem nihil remoratur. Si vero intricatum, ut quidem responderi solet, fluidum electricum quis dixerit, hoc ipsum prius demonstrandum esse, quam pro certo assumatur, reponi potest. Adhæc cum truncus nerveus quisque in progressu suo tot ramis pullulet, tot musculis unus inserviat, tot aliis nervis jungatur, cumque innumeræ fibrillæ nerveæ in eodem trunco nerveo sibi proxime accumbant, cur omnibus illis non eodem tempore vis electrica communicatur, uti omnibus contiguis corporibus non electricis eadem communicatur in experimentis physicis? Et si materies electrica vere muscutorum agentium causa est, cur solum concutitur, cur non item plene contrahitur vi electrica percussus musculus? cur irritamentum corporis non electrici, aciculæ, scalpelli, motum in musculo jam sopitum resuscitat? Ejusmodi difficultates

figendo quidem eludi possunt, resolvi ex systemate electricitatis non possunt. Prætereo jam evulsi cordis, evulsi intestini mobilitatem, quæ sane non felicius ex hac hypothese, quam ulla præcedentium explicatur.

Venio ad eos, qui, hydraulicorum dogmatum amœnitate capti, musculorum actionem a pressione fluidi subtilissimi per fistulas nerveas ruentis deduxere. Inter hos Cel. BOERHAAVIUS principem locum tenet. Statuunt illi : liquido nerveo, quacumque de causa, in cavitates fibrillarum vi majore adaucto, fibrillas hasce velut inflari & in vesiculas expandi sphaeroideas, quæ prius fuerant cylindricæ, inde musculos ex omni parte turgere & reniti & denique in tantum accurtari, in quantum fibrillæ musculares magis expanduntur & diametro transversali augentur vid. §. 404. Porro celeritate liquidi nervei in hunc illumve musculum influentis adaucta, alios musculos tanto minus urgeri; adeoque laxos manere, dumque hoc fit, excessum virium tanto plus incrementum in musculo, qui nunc contrahitur. vid. §. 405. Hinc utraque de causa contractas fibrillas musculares utrimque extrema sua trahere, partemque mobiliorem versus minus mobilem adducere; simul vero cum intumescant fibrillæ omnes, necessario spatia cellulosa inter has contenta fortiter premi & vasa sanguinea, in celluloso textu decurrentia, agente musculo quasi elidi, hinc sanguinem e musculo exprimi, hinc musculum omnem contractum pallere. vid. §. 406. Desinente vero celeriore liquidi nervei in musculum antea contractum influxu, vesiculas jam non expandi, hinc proprio elatere se restituere in fibrillas cylindricas & elongari & totum musculum in pristinum statum restitui, æquilibrio cum antagonista restituto. Atque sic putant omnibus phænomenis satisfactum esse, nihilque sine demonstratione assumptum esse, præter celeritatem liquidi nervei

a causa aliqua superiore adauctam; hanc vero in musculis voluntariis animam esse, quum ad voluntatis nutum operantur; neque id tamen gratis assumptum esse, licet explicare non possint, quomodo anima in liquidum nerveum agat; nam & in omni alia hypothese difficultatem eandem restare. vid. §. 407. Denique quomodo tanta vis per nervos dari queat musculis, ex hydraulica & hydrostatica, atque imprimis ex phænomenis cistæ Mariottianæ facile intelligi & explicari posse, existimabat BOERHAAVIUS. Nam etiam parva aquæ quantitas per exiguum tubulum premens, si modo ex magna altitudine premat, ingentia pondera elevare potest, siquidem fluida premant altitudine & celeritate. Atque adeo si mirum non est ab aliquot unciiis aquæ ex magna altitudine deorsum prementis centenarium & ultra elevari, etiam non mirabimur, a liquido nerveo, licet ejus quantitas minima sit, secundum leges hydrostaticas in musculum influente, resistentias adeo magnas superari, ut superari videmus in motu musculorum. vid. §. 411. Hæc BOERHAAVII explicatio magno applausu excepta & a discipulis Magni Viri plerisque tradita fuit, videbaturque omnibus aliis hypothesebus vero propior.

Verumtamen si omnia sine auctoritatis præjudicio disquirantur, certum est, hanc hypothesin non minus aliis omnibus & infirmam & falsam esse, & phænomenis explicandis minime sufficere. Nam primo fibrillas musculares a liquido nerveo intus expandi in vesiculas, & inde musculum turgere, & abbreviari, haudquaquam in phænomenis deprehendo; sed video fibrillas corrugari, video rugas etiam fibrillis visibilibus minimis inscriptas, video crassescere musculum, sine aucta diametro fibrarum, sine vesiculis, video mechanica necessitate crassitiem musculi augeri ex corrugatione fibrillarum. Deinde non reperio in phænomenis musculum contractum

pallere; quin contra perinde ut inertiae tempore rutilare, evidenter cerno. Palleret omnino si fibrillæ in vesiculas expanderentur, eaque vasa sanguinea comprimerent, nunc non pallet, ut BOERHAAVIUS credidit; non ergo etiam fibrillæ in ejusmodi vesiculas expanduntur, ut hypothesis finxerat. Porro muscoli ad dimidium fere suæ longitudinis contrahuntur, quidam ad duas tertias, quidam ad majorem brevitatem; jam vero fibrilla cava cylindrica, ut docent mathematici, si in sphæram expandatur, amittit solum unam tertiam partem suæ longitudinis; muscoli ergo abbreviatio phænomenis detecta insigniter major est, quam quæ oriri posset ex systemate fibrillarum in vesiculas expansarum, siquidem hoc systemate stabilito non plus, quam una tertia parte, musculus ad summum contractus brevior esset, dum tamen in phænomeno multo magis contrahitur. Et jam hæc animadversiones sufficerent; nam facile intelligitis, hypothesein, quæ phænomenis naturæ contraria est, veram esse non posse. Sed BOERHAAVII auctoritas postulat, ut profundius hæc expendamus. Ergo etiam id animadvertendum est, neminem, qui BOERHAAVII opinionem tuetur, aut rationem dedisse, aut hodie dare posse, qua de causa liquidi nervei influxus in musculos vitales acceleretur; nam in voluntarios ab anima impellitur liquidum nerveum, in vitales, quibus anima non dominatur, sola lege circulationis influit, adeoque celeritate immenso minore, & minore proinde impetu. Tamen vitales muscoli & celerius agunt, & fortius & vividius, quam multi aut plerique voluntariorum. Denique pressionem hydrostaticam liquidi nervei, quam in subsidium hypothesis adduxit Vir summus, ego quidem nullam video. Nam etsi quidem hodie constat, fluidorum vires æquales esse, quorum eadem altitudo est, utcumque diversa sit amplitudo tuborum, quibus coërcentur; etsi constat,

fluida premere in ratione composita altitudinis & celeritatis; tamen hæc ipsa lex admodum breves & præmaturos limites habet, quos BOERHAAVIUM non advertisse, vehementer miror. Nam ut primum in tubulo aliquo diameter valde exigua est & proportio solidi continentis ad fluidum intus contentum tanta est, ut vis illius attrahens fluidi gravitantis nisum superet, non tantum pressio illa hydrostatica jam exauctorata cernitur, sed etiam huic contraria naturæ statuta observantur. Sic sci-
mus in capillaribus tubis ultra libellam assurgere liquida, eadem semel his fistulis hausta retineri pertinaciter, nec jam altitudinem columnæ liquidæ in tubulo contentæ ultra efficacem esse, quantacumque fuerit; quin eo altius contra propriam gravitatem in tubulum ascendere fluidum, quo tubi diameter minor, & soliditatis in hoc proportio major fuerit. Quodsi vero pressio illa hydrostatica, alias tantarum virium, non modo jam subsistat, ubi ad capillarem tuborum minutiem ventum est, sed etiam contrariæ naturæ legi cedere cogatur, quid porro de subtilissimis nervorum tubulis cogitandum? quo consilio viri ceterum acutissimi in congruam cistæ Mariottianæ similitudinem ad hos ultimæ exilitatis canaliculos transferre potuerunt? omniane naturæ phænomena ex generalibus physices principiis, & iis quidem paucissimis cœcutientes eruemus? semperne cum maximis & obviis quibusque effectibus minima naturæ arcana confundemus? Fac modo, si lubet, applica cistulæ tuæ non majusculum aliquem, sed capillarem tubulum, & videbis phænomeni diversitatem, videbis, ut inde ruant ingeniosissima maximorum virorum systemata. Sed pone, liquidum nerveum hydrostatica pressione in musculos agere, & ab ea pressione vim musculorum pendere, ut voluit BOERHAAVIUS, etiam vi hypothesios recepta admittere debebis, pressionem eam eo majorem vim exercere, quo mus-

culus ab encephalo remotior est. Ergo sequetur, musculus flexorem pollicis pedis longe majore vi pollere, quam tot alii muscoli validissimi superiore loco siti, & majore, quam cor ipsum. Erunt enim vires musculorum inter se, ut altitudines columnarum liquidi nervei, ab origine medullaris substantiæ encephali & medullæ spinalis usque ad finem cujusque nervi in suo musculo. Nunc certum est musculus flexorem pollicis pedis esse admodum imbecillem, quem validissimum esse oportet, si locum habet pressio liquidi nervei hydrostatica. Tum porro liceat rogare, cur ejusmodi pressionis non meminerit BOERHAAVIUS in illorum nervorum functionibus explicandis, qui ad sensum destinantur? Idem nervus & ad organa sensuum ramos dat & ad musculos, exemplo paris quinti & aliorum; cur non perinde in his, ut in illis nervis, liquidum premat? quæ disparitas? Scilicet non indigebat BOERHAAVIUS pressione hydrostatica liquidi nervei ad explicandas sensuum functiones, indigebat vero maximopere ad explicandam vim ingentem musculorum, & perinde arbitraria assumpsit, ut alii. Et quis denique ex BOERHAAVII sententia rationem dabit, cur ligato præscissove nervo musculus jam resolutus illico iterum contrahatur, ubi aut præscissi nervi extremum, aut pars ejus aliqua infra ligaturam irritatur? utique jam sublata vel intercepta est liquidi prementis altitudo.

Ex omnibus his clare demum perspicitur, causas motrices musculorum hætenus in mechanicis legibus frustra quæsitæ esse, multumque a natura deviasse clarissimos ceterum physiologos, qui, de aliis viribus haud solliciti, non satis indagarunt, quid animatis corporibus peculiare inditum a natura sit, tamquam scilicet vitalis machinæ operationes eadem essent, quæ automatum! Inesse autem musculis vim prorsus singularem, auto-

matibus non datam, dudum antea perspectum fuit, sine omni utilitate tamen, cum sua quemque physiologum detorqueret ambitio, ut fingendo magis eluderetur natura, quam detegere-
tur experiundo. Nostrum jam est, ex supra recensitis phænomenis certiora elicere corollaria; neque enim fingendum quidquam, modo ipsa naturæ oracula consulantur.

Itaque cum ligato, præscissove nervo motus musculi illico pereat, musculos propria potestate non moveri, sed iis motricem causam per nervos advenire, liquet. Id ipsum porro quod musculis per nervos advenit, non est quid incorporeum, alioquin nec præscissione nervi, nec ligatura impediretur. Est ergo fluidum quidem in corpore animali subtilissimum, sed minus tamen subtile lucida, aut electrica materia, quam nulla ligatura remorari vel intercipere potest. Verum hoc fluidum, a substantia corticali encephali secretum, lege circulationis continuo fluere necesse est, adeoque continuo per nervos distribui ad organa sensuum & musculos, neque tamen musculi continuo moventur; etsi in continuo nixu, aut potius tensione perseverent; non ergo quilibet liquidi nervei in musculos influxus hos in motum ciet, sed requiritur vis quædam superaddita; requiritur, ut magis agat in eum musculus, qui nunc movendus est, quam in alios, quos movere non expedit. Vim eam superadditam in musculis voluntariis ab anima esse, docet voluntas efficax, motum producens, mutans, sistens, pro arbitrio animæ. Sed nihil vicissim potest voluntas animæ nervo ligato, compresso, destructo. Anima ergo non immediate, sed per liquidum nerveum musculos, quibus præest, in motum ciet. Atque ista hætenus firma sunt.

Verum & meminisse oportet alterius phænomeni, quo constat, musculus ex ligato vel rescisso nervo jam paralyticum, & in perpetua quiete fu-

turum, facile in contractionem cieri posse, modo resecti nervi extremum, vel pars ejus aliqua infra ligaturam vellicetur, imo aciculæ apice solum leviter pungatur, quod phænomenon etiam irritatis carneis fibrillis incidere visum est. Unde porro hoc sequitur corollarium : esse in ipsa carne musculi principium aliquod motus intrinsicum, esse vim quamdam huic parti quasi congenitam, quæ neque ab imperio nervorum pendeat, neque ab horum cum encephalo consensu, quæ proinde & a virtute liquidi nervei distincta sit : hanc esse irritabilitatem, quæ sua sponte nihil moveat, quæ sibi relicta in occulto delitescat, nec nisi stimulo quodam irritante provocata operetur. Sed & ab hujus integritate præcipue musculorum actionem pendere, inde scitur, quod ea semel evanida per irritantia quæque, etiam validissima, motus ultra produci non possit. Denique & hoc ex dicto phænomeno sequitur, irritabilitatem, etsi per se non agat, a liquido nerveo tamen perinde, ut a stimulo externo, in actum deduci, quum, in motum cieatur musculus jam paralyticus, si modo nervi resecti extremum, aut ligati pars aliqua intra ligaturam irritetur. Atque demum ex omnibus hisce accurate perpensis id evidentissimum est : reapse duplicem esse causam motricem musculorum, prædisponentem & internam alteram, quæ irritabilitas, alteram excitantem & extrinsecam, quæ priorem proliciat & in actum deducat, subtile scilicet fluidum nervorum : neutram harum seorsim ad producendos motus musculorum sufficere, sed utriusque concursum inevitabili necessitate requiri;

Alterius sic

Altera poscit opem res, ex conjurat amice.

Neque, dum liquidum nerveum causam excitantem & irritante vi præditam pono, acrem aliquam, spirituosam, aut salinam materiem intelligo; neque

enim folis acribus excitatur irritabilitas, cum & lenis aquæ tepor, & alius acrimoniæ expers stimulus hanc moveat. Hanc vero liquidi nervei proprietatem gratis assumptam, nemo facile nobis objecerit, quippe quæ necessaria conclusione ex ipsis phænomenis eruitur. Modum vero, quo liquidum nerveum irritare musculum & in contractionem ciere possit, assequi nec adeo facile, nec adeo patulum ex phænomenis. Ut tamen & is aliquatenus intelligatur, considerandum est, fibrillam muscularem ultimam adeo simplicem esse, ut hætenus ne quidem armatis oculis deprehensa sit: hanc adeo exiguam fibrillam ex sua natura irritabilem esse, cum & fibra major irritabilis tantummodo simplicium fibrillarum aggregatum sit; rursus corpora irritante vi prædita solo motu actiosa fieri ex phænomeno & ratione; liquidum nerveum ergo & ipsum in fibrillas musculares moveri & influere debere. Pone jam liquidum nerveum, quod lege circulationis in omnes musculos æquabiliter influit, nunc quacumque de causa in fibrillas musculi alicujus celerius, ac proinde fortius influere, quam in alios musculos, fibrillæ musculi illius fortius irritatæ ex lege irritabilitatis sese contrahent, & cum in omnibus ejusdem musculi fibrillis idem fiat simultanee, etiam totum musculus simultanee contrahi necesse est. Atque sic tandem patet sero detectæ naturæ simplicitas.

Intelligitur hinc, irritabilitatem esse, quæ facit, ut etiam exiguæ liquidi nervei vires motibus possint sufficere maximis; dum contra vim ejusdem liquidi immensam esse oporteret, si perinde ac hydraulica quædam machina lacerti moverentur. Nam sola irritabilia corpora majorem & multo majorem, quam acceperint, motus quantitatem reddunt, estque illis propria hæc stupenda virium multiplicatio, quæ in mechanicis legibus hætenus cognitis desideratur. Mus-

culum irritas scalpelli apice, aut nervum pungis acicula, & mox violente contrahitur musculus; nunc si consideras motum a stimulo impressum cum motu in musculo producto, vides posteriorem vim immenso majorem esse priore; hinc neque mirum videri debet, tantas resistentias musculis agentibus superari, quando multiplicationem illam virium in phaenomenis videmus. Porro & illud considerandum est, multum interesse, intusne an extrinsece musculus irritetur; siquidem in intimo fibrillarum sinu longe videtur esse vividior irritabilitas, exterius minor & obtusior, ob multiplicata telae cellulosa non irritabilis volumina, quibus fibrillae omnes tam sollicitè involvuntur. Ut hinc liquidum nerveum quod intus fibrillas irritat, minore vi motus eosdem & majores excitare possit, quam stimulus qualiscumque extrinsecus, licet validior. Atque haec ratio est, cur in experimentis anatomicis validissima interdum irritantia requirantur, ut artificialis musculi contractio in conspectum prodeat. Denique hoc nostrum systema uniforme est & perinde de vitalibus musculis obtinet, ut de voluntariis; nam & illi stimulo & irritabilitate cidentur. Quod nervis rescissis cor illico paralyticum non fiat, ratio est, quod nondum omnis stimulus ablatus sit; deme nervos cordis, deme influxum sanguinis in cava cordis, qui rescissis nervis adhuc perdurat, deme omnem alium stimulum, & perinde cor quiescet ut alius musculus. Sed applica alium stimulum etiam levissimum, aquam tepidam, calorem solis, aërem & resuscitabis motum cordis tamdiu, quamdiu huic adhuc sua irritabilitas est. Cum autem cordis irritabilitas major & vividior & pertinacior sit, quam in aliis musculis, etiam motus cordis vividior & pertinacior est, & amissus facilius resuscitatur. Atque idem etiam de intestinis valet. Proinde clarum est omnes, quotquot sunt, sive vitales, sive animales, sive naturales musculos,

stimulo & irritabilitate cieri, hac solum differentia, quod ad voluntariorum musculorum motum sanguinis arteriosi & venosi stimulus nihil conferat, sed omnes stimuli illis a liquido nerveo, voluntate animæ determinato, cieantur; quod contra in corde plurimus sit a sanguine venoso alterne influente stimulus, & præter hunc alius a liquido nerveo; sed ille æquabilis, non alternus, unde etiam impedito stimulus sanguinis venosi, ejusque in cava cordis influxu intercepto, modus cordis cito conticescit, licet integris nervis cardiacis, contra vero durante sanguinis alterno influxu motus cordis diu sæpe adhuc perdurat, licet nervis cardiacis rescissis. Intestina denique præter stimulum liquidi nervei, & eum quidem ab anima non pendentem, aliis adhuc stimulis obnoxia sunt, ab aëre incluso, ab humoribus secretis propriis aut alienis illuc depositis, ab ingestis &c. Duplici ergo scaturigine omnium musculorum motus oritur, vi propria musculo intrinseca, irritabilitate, & vi alia extrinsecus adveniente, stimulo sive unico & simplici, sive composito.

Atque omnia hæc de illo statu musculi, in quo is contrahitur, tenenda sunt; ubi autem actio ejus desinit, necesse est, etiam causas actionis tolli. Verum irritabilitas tolli per voluntatem non potest; in eam quippe nullum est mentis imperium. Itaque solus influxus liquidi nervei, quo irritabilitas excitata fuit, si auferatur, musculus jam non ultra irritatus sponte sua relaxari debet; etenim hæc irritabilium fibrarum natura per experientiam detecta. Neque obstant contraria quædam phaenomena, dum acido vitrioli fortissimo irritatæ fibræ diutissime contractæ manent; vis enim veneni mineralis protinus altissime in partem desidet, ut hinc irritatione manente perpetua etiam relaxatio nulla sperari possit. Itaque hoc est evidentissimum, sponte sua relaxari fibras, posteaquam stimulus irritans abla-

tus est; totumque relaxationis negotium in voluntariis musculis a liquidi nervei ulteriore influxu subtracto, non item ab irritabilitate repetendum esse; siquidem ligato vel præscisso nervo non resolvitur omnis musculus voluntarius, utut integra manente irritabilitate; & subtractis omnibus stimulis resolvitur omnis vitalis musculus, utut irritabilitate vividior præditus. Adjuvare vero relaxationem musculi voluntarii potest prægressa antagonistæ distractio, quæ profecto sine irritatione quadam ex ipsa distractione facta concipi vix potest; unde & antagonista musculus in sui contractionem promptior est, dum simul alteri stimulus liquidi nervei subtrahitur. Ceterum quorsum de musculo liquidum nerveum exeat, an per nervos alios referatur, an etiam venæ nerveæ sint, liquidum nerveum revehentes, an fibrillæ nerveæ intus valvulis præditæ sint, quæ pro tempore contracti musculi liquidum nerveum exire prohibeant, & quæ ejusmodi somnia sunt, ea equidem, suis quæque auctoribus lubens intacta relinquo & ingenue fateor, me nescire. Quid impedit, quo minus per venulas lymphaticas revehatur pro parte? pro parte vero dissipetur? multum certe dissipari videtur ex lassitudine concludi posse, quæ motum majorem subsequitur. Sed de hac re infra agam.

Considerari adhuc ille status musculi debet, in quo is neque ad sensum contractus, neque relaxatus, mediocriter se habet. Etiam hoc tempore, si caro ejus, vel tendo penitus rescindatur, continuo antagonista musculus, licet injussus, contrahitur, inque suam partem nexum pondus trahit, vi tamen multo minore, quam si jussus ageret. Non potest autem a sola vi elastica repeti hoc phænomenon, cum idem non sit in cadavere effectus, in quo tamen aucta sæpius ex rigiditate partium elasticitas; neque a voluntate mentis, cum etiam illi adversetur. Sola igitur superest irritabi-

litas. Sed neque hæc actiuosa esse potest, nisi excitetur. Excitatur autem, ut antea dixi, in musculis voluntariis a liquido nerveo. Igitur & in hoc statu, in quo tranquillus hæret musculus, aliqua liquidi nervei portio per fibrillas musculi trajicitur. Sed quoniam musculo aliquo rescisso spontaneam antagonistæ contractionem, ne ipsa quidem anima impedire potest, clarum est, liquorem nerveum hoc tempore sola vi circulationis per musculos agi & æquabiliter per omnes musculos distribui; quæ proinde vis cum sit in omnibus antagonistis æqualis, cumque a corde data sit, in remotissimis hisce & exilissimis canaliculis omnium imbecillima, id solum efficit, ut lenissime semper irritati musculi in perpetuo nisu conserventur, neque tamen actu moveantur, nisi vel majore impetu ab alia causa in aliquem horum liquidum nerveum determinetur, vel aliquis antagonistarum paralyticus fiat, aut rescissus omni etiam nisu privetur.

Porro ex hoc de motu musculorum systemate omnium phaenomenorum ratio reddi clarissima potest. Inde enim scitur, cur musculi sese contrahentis fibræ omnes, quotquot oculis apprehendere licet, in rugas undulatas complicantur? Est hic irritabilitati soli proprius effectus, quem ex alio quocumque systemate explicare nullatenus datur. Cur sub ipsa contractione crassities totius carnis musculosæ augeatur? utique convolutæ fibræ plus occupant spatii transversæ, quam in rectam lineam extensæ. Cur tamen hæc ipsa crassities diminutæ longitudini musculi haud respondeat? Nempe alia longe est corrugatæ fibræ, alia expansæ vel inflatæ idea. Cur non palleſcat agens musculus, imo cur potius erubescat magis, ut HAMBERGERO visum? Non ita comprimuntur vasa sanguinea, non ita delentur, quæ in cellulosa decurrunt arteriæ venæque, ut omnis sanguis expellatur: manet idem fere muscula-
rium

rium fibrarum intervallum : quod eas inflet, & expandendo ad se mutuo apprimat, nihil uspiam est. Et si quæ fit in vasis sanguineis minoribus mutatio, erit hæc ipsa corrugationis quædam species, ex cellulosa telæ complicatione nata; unde parum lentius ire sanguinem ob multiplicatos angulos & parumper accumulari posse consequitur, & sic fit, ut etiam magis intendatur musculi rubor; quamquam accelerari sanguinis motum per vasa majora certum sit, dum crassescen-tes in actione lacerti, iterumque gracilescentes, venas comites alternis vicibus toties emulgent. Cur arteria filo intercepta, vel ferro præcisa, motus musculi paulatim elanguescit? vitale musculo liquidum arteria suppeditat; hoc denegato motum sensim perire, mortua jam parte, mirum non est; debet enim ceu mortua spectari pars omnis, quæ vitali sanguine defraudatur. Adde, quod in vivo corpore animali frigeant musculi, quibus ligata arteria sanguis subtractus est, non differentes a musculis cadaveris per exp. Cl. KAUV. Cur nervis omnibus rescissis, arteriis venisque, motus aliquis & contractio vera fibrarum in musculo resuscitari potest? Est huic adhuc sua quandoque irritabilitas, a nervis non dependens, non pendens ab arteriis, sola deest excitans causa. Quid- quid igitur musculus resectum extrinsecus tunc irritat; id causæ excitantis vice fungitur; unde ex lege irritabilitatis aliquamdiu adhuc superstitis, musculus iterum contrahatur necesse est. Intelligitur, cur opium musculorum actionem debilitet, imo dosi majore sumptum etiam paraly- sin inducat? Nam & nervorum actionem sus- pendit, ut stupor, somnus, oblivio, ab opio in- ducta, docent; sed etiam irritabilitatem a nervis non pendentem idem venenum tollit, experimen- to Cl. ZIMMERMANNI, qui cordis, ex animali vi- vo erepti, petulantem motum affuso laudano li- quido SYDENHAMI illico extinctum vidit. Unde

simplex aliis visa effectuum opii causa mihi verisimilius duplex est; & ex hac duplici conspirante causa, ratio intelligitur, cur adeo parva dosi efficax opium sit. Superest adhuc unum phænomenon explicandum, solis musculis voluntariis proprium, lassitudo nempe, quæ motus magnos & diuturnos subsequitur. Hoc phænomenon omnes fere physiologi intactum reliquerunt, ob ipsam puto difficultatem explicationis. Est autem lassitudo, imminuta potentia movendi musculos, sic, ut non nisi magno molimine eos movere possimus lacertos, quos antea adeo agiles & obsequiosos habuimus. Facile patet ab effectu, ipsas causas motrices imminui debuisse; atque adeo vel irritabilitatem musculorum per diu protractos motus elanguescere, vel fluidi nervei copiam requisitam deficere, vel utrumque conspirare. Verum cur non delassantur vitales musculi? cur cor, quod intra viginti quatuor horas plus 100,000ies alterne contrahitur & relaxatur, nullum laborem persentiscit? cur per annos fatigatur? Multum super hoc speculatus credidi olim in irritabilitate cordis phænomeni diversitatem latere, quæ huic musculo major, quam aliis est. Verum nunc maturiore iudicio aliter sentio, meamque sententiam quam quidem non sine dubitatione olim proposui in *disp. de act. musc.* §. XX. ipse nego & abrogo. Nam quantacumque demum sit cordis irritabilitas, & quocumque demum excessu irritabilitatem aliorum musculorum superet, tamen, si in aliis musculis per diuturnos motus exauriri posset irritabilitas, & si inde lassitudinis phænomenon penderet & cordis irritabilitas proportionaliter exauriri, ipseque hic musculus tandem, ut alii, etsi minus cito, fatigari deberet; quod cum non fiat, frustra irritabilitatis præsidium quæsi non satis cautus. Non potest ergo lassitudinis phænomenon aliunde repeti, quam a deficiente post validos labores copia requisita liquidi nervei. Ve-

rum reponetis, cur non deficit liquidum nerveum cordi & intestinis? Dabo responsum, & hoc ipso lis omnis decidetur. In cor & intestina liquidum nerveum non alia vi influit, quam quæ circulationis est, & qua secretum in encephalo liquidum nerveum per omnes nervos movetur. Alterni motus cordis non adeo ab hoc liquido nerveo, quod non alterne influit, sed ab alterne influente in cava cordis sanguine pendet; hinc omnibus nervis rescissis durat alternus motus cordis adhuc notabili tempore, quia perdurat stimulus venosi sanguinis. In intestinis alii stimuli sunt, nam & in hæc solum lege circulationis liquidum nerveum influit. Jam vero liquidum nerveum, quatenus sola circulationis vi per nervos agitur, numquam in statu naturali deficit, stimulus sanguinis venosi in corde, quamdiu vita adest, numquam deficit; intestinis sui numquam deficiunt stimuli; semper ergo in corde & intestinis adsunt causæ motus sufficientes, & his præsentibus non est ratio, cur lassitudinem sentiant hæc organa. Non idem est in voluntariis musculis. Hi non alios habent stimulos, quam liquidi nervei; neque liquidum hoc, vi solius circulationis in hos influens, motum ullum producit; necesse est, ut voluntate animæ plus liquidi nervei, idque ipsum majore celeritate in illos diffundatur. Verum hoc modo clarum est, post validos & diu protractos motus copiam requisitam liquidi nervei tandem deficere, cum non ea celeritate, neque ea copia, lege circulationis perpetuo secerni possit, qua celeritate & copia per voluntatem animæ in musculos dispensatur. Ergo deficiente paulatim copia liquidi hujus ad motum determinatum requisita, imminuuntur vires potentiaæ motricis; unde lassitudinem musculi sequi necesse est. In corde nulla fit diminutio potentiaæ motricis; nam liquidum nerveum non alia vi, quam circulationis, in cor pellitur, numquam

ergo exhauritur, quia in eadem semper proportionem secernitur; sed neque influxus sanguinis venosi deficit, qui perpetuus & potentissimus stimulus est, quo voluntarii muscoli carent. Intercepe influxum sanguinis venosi in cor, & non solum cordis motum debilitari, sed etiam cessare videbis. Patet ergo nunc ratio differentiae illius, quæ inter vitales & animales musculos intercedit, quam rationem Cl. HALLERUS obiter tetigit, reliqui physiologi fere omnes silentio præterierunt, pauci aliqui ejusmodi explicationem protulerunt, quam consultius reticuissem.

§. CCCCVIII. §. CCCCIX.

De causis motuum cordis alibi ex professo actum est & paulo antea, alibi omissa, pertractavi. BOERHAAVII hypothesein alternis cordis motibus explicandis non sufficere, dudum vidimus. Unde hæc non opus est repetere. Id unum addam, non satis sibi met constare BOERHAAVIUM, dum hic *liquidum nerveum in cor contractum influere negat*, cum paulo antea musculos omnes in tantum contrahi statuerit, in quantum fibrillæ musculorum a liquido nerveo expanduntur; & tunc contractissimum esse musculum, quando fibrillæ ejus liquido nerveo, quam maxime turgent, & in vesiculas expansæ sunt. Quam cito destruxit vir magnus, quod paulo antea multo molimine ædificavit!

§. C C C C X.

Vires musculorum ingentes esse, ex ipso effectu actionis muscularis sufficienter patet. Verum hæc vires, ex effectu patulæ, tantummodo pars sunt absolutarum virium, quas muscoli in actione exercent; dumque ope muscoli deltoidis pondus determinatum extremæ manui appensum elevo, vis ea, qua pondus hoc elevo, non est vis absoluta muscoli deltoidis, sed respectiva

vis, aut excessus virium supra resistentias omnes, quas musculus hic superare debuit. Ad vim musculorum absolutam determinandam, præter pondus movendum, præterque celeritatem, quæ id intra datum tempus movetur, plures aliæ conditiones in musculis spectandæ sunt, quæ si computentur, vires absolutæ musculorum immensè majores inveniuntur, quam ipso effectû appareant. Hæc autem sunt, quæ considerare oportet.

Primo. Locum ubi tendo trahens inseritur parti trahendæ &c. Nam ut ex mechanicis notum, potentia motrix, vecti applicata, eo majores vires impendere debet, ut pondus determinatum elevetur, quo ipso hypomochlio vectis propior, & quo pondus ab eodem hypomochlio remotius fuerit; contra vero exiguam potentiam sufficere ponderibus maximis elevandis, si potentia motrix longissime ab hypomochlio vectis distet, pondus autem elevandum huic valde propinquum sit. Nunc in corpore animali pro vectibus haberi possunt omnia ossa, præsertim longa, mobilia; articuli autem his punctum fixum præbent, circa quod rotantur; hinc hypomochlion ossium est in centro cujusque articuli. Musculi denique & tendines instar funium se habent. Potentia motrix est ipsa causa, contractionem musculi efficiens. Jam his positis clarum est, musculos eo majorem vim ad pondus aliquod dimovendum impendere debere, quo eorum insertio articulationi ossium propinquior est; & musculum eundem, qui nunc pondus decem librarum elevare potest, duplo ponderi elevando parem futurum, si ad duplam ab articulo ossis distantiam infereretur. Sic dudum diximus, musculos temporales & masseteres & pterygoideos, quorum conspirante actione nuclei diffringuntur, qui trecentas libras alias pro fractione exigunt, musculos, inquam, hosce nul-

lis aliis subsidiis auctos, sed eosdem prorsus, vim facile triplo majorem edituros, si in parte maxillæ inferioris ab articulatione remotissima intèrerentur. Sed quod de his musculis dictum est, id fere de omnibus valet; nam certe plerique nostrorum musculorum in parva ab articulo distantia ossibus inferuntur, dum contra pondus extremo ossi adnexum vel appensum, ab articulo, seu hypomochlio longissime distat. Hinc ingens nascitur virium absolutarum jactura, ut multo minus valida videatur actio musculi, quam reapse sit. Res hæc in exemplo melius patebit. Pone hominem brachio horizontaliter extenso, manu supina, extensis digitis sustinere pondus librarum sex, ex digitis extremis suspensum. Musculus deltoides hoc in casu & brachium elevatum tenet & pondus sex librarum extremis digitis appensum. Jam vero distantia ponderis appensi ab articulo humeri, tamquam ab hypomochlio, adminimum quintupla est distantia, in qua deltoides musculus in os humeri inseritur; ergo ex hac sola ratione, si ab omnibus aliis præscindas, musculus hic, pondus sex librarum digitis appensum elevans, vim impendere debet æqualem libris triginta, atque id solum, ut æquilibrium cum pondere sex librarum sustineat; majore vi opus est, ut pondus hoc ulterius elevet. Et tamen apparet, ac si non majorem sex libris vim impenderet; nempe quia vis viginti quatuor librarum solummodo ob distantiam musculi, quam ponderis, ab hypomochlio minorem, de vi absoluta hujus musculi absimitur.

Secundo. Obliquitatem directionis &c. Potentia motrix, quæ directione perpendiculari ad vectem applicatur, ceteris paribus efficacissima est; quo plus a perpendiculo recedit, quo magis ad vectem inclinatur, eo majorem semper diminutionem virium patitur. Sunt enim potentia obliquæ ad perpendicularem, ut sinus anguli inclinationis

ad sinum totum, qui mensura est anguli recti. Si potentia motrix ipsi vecti plane parallela & in directum applicata sit, inanis erit hujus potentiae nixus ad motum producendum; si angulo applicetur infinite parvo, vis requiretur immensa ad motum producendum, licet infinite parvum. Nunc quidem nullus musculus ossibus penitus parallelus incedit, sed omnes præcipue circa articulos, ob protuberantem ossis substantiam, aliquo intervallo ab axi vectis & a centro articuli, seu hypomochlio removentur. Quod nisi factum esset, vires infinitæ requirerentur. Interim tamen omnes fere muscoli ad angulos valde acutos ossibus inferuntur. Itaque etiam ob hanc insertionis obliquitatem insignie virium absolutarum detrimentum patiuntur. Ut hoc melius pateat, resumamus prædictum exemplum. Musculus deltoides, brachium elevatum tenens, cum pondere sex librarum e digitis suspenso, vim impendere debet ex demonstratis tanto majorem, quanto longius insertione hujus musculi ab articulo humeri pondus illud distat; & cum distantia ponderis minimum quintupla sit distantiae musculi ab hypomochlio, erit vis musculi idcirco quintuplo major vi ponderis appensi & aequalis libris triginta vel ex hac sola ratione. Verum nunc considerare oportet, quanta obliquitate musculus deltoides ossi humeri inferatur, & quam acuto angulo potentia motrix vecti applicata sit; considerare oportet ex adverso, pondus digitis extremis appensum directione perpendiculari premere, adeoque ex hac ratione nunc sequitur, ut præter vim triginta librarum musculus deltoides vim aliam impendat, quæ in tantum major esse debet, in quantum sinus anguli recti major est sinu anguli inclinationis, quo is musculus ossi humeri applicatur; sive in quantum angulus rectus ex perpendiculari ponderis directione oriundus, major est angulo acuto, quem deltoides cum osse

humeri intercipit. Unde clarum est, insignem partem virium absolutarum muscoli absumi & disperdi ob insertionis obliquitatem. Sed insertiones ejusmodi obliquas symmetria corporis postulabat, quam dum affectavit sollicita natura, vires musculorum immenso multiplicare debuit, quum alias multo minores suffecissent.

Tertio. Pondus ipsius partis movendæ. Vectis mathematicorum est linea infinite rigida, inflexilis, gravitatis expers, mente solum concipienda. Sed ossa nostra insigne pondus habent. Dum ergo musculus deltoides brachium extensum & elevatum cum pondere appenso servat, ad vim muscoli absolutam determinandam, præter pondus extrinsecum, ejusque distantiam ab hypomochlio, & directionem, præter muscoli ab eodem puncto distantiam & obliquitatem, etiam computandum est pondus totius brachii, ossium humeri, radii, ulnæ, carpi, metacarpi, digitorum, denique & musculorum omnium his ossibus annexorum pondus. Hæc enim omnia una cum pondere extrinseco viribus muscoli deltoidis obluantur, & ab illo una superari debent.

Quarto. Pondus corporis appensi vel elevandi; hoc per se patet. *Una cum loco in quo applicatur;* Hoc paulo antea dictum est.

Quinto. Duplicationem summæ harum virium &c. ubi omnia prædicta recte computaveris, & in unam summam contraxeris, nondum vim integram muscoli habes, sed dimidiam solum; quare necesse est, ut eam summam multiplices per duo, sive ut duplam ponas; tum denique vim absolutam muscoli cognitam habebis. Nam musculus agens utrumque suum extremum eadem vi trahit, etsi extremum mobilius unice adducatur ad partem fixiorem; alterum extremum fixius tanta vi a parte firmiore retinetur, quantam musculus in pondus trahendum impendit; ergo pars dimidia, virium muscoli agentis causa est; ergo

ut vim absolutam habeas, addere debes vim eam, quam musculus in partem firmiorem impendit, & qua ab ea parte retinetur. Sed ea vis perfecte æqualis est summæ virium, quam in partem oppositam idem musculus impendit; adeoque summa ea duplicata dat vim absolutam musculi. Iterum in exemplo res clarior erit: sit chorda e clavo ferreo parieti infixio suspensa, illique adnexum pondus e. g. libræ unius. Licet pondus solummodo libram unam æquet, chorda tamen illa reapse vi librarum duarum trahitur. Nam quantum pondus adnexum illam deorsum trahit, tantumdem præcise clavus ferreus illam sursum retrahit retinetque. Rescissa in medio hac chorda, pars ejus inferior decedit, pars altera celeriter sursum versus clavum se retrahit, & sententiam nostram confirmat. Facilior hujus rei conceptus erit, si ponas clavum infixum vecti firmo ligneo, & trans illum vectem chordam cum pondere unius libræ appenso promissam; videbis sibi relictam hanc chordam in perfecto æquilibrio sustineri. Verum non potest esse perfecte æquilibrata, nisi utrimque vi trahatur æquali; ergo chorda hæc ibi a pondere trahitur vi æquali uni libræ, hic a clavo ferreo trahitur vi eadem; nam clavus ferreus idem facit, quod faceret libra una huic extremo appensa; ergo chorda hæc trahitur vi duabus libris æquali, etsi unicam tantummodo libram appensam habeat. Nunc hoc ipsum, quod de chorda diximus, de omni musculo tenendum est. Sic autem vis absoluta musculorum prodit ingens.

§. C C C C X I.

Hoc explicui paragraphis in prioribus dum BOERHAAVII de musculorum actione systema expendimus, simulque ostendi, pressionem illam liquidorum hydrostaticam & cistæ Mariottianæ similitudinem, ad liquidi nervei in musculos actionem illustrandam, nil conferre.

§. C C C C X I I.

Consideranda adhuc sunt quædam adminicula mechanica, quibus vel directio musculorum mutatur, vel horum motus adjuvatur, viresque augentur. Inter hæc sunt.

Primo. Fasciæ membranosæ &c. ut ad carpum & ad pedes &c. Ita tendines musculorum profundi & sublimis, tendines item extensoris digitorum in carpo revinciuntur forti ligamento, armillari dicto, quod illis supertenditur & ad officula carpi firmiter adhæret, aliud in dorso carpi, aliud in facie ejus interiore. Per illud ligamentum cavetur, ne agentibus dictis musculis tendines horum e via sua præscripta exsiliant, quod alias certo fieret, quum tendo recta linea sequatur ductum trahentis musculi. Id vero non sine difformitate contigisset, nec sine impedimento agilitatis manuum, quæ tamen ad negotia vitæ humanæ requiritur. In tarso pedis similis armilla ligamentosa adest, alia antè, quæ tendines extensores digitorum pedis coercet, alia lateralis ad malleolum externum, tendines peronei longi & brevis complexa, alia ad internum malleolum, propria tendinibus flexoris longi digitorum pedis, flexoris longi pollicis ac tibialis postici. Vid. EUSTACH. *Tab. XXVIII. XXX. XXXI.* Hæ fasciæ armillares musculis usum trochleæ præstant, ut, licet non in eadem cum musculis directione jaceant tendines, idem tamen effectus sequatur, ac si musculi ex ipso eo loco, ubi tendines revinciuntur, prodirent, ut proinde omnis musculi actio in eum locum dirigatur & pars trahenda illuc moveatur, quo alias citra mechanicum hoc adminiculum moveri non posset.

Secundo. Fasciæ latæ, musculosæ, ut in cubito, dorso, femore &c. Hæ sunt aponeuroses tendineæ, expansiones validæ tendineæ musculis præcipue longis superstratæ & arcte accretæ. Hæ

aponeuroses fibras musculares arctius coërcent & in tantum vim musculorum agentium adjuvant, in quantum elongationi fibrarum muscoli resistunt. Tantumdem enim de contractione muscoli & de vi ejus efficaci perit, quantum fibræ muscoli sex contrahendis ab ipso pondere elongantur. Hinc impediendum erat, ne fibræ musculares facile distraherentur & a pondere movendo victæ, quidquam cederent. Atque hoc cavetur, per fortes tales tendineas aponeuroses musculis accretas & superstratas, quarum tenacitate fibræ musculares arctius coërcerentur, & in actione sua firmentur. Præcipue autem hoc adminiculum necessarium erat in longis musculis; quia fibra, non muscularis solum, sed & mechanica, quo longior est, eo debilior & contra. Fila decem sericea unius pollicis longitudine, majus pondus sustinent, quam filum unum sericeum ejusdem diametri & decem pollicum longitudine, sustinere possit. Idem de fibra musculari longiore tenendum est. Et licet, ut alibi dixi, nulla fibra muscularis, integram muscoli alicujus prolixioris longitudinem absolvat, sed ex pluribus fibris, quasi concatenatis constet, nihilo tamen crassitie augentur ejusmodi fibræ sibi continuatæ; hinc pro longitudine muscoli increscit fibrarum debilitas. Ergo ne fibræ illæ sub contractione muscoli ponderi movendo cedant, aut inflectantur, tendinea forti expansione cinguntur, aut ipsæ fibræ carneæ hinc inde inserto tendine interrumpuntur. Utrumque in musculo recto abdominis videre licet, qui non solum vagina tendinosa forti, ab obliquo interno & transverso abdominis producta includitur, sed etiam tribus quatuorve distinctis locis tendineam habet substantiam, carneas fibras transversim interrumpentem. Sic & exteriori vagina fibræ arctius comprehenduntur & longitudo earum abrumpitur aliquoties, ut inde robur muscoli crescat. Ejusmodi tendinea vagina etiam musculus sacro-

lumbarem & longissimum dorsi investit. Tali vagina proteguntur & brachiales muscoli, orta a tendine bicipitis brachii & extensoris cubiti; talem etiam nacti sunt muscoli femoris & alii plures. Imo & temporalis musculus, licet brevis, valida aponeurosi tegitur, non adeo ob longitudinem fibrarum hac indigens, quam quidem ob vim ingentem, quam in morfu validissimo exercet hic musculus.

Tertio. Trochleis cartilagineis, vel osseis &c. His mutatur directio motus. Exemplum est in musculo obliquo superiore oculi, qui in fundo orbitæ a dura matre, foramen opticum investiente, exortus antrorsum, sursum, ac introrsum versus canthum oculi majorem incedit, ibique tendinem suum per trochleam cartilagineam, seu annulum ex ossæ frontis enatum trajicit, iterumque retrogradus parti posteriori, superiori & exteriori bulbi oculi inseritur. Hinc ope mechanismi hujus trochleæ oculum ita vertit, ut pupilla deorsum & introrsum versus nares dirigatur, quæ alias omnino sursum dirigeretur. Aliud exemplum est in musculo circumflexo palati molli, seu pterygo-staphylino, jam in deglutitionis actione dicto, qui ab extremo ossæ petroso & ex hoc emergente tuba EUSTACHII cartilaginea exortus, descendit juxta externum latus laminæ interioris processus pterygoidei, inde circa hamulum ejus processus circumflexo tendine, lateacente, denuo sursum fertur, inque velum palatinum inseritur, quod agens detrahit, si prius elevatum fuerit; licet ipse omnino elevaret, nisi per hamulum ossæ mutata fuisset ejus directio. Ceterum plures alii muscoli trochleas simpliciores nacti sunt, dum vel tendines suos in peculiaribus ossium sulcis decurrentes circa ossa inflectunt, vel dum tendines a directione musculi deflectentes, anfractibus ligamentosæ & fasciæ ad certas partes ita revinciunt, ut quidem musculi tractionem se-

qui, non autem e sede sua exspatiari possint, quod in carpo & tarso fieri, dictum est.

Quarto. Vel alio musculo transmittente &c. Ita primus venter musculi biventris maxillæ inferioris sæpe per secedentes fibras musculi stylo-hyoidæ transit, ut alibi dixi. Sed imbecillior est cellulosa tela hujus musculi, quam ut biventri punctum fixum præbere, aut trochleæ vicem præstare possit. Aliud exemplum exhibent musculi sublimis & profundi tendines. Nam tendines musculi sublimis bifurcantur ultimo suo fine, & singulus duplici crure secundam digitorum phalangemprehendit; inter eam vero bifurcationem transeunt tendines musculi profundi, qui extimam phalangem petunt. Sed tamen hic nulla trochleæ similitudo est; nec is fuit finis naturæ. Nam & tendines hi inter se conjuncti sunt per chordulas, ab aponeurosi, volam manus tegente, procedentes; & inde fit, ut numquam extremas digitorum phalanges flectere possimus, quin simul phalanges mediæ flectantur.

Quinto. Hypomochliis tendines musculorum sustentibus &c. Si ossa ut vectes consideraveris, erunt hypomochlia in centro cujusque articuli, in quo os movetur. Si vero musculos pro vecte habueris, erunt hypomochlia partes ossium prominulæ, tumidiores, quibus vel musculi, vel horum tendines a centro articulationis, seu vero hypomochlio removentur; quo ipso vis musculorum insigniter augetur. Musculi quatuor extensores tibiæ, cruralis, vastus internus, vastus externus & rectus cruris, tendinibus suis confluunt & in patellam inferuntur, quæ sursum & deorsum mobilis articulo genu applicata est; a patella denuo exoritur ligamentum validissimum, idque ad angulum multo majorem, quam absque patella foret, in tibiā inferitur. Per patellam igitur fit, ut tendines extensorum tibiæ, qui alias in eadem fere directione cum tibiā jacerent, atque adeo

hypomochlio articuli nimis propinqui essent, nunc ab eodem remotiores sint. Hinc vis musculorum crus extendentium augetur, hinc statio firma, firmus tutusque gressus; hinc a contrario fracta patella gressus instabilis & proclivitas in lapsum, nisi baculo gressum fulcias.

Sexto. Appendicibus ad ossa enatis &c. Hoc in mox dicta recidit. Nempe passim videas protuberantias ex ossibus enatas, apophyses, vel appendices ossibus impositas & accretas, quas epiphyses vocant. Hæc tubera unice pro musculorum insertionem & motus adjumento facta sunt. Porro omnia hæc tubera musculi removentur ab hypomochlio, seu a centro articulationis; hinc vis augetur ex legibus mechanicis. Huc pertinent trochanteres major & minor femoris, patella, ossa sesamoidea pollicis manuum pedumque, omniaque alia tubera, sive ex osseo corpore enata, sive ossibus imposita, processus omnes, ut anconæus ulnæ, condyli ossium &c. Et ubique videre licet, ipsos articulos corpore ossium, ex quibus fiunt, crassiores ac tumidiore esse. Per hoc vero musculi ab hypomochlio elongantur, ut numquam actione sua frustrentur, nisi vel causa motrix deficiat, vel pondus movendum causæ motricis vires excedat.

Septimo. Circumductione musculorum circa ossa. Ita mutatur motus directio & nascitur trochleæ emolumentum, de quo jam diximus. Adfert BOERHAAVIUS exemplum musculi obturatoris interni, qui, ab ambitu interno magni foraminis ossium innominatorum exortus, transit incisuram ischii posteriorem & in hac tamquam super trochlea reflexus ex pelvi exit, atque in foveam ossis femoris juxta trochanterem majorem inseritur. Fit hoc mechanismo, ut musculus iste, in pelvi locatus, os femoris & rotare possit & ab altero abducere.

Octavo. Vaginis pinguitudinis &c. Tela cellulosa & musculos & singulas fibrillas musculares involvit, & ipsis etiam tendinibus vaginam præbet. In hac autem cellulosa tela naturaliter adeps aservatur. Hinc fibræ continuo lubricæ & admotum aptæ sunt. Sed & intra articulos ubique liquor a glandulis conglomeratis secernitur lubricans cui oleum ex medulla ossis per tubulos peculiare transsudans miscetur & linimentum constituit, quò frictio in articulis minuitur, ipsique ad motum expediti servantur. Hæc tamen vires musculorum non augent, etsi motum faciliorem reddant.

§. C C C C X I I I.

Vis autem trahens &c. Musculus deltoides ex pluribus lacertis constat, qui omnes in unum tendinem confluunt; ita etiam pectoralis magnus, & biceps brachii, duplici origine natus, carnes in unum tendinem conjungit, & perinde triceps femoris. Quatuor distincti muscoli, extensores tibiæ in unicum tendinem coalescunt, patellæ insertum. Clarum est, vim trahentem augeri, quo plures fibræ & quo plures muscoli in unicum tendinem concurrunt, si cetera omnia paria sint.

Quo longiores fibræ, eo major aptitudo magnæ flexioni. Musculi passim fere ad dimidiam suæ longitudinis partem se contrahere possunt. Cum vero partes totum aliquod componentes sint inter se in eadem ratione, quam tota habent ad se invicem, evidens est, a parvo musculo non posse magnam artus flexionem expectari, sed longiorem requiri musculum. Musculus enim duos pollices longus, si ad dimidium se contrahat, pollice solum uno brevior fiet; musculus vero decem pollices longus, si se contrahat ad dimidium suæ longitudinis, brevis fiet quinque pollicibus, adeoque flexionem articuli majorem peragat, quam

prior. Hæc ratio est, cur eos imprimis musculos, qui flectendis & extendendis artubus destinantur, longiores fecerit natura.

Quin & fibrillæ transversæ &c. Nullæ sunt fibrillæ transversæ musculares, quæ longas fibras retinerent, firmarent; qui eas descriperunt, hos aut rugæ contracti muscoli, aut fila cellulosæ telæ fefellerunt. Tunicas musculosas viscerum, ventriculi, intestinorum, tunicam œsophagi, vesicæ urinariæ musculosam, excipere oportet, in quibus omnino fibræ transversæ cum longitudinalibus in speciem reticuli mutuo implexæ sunt, quia se mutuo juvant & actionem simultaneam habent & in id conspirant, ut cavitatem, quam ambiunt, deleant, quod ab unico & simplici fibram strato præstari non posset.

§. C C C C X I V.

Omnia, quæ hætenus dicta sunt, applicari possunt ad quemvis particularem musculum; etsi ejus origo, directio, insertio, simulque mobilitas comparata partium, quibus nectitur, cognita habeatur, actio ejus facile erui potest. Sed hæc ex professo pertractare nec multæ utilitatis est, nec nostri certe instituti.

§. C C C C X V.

Primo. Ergo muscoli voluntarii nervos habent a cerebro, vitales.

Secundo. Veri & spontanei muscoli a cerebello. Hoc penitus refutatum fuit & per anatomen & per experimenta in vivis animalibus instituta & per casus practicos, perque causas morbosas in cadaveribus detectas & comparatas cum functionibus læsis. Unde liquido patuit, nullam cerebelli peculiarem in organa vitalia prærogativam esse.

Tertio. Motus in fibris a morte superstite, a contractione spontanea vasorum & fibrarum. Recte quidem

dem tunc a sola vi elastica fibrarum contractio-
nem post mortem repetes, quando omnis in his
irritabilitas jam extincta est; at quamdiu illa
aliquo modo adhuc superest, plus certe illi tri-
buas, quam vi elasticæ.

*Quarto. Nec contractio musculi a contractione
spontanea*, nam hæc omnibus æqualis inest &
æquilibrata; *nec a contractione nervi*; nullus enim
nervus contrahitur umquam, sive irritus, sive
rescindas.

*Quinto. Succus nerveus non lædit fistulam ner-
veam ex hydraulicis.* Sed neque agit juxta leges
hydraulicas cognitæ.

*Sexto. Musculus nimis diu tensus dolet, inflamma-
tur, moritur. Cur?* Sermo hic est de musculo spas-
modice contracto, qui sine alterna resolutione
aut relaxatione constanter contractus manet;
quod malum si plures musculos occupat, tetanus
vocari solet & subinde omnes musculos prehen-
dit, ut corpus instar statuæ rigeat. Grave semper
& periculi plenum malum est & vel in nervis
causam latentem habet, vel in ipso encephalo. Ex
phænomeno contracti perpetuo & violentissime
contracti musculi, concludere licet, irritantem
causam in eo & validam esse & perpetuam sine re-
missione. Ex ea indefinente irritatione videtur fa-
brica fibrillarum muscularium quocumque demum
modo destrui; utpote quæ alterna relaxatione in-
digeant, ne corde quidem excepto. BOERHAA-
VIUS a vasis sanguineis rationem repetiit, quæ tu-
mentibus fibris compressa sanguinem non admitte-
rent, hinc inflammarentur. Sed cum musculus
contractus rubeat, quem pallere credidit BOER-
HAAVIUS, ratio hæc sponte cadit.

Septimo. Sanguis exprimitur & admittitur. Nem-
pe musculi alterne crassescunt contracti & relaxa-
ti gracilescunt, sic necessario venæ sanguineæ ma-
jores inter musculos decurrentes alternis vicibus
emulgentur, sanguis per has velocius & majore

impetu propellitur; inde ab exercitio corporis aucto augetur circulatio, cor & arteriæ frequentius pulsant, respiratio frequentior simulque difficilior fit. &c. Non tamen ex substantia musculi sanguis peculiariter exprimitur.

Octavo usque ad undecimum. Horum ratio patet ex alibi dictis.

Duodecimo. In fœtu tendines paucissimi sunt, crescente ætate augetur substantia tendinea & in senectute constanter magis, quam in omni alia ætate tendinosi sunt musculi. Hoc rigiditatis vitium est, quæ eo magis semper invalescit, quo quis annis provector est; paucos exceperis crudæ viridisque senectæ homines.

Decimo tertio. *An tumor a spiritibus?* Est a corrugatione fibrillarum; nam expansionem, tumentes vesiculas, hypothesis finxit, natura repudiat.

Quæri adhuc potest, quæ fuerit tendinum necessitas? Poterant quidem & carneæ fibræ ossibus connecti, sed numquam mollior caro tanta firmitate ossibus connecti poterat, ut tenacissima tendinum substantia. Sed & tendines carne graciliores sunt, atque adeo locum insertionis suæ occupant minorem; sic spatia nascuntur, aliis musculis locandis opportuna. Denique oportebat sæpe, ut nimis longæ fibræ nimisque debiles futuræ tendinea substantia interromperentur. Et tendo in actione musculi vix mutatur; hinc partes vicinas minus afficit, minus premit; hinc coracohyoidei musculi, ubi venam jugularem transcendunt, tendinei, ea superata iterum carnei fiunt.

Cur infantibus non eadem potestas movendi artus, quæ adultis? Non una ratio est. Et *primo* quidem tendines in tenella ætate imbecilliores sunt, nec adeo firmiter ossibus adnexi, nam in fœtu cum solo periosteo cohærent. *Secundo*: tubera ossium, quibus musculi ab hypomochliis articulorum elongantur, in adultis adeo magna,

in pueris recens natis nunc primum produci incipiunt. *Tertio* : nec ossa debitam firmitatem habent. *Quarto* : gressum in his vetat etiam capitis præpondium & gracilitas artuum inferiorum.

F U N C T I O C U T I S.

§. C C C C X V I.

Cutim vocamus exterius illud & universale corporis tegumentum, quod musculis omnibus, pinguique telæ cellulosæ, musculos involventi, superstratum cernitur & quod ipsum extima superficie instratum habet aliud tenuius involucrum, quod latine cuticula, græce *epidermis* appellatur. Inter cutim & musculos ubique in toto corpore pinguis, laxa, cellulosa tela intercedit, in qua oleum asservatur & musculis & una cuti, lubricandis destinatum, priusquam in cutim ipsam sese dispergant. BOERHAAVIUS etiam fibris musculosis hinc inde distributis præditam describit, quibus olei collecti propulsio adjuvaretur. Sed error est, a brutis ad hominem male traductus. Nam in animantibus quidem multis stratum musculosum inter cutim & cellulosam telam interjacet, quod panniculum carnosum vocant & cujus vi animantia hæc cutim corrugare, concutere & muscas, culices, aliaque insecta sibi infesta elidere possunt, ut in equis videmus. In homine paucis musculis subcutaneis in fronte, naso, labiis, mento, jugulo & ani sphinctere externo exceptis, qui in ipsam cutim fibras spargunt, eamque trahunt, ceterum in toto corpore cutis a musculis libera est & pauci hi subcutanei muscoli non in cellulosæ telæ gratiam, sed ad cutim movendam dati sunt, quod in frontalibus, corrugator supercilii, sphinctere ani externo, platysmate myoide, evidens est. Reliqua, quæ in *textu* de tunicæ cellulosæ officio, deque olei, in cellulis asservati, utilitate adferuntur, dudum aliis locis, nec una

vice dicta sunt. Unde his omiſſis jam ipſius cutis fabricam conſideremus.

Perinde ut aliæ membranæ ex filis laminisque brevibus inter ſe cohærentibus & arcte ſtipatis, conſtat, denſior ſemper, quo magis exterior & epidermidi vicinior; qua cellulofam ſubjectam ſpectat, laxior eſt & ipſa tandem in cellulofum textum degenerat; maceratione diuturna in aqua intumeſcit & in fila laminaſque ſolvitur. Sed præter eum textum, qui fundamentum fabricæ cutaneæ eſt, plurimis etiam vasis arterioſis & venoſis perreptatur, ut injecta materie ceracea tota rubeat; plurimis etiam nervis prædita eſt, in tota ejus externa ſuperficie diſtributis, qui organum tactus conſtituunt. Inde ſenſilitas cutis, cujus nullum non punctum particeps eſt; atque in hoc ab aliis membranis differt. Facile ceterum extenſilis, non ubique tamen ejuſdem denſitatis aut roboris eſt. Tenerior in palpebris, genis, mammis, præputio; firmior denſiorque in parte capillata capitis, in vola manus, plantis pedum &c. & hic ſimul magis adſtricta, uti & in auriculis. Vi muſculari deſtituitur, gaudet elatiſtica; hinc frigore conſtringitur, hinc tracta ſeſe reſtituit, hinc ſciſſa ſe retrahit, ut labia vulneris hient. Non autem ſolum extremitatem corporis tegit, ſed etiam ad interiora reſlectitur; nam ubi olim perforata deſinere putabatur, ut in ore, oculis, naribus, ano, auribus, pene, vagina muliebri, reipſa nec perforatur, nec deſinit, ſed introrſum reſlectitur, mutata paululum fabrica, ut hodie per accuratiſſimas obſervationes anatomicas conſtat. Ita membrana oris, narium, tunica nervea œſophagi, ventriculi, inteſtinorum vera cutis introrſum reflexæ continuatio eſt. Ita & in nerveam inteſtini recti tunicam cutis propagatur, ita eadem in urethram & vaginam ſe inſinuat; ita in meatum auditorium intrat & membranæ tympani inſternitur; ita denique in-

tra palpebras reflexa in adnatam oculi tunicam continuatur.

§. C C C C X V I I.

Nervi ad cutem plurimi feruntur, omnibus in locis corporis, facile distinguendi, nec pauciores fere, quam ad musculos. Hinc omne punctum cutis sensibile est. Nervi hi truncis suis & ramis majoribus per spatia cellulosa subcutanea decurrunt, indeque ramulis exiguis, quos prosequi cultello difficile est, ipsam ubique cutim subeunt & in ea evanescunt. EUSTACH. Tab. XXI. XXIII.

§. C C C C X V I I I.

In externa cutis superficie, qua incumbentem habet epidermidem, industria Cl. virorum detexit papillas minimas, albas, diversæ figuræ in diversis cutis regionibus, diversæ etiam magnitudinis. In lingua detracto epithelio papillæ hæ distinctæ cernuntur. In digitis manuum, pedumque, epidermide ablata, etiam nudo oculo conspiciuntur fila alba, oblonga, quibus papillarum nomen vulgo impositum est. ALBIN. *lib. II. annot. acad.* Tab. 7. fig. 4. Porro eadem oblongæ papillæ apparent, sub unguibus manuum pedumque. In labiis, buccis, facie, quasi villosa videntur; in glande penis ad instar flocculorum antrorsum procumbentium se habent; ALBIN. *annot. acad. lib. III.* Tab. 4. fig. 1. in mamma muliebri obtusæ potius & conicæ sunt. *Idem lib. III.* Tab. 4. fig. 2. In aliis cutis regionibus minimæ & sine microscopio difficulter cernendæ, eo autem admoto obtusæ & latiusculæ apparent. Ad eas papillas cutaneas nervea filamenta accedere, ex earumdem acutissima sensibilitate convincimur, quæ quidem longe major est, quoties in vivo homine aut animante epidermis a cute soluta est, vel ambustione, vel applicato vesicam ciente emplastro. Ablato enim hoc extimo involuero, ut per vesicantia fit & admoto microscopio, papillæ illæ albicantes in conspectum prodeunt & nudo oculo, etsi forma pa-

pillaris distincte non cernatur, tamen albicans quædam tenerrima pulpa in superficie cutis conspicitur, adeo acute sensibilis, ut etiam ad politissimi corporis contactum dolor ingens cieatur & convulsiones oriantur, si imprudentius a chirurgo libera epidermide cutis detergatur. Unde dubium nullum est, quin eæ ipsæ papillæ nerveas fibrillas accipiant. Imo vero Cl. ABRAH. KAUW, aliis anatomicis hac in parte felicior, acu & microscopio usus, difficili labore, ad ipsas usque papillas nervos cutaneos prosecutus est. Sed non ex mera nervea substantia hæ papillæ componuntur; nam & arteriolæ venulæque subtilissimæ ad eas formandas concurrunt. Id felix injectio anatomica docet: & vidi Viennæ talia præparata, microscopiis inclusa, ubi distinctissime apparet, papillas has cutaneas pulcherrimis minimorum vasculorum glomeribus componi, unde moles papillarum insigniter augetur. Sed & cellulosam telam earum compositionem ingredi, quæ vascula nervulosque ordinet & revinciat, suadet analogia, cum ubique inter minima vascula & inter ipsas nerveas fibrillas, subtilissima cellulosa se insinuet. Sed & ipsa nervorum involucra cellulosa hic finiri necesse est, ubi nervi in papillas sensui destinatas desinunt.

Quæ deponentes involucrum exterius a dura matre datum, per eas exuvias formant corpus reticulare MALPIGHII &c. De corpore reticulari MALPIGHII, quo nomine interior & cuti proxima epidermidis lamella appellatur, seorsim dicam, ubi de epidermide sermo erit. Nunc ut hic BOERHAAVII textus intelligatur, notandum solum est: MALPIGHIIUM statuisse, quod nervi, involucris suis defensi, in superficie corporis sua integumenta deponant reflectantque, ita, ut dura mater, quæ extimum nervis involucrum dederat, primum reflexa cutim constituat, arachnoidea vero reticulum & pia mater denique epidermidem reflexa producat. Verum hanc opinionem facile anatome

refellit; nam, si opticum nervum excipias, dura mater nullum alium extra encephalon progressum comitatur: ut in historia cerebri videmus. Deinde si hæc sententia vera foret, sequeretur omnino ipsam nerveam substantiam integumentis suis reflexis orbatam & denudatam, extimam corporis superficiem occupare; quod itidem contra experientiam est. Pluribus eam sententiam refutavit Cel. KAUV de *persp.* §. 57. &c. sed neque opus est immorari refellendis figmentis.

§. C C C C X I X.

Pili etiam ad historiam cutis pertinent, etsi neque in omni superficie cutis excrescant, neque in ipsa cute, sed sub hac in cellulosa tela rudimentum habeant. Radix pili cujusque exiguus bulbus est, figuræ fere ovalis, coloratus, cujus dimidia pars exterior cuti obvertitur, pars altera dimidia laxior, cellulosa telæ subcutaneæ insidet & ab ea vascula, imo & nerveos minimos furculos & fabricam pariter cellulosam accipit. Medio ventri hujus bulbi circumponitur involucrum, durum & splendidum, in lamellas divisibile, versus cutim sensim angustatum, atque ante porum cutaneum desinens. Vasculis rubris præditum hoc involucrum est, eoque aperto sanguis effluit, aut alius subviscidus humor, qui in cellulosam bulbi fabricam naturaliter deponi videtur. Tum vero simul ulteriore indagine intra hunc bulbillum alius conspicitur minor, principio subrotundo, ceterum longe cylindricus, albus & duriusculus. Hoc bulbillo iterum aperto ipse demum pilus in eo latitans cernitur, ortus ex vaginæ primi bulbi parte laxiore & pingui lubrico humori immersus, qui cellulosam interioris bulbi fabricam replet, ipsumque pilum nutrire videtur. Inde pilus mollior, quamdiu intra bulbum continetur, ubi ad porum cutis pervenit, deposita exterioris bulbi vagina, unicum solum ab interiore bulbo involucrum secum abripit, & trajecto poro cutaneo

epidermidem pertundit, simulque in transitu aliam seu extimam vaginam ab epidermide sibi adsciscit, quæ priori adeo arcte accreta est, ut epidermidem detractam una pili sequantur. Et ab hac extima vagina videtur major illa pili liberi rigiditas pendere. Incisa extima vagina intus apparent fila elastica plura, quinque ad decem, cellulosa tela & inter se invicem & cum involucrio revincta & humore lubrico, viscido, qualis in bulbo erat, inuncta. Atque hæc per subtiliorem anatomen & microscopicas observationes de fabrica pilorum a Clar. Viris detecta sunt. Patet inde, pilos esse corpora sui generis & peculiaris naturæ, neque ex *nervis* exsiccatis oriri, ut quorundam opinio erat, neque ex *glandulosis folliculis*, nisi bulbos pilorum pro glandulis habere velis. Pili penitus insensiles nullam certe cum nervis similitudinem habent & dolor, qui a tracto, vel evulso pilo sentitur, aut in bulbo pili, aut cute sedem habet, & denique nulli pili sunt in volis manuum, plantis pedum, digitorum interiore latere & apicibus, licet hæ partes maxime nervosæ sint. Ceterum in aliis locis cutis ubique fere plus minus hirta & pilosa est, saltem brevissima teneraque lanugine cincta, etiam in fæminis, & infantes recens nati toti lanuginosi sunt. Quædam autem regiones cutis præ aliis magis pilosæ sunt & in diversis regionibus pili diversæ longitudinis, diversæ crassitie conspiciuntur & diversis etiam nominibus insigniuntur. Ita speciatim *capillos* vocamus eos pilos, qui cutem cranii occupant & qui nobis longissimi excrescunt; breves, conici, reflexi pili, qui limbum palpebrarum tenent, *cilia*, qui supra orbitam oculi arcum formant imbricatum, *supercilia* dicuntur. In naribus *vibrissæ* vocantur, in genis, labiis, mento, *barbam*, in pudendis partibus utriusque sexus *pubem* appellamus; alibi generali pilorum nomine comprehenduntur, in pectore, sub axillis, in brachiis, femoribus, cruribus,

dorso manuum & pedum & in meatu auditorio externo. Incrementum pilorum sola protrusione fit; quod ex eo apparet, quia æquabilissime abradi intra unius diei spatium iterum ultra epidermidis superficiem sese exserunt. Nempe nutritius humor intra bulbum depositus in pilum succedit, eum urget, cum & ipse a novo succedente humore urgeatur. Id autem incrementum in diversis corporis partibus majus minusve est; singuli enim pili suum habent terminum, intra quem subsistunt. Color ceterum, crassities, rigiditas, vel flexilitas major, incrementum velocius tardiusve, a diversa quantitate & qualitate succi nutritii pendere videtur. Multam tamen varietatem adfert ætas, temperamentum, clima. In senio exsiccantur & cum rigiditate canescunt, & qui puero fulvi fuerant, per ætatem profundius colorantur. Frigidarum regionum incolæ passim albidos pilos habent; nigros passim, aut fuscis terrarum calidiorum habitatores; ut tamen hinc inde in quibusdam gentibus exceptio sit. Nobis prolixior capillus & rectior: Mauris suapte natura crispus & brevis, lanæ similior est, nec adeo, ut in nobis, confertus & barba itidem rarior.

Utilitas pilorum in diversis partibus corporis diversa est. Capilli capitis calorem conservant, sic perspirationem cutis promovent; supercilia in nimia luce oculum obumbrant per suum musculum detracta. Simulque sudoris ex fronte delapsum ab oculo arcent. Cilia visum juvant distinctiorem. Vibrissæ insecta a naribus arcent & titillatione sternutationem cient, qua exploditur, si quid acre in nares illapsum est. Idem forte pilorum meatus auditorii usus est. In pube, perineo, sub axillis creduntur partes ab attritu defendere. Sed videtur aliquid latere nondum bene cognitum. Videntur aliquem generalem habere usum, qui omnibus pilis communis sit. An aliquid de corpore excernunt, quod relictum noceret? Id videtur

concludi posse *primo* ex assidua horum protrusione & ex perpetua successione succi novi pilum suum prolongantis. *Secundo* ex analysi chemica pilorum, cum longe maiorem salis volatilis copiam præbeant, quam omnes aliæ partes solidæ animales, per observata NEUMANNI. *Tertio* : ex natura pilorum electrica; pili enim suapte natura electrici sunt, nec rara exempla habentur & in brutis & in hominibus, pilorum lucentium, dum manu fricarentur vel pectine. Hinc videntur pili omnino & materiem electricam exhalare & alium crassiorem oleosum, salinum humorem, qui medullam ipsorum constituit. Denique & oleo subcutaneo viam aperiunt, quod per eosdem cutis poros, per quos pili eunt, penetrat illosque oblini, observante Cl LUDWIGIO. Inde illi furfures & lemæ pingues in parte capillata capitis; inde pili semper lubrici & flexiles. Pili pubis in utroque sexu, non nisi suo tempore, prorumpunt; nec antea maribus barba proserpit, quam ad generationem apti fiant & castrati imberbes manent, si ante pubertatem testiculis privati fuerint.

§. C C C C X X.

Cutim vasculosam esse evidenter demonstrant injectiones anatomicæ, quibus tota rubet, si felix fuerit anatomici administratio. Exiguæ autem sunt cutaneæ arteriæ, nam trunci passim fere profundius & inter musculos excurrunt. Ex his truncis nati ramuli in cellulosa subcutanea repunt, illique porro minores edunt furculos, qui in cutim undique se demergunt & rete illud vasculosum in ea efficiunt, quod per injectiones apparet, ut tota cutis veluti inflammata rubeat. Eædem arteriolæ, quo magis versus exteriorem cutis superficiem excurrunt, eo semper minores fiunt, ac demum in vascula minima exhalantia abeunt, per quæ in tota cutis superficie halitum tenuem, aquosum, naturaliter invisibilem, exhalamus, & qui vel frigore condensatus specie fumi cernitur, vel copia

maiore secretus dilatatis iisdem vasculis visibilis fit & crassior jam sudor appellatur. Hunc etiam in cadavere per artem imitari possumus; nam si e. g. in arteriam brachialem aqua tepida per siphonem injiciatur, eadem specie roris subtilissimi ex omni brachii cute exsudare cernitur.

§. C C C C X X I.

Venæ subcutaneæ plurimæ & magnæ truncis suis in cellulosa, cuti subjecta, excurrunt, ubique fere, in pedibus, dorso manuum, brachio, fronte, jugulo & in macilentis ac teneriore & alba cute præditis cœruleo colore translucent. Ipsius vero cutis venæ, quæ in subcutaneas illas se exonerant, difficilius demonstrantur, quia venæ subcutaneæ ubique valvulosæ sunt & injectionem contraria directione factam, qualis in visceribus facile succedit, non admittunt. Adeste tamen venas, sanguinem a secretionem in cute facta residuum revehentes, necessarium est. Ceterum venæ bibulæ, quæ minimis osculis in tota cutis superficie ubique patent & quæ arteriis exhalantibus sociæ tenuem humorem, vel ex aëre, vel ex aliis corpori applicatis inhalant, facile demonstrantur, ex phænomenis, quibus constat, hominem aliquot horis in balneo detentum pondere insigniter augeri & hydropica corpora, evacuatis per artem aquis, cito sæpe pristinam aquæ copiam intra corpus colligere, licet parum potulentorum iis ingeratur & denique vires medicamentorum plurium, dum cuti applicantur, ad internas corporis partes penetrare & eosdem effectus exferere, quos intus assumpta ederent, de quibus dudum fufius egi in descriptione fabricæ venarum. Vasa lymphatica in cellulosa subcutanea NUCKIO visa sunt; & ab ea ipsa oriri videntur; nam ad cutim usque nemo hactenus hæc presecutus est.

§. C C C C X X I I.

Alibi dictum est, sub cute glandulas simplicissimas, seu folliculos delitescere, qui lentum, pin-

guem, sebaceum humorem præparant & per ductulos suos in extimam corporis superficiem patulos excernunt, atque ita cutem & epidermidem lubricant, flexilemque conservant. Tales folliculi adsunt in parte tota capillata capitis, sed isti humorem peculiarem, in furfures & lemas concrecentem, pinguem, excernunt; tales etiam sunt glandulae sebaceae in facie, quæ subinde mole auctæ & pressæ pinguem albicantem materiem instar vermiculi prorumpentem fundunt. Denique in universo fere corporis ambitu, plantis pedum, volis manuum ac digitis exceptis, ejusmodi folliculi subcutanei latent, qui omnes quidem pinguem viscidum humorem, sed non tamen ubique penitus eundem præparant & trans cutim excernunt. Verum præterea pori in cute reperiuntur frequentes, qui ad nullum subjectum folliculum, sed recta via ad cellulosam subcutaneam ducunt. Non ergo solum per glandulas pingue cutis unguen paratur, sed etiam ex cellulosa cuti subjecta tela per poros exsudat oleum, calore corporis liquidum. Inde sudor pinguiusculus, inde pingues maculae in linteo, vel serico conspicuae, quo faciem udam deterferis. Sed & præterea per eosdem poros, quibus pili de cute emergunt, oleo subcutaneo via patet, qua se in extimam corporis superficiem efferat.

§. CCCCXIII.

Extimæ cutis superficiei & papillis nerveis sensilissimis per eam distributis superincumbit *epidermis*, cuticula latinis dicta, peculiaris indolis membrana, insensilis, nullis prædita vasculis, poris tantummodo pertusa infinitis, quibus vascula cutanea exhalantia respondent & majoribus aliis, per quos pili sese efferunt. Eadem & in partes interiores narium, oris, palpebrarum, vulvæ, ani, descendit, alio nomine tunc a RUYSCHIO appellata & *epithelium* dicta; arcte ubique cum cute externa & ejus propagine interiora petente, cohæret, filis exi-

guis, quibus interior ejus superficies quasi hirta apparet, quæ tamen nil nisi cutaneorum vasculorum abruptæ extremitates esse videntur & pilorum denique caudices a cute soluti, licet BOERHAAVIUS in textu *ligamentula* vocarit. Disputatum olim fuit, an solum suprema cutis superficies, an peculiaris membrana esset. Postremum hodie extra dubium est: nam non solum a cute facile separari potest, in vivo quidem homine per ambustionem, aut applicatos acres stimulos, seu cantharidum, seu alterius mordacis veneni; in cadavere vero maceratione; nec difficile est totam epidermidem in puerili cadavere maceratione protracta a pedibus manibusque solvere illæsam, ut perfecte chirothecam referat, nunc ex maceratione solum aliquanto ampliorem & laxiorem, quam naturaliter fuerit. Verum & tota natura a cute differt; nam cutis sensibilis, epidermis insensibilis est; cutis tota vasculosa est, cuticula vasculis caret; cutis longa maceratione in fila laminaeque cellulosas fatiscit, non item epidermis; cutis & omnes aliæ partes putredine in tabum colliquescent, gangræna, sphacelo, corrumpuntur; epidermis iis in casibus soluta tantummodo, non item destructa secedit. Peculiaris ergo naturæ & a cute distincta membrana est.

Tota squammosa &c. Si quis in æstivo sole iter suscipiat, non assuetus ictibus radiorum solarium, ei tota epidermis, quousque sole perusta fuerit, in furfuraceas quasi squamas dehiscit & secedit, renata nova cuticula in locum prioris. In morbis, aut post morbos cutaneos, eadem simili modo desquamatur; ita in scabie sicca, post variolas, morbillos, miliaria, scarlatinas. Inde factum est, ut crederent Clarissimi Viri, totam epidermidem ex meris squamulis minimis compositam, quæ squamulæ totidem velut opercula essent vasorum exhalantium. Verum hanc speculationem confundit anatomica administratio, qua tota & integra non squammosa, sed vere membranacea epider-

mis, macerata de cute solvitur, perinde in squamulas abitura, si his constaret.

In sulcos areasque exsculptæ &c. Sulcos hos nullibi non in epidermide obvios habemus, majores hos, minores illos & in omni fere parte corporis alios. Oriuntur hi sulci mechanica necessitate, majores quidem a plicis cutis subjeçtæ, in quas illa a musculis adducitur, minores vero a sulcis cutaneis minoribus; quia epidermis ubique cuti æquabiliter instrata est, cutis vero superficies extima per papillas prominulas inæqualis redditur & hinc inde eminentibus lineis attollitur, inter quas minimi sulci relinquuntur, in quos sese epidermis demittit, semper cuti proxima. Distinctissimi & pulcherrime ordinati sulci fere spirales in apicibus digitorum sunt, ubi tactus exquisitissimus, & papillæ nerveæ distinctissime constantiore ordine dispositæ sunt. Sulcis hisce minoribus potissimum vascula sudorifera respondent, in eminentes autem lineolas epidermidis papillæ nerveæ tactiles, potius nerveo-vasculosæ dicendæ, assurgunt. Ita cuti instrata epidermis eam defendit ab aëre, defendit sensiles papillas, alias dolorem percepturas ab omni tactili objecto, & brevi ab aëre exsiccandas, atque sensui inutiles futuras, si nudæ prominerent. Interim quum tenue sit hoc integumentum, non impedit, quominus impressionem ab objecto tactili factam nervi cutanei persentiscant & eo vividius, quo tenerior fuerit cuticula. Patet hinc, cur ipsa sensu carere debuerit.

Non eadem ubique epidermidis aut tenuitas est, aut color. In vola manus & planta pedis, jam in ipso foetu crassiores esse observavit Cel. KAUV & talia præparata Viennæ vidi, ubi id evidens. Ex quo apparet, jam primitus eas partes firmitus a natura munitas fuisse, quas aut labori præ aliis destinavit, aut attritui & pressioni majori obnoxias prævidit. Ceterum vero crassities hæc per continuum attritum & pressionem augetur in profun-

dam & callosam densitatem, atque ita induratur, ut fere corneam substantiam referat, sub quo cellulæ latentes & compressæ papillæ tactiles vix quidquam sentiunt. Fabrorum ferrariorum manus explore; rigidas instar asseris videbitis, qua parte a mallei manubrio continuo teruntur ac comprimuntur. Mirum non est, ejusmodi homines vivos esse, qui plumbum fusum manibus continerent aliquo tempore, sine dolore, imo vero sine sensu notabili. Qui anchoras novales cudunt Amstelodami, manus habent adeo induratas, ut parum vel nihil cedant ungulæ animalium; iidemque teste Cel KAUÿ ferrum candens nudæ manui impositum sustinent, ut tota fumet ambusta, sine dolore tamen. Veri cyclopes! *de persp.* §. 101. Clavi pedum vere cornei, nihil aliud sunt, quam callosa, crassior & indurata epidermis. Si callum examinas, vides insensilem, sine dolore secari & uri; vides ex pluribus sibi superimpositis lamellis constare & idem in clavis pedum deprehendes, ea tantum differentia, quod in his lamellæ fortius & densius ad se invicem compactæ sint. Intelligitis hinc callum epidermidis nasci, dum non decidua veteri cuticula, nova interim sub hac generatur & priori se agglutinat, dumque ita multæ paulatim lamellæ subnascuntur & ad se invicem compinguntur, ad quod plurimum contribuit assidua & valida pressio & labor in duro opere.

Atque ista quidem morbosa sunt. Sed alia quaestio est, an naturaliter unica & simplex lamella sit epidermidis, uti quidem prima fronte videtur? an vero duplici lamella componatur, ut subtiliores anatomici contendunt? Interior nempe cuticulæ superficies, quæ cutim proxime tegit, ab exteriori manifeste distincta, reticulum Malpighii appellatur. Hoc reticulum reapse peculiarem lamellam esse, licet arctissime epidermidi adhæreat ubique, licet etiam una cum epidermide se-

cedat & de cute solvatur, non levibus argumentis evincitur. Est enim membrana tenera, mollior, quam cuticula, pulposa quodammodo & in aqua per macerationem diuturnam in speciem quamdam mucii dissolvitur, dum epidermis ipsa indissoluta perstat, nec nisi longo post tempore in mucidam naturam fatiscat observante illustri MECKELIO. In hoc ipso reticulo sedes coloris est externi corporis. Id Æthiopibus reticulum nigrimum est & ab epidermide non difficulter solvitur, quæ cinericei solum coloris est. In semiæthiope fuscum est reticulum, epidermis a reticulo separata coloris magis diluti. Diversum etiam in Europæis est pro diversitate regionum & temperamenti, diversum in diversis corporis partibus, crassissimum, ubi densior cuticula; in pudendis tenue, sed magis coloratum & fuscum in Europæo etiam homine, in quo cuticula ipsa alba & pellucida est. Idem & per morbos coloratur, flavescit, viridescit, nigrescit in ictero; & in eodem stigmata exanthematum sedem habere videntur, saltem eorum, quæ desquammatione finiuntur, ut morbillorum & scarlatinæ. Ex his videtur concludi posse, reticulum a cuticula distinctissimam lamellam esse, licet adeo arcte huic ubique accretam, ut solum pro interna cuticulæ superficie haberi possit. Ceterum hoc ipsum & vasculis caret & nervis & proxime papillis cutaneis insternitur, quas in foveolas suas ita recipit, ut ultra cutis æquabilem superficiem elevatae papillæ tactiles intra istas reticuli foveolas tutæ nec complanatae, recondantur. Foveolæ istæ reticuli manifestæ sunt in epithelio linguæ detractæ & inversæ, maxime in brutis, in quibus etiam poris conspicuis pertusæ sunt, quos in humani reticuli foveolis non deprehendis. Ubicumque in lineolas eminentes epidermis assurgit, ibi intus reticulum foveolas impressas habet, in quas papillæ tactiles recipiuntur. Ceterum quod ad genesis reticuli Malpighiani & epidermidis

epidermidis attinet, dissident inter se physiologi. Alii ab humore per cutem exhalante & ab aëre ambiente exsiccatō ac condensato nasci credunt. Sed jam in fœtu mediis in aquis detento & reticulum adest & cuticula. Alii pro finibus ultimis vaporum perspirantium habent; sed nimis facile tota epidermis cum suo reticulo de cute solvitur. Ex muco condensato reticulum nasci, quia maceratione in eum dissolvitur & magis condensatam exteriorē superficiem epidermidem esse, quoniam & ipsa post longam macerationem in mucidam naturam solvitur, Cl. HALLERUS credit. Videtur id suadere calli generatio, per solam compressionem ac condensationem reticuli & epidermidis; videtur idem suadere sensibilitas digitorum aucta, dum manus vel aqua calida foventur diutius, vel sapone lavantur. Nempe & calida & omnes saponēs soluti mucum solvunt; ita reticulum nervos integens attenuatur & in eadem ratione sensibilitas papillarum augetur. Non tamen ita hactenus stabilita est hæc sententia, ut eam pro certa amplecti liceat.

SUDORIS EXCRETIO.

§. CCCCXXIV.

Quæ hoc paragrapho dicuntur, ea imaginatio finxit, anatome non demonstrat. Diximus passim sub cute glandulas simplicissimas delitescere, sebaceas, aut alium pinguem viscidum humorem præparantes, quo cutis inungitur. Præter has alias glandulas finxerunt Cl. Viri, quæ organum sudoris essent. Nempe MALPIGHIUS & ejus sectatores, quum pro omni secretionē glandulas necessarias esse crediderint & sudori suos assignare folliculos debebant. Hos & BOERHAAVIUS alique physiologi ita receperunt, ut etiam valvulis, seu operculis tecta ostia harum glandularum describerent, quidam etiam figuris ea opercula illustrarent. In confirmationem sententiæ suæ attulerunt argumen-

tum a tuberculis cutaneis petatum. Nam, uti notum est, cutis aëre frigidiusculo afflata sæpe in exigua tubercula elevatur & tota exasperatur; ejusmodi cutem anserinam dicimus. Jam vero hæc tubercula ipsas illas glandulas sudoriferas esse credebant, quæ operculis frigore contractis liquidum suum effundere non potentes mole sua intumescerent. Verum certum est, nulla ejusmodi tubercula, nullasque glandulas observari in extremis digitorum apicibus; & tamen in hisce sudor omnium frequentissimus est. Nec in fronte, aut facie ejusmodi tubercula surgunt; & sæpissime tamen frons & facies largissimo sudore perfunditur. Sed nec alii sub cute folliculi deprehenduntur, præter eos, quos diximus pinguem spissiusculum humorem parare; nunc vero sudor potissimum tenuis & aqueus est. Valide expresso per vehementes labores sudori viscidam folliculorum materiem admisceri & glandulosi hujus unguinis secretionem augeri, dum impetus humorum versus cutim in universum augetur, nemo abnuat; sed non ideo proprium sudoris organum glandulæ subcutaneæ sunt. Neque sanus homo umquam sua sponte sudat, nisi causa aliqua externa accesserit, vel calor aëris, vel potus calidi assumpti, aut stimulantia sudorifera, vel motus corporis validus, vel major cutis laxitas &c. cur ergo natura peculiare organum fabricasset in gratiam humoris, qui nec naturalis est sano corpori? Sed ab arteriis exhalantibus sudorem profundi, id quidem multo magis & rationi consentaneum est & experientiæ. Nam in quamcumque artus alicujus arteriam post mortem aquam tepidam impuleris, ruet eadem versus cutis superficiem & specie sudoris ex omni hujus superficie prorumpet; aut nisi ea copia statim per epidermidis poros transfludare possit, qua advenit, etiam epidermidem in tubercula, imo & in vesiculas attollet, atque a cute separabit. Id fit, quando gluten aqua solutum in arterias injicitur, quod

non facile per poros epidermidis se subducere potest. Confirmat idem transsudatio facilis aquæ tepidæ in cavitates internas corporis, quæ per solas tamen exhalantes arteriolas fit. Denique sic intelligitur, cur naturaliter a sano homine sudor absit? nempe quia vascula exhalantia in statu naturali adeo minuta sunt & impetus humoris vi circulationis in extrema hæc vascula pulsi adeo exiguus est, ut tenuissimum solum halitum transmittant, qui solum visibilis redditur, dum denso, polito, metallico, vel vitreo splendente speculo exceptus condensatur, illudque nebula quadam, cito iterum evanida, obfuscatur. Contra vero cur sudor oriatur, dum corpus vel ab externo aëre incalescit, vel a stimulantibus ingestis circulatio exagitur? Nempe eo in casu & vascula cutis exhalantia calore dilatantur, & impetu humorum a tergo aucto, distenduntur, unde intra datum tempus non solum plus humoris, quam antea, sed & humor perspirabili materie crassior & visibilis, per hæc vascula transprimitur. Intelligitur ex eodem fundamento, cur aucta circulatione sanguinis a causa interna sudor, ut in febribus acutis, chronicis & in fine paroxysmi intermittentium? cur multo potu calido diluente ingesto sudor oboriatur? cur idem ab exercitio corporis majore? cur a dissolutione humorum? cur stragulis tecto corpore adeo promoveatur? omnia inquam hæc ex aucto humorum versus cutim ruentium impetu & ex relaxatione ac dilatatione præternaturali vasculorum exhalantium facile intelliguntur, quin opus sit glandulas peculiares fingere, quæ quandoque sudorem excernant, & plurimo alio vitæ tempore officio carentes otientur.

§. C C C C X X V.

Variat sudor excretus non solum copia majore vel minore, sed etiam qualitatibus. Atque hæc varietates a diversis circumstantiis pendent, quas hic breviter BOERHAAVIUS recenset. *Primo: pro va-*

rietate coeli & soli. Quo atmosphaera ambiens calidior est, quo regio aliqua magis fervida, quo æstas siccior & ardentior, eo plus desudant homines, nec solum plus, sed etiam eo viscidiorum & acriorem sudorem profundunt & coloratum una a transsudante oleo subcutaneo & materie sebacea glandularum, quam vis caloris simul cum aqueo humore provocat. Hinc æstivis temporibus fervente cœlo fere sudore diffuunt homines; & is ipse sudor manifeste falsus est & sæpe admodum acer, ammoniacali penetrabili falsedine, ut in me ipso sæpe expertus sum. Idem sudor & industria flavescens colore maculat & rigiditatem his inducit, dum exsiccantur, ex quo manifestum est, non solum aquam, sed una crassiorem, viscidulum, aut gelatinosum humorem, per spiracula cutis magno calore dissipari. Omnia autem hæc augentur in illis hominibus, qui in magno ejusmodi calore simul corpus valide exercent. Vitriarii adeo acrem sudorem excernunt, ut salem in facie istorum hominum in crystallos colligi viderit HALLERUS.

Secundo : sexus, ætatis, temperiei. Viri potissimum acrius olere dicuntur, quam feminae; dantur vero etiam examinati viri & feminae viragines in quibus inversa ratio obtinet. Ætas majorem varietatem adfert; nam juniores magis in sudores proni sunt; senes etiam in maximo æstatis fervore aut nihil quidquam sudant, aut certe minimum. Temperamenti sicci homines, ceteris paribus difficilius sudant, facilius autem laxi, sanguinei, calidi.

Tertio : emundiorum seu loci corporis, ex quo sudor excernitur. Sudor capitis pinguiusculus est, alius & magis aqueus in fronte excernitur, alius iterum sub axillis, copiosus admodum & viscidulus; in pedibus extremis omnium foetidissimus & adeo viscidus, ut in faeces crassas nigricantes densetur, potissimum in interstitiis digitorum.

Quarto : pro ratione victus. Potus calidi diluentes majore copia assumpti, jusculum tenue calidum, potus Thee, Caffee, sudorem & excitant & promovent, si modo aër corpus ambiens moderate calidus sit. Sed & observatum est, ingestorum qualitates sæpe adeo pertinaces esse, ut in ipsum sudorem transeant. Ab allio assumpto sudor allium redolet; redolet moschum, asam foetidam, sulphur, si hæc corpori ingerantur, licet non magna quantitate. Acidulum sudorem ex nimio abusu acidorum, sunt auctores, qui observarint. Et contra ex abusu victus animalis sudor foetidus.

Quinto : pro ratione vitæ, segnis vel laboriosæ. Quo enim validiore motu corpus exercitatur, eo copiosior & viscidior sudor exprimitur. In quiete non sudamus, nisi alia causa accesserit sudorem proliciens. Imo vero sudor motu provocatus, mox sponte cessat, si ad quietem rediveris.

Sexto : pro ratione temporis cœtionis ; nempe uti de urina diximus, eo semper saturatiorem minigi, quo majus ab assumpto cibo & potu tempus elapsum est, ita idem de sudore obtinet. Dum æstivo calore sudantes, magnam copiam aquæ frigidæ, vel alterius liquidi tenuis, diluentis, ingurgitamus; non ideo quidem sudor cessat, imo potius, dum calor externus sævire pergit, etiam abundantius profunditur assumpto diluente liquido. Verum ille sudor tenuis, lymphidus, potissimum aquosus est. Ubi autem potulenti ingerendi facultas non datur, sudor viscidior, acrior, magis coloratus, magis falsus & oleosus profunditur. Deficit enim paulatim latex aquosus sanguinis, eo magis semper, quo diutius cibo & potu abstinemus; hinc salis & olei in nostris humoribus proportio augetur, simulque acrimonia.

Septimo. Addi posset, *pro varietate aliarum excretionum auctarum vel immutarum.* Nam quo majore copia urina excernitur, eo sudor parcior est & vicissim cum pauca urina sudor abundantior

conjungitur. Hinc malum signum in illis morbis, qui per sudorem solum judicandi sunt, si urina copiosa, aquea, tenuis mingatur; significat enim, humores versus renes ruere & sudorem frustra expectari, nisi illa evacuatio mature possit compesci.

Octavo denique varius est sudor pro genio morbi. Sed hoc ad pathologiam pertinet.

In corpore sano vix adest, nisi peccato sex rerum non naturalium. Nempe sanissimus homo sponte sua numquam sudat, quia vascula perspirantia in statu naturali adeo exigua sunt, ut tenuissimum solum & invisibilem halitum transmittant, quem aër externus nostro corpore & frigidior & siccior, constanter aufert. Ubi autem vel calore externo vascula hæc nimium relaxantur, vel impetu humorum versus cutim ruentium magis distenduntur, vel cutis stragulis operta sic fovetur, ut aër ambiens materiem perspirantem sufficienter auferre non possit, vel ubi motu musculorum valido, aut aucta ab interno stimulo circulatione corpus vehementius incalescit, vel ubi aliæ excretiones aquosæ imminuuntur, vel denique potus diluentes aquosi, in vasa minora facile penetrantes & calidi, majore copia assumuntur, vel vi peculiari cujusdam morbi dissoluti humores versus cutim aguntur, iis in casibus sudor prorumpit, jam parcius, jam abundantior, jam tenuior, jam viscidior, pro variatis circumstantiis. Hinc strikte loqui si velimus, omnis sudor morbosus est, dum scilicet id omne pro morbo sumitur, quod præter naturam in nostro corpore contingit. Et hoc sensu recte olim dixit HIPPOCRATES: Ubi sudor, ibi morbus: Aphor. *L. IV. num. 38.* Verum cum sanitas latitudinem quandam habeat, intra quam subsistere potest, etiam mutatis conditionibus naturalibus corporis humani, cum absoluta & perfectissima sanitas in omni homine desideretur, hinc etiam levis sudor & qui functiones non admodum lædit, vulgo pro morbo non habetur.

Primo effectū semper nocet. Perditur enim per sudorem pars liquidior aquosa humorum nostrorum & longe plus, quam perspiratione insensibili, dissipatur. Præterea dilatatis vasculis exhalantibus non solum excrementitius humor, sed etiam inquilina & utilis lymphæ diffatur. Hinc a sudore diu protracto tanta debilitas sequitur. Hinc reliqua massa fluidorum spissior & acrior, circulationi minus apta, remanet. Hinc in regulis sanitatis habent medici, ut exercitatio corporis ad initium levissimi sudoris, nec ultra protrahatur.

Per accidens aliquando juvat. Dum scilicet talia, quæ relicta nocerent, per sudorem eliminantur, aut dum materia morbifica per hanc viam de corpore expellitur. Ita febres ardentes sudore largo totius corporis calido, prægresso rigore & horrore in sanitatem non raro terminantur; ita febrium intermittentium singuli paroxysmi sudore finiuntur; ita morbi pestilentiales, morbi maligni, a suscepto miasmate oriundi, sæpe spontaneo sudore aut judicantur, aut ex parte levantur. Sed ejusmodi sudores a natura morbum superante vi automatica excitantur & critici medicis dicuntur, nec quidquam juvant, si a vi morbi oriantur, aut si in statu cruditatis prorumpant, dum materia morbi nondum ita subacta & attenuata est, ut per vias cutaneas eliminari possit. Per accidens etiam prodest sudor in hominibus laboriosus, sed victu crudo utentibus & qui alvo segnior sunt. In his enim una cum sudore ea per vias cutaneas ejiciuntur, quæ relicta nocerent. Hinc ejusmodi homines optima sanitate fruuntur, dum alius vitam sedentariam vivens ab eodem victus genere pessime afficeretur. Prodest etiam per accidens sudor, si natura jam consuetudinem in hoc illove individuo contraxerit; nam & tunc solet excrementitias particulas per sudorem abigere & ejusmodi homines mox ægrotant, sicubi sudor consuetus ex quocumque errore cessaverit.

SANCTORIANA PERSPIRATIO.

§. C C C C X X V I.

Univerſum corpus exhalare & inhalare, ex ſu-
dore quidem jam veteribus notum fuit & ex aliis
quibuſdam phænomenis. Siquidem jam HIPPO-
CRATES *Epid. Lib. VI. ſect. VI. totum corpus ex-
ſpirans & inſpirans pronunciavit.* Et GALENUS *lib.
de uſu part. cap. V.* diſtinctius idem docuit his
verbis: „ ſicuti per determinata in cute oſcula ex-
„ cernunt quidem extrorſum omne, quodcumque
„ vaporoſum & fumoſum redundans eſt; accipiunt
„ vero in eadem ex ambiente noſmet aëre non
„ parvam portionem. Et illud eſt juxta HIPPO-
„ CRATIS dictum, quod exſpirans & inſpirans uni-
„ verſum corpus. „ Sed modum & copiam hujus
inſenſibilis perſpirationis, ejuſque varia, vel aug-
menta, vel decrementa pro mutatis circumſtan-
tiis, primus omnium SANCTORIUS, Italus medi-
cus, experimentis demonſtrare aggreſſus eſt. Inde
ab hoc tamquam inventore inſenſibilis perſpirationis
etiam Sanctorianæ dicta eſt. Fecit autem SANCTO-
RIUS experimenta in aëre calido & humido Vene-
tiis; & corollaria ab experimentis deducta, edidit
aphoriſtico ſtylo in libello *de med. ſtat.* Ut autem
ſciret, quantum per inſenſibilem tranſpirationem
de corpore difſletur, ponderabat proprium corpus
in ſtatera, ponderabat dein omnem cibum & po-
tum, quem intra 24. horas aſſumpſerat; pondera-
vit excrementa alvi & urinæ, intra idem tempo-
ris ſpatium reddita. His factis, elapſis 24. horis
dum ruruſ corpus ſuum ponderaret, invenit id
in optima ſanitate nihilo gravius eſſe, quam fue-
rat ante viginti quatuor horas, ante cibum potum-
que ſumptum; ſimul invenit excrementa alvi &
urinæ ſimul ſumpta multum infra pondus cibi &
potus aſſumpti ſubſiſtere; unde pronum erat con-
cludere, reliquum omne, quod de pondere aſ-
ſumpti cibi potuſque in excrementis & in corpo-

ris pondere desiderabatur, per vias cutaneas invisibiles, perque pulmonis exhalationem de corpore decessisse. Observavit porro, si cibus & potus diei sit ponderis octo librarum, transpirationem insensibilem ascendere ad quinque circiter libras; hinc esse hanc excretionem ad excretionem alvi & urinæ simul sumptas, ut 5. ad 3. Addidit vero quantitatem perspirationis insensibilis aliquam varietatem pati, pro varietate naturæ, regionis, temporis, ætatis, morborum, ciborum & aliarum rerum non naturalium. Perspirationem autem eam, quæ per superficiem aëream pulmonis & ex ore fieret intra idem tempus, ad semilibram æstimavit ex guttis, in speculo ori præposito collectis. Experimenta tamen ipsa non descripsit, unde judicare possemus, num justa sint corollaria, quæ ab experimentis deducta recensuit. Post SANCTORIUM Cel. DODARTUS Parisiis in proprio corpore per multos annos experimenta instituit, quibus fugacem hanc materiem ad bilancem redigeret & ejus mensuram daret; & ille quidem Parisiis minorem invenit perspirationem, quam SANCTORIUS Venetiis, esseque proportionem perspirationis, ad alvi & urinæ excretionem simul sumptam, non majorem quam 15:12: vel 15:10. adeoque ad summum tertia parte solum ceteras excretionem superare. Sed nec hujus Clarissimi Viri experimenta exstant, præter pauca corollaria. Sed alii viri illustres in diversis regionibus hæc tentamina repetierunt, in Belgio GORTERUS, in Anglia KEILIUS, in Hibernia ROBINSON & sub æstuoso Carolinæ meridionalis cœlo Cl. LININGS & nuper iterum in Anglia Cl. HOME. Ex horum experimentis accuratioribus omnino patet, diversitatem magnam in calculis esse, nec SANCTORII corollaria in universum comprobari, certe non in regionibus frigidiori cœlo subjectis. Nam etsi quidem in calidissimis regionibus perspiratio insensibilis uncias 60. superet, in frigidis tamen eadem

intra uncias 50., 40., etiam 30. subsistit & in his urinae copia cum perspirationis quantitate certat, aut illam superat. Deinde recte monet Cl. HALLERUS, demendum esse id omne, quod per sputum rejicitur, imo exsudationem unguinis cutanei & muci narium, asperæque arteriæ, qui vel emungitur vel excreatur, mensuram, & pulmonalem transpirationem subtrahendam esse, ne defectus ponderis soli perspirationi cutaneæ insensibili attribuat; denique raros esse homines, qui libras octo cibi & potus intra diem absument. Sed non est credibile, SANCTORIUM, qui in ceteris adeo subtilis erat, de sputo simul ponderando non cogitasse; & unguinis cutanei ratio exigua habenda est, quandoquidem illud exsudans in superficie cutis manet, nec avolat in aërem ut perspirabilis materia. Ratio vero perspirationis pulmonalis nulla haberi debet, cum de perspiratione in universum agitur; quaeritur etenim, quid perspirando de corpore decedat & quantum; non quaeritur, quantum per solas vias cutaneas decedat, neque id determinari posset, cum certa mensura dari nequeat ejus quantitatis, quæ per superficiem aëream pulmonis exhalat. Id quidem verum est, raros esse homines, qui cibum potumque ad libras 8. intra diem ingerant; sed neque hoc SANCTORIUS voluit; dicit enim solummodo, si quis libras 8. cibi potusque assumpserit intra diem, 5. libras per insensibilem transpirationem dissipari, ut ostenderet, evacuationem hanc $\frac{5}{8}$ partes omnium evacuationum simul sumptarum adæquare; ea vero proportio stare potest etiam cum minore ingestorum quantitate. Nunc vero si etiam in frigidioribus regionibus perspiratio tanta non sit & urinae copiam non æquet, ut ex KEILII experimentis sequitur, si hyemali tempore multo minor sit perspiratio, urina vero copiosior, non ideo fides SANCTORIO deneganda est; qui in aëre calidiore experimenta fecit & qui alio procul du-

bio victus regimine usus est, quam KEILIIUS & Angli medici ceteri, cum in universum Angli potu valde diuretico, gratissimo *Punch* liberalius indulgeant, ex quo urinæ copia augetur & in ea ratione perspiratio minuitur. In nostris regionibus partim ob cœli zonam frigidiorē, partim ob potum diureticum, cerevisiam vel vinum Austriacum, minor etiam perspiratio est & nullus dubito, quin in meo corpore urinæ copia perspirationem, frigido imprimis tempore, si non superat, certo adæquet. Sume loco vini diurectici Austriaci aut loco cerevisiæ, vinum Hungaricum generosum & mox insignem diversitatem animadvertes; videbis urinæ copiam præter solitum imminui. Mirum itaque non est, copiam perspirationis Cl. Viris in diversis regionibus experimenta facientibus & diverso victus genere utentibus, non eandem fuisse deprehensam, quam SANCTORIUS observavit; nec aliud quid ex omnibus hisce experimentis sequitur, quam quidem perspirationem insigniter variare pro ratione climatis, tempestatis anni, temperamenti hominum, victus, regiminis, &c. Sed id ipsum jam SANCTORIUS animadvertit. Et tamen in nostris etiam regionibus & in Hibernia teste Cl. ROBINSON æstivo tempore perspiratio urinam superat in ratione 5. ad 3., quæ proportio valde insignis est & parum a SANCTORII calculo differt, cum alvi excrementa solummodo quatuor vel quinque unciarum sint & proportio perspirationis Sanctorianæ sit ad urinam & alvum simul ut 5. ad 3. Nunc præterea aliud quid animadvertendum est, nempe etiam universam cutim & universam superficiem pulmonis aëream per venas bibulas minimas vicissim inhalare. Pone nunc tantummodo libram I. intra 24. horas inhalari; pone cibum potumque assumptum fuisse librarum VI.; pone urinam intra hoc tempus redditam fuisse librarum III., alvum unciarum V., erit quantitas excrementorum alvi & urinæ si-

mul = unciis XLI., & quantitas perspirationis, si homo ad pristinum pondus rediverit, = libris III., = unciis V., = unciis XXXI., adeoque minor videbitur excretio insensibilis excretionem alvi & urinæ simul sumptis. Verum ille idem homo interea temporis inhalavit libram I., & tamen nihilo gravior nunc est, quam fuerit ante 24. horas, ante sumptum cibum potumque; debet ergo etiam computari id omne, quod corpori per inhalationem accessit, debet id ipsum addi summæ ponderis cibi potusque. Licet enim homo ille sex tantum libras ingesserit, cum tamen interea temporis, libram I. inhalaverit, idem est, ac si septem libras cibi potusque assumpsisset. Nunc ubi post 24. horas ad pristinam levitatem rediit & alvus fuerit = unciarum V., urina librarum III., seu unciarum 36., necesse est, ut perspiratio insensibilis fuerit unciarum non 31. (quo in casu summa excretionum solum æqualis esset ingestis assumptis) sed ut fuerit unciarum $31. + 12 = 43$; nam 12. uncias interea corpus inhalavit & tamen hanc etiam quantitatem, seu illi saltem æqualem perdidit. Ergo etiam hoc in casu, qui minime favet SANCTORIO, ubi alvi & urinæ excretio simul sumpta superat partem dimidiam ingestorum, excretio tamen insensibilis superat adhuc utramque, si simul inhalatio computetur, prout computari debet. Quomodo vero invisibilis humor tanta copia intra spatium viginti quatuor horarum dissipari possit, mirum non videbitur illi, qui latissimam superficiem cutis, tum porro superficiem aëream pulmonis, oris, narium, considerat, qui cogitat numerum vasculorum exhalantium in tanta superficie prope modum infinitum, etiam si LEUWENHOECKIO enormem visionem pro vera recipere non velit; qui denique expendit etiam plantas, in quibus vis impellens multo minor est, tamen abundanter perspirare & esse stirpes aliquas, quæ plus perspirant, quam animantia & homines, per observata HALESII *veg. stat.*

§. C C C C X X V I I.

De exhalatione subtilissimi vaporis in cavitates corporis internas jam alibi sæpius dictum est. Et in his quidem cavitatibus perspiratio etiam sensibilis fit inciso vivo animali & copiosior, quam in externis partibus, quum interna magis caleant, externarum partium calorem aër continuo auferat. Sed internarum partium perspirationem, excepta ea, quæ in pulmone, ore, naribus, faucibus, larynge obtinet, non oportet cum externa perspiratione confundere; quia, quidquid in cavitates internas exhalat, id omne iterum resorbetur in statu naturali, nec de corpore decedit, neque adeo pondus corporis minuit. Cetera, quæ in textu dicuntur, jam explicata sunt.

§. C C C C X X V I I I.

Subtilitas. Subtilitatem hujus humoris docet ejus invisibilitas; nec alio argumento opus est. Interim tamen duabus conditionibus visibilis reddi potest, si nimirum vel frigore condensetur, vel majore copia secernatur, ita ut subsequens vapor priorem, antequam de corpore aufugere potuerit, contingat & cum eo in particulas majores, guttulasque sudoris coalescat. Postremum hoc fit, quoties vel aucto externo calore & relaxatis vasculis perspirantibus, vel, aucta ab interno stimulo circulatione, perspiratio augetur. Primum vero observare licet, dum pars corporis quæcumque externa politæ superficiei metallicæ, vel speculo nitido proxime admovetur, quo in casu perspirabilis materia ad medium, aëre & nostro corpore multo densius appulsa, condensatur, & speculum, vel laminam metallicam, nebula visibili obducit. Ita etiam pulmonalis exhalatio hyemali aëris frigore condensata visibilis fit & specie fumi proflatur.

Non turbata æquabilitas. Hoc sic sumendum est, ut omni quidem tempore in sano homine perspirationem succedere dicamus, sed non ea æquabilitate, ut omni tempore eadem sit perspi-

rantis halitus copia. Nam non solum in diversis hominibus diversa est perspiratio, nec ratio ætatis tantummodo variat, sed etiam in eodem homine diversis a cibo potuque sumpto horis alia est, alia est somni tempore, quam vigillarum, alia in motu corporis, alia in quiete, alia jejuno, alia repleto corpore & pro variis aliis circumstantiis varia, ut infra speciatim dicetur. Non ergo æquabilis est hæc excretio, nisi æquabilitatem illam sumas pro continuitate excretionis numquam interrupta, in sensu latissimo.

Copia maxima. Hæc tanta est, ut in calidis regionibus & æstivo tempore etiam in nostris frigidioribus, omnes alias excretiones simul sumptas notabili excessu superet.

Levitas simul ad sensum. Hoc perpetuis observationibus constat, corpus agilissimum esse & ad motus expeditum cum sensu levitatis, quando perspiratio optime procedit; contra vero grave esse corpus & torpidum, cum sensu lassitudinis, dum perspiratio quacumque de causa supprimitur, vel minuitur. Et si in parte aliqua seorsim, v. g. capite, perspiratio minuatur, ea pars sola ceteris gravior & hebetior videbitur. Nempe non percipimus proprii corporis pondus, dum circulatio legitime peragitur & dum iusta fluidorum ac solidorum proportio adest. Dum vero proportio illa, cui assueti sumus, vel in parte quadam, vel in toto corpore turbatur, illico excessum illum persentiscimus & de gravitate corporis insolita, deque lassitudine conquerimur. Id fit post ingurgitationem majorem cibi & potus; idem in omni plethorico homine observare licet. Et sæpe unica tantum libra humorum si superet, eam gravitatem & lassitudinem inducit; nam unica libra sanguinis subtracta, sæpe plethora pro tempore tollitur. Nunc si cogites hominem in nostris regionibus æstivo tempore ad libras V. fere intra 24. horas perspirare, si ponas, quacumque de causa, perspirationem ita imminui, ut ille loco V. librarum tan-

tum II. perspiret; jam massa humorum illius hominis tribus libris aucta erit, vasa in ea proportionem magis extensa, quæ omnia augentur, si de novo cibum potumque assumat. Unde mirum non est, gravitatem corporis, torporem, lassitudinem, sensuum hebetudinem & ea symptomata ab immixta perspiratione subsequi, quæ alias a plethora, seu nimia humorum abundantia oriuntur. Adde quod ubique fere, saltem in artubus extremis, vasa cutanea cum vasis musculorum communicent & ab iisdem truncis proficiantur; suppressa igitur excretionem cutanea (nisi alia evacuatio in locum hujus succedat) vasa musculorum majore liquidi redundantis copia infarciuntur, sic muscoli, accumulato humore onerati, de agilitate sua multum perdunt. Accumulari autem liquidum in locis præcipue subcutaneis dum perspiratio suppressa, nec alia evacuatione substituitur, evidenter docet tumor manuum & pedum variolis confluentibus accedens, dum cutis tota crusta imperspirabili tegitur.

Pondus auctum ad stateram. Augmentum post somnum. Sed hæc cum sensu levitatis conjuncta esse oportet. Nempe si corpus recte perspiraverit & ad sensum leve atque expeditum sit, interea tamen pondus corporis ad stateram auctum deprehendatur, optimæ valetudinis signum est, præsertim in illis, qui ad incrementum nutriuntur, in pueris, adolescentibus, juvenibus. Pondus enim corporis auctum docet, reapse corpori aliquid accessisse, illudque ad incrementum nutriri; sensus vero levitatis cum aucto pondere corporis conjunctus, docet facile id augmentum recipi a corpore illæsis functionibus, nec naturam gravari hoc excessu & perspirationem reliquasque excretionem intra justos limites consistere, sed in viris protractæ ætatis, qui non jam ad incrementum, sed subsistentiam solum nutriuntur, vix auctum corporis pondus cum sensu levitatis jungitur, vixque illæse manent functiones, nisi per alvum, urinam &

insensibilem perspirationem tantum quotidie de corpore decedat, quantum ingestum fuit.

§. C C C C X X I X.

Multi omnino morbi a suppressa vel imminuta perspiratione oriuntur, & omnes fere perspirationis suppressio vel diminutio præcedit. Paucis enim morbis, qui subito sanos invadunt, exceptis, reliqui omnes præcedentem habent insolitam lassitudinem, torporem, debilitatem, gravitatem corporis, qualis ex perspiratione cohibita sequitur. Hinc lassitudines spontaneas, citra externam causam obortas, morborum prænuncias dixit HIPPOCRATES, easque pro signo certissimo alicujus morbi ingruentis habuit. Ab ipsa perspirabili materie, in corpore retenta, morbos nasci, mirum non est, tum quod universa humorum massa sic præter consuetudinem augetur, tum multo magis ideo, quod humor iste excrementitius, jam usu suo functus, corpori utilis amplius esse non possit. Et licet id, quod exhalat, aqueæ potissimum indolis sit, clarum tamen est, si retineatur in corpore, nec aliis excretionibus auctis suppleatur, sic temperiem naturalem humorum turbari & inde functiones partium facile lædi posse. Verumtamen non hæc nimis exaggeranda sunt, neque ideo suppressa aut imminuta perspiratio morbos valde graves & periculosos infert, neque illi etiam morbi, quos imminuta perspiratio præcedit, ab ea tamquam causa semper oriuntur. Morbi, qui ex sola perspiratione suppressa, citra aliam causam graviolem internam vel externam oriuntur, plerumque leves sunt & facile solvuntur. Sæpe etiam alvi fluxus liberior, aut urinæ major excretio sponte naturæ tollit incommodum, ex retento perspirabili natum. Multis gentibus calidarum regionum more receptum est, cutim oleo aut unguento perfricare, quo ipso vasculorum exhalantium oscula obstruuntur & perspiratio multum imminuitur, sine incommodo tamen. Et Cel. HOME
experimentis

experimentis in proprio corpore factis, non solum multa ratione imminutam perspirationem, sed etiam penitus suppressam, inque inhalationem conversam, absque noxa tulit. *Medical. factis. exp.* 17. Denique plerique morbi, priusquam in actum erumpant, solent jam aliquo tempore antea latentem in corpore causam habere, quæ quidem ipsa sensim vires frangit, functiones gradatim lædit, quæ ipsa causa morboſa in corpore præexistens facpissime perspirationem simul suppressit aut imminuit, ut morbus demum in actum erumpens videri possit ab imminuta perspiratione ortus, licet illa tantummodo effectus fuerit causæ morboſæ in corpore latitantis. Possem hæc pluribus exemplis practicis confirmare, sed ea non sunt hujus loci.

§. C C C C X X X.

Hoc loco agitur de illis causis, quæ perspirationem insensibilem promovent & quæ e contrario eam imminuunt. Inter has recensentur.

Primo: viscera, vasa, fibræ, robusta. In his enim ceteris paribus fluidorum & solidorum motus major est, cordis & arteriarum actio fortior, calor etiam major. Hinc & perspiratio copiosior. Sed robur illud vasorum, viscerum, fibrarum, intra justam mediocritatem subsistat oportet, nec nimium sit. In senectute certe solidarum partium rigiditas major est, quam in omni alia ætate & tamen minus perspirant senes. Nimis enim auctum robur solidarum plus justo resistit fluidis. Hæc in senibus conditio est. Nec adeo reagunt in humores vasa rigidiora, ut vasa fortia quidem, sed cum justo robore satis flexilia & elastica. Adde, quod in senibus circulatio tardior sit & vis cordis minor, cum & hujus musculi irritabilitas per longam ætatem demum elanguescat. Itaque dum dicitur, quod viscera, vasa robusta perspirationem promoveant, id de requisito illo justoque robore viscerum & vasorum intelligendum est, quod nec nimium sit, nec nimis parvum, sed in illo me-

diocritatis puncto consistat, a quo potissimum sanitatis integritas pendet. Et præterea cetera omnia paria spectare oportet.

Secundo : motus corporis exercitatus ad primum initium levissimi sudoris. Per motum corporis augetur velocitas & impetus circulationis; muscoli enim alternis vicibus contracti & relaxati, sanguinem venosum fortius & celerius propellunt versus cor; inde etiam aucto stimulo cor & velocius & fortius contrahitur & actio fluidorum in sua vasa & horum vicissim in fluida augetur; & inde major attritus & caloris incrementum & attenuatio sanguinis efficacior. Hinc augetur exercitio corporis perspiratio, tum quia calor oritur major, quo vascula cutanea relaxantur, tum quia attenuatis per motum humoribus copia materiæ perspirabilis augetur; tum denique, quia augetur impetus cordis in vascula hæc, adeo a corde remota. Id experimenta statica confirmant unanimi auctorum consensu, qui per exercitium corporis intra horam triplo, imo subinde etiam 10plo & 14plo plus quam in quiete perspirari observarunt. Hinc intelligitur defectum aut imminutionem perspirationis refarciri posse moderato corporis exercitio, quod jam SANCTORIUS notavit, *Secl. V. n. 34.* Protrahendum autem est ejusmodi exercitium ad initium levissimi sudoris, tumque ab eo cessandum, quia sudor humores utiles evacuat & vires frangit, nisi quis huic jam assuetus sit, aut aliæ circumstantiæ sudorem exposcant. Multum sanitatis præsidium in exercitio corporis non absere posuerunt medici veteres, multosque morbos sic præcaveri posse, aut tolli, etiam nostræ ætatis peritissimi medici affirmant. Et hæc ratio est, cur sæpe solum medicamenta pro forma ægris præscribantur, simulque exercitium corporis imperetur, a quo sæpe magis salubritas pendet, quam a medicamentis assumptis.

Venus modice exercita. A rara & moderata venere perspirationem augeri & corpus levius reddi,

SANCTORIUS observavit, ab immoderata autem & frequenti imminui & supprimi; hæc enim quam maxime corpus debilitat & multa alia mala post se trahit pejora, quam incommoda suppressæ perspirationis.

Somnus septem vel octo horarum &c. Observavit SANCTORIUS in universum plus, imo & duplo plus somni quam vigiliarum tempore perspirari. Inde tanta post placidum somnum corporis levitas & agilitas. Ab irrequieto vero somno & jactitatione in lecto perspirationem imminui deprehendit; nihil etiam vel parum a tali somno reficimur. Notare vero oportet, augmentum illud perspirationis nocturnæ nequaquam ab ipso somno pendere, qui ex natura sua perspirationem, ut omnes alias excretiones minuit; sed esse solummodo effectum caloris æquabilis, quo corpus universum bene tectum fovetur & vascula cutanea, in balneo quasi vaporoso hærentia, relaxantur; hinc dicitur in textu : *bene tecto corpore*. Nam si quis detecto corpore dormiat, perspiratio insigniter minor est somni tempore; imo qui pedibus solum denudatis dormiunt, una libra minus perspirant, observante SANCTORIO. Hinc manifestum, si tempore somni major sit perspiratio, quam vigiliarum, rationem phænomeni non in somno quærendam esse, sed in tempore lecti. Verum annon deceptus est SANCTORIUS & alios in errorem induxit sequaces? an certum est phænomenon? annon ratio-cinio potius, quam experimento, hac in parte stetit Italus observator? Ita prorsus videtur. Nempe quia corpus a somno placido levius nobis videtur & agilius, ideo etiam plus perspirasse nocturno tempore & quia post irrequietum somnum ac jactitationes in lecto corpus minus leve minus agile nobis apparet, ideo etiam minus in tali somno perspirasse, conclusit. Verum levitas illa apparens post placidum somnum & expedita musculorum agilitas a relictis viribus pendet; maxi-

ma enim in somno placido nutritio & virium restauratio fit; ab irrequieto somno parum reficimur; hinc corpus debile, muscoli torpidi, ignavi, minus obsequiosi, sensuum minor alacritas. Hanc unice rationem esse, nec perspirationem ullas hac in re partes habere, experimenta Cel. DE GORTER, in *Exercit. de somno & vigil.* §. 13. manifeste demonstrant, qui in omnibus suis tentaminibus, accurate in proprio corpore institutis, observavit, semper minorem somni tempore perspirationem fuisse, quam vigiliarum; & idem ponderato corpore post vigilias, licet ad sensum grave & minus agile sit, semper tamen illud comparative levius invenit, quam post somnum placidum, licet tunc multo agilius & levius videatur; & denique somnum turbatum, irrequietum, cum insomniis & jactitationibus, corpora reapse ad stateram leviora reddere, licet ob virium detrimentum, lassâ, ignava, torpida. Sed & omnia phænomena idem docent. In somno enim placido motus omnes voluntarii silent, motus vero vitales continuo decremento imminuuntur, eo plus, quo hic diutius protrahitur; imminuitur etiam omnis alia secretio & excretio. Tempus lecti, ut favet transpirationi, ita perinde inhalationem juvat, quum atmosphæra proprii corporis, undique tecti, ab aëre non auferatur. Et hinc per concubitum morbi contagiosi celeriter communicantur. Denique certum est, omnes, qui somno plus indulgent, abundantius nutriri & pinguescere, omnes qui justo plus vigilant, macie consumi; quodsi vero plus somni tempore, quam vigiliarum, perspiraretur, quomodo fieri posset, ut corpus per somnum adeo pondere augeatur in molestam obesitatem, gracilescat contra per vigilias? Quid, quod ipse SANCTORIUS ex somno nimis protracto perspirationem penitus suppressi observavit? *Sed. IV. n. 50.* Sed & experimenta KEILII, DODARTII, LININGS, ROBINSON, HOME, unanimi consensu demonstrant, perspirationem somni tempore mi-

norem esse, quam sub vigiliis, licet proportio perpetua & certa assignari non possit.

Affectus moderatæ lætitiæ. Animi pathemata vim magnam habent in mutanda circulatione sanguinis; ab aliis incitatur motus cordis & arteriarum, ab aliis deprimitur. Inde ab animi affectibus vehementioribus & morbi graves oriuntur, & subinde iisdem tolluntur. Cum in ipsam circulationem humorum tantum imperium exercent animi pathemata, facile patet, ab illis & perspirationem insensibilem mutari, vel intendi, vel deprimi pro singulari cujusque affectus genio. Observatum est ab ira & pericharia (immoderata lætitia) perspirationem augeri & corpus reapse levius fieri, levissimum autem a consolatione animi, teste CLAR. ROBINSON. Timor verò & mœstitia perspirationem supprimunt, favent inhalationi. Hinc tristes & meticulosi adeo facile morbos contagiosos suscipiunt & pestilentiali miasmate frequentius aliis hominibus inficiuntur.

Juventus. Senes minus perspirant junioribus. In illis sicca cutis & rigida, in his mollis, laxa, humidula est. In junioribus vis vitæ major est, circulatio humorum velocior, impetus cordis vividior & in vasa minor resistantia, humorum actio efficacior. Interim tamen cum uberiore perspiratione continuum incrementum sumunt corpora juniorum, dum senes continuo magis decrescunt. Non ergo absolute loquendo plus perspirant juniores; viri enim consistentis ætatis tantumdem intra 24. horas perdunt, quantum ingesserunt, pueri non item. Sed & pueri & adolescentes respectu voraciores sunt, unde naturæ, post largam etiam perspirationem, abunde suppetat materia, quam in augmentum corporis impendere possit. Et videntur simul plus vicissim inhalare & promptius per laxam mollemque cutim, quam ætas adultior.

Cibi solidi, leves, fermentati, non pingues, interpolatis levissimis aromatibus. Cibus potusque etiam

perspirationem insigniter mutat. Bene pastus homo, ceteris paribus, multo plus perspirabit jejuno. In hoc observata recentiorum cum illis SANCTORII conveniunt. Cum cibum potumque ad libras 8. & $\frac{1}{2}$ intra 24. horas consumpsisset Clar. RYE, qui in Hibernia experimenta fecit, libras quatuor & uncias octo perspirabit media in hyeme, tantum fere, quantum in aëre calidiore SANCTORIUS. Qui non cœnavit, is ea nocte tertia parte minus perspiravit, observante SANCTORIO; KEILIUS levissime cœnavit & perspirationem nocturnam exiguam habuit, vix uncias 12. excedentem, dum SANCTORIUS 40. & 50. & plures uncias unica nocte perspirasset. Clar. HOME cum non cœnasset, adeo non perspiravit nocturno tempore, ut etiam ad duas uncias pondere augetur. Certum igitur est, largius pastos in universum uberius perspirare. Non tamen mox a cibo sumpto perspiratio augetur, imo vero primo tempore coctionis exigua est. Aliquot autem horis a pastu elapsis, dum chylus jam in sanguinem movetur & cum eo circumducitur, perspiratio increscit. Ratio horum phaenomenorum hæc est : in homine jejuno deficit in sanguine materies perspirabilis, quum & prægressa perspiratione plurima ejus copia difflata fuerit & in universum massa humorum in jejuno homine diminuta sit, hinc vasa majora minus respective plena; vascula ergo minora & maxime quæ longius a corde removentur, minus urgentur liquidis; quin contra fit tanto uberior secretio in partibus internis calidioribus & vacuis, ore, ventriculo, intestinis; major secretio salivæ, succi gastrici, enterici; hoc ipso vero diminuitur secretio externa cutanea. Hinc exigua in jejuno perspiratio. Contra vero, assumpto cibo potumque, augetur penus materiæ perspirabilis, sed necesse est, id quod ex cibo potumque in perspirationem vertitur, prius in sanguinem transfundi & repetitis circulationibus attenuari in eam ubilitatem, ut vascula exhalantia facile subire

possit. Hinc non statim a pastu, sed aliquot horis elapsis, dum cibus jam notabili tempore vires digestionis expertus est, dumque chylus jam in sanguinem infunditur & cum eodem per vasa circumducitur, perspiratio increfcit. Adde phænomenon, quod in bene pastis calor generetur aliquot gradibus major, quam in jejunis, ut alibi ostendi; calor autem corporis præcipue perspirationi favet. Per primas tres vel quatuor a pastu horas perquam exigua est perspiratio, ab hora quinta & sexta ad nonam & duodecimam maxima est. Sed etiam qualitas cibi potiusque præcipue spectanda, non sola quantitas. Nam quo ceteris paribus levior cibus & facilioris digestionis, eo plus perspiratur; quo magis tenax, viscosus, digestu difficilis, eo magis perspirationem diminuit, supprimit. Carnes observante SANCTORIO a cœna ad prandium perspirant uncias 18.; vervecina caro, mollior & tenerior, trientem libræ plus, quam aliæ carnes perspirat; a tenuiore cibo 40. uncia perspirantur. Caro porcina, difficilis digestionis perspirationem insigniter minuit; ita etiam fumo indurata, omnium maxime lardum, cibi multum refrigerantes eandem minuunt, exemplo melonum; promovent aromata cibus addita dosi moderata, quæ leniter stimulant, digestionem facilitant, motum humorum incitant; sed majore copia aucto stimulo sudorem cient. Promovent etiam diaphoresin acetum & citri succus, cepæ, allium, nasturtium, sinapi &c. Inter potulenta aqua calida, omnesque potus aquosi calidi, thee, caffèe, perspirationem augent, quia & ipsam materiem perspirabilem augent & vascula cutanea facile subeunt ob tenuitatem suam & denique calore relaxant. Alii potus perspirationem eo magis juvant, quo minus diuretici sunt, exemplo vini generosi, moderate sumpti. Vina vero tenuia oligophora, cerevisiæ tenues, urinæ copiam augent, & in ea proportionem perspirationem minuunt.

Aër purus, serenus, siccus, gravis; aërem purum, serenum, siccum graviorem esse aëre nebuloso, humido, aut certe magis elasticum esse, constat experimentis physicis. Ejusmodi aër vapores ex corporibus exhalantes facile suscipit, aufert, dissipat. Humidus vero, levior & minus elasticus aër nec adeo prompte recipit vapores, nec adeo facile dissipat. Eam differentiam videre licet in fumo caminorum, qui alacriter ascendit & cito dissipatur, atmosphæra gravis elastica sicca; contra vero cœlo nebuloso, humido, deprimitur. Aër ergo purus, serenus, siccus, gravis, elasticus perspirationem promovet, quia atmosphæram nostri corporis constanter aufert. Aër vero humidus parum aufert perspirabilis vaporis, quum jam pene saturatus aqueis vaporibus vix possit ultra quid recipere. Itaque tum propriæ nostri corporis atmosphære immersi minus perspiramus; imo vero augetur inhalatio partim nostri vaporis, partim aëreæ humiditatis.

Frigidus. Frigidus aër ex sua indole perspirationem adeo non promovet, ut eam potius certo imminuat. Frigus enim ut omnia corpora condensat, ita & cutim nostram compingit & poros epidermidis contrahit. Hinc in aëre calido perspiratio semper abundantior, quam in frigido, ceteris iisdem positis. Et iterum major perspiratio in aëre calido & sicco, quam in calido & humido & pari ratione major in aëre frigido & sicco, omnium minima in frigida simulque humida atmosphæra. Sed alia ratio subest, cur BOERHAAVIUS aërem frigidum & siccum inter causas, quæ perspirationem promovent, recensuerit; nempe si cum exercitio corporis conjungatur. Nam etsi aër frigidus ex sua indole perspirationem supprimat, aut minuat, quia vasa cutanea constringit, tamen hac ipsa condensatione solidorum corpus nostrum insigniter firmat & robur ejus mire adauget. Hinc longe validior oritur reactio fluidorum & solidorum, attritus longe

vehementior, incalescentia corporis major, si in ejusmodi aëre corpus valide exerceatur. Hinc & attenuatio fluidorum in perspirabilem tenuitatem & impetus humorum versus cutem augetur. Hinc perspiratio maxima, imo & sudor, si in frigore magno corpus valide commoveas. Hinc etiam hyemali tempore felicius digerimus & multo plus cibi & cibos duriores concoquimus, quam æstivo, ubi solida nostra calore atmosphæræ adeo relaxata & debilitata sunt. Hinc illi qui in maritimis regionibus super glacie validissimo & celerrimo impetu lubricando se exercent, tantum perspirant, ut sudoribus in media nive fere diffuant & fame ac voracitate ingenti afficiantur, teste BOERHAAVIO, quo in casu eos non spirituosius reficere oportet, quæ citissime diffantur, auctis adeo vasorum & viscerum viribus, sed cibo solido, difficillimæ coctionis, pane nigro, carnibus & piscibus fumo induratis. Itaque frigidus aër & siccus cum quiete corporis perspirationem omnino supprimit, idem cum motu corporis valido eam promovet maxime.

Hiscæ recensitis causis perspirationem promoventibus aliæ adhuc addendæ sunt, a BOERHAAVIO speciatim non allatæ. De calore quidem sparsim dixi, addi debet laxitas cutis; & omnia quæ cutim relaxant. Hinc etiam a balneo, quamquam aqua imbibatur magna copia, deinde tamen perspiratio multo uberior fit, quam fuerat antehac & in hora ad plures uncias & ad libram integram, atque ultra subinde ascendit. Hominem intra 14. dies ex balneorum usu 28. libris leviolem reddi- tum esse, refert Cel. WAINERIGTH, *of bathing.* pag. 164. HALLER. *El. Phys. T. V.* pag. 77.

Denique & vis electrica perspirationem auget & circulationis velocitatem, per certa experimenta. Et ipse aër videtur eo magis perspirationem augere, quo magis electricus est.

§. C C C C X X X I.

Expositis nunc iis conditionibus, quibus perspiratio augetur, sponte patet, ab omnibus, quæ

his contraria sunt, eandem minui & eo magis, quo plures contrariæ conditiones concurrerint. Minuitur vero præterea aliis excretionibus auctis, fluxu urinæ majore, aut diarrhœa. Jam HIPPOCRATES id notavit, dum ait: cutis densitas, alvi laxitas & contra. Hinc etiam diarrhœa, a suppressa perspiratione orta, optime curatur bene tecto corpore & contra frigus munito, datisque diaphoreticis medicamentis, quæ ad cutim humores determinant & perspirationem ac sudorem cieant. Et a contrario funestissimo cum eventu in iis morbis, qui per solam cutim critiche evacuantur, alvi fluxus succedunt, quia versus alvum ruente humore crisis cutanea præpeditur. Et idem de largiore urinæ tenuis, aquosæ, fluxu verum est, quod jam supra dixi. Ita plerumque res se habet; sunt aliqui casus excepti ob alias rationes, quæ huc non pertinent. Observarunt tamen etiam auctores, qui experimenta statica fecerunt, perspirationem non semper a purgatione minui. Sed recte monet Cel. DE GORTER, posse omnino fieri, ut purgatio perspirationem non minuat, imo vero ut eam augeat, eo scilicet in casu, ubi a corrupta in primis viis materie perspiratio suppressa est, quam dum aufert purgatio, etiam perspirationem promovet.

§. C C C C X X X I I.

Materia perspirationis maximam partem aqueæ naturæ est, quod docet vapor visibilis redditus & guttæ in speculo collectæ & collectus in orbibus vitreis humor, hyemali præsertim tempore. Cum ea aqua exhalare simul videtur materies electrica, per se quidem invisibilis, sed facile demonstranda experimentis, in quibus etiam forma scintillarum & flammularum prorumpit. Denique videtur aqueo huic vapor admixtum esse aliud quoddam principium odoratum subtilissimum, pars attenuatissima olei animalis; simplex enim aqua inodora est. Canes tamen solo odore feram non visam insequuntur, insequuntur herum amissum, etiam in

distantia non minima. Quid? quod nos ipsi eum odorem percipiamus, dum in parvis cubiculis & clausis degimus ac dormimus; & evidentius dum plures in eodem cubiculo decumbunt. In nosocomiis res est notissima. Sed in spatiosis cubilibus, aut in aëre aprico non percipimus odorem propriæ exhalationis.

Causa est vis cordis & arteriarum, quæ humores in vascula hæc a corde remotissima pelluntur, simulque proportionata cutis laxitas. Aliquid causæ utique latet in calore, qui continuo de nostro corpore in atmosphæram frigidioram transit & aqueas secum particulas una de corpore aufert. Sed in hoc non latere integram perspirationis causam, ut quidam voluerunt, vel ex eo clarum est, quod calor ille fere semper æquabilis sit, nam de calore naturali loquor; atque adeo & perspiratio necessario fere æquabilis foret, si inde solum penderet; nunc vero illa diversis ejusdem diei horis variat.

Effectus est, quod humor nulli jam usui in corpore futurus, si retineretur, imo potius nociturus, excernatur, tum quod aliæ excretiones simul subleventur. Alias enim alvi vel urinæ excretionem augere debuisset natura, quarum utraque majori nobis incommodo fuisset, quam insensibilis hæc evacuatio.

Necessitas, ususque. Necessitas ex dictis patet. Usus vero hujus perspirabilis materiæ non infimus est; licet enim excrementitia sit, magnam tamen cuti utilitatem præstat, quam continua humectatione emollit, flexilemque conservat. Sed & papillæ tactiles per omnem cutis superficiem distributæ continua humectatione indigent; nam exsiccatus nervus sensilitate sua privatur. Siccis naribus vix odorem percipimus; arida lingua non percipit bene sapores; sic arida cutis sensum tactus minus exquisitum habet. Canes olfactus organo pollent sagacissimo; sed illis præhumidæ

semper nares sunt. Itaque materia perspirabilis non omni utilitate caret, sed cutim mollem, flexilem, perviam, nervos tactus sensiles, conservat.

§. C C C C X X X I I I.

Augto sudore perspirationem minui. Si vasa sudorifera distincta essent a vasis exhalantibus, omnino recte diceret BOERHAAVIUS. Sed demonstratum est, eadem vascula, quæ naturaliter humorem insensibilem perspirant, aucta circulatione humorum, aucto calore, maxime vero bene tecto corpore, humorem visibilem dilatata emittere. Omnes certe eadem causæ, quæ perspirationem promovent, auctæ sudorem proliciunt; & eadem medicamenta diaphoretica dosi majore & regimine debito sudorifera sunt. Eadem circumstantiæ & perspirationem supprimunt & sudorem. Nonne & ex iisdem renibus jam tenuior, aquosa, jam crassior & magis oleosa urina secernitur? quid repugnat ab iisdem vasculis cutaneis jam tenuem invisibilem, jam crassiorem visibilem humorem secerni?

Friciones. Hæ augent motum humorum in parte, cui administrantur. Docet id calor & rubor & intumescencia partis perfrictæ. Sic humores stagnantes impelluntur, attenuantur, obstructa solvuntur, auctoque in parte humorum affluxu & calore etiam plus perspirari consequitur.

Debilibus, atrophicis, phthysicis, syncope laborantibus, moribundis. Debiles & laxa sunt cute & pauco cruore, multa vero tenuioris humoris copia abundant. Adest ergo in his materia sudoris & viæ magis patulæ, si causa excitans accesserit. Atrophici, phthysici, ex acrimonia humores corrumpente & ex febricula, sudant. Syncopiticis & moribundis frigidus prorumpit sudor, nec ille vi cordis, sed sua sponte, resoluta nervorum actione, ex qua causa etiam in animi affectibus quibusdam sudor oritur, etsi ratio ultima latet.

NUTRITIO, INCREMENTUM,
DECREMENTUM.

§. CCCCXXXIV.

Hoc subtile BOERHAAVII ratiocinium non id evincit, quod deberet. Non necessaria sequela est, ideo quia flexile est corpus humanum, totum ex parvis vasculis fabricari debuisset. Multa alia corpora flexilia sunt, etsi non vasculosa. Etiam metallica fila & fila vitri, metallo rigidioris, flexilia sunt. Poterat ergo creator flexile facere corpus humanum sine vasculis. Nunc autem sic fabricatum esse voluit corpus nostrum, ut solidis partibus & fluidis constaret, utque solida a fluidis & hæc vicissim ab illis impellerentur ac moverentur. Porro fluidum illud, quod maxima vasa replet, heterogeneum esse voluit & diversæ naturæ, diversæ gravitatis ac molis, particulis compositum. Voluit porro, ut distinctæ corporis partes distinctum ac peculiarem humorem acciperent distinctum humorem ab universali sanguinis massa separarent. Non poterant autem partes solidæ corporis diversæ ab unico corde sufficientem sanguinis copiam accipere, nisi per vasa majora, nec poterant a recepto sanguine humores tenuiores separare, nisi per vasa minora, liquidorum decrescenti ordini respondentia. Ergo & majoribus vasis componi debuit corpus humanum & minoribus, continuo decrescendentibus, quorum tot series diversæ requirebantur, quot sunt diversæ series liquidorum nostrorum a rubro sanguine continua proportionem decrescendentium. Non abnego, sic flexilitatem partium augeri, sed unice nego, eam primarium scopum fuisse, cur ex minoribus & continuo decrescendentibus vasculis corpus nostrum fabricatum fuerit. Certe magnum est dubium, num fibræ tendineæ vasculosæ sint? flexiles ta-

men certo sunt. Paucula vasa in cellulosa tendinis substantia, & ea quidem difficulter demonstranda, huc non pertinent; nam de ipsis fibris tendineis loquor. Cartilaginea vasa penetrant, sed ipsa cartilaginea substantia vasculis caret, elastica tamen & flexilis.

§. C C C C X X X V.

In motu humorum per vasa nostri corporis vita consistit. Id ex hactenus dictis constat. Cesset humorum motus in aliqua parte corporis sic, ut restitui non possit, aderit mors partis illius, quod in gangræna & sphacelo patet. Cesset in toto corpore motus humorum, ut restitui non possit, aderit mors perfecta totius corporis. Vita ergo nostra (si corporea solum spectemus) est effectus motus humorum circulatorii per universa corporis vasa. Sed potentiae, quibus hic motus peragitur, validissimæ sunt; sanguis ex corde projectus pellitur in arterias convergentes, semper angustiores, semper humore plenas & propellitur ea vi, ut omnes totius corporis arteriæ sensibiles eodem tempore eleventur; & propellitur ea velocitate, ut spatio 6. vel 7. minutorum horæ tota massa humorum, 50. libris æqualis in homine adulto, circulum suum absolvat. Porro arteriæ sese alternis vicibus contrahentes sanguinem receptum per fines suos propellunt in venas comites, & urgent ea vi, ut in ipsum usque cordis dextri sinum refundatur. Ex motu ergo adeo veloci, adeo valido & impetuoso, adeo perenni, in vasis semper plenis, magnum partium attritum oriri, necesse est, & ex eo affricu particulas vasorum solidas deteri consequitur, uti videmus corpora etiam durissima ex affricu deteri in experimentis physicis. Atque detritus ille se habet in vasis nostris pro velocitate & impetu liquidorum fluentium majore vel minore,

& in ratione superficierum sese confricantium. Jam vero in vasis majoribus maxima est sanguinis velocitas & impetus quoque maximus, in minoribus & a corde multum remotis vasculis, minor quidem velocitas & impetus est, ut ratio superficierum sese confricantium crescit, unde etiam detritus crescit ex hac saltem ratione; nec ipsa vascula teneriora multum huic resistere possunt, quippe quorum elementa minus firmiter cohærent, quam majorum vasorum; cohærent tamen firmitus, si rationem habeas liquidi perfluentis, cum proportio soliditatis crescat in vasis minimis, quod nisi factum esset, paria omnino non forent sustinendo affricui, ex aucta superficie oriundo. Ex omnibus hisce clarum est, ipso eo motu humorum, in quo vita consistit, corpus nostrum continuo destrui, partes solidas deteri, fluidis misceri, de corpore eliminari. Confirmant hoc ipsum phænomena in morbis acutis observata, in quibus aucto humorum motu etiam attritus major est. Si quis consideret urinam hominis acuta febre decumbentis, quantum non turbata est? quanta & quot ramenta solidarum partium detrita non exhibet? De fluidis alioquin dubium non est, quorum magna portio continuo per superficiem aëream pulmonis, cutis perque renes de corpore secedit.

§. C C C C X X X V I.

Cum ergo per ipsas vitæ actiones & fluidorum copia continuo minuatur, & solida quoque continuo affricui deterantur, manifestum est, vitam nostram paucorum dierum spatio duraturam, nisi corpus nostrum continuo reficeretur & in locum particularum detritarum atque eliminatarum novæ restituerentur. Unde nutritionis necessitas intelligitur. Necesse autem est ad subsistentiam corporis, ut tot & talia præcise restituantur, quot

& qualia deperdita fuerunt. Nam nisi tantum restituatur, quantum actionibus detritum ac deperditum fuit, corpus nutrietur quidem, sed nutrimento non sufficiente; hinc etiam sub ipsa nutritione decrefcet. Nisi vero talia restituantur, qualia fuerunt perdita, nutritio vel nulla fiet, quod vascula hæc alienum humorem non recipiant; vel si fiat, erit nutritio depravata, e. g. si succus osseus in cellulofam arteriarum membranam deponatur, osseæ ibidem præter naturam lamellæ nascentur. In junioribus vero corporibus quæ incrementum capiunt, etiam necesse est, ut plus nutritiæ materiæ corpori applicetur, quam per actiones vitæ deteritur.

§. CCCCXXXVII.

Massa humorum nostrorum reparatur indies chylo recente, ex alimentis elaborato & per vasa lactea resorpto, qua ipsa via, & aër chylo solutus corpori inducitur. Aliquid etiam tenuis humoris aquei ex atmosphæra per venas bibulas inhalatur. Inde quidem reparata fluidorum massa materies habetur, quæ viscerum & vasorum actione continuata in nutritium humorem elaborari potest sed quæ ipsa nondum ad nutriendum, apta est. Hinc probe distinguendum est inter nutritionem & repletionem. Replere corpus, in potestate hominis est, nutrire, solius naturæ opus est. Dentur enim e. g. phthisico fercula exquisitissima & plurima, e quibus & multus chylus & laudabilis paretur; non ideo corpus ejus nutries, quin lædes eo magis, quo plus nutrire volueris. Ea enim humorum separatio, quæ per chyli in sanguinem infusionem fit, solummodo repletio est. Ut vero partes solidæ nutriantur, requiritur, ut chylus ille nostris humoribus infusus vi viscerum & vasorum in materiem plasticam, nutritioni aptam elaboretur, ut per vascula minima corporis distribua-
tur,

tur, partibus solidis, e quibus per actiones vitæ detritus elementa quædam abstulit, applicetur, applicatusque humor ille alibilis retineatur, & ex fluida natura in statum soliditatis transeat. Facile ergo patet, nutritione majoris momenti opus esse, & unitas ac conspirantes naturæ vires exposcere. Et patet inde, nullum esse fundamentum transfusionis sanguinis, quum, si etiam nullis aliis hæc operatio difficultatibus obnoxia esset, nil tamen nisi repletio sit, neque ideo nutritioni etiam consultum sit, quod sanguinem alium in alterius vasa transfuderis. Et patet denique, cur morbi a repletionem oriundi, ceteris paribus, minus periculosi sint illis, qui ab inanitione aut defectu humorum oriuntur, quod jam HIPPOCRATES notavit: nempe demere corpori semper possumus per venæ sectionem, purgantia, alia evacuantia; nutrire autem non est in potestate medici, qui actum aget, utcumque corpus repleverit, nisi vi viscerum & vasorum materies nutrititia ex ingestis elaboretur & partibus detritis applicetur.

§. CCCCXXXVIII. §. CCCCXXXIX.

Omnis pars solida nostri corporis constituitur ex aliis minoribus, majori quam maxime similibus. Hujus asserti veritas ex iis patet; quæ hæcenus in cursu physiologico de fabrica viscerum & aliarum partium solidarum dicta sunt. Pulmo lobulis componitur minimis, quorum singulus eadem fabrica constat, qua totus pulmo, si extimam membranam excipias. Ita hepar, lien, acinis constant vasculosis, quorum eadem structura & eadem actio est, quæ totorum viscerum. Vasa majora ex minoribus vasculis & membranis componuntur. Ossa ex fibris osseis minimis toti ossi, quod ad naturam hujus attinet, similibus; muscoli ex innumeris fibrillis sui generis, nervi ex nerveis fibrillis in fasciculos congestis sunt.

Fere autem ubique tela cellulosa se insinuat, si corpora ossium solida excipias. Sed & præterea, licet sui similibus particulis minoribus solida majora constent, tamen non iis unice constant. Nerveæ fibrillæ simplicissimæ, & fibrillæ musculares, & viscerum textus vasculosi, intercedente dissimili tela cellulosa discriminantur; musculis præterea & tendinibus, & ipsis ossibus vascula adrepunt, seque interponunt & substantiæ dissimilitudinem faciunt; prorsus ut nulla pars solida in totum iisdem & sui similibus homogeniis elementis constet, neque adeo ANAXAGORÆ homœomeria locum habet. Denique licet adeo stupenda sit divisibilitas vasculorum & solidarum nostri corporis particularum, non tamen eam in infinitum progredi, ratio dicat. Liquida enim nostra quævis determinatæ magnitudinis moleculas habent, & suis quæque vasis coërcentur; proinde & terminum aliquem vasculorum esse necesse est.

§. C C C C X L.

Solida nostra valde pauca haberi. Hoc jam in physiologiæ initio demonstratum est. Nempe nihil vere solidum est in nostro corpore, præter ultima elementa terrestria. Partes solidæ vulgo dictæ nostri corporis ex illis terreis moleculis quidem componuntur, simul vero fluido glutine intercedente, quod ex aqua, aëre, oleo, compositum, stamina illa terrestria connectit, constant. Dictum etiam est, quo magis pars aliqua solida nostri corporis elementis terrestribus abundat, & quo minus fluidi intercedentis habet, eo ceteris paribus densiorem ac firmiorem esse; contra vero eo molliores esse partes, quo minus habent staminum solidorum terrestrium, quo magis fluidis abundant, quod laxiorem semper inter elementa terrea nexum efficit. Solidissimæ corporis nostri partes ossa sunt, sed etiam inter omnes

nostras solidas partes ossa plurimum terræ continent. Et tamen ex solidissimis ossibus plus quam dimidium pondus fluidi per chemicam analysin elicitur; longè major fluidorum proportio in reliquis solidis partibus obtinet. Lien humanus exsiccatus ab unciiis 14. sui ponderis ad drachmam unam redigitur; exsiccatus cerebri cortex ad $\frac{1}{25}$ sui ponderis redigitur; quod autem exsiccatione disperditur, nil nisi fluidum est. Neque exsiccatio omne fluidum, quod solidis nostris partibus inest, dissipat, cum exsiccatae ejusmodi partes, si igni chemico subjiciantur, adhuc plus quam $\frac{1}{2}$ fluidi præbeant, quod inter solida elementa latebat absconditum, ut docent ossa siccissima destillationi commissa. Porro microscopia & injectiones idem confirmant; his enim etiam in illis partibus, quæ solidæ veteribus putabantur, innumeri canaliculi & vascula fluidis pervia, demonstrantur. Docent idem inanitiones magnæ & subitæ; in cholera vehemente homo intra spatium unius diei 50., 60., ad centum usque libras perdere potest, fusis per vomitum & alvum humoribus. Vidit II. VAN SWIETEN, hominem obesum, qui per morbum acutum spatio 14. dierum macilentissimus factus ultra centum libras de pondere corporis sui perdidit, fusa per calorem pinguedine & cum urina, sudore, alvo, de corpore eliminata. Omne tamen hoc decrementum fere solis fluidis dissipatistribuendum est. Ex omnibus hisce evidenter patet, *solida nostra, cum humoribus comparata, valde pauca haberi.*

Quin imo fere demonstrabile est, ex consideratione ortus & generationis vasorum, & ex resolutione &c. omnem nostri corporis solidam massam meris modo nervis ut elementis constructam esse. Hæc magni BOERHAAVII speculatio nimia est. Non negaverim in fœtu, qui nunc primum ex germine suo evolvi incipit, etiam maxima vasa

ejus tenuitatis fuisse, quæ nunc in adulto fibrillæ nerveæ est, sed hoc dato etiam BOERHAAVIUS admittere debet, fibrillas nerveas in foetu, nunc primum evolvi incipiente, in ea ratione minores fuisse; adeoque etiam jam tunc distinctionem fuisse partium diversarum, neque adeo statui posse, omnia solida nostra primitus ex nervis, ut elementis composita fuisse. Neque illud quidquam evincit, quod cerebri moles in foetu, & in pueris etiam, habita ratione reliqui corporis majus sit, quam in adultis. Nam & de aliis partibus idem dici potest, e. g. de corde, de renibus succenturiatis, de glandula thymo; & alia ratio subest, quia cerebrum, cranii ossibus semel incrementi sui finem adeptis, & inter se arcte connexis; ulterius incrementum non potest; quia tamen magna cerebri moles ad motuum & sensuum functiones requiritur, debebat primo statim tempore volumen cerebri augeri, cum dein ossa cranii parum cedant, parumque faveant incremento cerebri. Denique & insecta dantur cerebro & nervis carentia, quæ & nutriuntur, & crescunt, & quorum organa certe ex nervis fabricari non poterant. Nec ullo modo, a foetu incipiendo ad usque senium, nervos in alias partes corporis degenerare observamus, aut vicissim alias partes solidas maceratione in nervos resolvi. In primordio foetus, quod in ovis incubatis lustrare licet, hora ab incubatione 12. per observationes HALLERI primum foetus conspicuus fit, tumque præter caput & caudam nihil cernitur nihilque pariter in his distincte observatur. Dein sensim mutatum apparet caput, & 70. horis elapsis primarum vestigia, & in capite duæ vesiculæ pro cerebro deprehenduntur, & similis una pro rostro, una pro fronte, una pro occipite apparet. Post dies 4. hepar valde mucosum conspicitur, hora 120., seu 5. diebus elapsis cerebrum totum fluidum, cranium vero bullæ transparentis in-

star, atque intègumenta, caro & ossa, pectus formantia, tenui membranæ vix visibili similia conspiciuntur, contra vero prima vestigia cordis jam pulsantis, albi, pellucidi, jam hora 48. observantur. Jam ergo partes solidæ in foetu formari incipiunt, dum cerebrum adhuc mere fluidum est. Non ergo ex meris nervis in origine sua partes solidæ corporis animalis coalescere videntur. Scio autem quid BOERHAAVIUM in eam opinionem deduxerit; namque nutritionem fieri non posse putabat, nisi per vasa totius corporis minima; minima autem vasa nervi sunt, ergo nutritio omnis per nervos fit; atqui omne punctum solidum nostri corporis nutritur, ergo omnes partes solidæ nostri corporis ex nervis debebant oriri. Verum si etiam detur, nutritionem fieri in vasis minimis, tum quidem hoc sensu accipienda sunt omnia ea vascula, quorum parietes aliis minoribus vasculis non componuntur, cujusmodi esse possunt arteriolæ serosæ, lymphaticæ, non ergo per nervos nutritionem peragi sequitur.

§. C C C C X L I.

Utitur Cel. BOERHAAVIUS exemplo ovi incubati, indeque ad nutritionem corporis nostri argumentum deducit. Recte hoc, sed non nimium inde deducendum est. Illustrat autem imprimis genesis foetus in ovo incubato partium solidarum nostri corporis primitivam ex fluida materie originem, & clare demonstrat, omnes solidas partes animantium ex fluida materie nasci, quæ in statum soliditatis certis conditionibus abit. Pullus certe in origine sua punctulum est. Hoc punctulum spatio dierum 21. in pullum excrescit perfectum, visceribus, vasis, musculis, nervis, ossibus præditum. Omnes hæ partes solidæ adeo brevi tempore ex liquido ovi albumine nascuntur. Quid aliud in origine sua homo est, quam mucus, &

invisibile tenerrimum flamen? Et hocce rudimentum spatio 9. mensium ex solis humoribus matris nutritur, increfcit, membranis, musculis, ossibus augetur, quarum partium firmitas indies major fit, licet nihil tamen, præter fluidum, embryoni advenerit. Certum igitur est, partes solidas nostri corporis a fluidis nutriri & ex iisdem nasci. Non autem ex hisce sequitur, aut corpus nostrum in sua origine mere nerveum esse, aut per liquidum nerveum omnem nutritionem absolvi.

§. C C C C X L I I.

Albumen ovi ut pullum nutrire possit, calore incubatur, ubi ita resolvi debet, ut per minima & primitus inconspicua vascula earum membranularum, quibus continetur, tum membranarum vitelli ac demum ipsius foetus inconspicui vascula trajiciatur, ea successive extendat & evolvat. Unde certe in tenuitatem incredibilem attenuari debet, alioquin per minutissima illa vascula transire non posset. Sed cum BOERHAAVIUS hæc inique detorqueat, & inde deducere velit, albumen in tenuitatem liquidi nervei resolvi, & totum foetus corpusculum in origine sua mere nerveum esse, & per nervos solummodo aut nervis similia vascula nutritionem absolvi, juvabit paulisper mutationes eas expendere, quæ in ovis incubatis observantur, ut, quid inde deduci possit, distinctius videamus. Vitellus tempore incubationis omni momento augetur atque liquor eo contentus semper fluidior fit & viridescens, & post quartum ab incubatu diem vascula primum rubra in vitello conspicua fiunt, quorum alia arteriosa ab arteria mesenterica pulli oriuntur, & ad vitellum disperguntur, alia venosa, ex vitello cum trunco venæ portarum, prope hepar pulli conjunguntur; sunt præterea vascula alia vitelli, quæ cum vasis albuminis communicant. Per hæc calore at-

tenuatum ovi albumen in succum vitelli trajicitur; nam copia albuminis indies minuitur, vitellus vero pondere continuo augetur simulque humor vitelli continuo fluidior apparet. Ipse porro vitellus sub finem incubatus in abdomen pulli se recipit & intestina format. Illius membrana interior continuatio est internæ membranæ intestinorum, ventriculi, oesophagi, pharyngis, oris, &c. extima vitelli membrana continua est extimæ intestinorum atque in mesenterium & peritoneum producitur. Involucrum denique vitelli, eo jam in abdomen recepto & intestina constituyente, sit ipsa pulli cutis. Hæc per immortales & numerosissimas Cel. HALLERI observationes constant. Inde vero deducere licet, partes foetus jam in ovo delineatas ac formatas existere, sed minimas & inconspicuas indigere solum dilatatione & apparitione particularum, ut incrementum sumant & evolvantur. Nam vitellus per has observationes jam continet intestina, ventriculum, mesenterium, peritoneum, abdominis musculos & cutim & vasa denique meseraica, venosa, arteriosa, & reliqua abdominis viscera. Albumen ovi subit vascula vitelli, attenuatur, fertur per venosas propagines ad hepar, inde ad corculum foetus, ut in embryone humano sanguis per venam umbilicalem ad hepar foetus perque illud in venam cavam & inde in cordis dextrum sinum influit. Corculum pulli acceptum ea via, qua dixi, nutritium humorem propellit in arterias, tunc adhuc minimas, jam tamen rubro colore conspicuas; & ad omnes foetus partes vitale liquidum distribuit, iterumque per venam cavam, quarto die jam conspicuam recipit. Cum autem corculum in origine sua vivacissimum sit, & vascula tenerima, necesse est, eadem continuo cedere distendenti vitali liquido & elongari & liquidum nutritium inter distracta vasculorum elementa sese interponere, cum reliquis elementis cohærere,

sic partes embryonis sensim evolvi & magnitudine ac firmitate augeri. Sed an ideo vascula pulli omnia in origine sua nervosa? Repugnant vascula rubra jam quarto ab incubatu die conspicua. Annon necesse est, cerebri & nervorum stamina in primordio embryonis ea fere proportionem minora esse vasculis embryonis maximis, qua proportionem maxima embryonis vascula minora sunt vasis maximis hominis, aut animalis jam in lucem editi, jam perfecti? Certe id suadet consideratio cerebri embryonis pulli, quod, dum in aliis partibus jam vasa rubra conspiciuntur, die ab incubatu octavo, & aliquanto post etiam, nil nisi vesiculam refert aqua pellucida plenam, in quo nullam organicam machinationem, imo nihil distincti, utcumque armatis oculis cernere licet. Non repugnat sane vascula in embryone nutriri ex ipsis, quæ vehunt, liquidis; non repugnat etiam in adulto homine vascula minora, ex aliis non composita, & tamen nondum minima, ex propriis humoribus nutriri. Nervi certe ipsi vix aliunde videntur nutriri, quam a proprio liquido, quia aliis vasculis compositi non sunt. Si autem nervi a proprio liquido, quod vehunt nutriuntur, cur alia vascula simplicia, quæ multum adhuc a tenuitate nervea remota sunt, non pariter a proprio liquido nutriri possent? Nam si dicas non posse hæc nutriri nisi per vascula iterum minora, tum etiam de nervis idem postulari poterit, & erit recursus in infinitum.

§. C C C C X L I I I.

Ex hætenus dictis id certum est, omnes solidas corporis animalis partes ex fluidis originem duxisse. Nihil præter ovi humorem rudimentum pulli accedit & ex eo humore muscoli, vasa, viscera, tendines, cartilagines, ossa, spatia dierum & nascuntur. Spatio novem mensium omnia eadem, sed mole majora, in foetu humano pro-

ducuntur, cui nihil nisi vitalis a matre humor accessit. Omnia hæc gradatim fiunt. Partes molliſſimæ in origine ſua omnium minime a fluidis differunt; hinc cerebrum in fœtu pulli die adhuc octavo veſiculam aqua pellucida plenam reſert. Reliqua viſcera, utut tenerrima, jam tamen aliquanto majorem conſiſtentiam habent. Dum cerebrum adhuc fluidum conſpicitur, hep̄ar jam mucidum & quaſi coagulatum apparet. Oſſa in origine ſua nil niſi gelatinam tremulam referunt, quæ paulatim durior ſolidiorque evadit. Partes ergo illæ, quæ in fœtu perfectō ſolidæ viſuntur, olim manifeſte fluidæ fuerunt, & per vaſcula minima fluxerunt, inde paulatim aucta particularum appoſitione & attractione mutua, per innumeros gradus ſuccedentes, ex fluida natura in ſtatum ſolidum tranſeunt. Exempla etiam abunde ſunt in vegetabilibus, quæ ſolo fere aqueo telluris ſucco nutriuntur.

§. CCCCXLIV.

Fluida mutantur in firma corpora, quotieſcumque cohæſio particularum fluidi inter ſe, vel cum aliis particulis augetur, & quo hæc cohæſio vel attractio fortior eſt, eo firmitus denſiusve corpus naſcitur. Et viciſſim ſolida mutantur in fluida, quoties mutua attractio particularum ſolidi, quacumque de cauſa, tollitur, vel inſigniter minuitur. Id fit in ſolutionibus corporum metallicorum & infuſione eorundem per intercedentes igneas particulas. Hæc ita ſe habere certum eſt, licet modum, quo particulæ corporum ſeſe mutuo attrahant & inter ſe cohæreant, non aſſequamur. Solidiſſima oſſa plus quam dimidia parte fluidi conſtant, quod omne inter elementa ſolida latebat. Aqueæ particulæ inter ſe vix minima vi cohærent, adde vero aquam calci & ſabulo, & videbis aquam cum hiſce corporibus in lapideam firmitatem concreſcere. Ipſe fluidiſſimus aër in ſo-

lidam naturam cum aliis elementis concrefcit & non minimam partem ponderis corporum efficit. Docet id incredibilis copia aëris, quæ ex offibus animalium & longe major, quæ ex tartaro & calculo humano elicitur. Quid? quod ipfa ignefcens materies, subtiliffima & fugaciffima, corporibus adhæreat, cum iis in ftatum folidum tranfeat, eorum pondus augeat. Docent id metalla pondere poft calcinationem aucta, licet fub ea operatione aliquid per vapores perdiderint. Dum hæc omnia ita fe habent, dum videmus, fluidiffima corpora in ftatum folidum transire pro diverfis circumftantiis, non mirabimur, etiam noftras partes folidas ex fluidis generari, licet ipfa naturæ operatio, & modus, quo hæc efficit, in puteo DEMOCRITI delitefcant.

§. CCCCXLV.

Quomodo ultimæ corporis noftri fibræ nafcantur, nemo mortalium hætenus novit; quomodo vero iisdem jam factis increfcere poffit corpus, id quidem intellectu utcumque aflequimur. Pone partes omnes corporis in rudimento foetus exiftere, ut delineata exiftit in femine cujufque plantæ minutula progenies, non follicitus, quo modo hoc foetus rudimentum, hæ partes primordiales minimæ fabricatæ fint, quæ vis occulta, quæ architectonica poteftas has partes confociaverit, non inquam de his follicitus, quæ numquam intelligam, tamen id concipio, data potentia interna in hoc minimo corpusculo, quæ humorem nutritivum vivaci motu impellat & per vafcula omnia hujus machinulæ urgeat, omnia hæc vafcula elongari, extendi, etiam in tranfverfum augeri, fic elementa folidi vafculorum a mutuo contactu diftrahi & dum hoc fit, nafci interftitia inter elementa folidi, in quæ fimiles particulæ, interftitiis illis proportionales, fe cum humore nutritio infinuare

possint, & ubi se insinuaverint, attractione mutua cum reliquis elementis cohærere, hæc si in omnem dimensionem fiant, intelligo hac ratione & longitudinem & latitudinem, & profunditatem seu crassitiem partium increfcere; totumque adeo corpusculum mole sua augeri, non recens productis partibus, sed iis tantummodo extensis atque evolutis.

§. CCCCXLVI.

Iterum ad nervos relabitur BOERHAAVIUS, eo nixus fundamento, quod omnes partes corporis vasculosæ sint, quod nullum sit punctum in corpore, ubi vasculum non sit, quod omne punctum corporis nutriatur; adeoque in minimis solum vasis nutritionem peragi credit; cum vero vascula nervis minora non sint, ergo per nervos corpus nutriri. Verum alio loco refutata est ea opinio, quæ omnia in nostra corpora vasculosa ponit; sed reponere potest BOERHAAVIUS, saltem initio vasculosa fuisse, exemplo ossium & adhuc inter ossium lamellas vascula decurrere, etsi non omne punctum ossis vasculosum sit. Sed etiam hoc dato, certum tamen multas partes nervis præditas non esse, quæ nihilominus nutriuntur, ut dura mater, pia mater, arachnoidea, ungues, cellulosa tela, membranæ ex illa natæ, ipsa ossium substantia & tendinum, & cartilaginum. Certum est etiam, viscera maxima, ut pulmo & hepar, exiguos habere nervulos, qui certe non videntur sufficere, ut omni puncto horum viscerum prospiciant. Verum iterum effugium adest, nam, ut alibi dictum est, credidit BOERHAAVIUS arterias in omni parte corporis abire in talem tenuitatem, qualis nervorum est, & hæc esse arteriolas nutritias, quæ nomine nervorum *naturalium* insigniri possent. Dixi autem nullum exstare exemplum genitæ fibrillæ nerveæ sine corticali substantia, qualis in nullo viscere, præterquam in encephalo.

phalo reperitur; hypothesim ergo BOERHAAVII precario assumptam esse. Nunc omnia, quæ vis, lubens concedo; sed jam vide, quid sequatur! Omne punctum physicum corporis, dicis, nutritur, ergo vascula nutrientia oportet esse omnium minima. Sit vera hæc conclusio, quamquam falso supposito laboret, nec necessario sequatur. Dicam ex eodem fundamento: omne punctum physicum nostri corporis nutritur, sed nutritio fieri non potest, nisi per vascula minima, ergo omne punctum physicum nutritur per vasculum minimum. Sed si omne punctum physicum nutritur per vasculum minimum, tot erunt vascula quot sunt puncta physica, quod absurdum est & impossibile, quia ipsa vascula componuntur ex punctis, atque ita pars totius esset ejusdem magnitudinis cum suo toto. Respondent Boerhaaviani, non eo usque se progredi, sed vasa minima, quia jam aliis vasculis non componuntur, a proprio liquido, quod continent, nutriri. Atque hoc unum responsum illis superest, ut absurdum effugiant. Jam vero hoc responsum nobis assumere licet, frustra repugnantibus illis. Si enim vascula corporis absolute minima nutriri possint non aliter, quam a proprio humore, quem suis canaliculis continent, etiam alia vascula, etiam si non absolute minima totius corporis poterunt a suis nutriri humoribus. Nec possunt reponere disparitatem, quod alia vascula, quæ absolute minima non sunt, ex aliis minoribus composita sint. Id enim anatome non demonstrat, nec microscopium; video equidem aortam, & pulmonalem arteriam, & alios magnos truncos arteriosos & venosos vasculis minoribus, inter parietes decurrentibus, compopi; sed non idem video in minimis rubris arteriis aut serosis; neque video ullam necessitatem hujus compositæ fabricæ in arteriis minoribus, quarum parietes tenuissimi sunt. Quod si autem vascula minora, et si

non absolute minima, perinde tamen ut hæc simplicia esse possint, nec ex aliis necessario composita esse debeant, etiam per alia vasa minora, etsi non absolute minima, nutritio peragetur. Denique succus nutritivus in omni parte alius atque alius est. Alius & majore terræ portione abundans, ex quo ossea substantia nascitur, alius & maxima aquæ portione gravidus, ex quo mollißima cerebri substantia reparatur, alius iterum, ex quo alia viscera, aliæque partes nutriuntur. Nam diversitatem principiorum, quod ad proportionem attinet, in aliis partibus aliam docet evidenter analysis chemica. Nunc vero si succus nutritivus in omni parte alius est, etiam in omni parte alia atque alia vascula requireret, ut serum & lymphæ sui generis vascula exigit. Sed vascula absolute minima totius corporis omnia unius ejusdemque generis sunt, nam si aliquod horum tantillo majus esset, jam non esset absolute minimum; cum ergo succus nutritivus in diversis partibus diversus, etiam diversa vascula, & particularum suarum tenuitati vel crassitie proportionalia requirat vascula vero nervea absolute minima ejusdem generis sint, clarum est, nutritionem non per solos nervos peragi, sed per vascula in diversis quidem partibus diversa, simplicia, ex aliis non composita, & in hac illave parte, ad quam pertinent, minima, aut minima in suo genere, non autem absolute minima totius corporis. Mihi certe nemo persuadebit, eundem succum gelatinosum, terreum, quo ossa nutriuntur, per nervos ad ossa deferri, & si quisquam mihi persuaderet, non tamen BOERHAAVIUS id efficeret, quem continuo dicerem oblitum esse subtilitatis illius ingentis, quam liquido nerveo recte quidem attribuit.

§. C C C C X L V I I.

Responsum ex dictis patet. Si liquidum nerveum, aut illi simillimum, omnium partium nu-

tritionem absolvit, debet continere principia ea, ex quibus partes solidæ corporis componuntur. Debet ergo continere principia, unde os componitur, si os per nervos nutritur. Si hæc continet, dic, cur nervus, qui a proprio liquido nutritur, non offescat? Si non continet, dic, quomodo ossi ea principia restituere possit, quæ per vim vitæ inde detrita sunt? Iterum si liquidum nerveum eam terræ abundantiam continet, quæ in succo nutritio ossium adest, dic, quomodo hoc conciliari possit cum enormi subtilitate, & mobilitate liquidi nervi? aut quomodo liquidum hoc adeo multa terra gravidum trajici possit per vascula nervea omnium minima? Dic etiam, quomodo non raro homines, toto fere corpore paralytici, vivant per multos annos, & nutriantur ad subsistentiam, in quibus tamen certo nulla est actio multorum nervorum?

§ C C C C X L V I I I.

Est omnino nutritio ex ultimis perfectissimisque naturæ actionibus. Nam in hoc omnium viscerum actiones conspirant, ut corpus nostrum in vigore suo conservetur, quod paucorum dierum spatio duraret, nisi continuo perdita restituerentur. Quid omnia viscera abdominalia laborant aliud, quam ut ex ingestis ea principia elician- tur, quæ partes fluidas solidasque nostri corporis restituere possint. Verum chylus ex ingestis recens elaboratus & ipse ulteriore perfectione indiget, ut inde materies nutrititia diversa pro diversarum partium indole elaboretur, ad quod pulmonis & arteriarum actio concurrit. Neque hoc totum est, sed necesse est etiam, ut acres & usu suæ functæ particule de corpore excernantur; eæ enim relictæ indolem blandam nutrititii recentis humoris perverterent, eumque nutritio- ni ineptum redderent. Hinc quibus fomes acer in sanguine hæret, ut phthisici, scorbutici &c.

adeo parum nutriuntur, ut etiam indies confumantur magis. Porro requiritur libertas expedita circulationis, requiritur iusta temperies reciproci motus fluidorum & solidorum; eo enim nimis valido plus deteritur corpus, quam nutritur, eo nimis languido, non satis perficitur nutritivus humor, nec eas qualitates accipit, quas in sanis habere solet. Denique requiritur debita in vasis flexilitas, extensilitas, quæ, quo major est, eo nutritio celerior fit, nec solum ad subsistentiam, sed etiam ad incrementum; contra, quo vasorum minor flexilitas, quo hæc rigidiora sunt, eo minor nutritio, & cum decremento etiam corporis conjuncta, ut in senibus. Cum tot conditiones, quibus aliæ adhuc adnumerari possent, ad nutritionem concurrant, & una illarum vitata, nutritio quoque vitietur, facile patet, hanc esse ex ultimis perfectissimisque naturæ actionibus.

§. C C C C X L I X.

Etsi chylo materies insit, unde nutritivus humor elaborari possit, non ipse tamen chylus statim nutrire aptus est, ob rationes mox dictas; unde a chylo recente vasa solum implentur, non vero solida mox reficiuntur. Eo magis autem nutritioni chylus ineptus est, quo crassior, & quo plus peregrinæ indolis ingestorum particeps fuerit; hinc chylus, ex vegetabili cibo extractus, majore perfectione indiget, ut inde nutritivus humor elaboretur, quam chylus ex cibis animalibus extractus, in quibus jam latebat succus nostris humoribus analogus.

§. C C C C L.

Cum itaque chylus ipse nondum sit proxima nutritionis materies, sed primo repetitis circulationibus in eam elaborari debeat, quæstio jam oritur, quibus gradibus hæc mutatio fiat, & quibus causis adscribenda sit. Aliquam omnino par-

tem inter eas causas pulmo sibi vindicat, quatenus chylus in hoc viscere primum secretionis periculum facit, atque ita præparatur, ut ad subeundas in corpore secretiones aptior fiat; tum etiam quatenus in pulmone aliqua aëris copia imbuitur, cujus æque magna ac aliorum elementorum ad nutritionem necessitas est; denique quatenus in pulmone adaptatur trajiciendis vasculis minoribus diversæ seriei, qualia nutrititia sunt. De his quidem dictum est in actione pulmonis.

§. C C C C L I.

Si jam pulmo aliquam potestatem habet chylum immutandi, etiam reliquis vasis arteriosis corporis, per quæ toties cum sanguine, quoties per pulmonem, chylus circumfluit, eadem potestas adscribenda est, quod itidem alibi declaratum fuit. Hæc autem mutatio chyli multis demum circulationibus absolvitur, ut docent LOWERI & aliorum observata. Nam aliquot a pastu horis chylus adhuc sanguini innatat, licet jam sæpe per universum corpus fluxerit. Hora autem a pastu duodecima, nullus amplius chylus, nullum lac in sanguine conspicitur, quo ipso docemur, hoc tempore chylum jam esse mutatum in humorem vere animale. An vero tum prius in serum sanguinis & porro in cruorem mutetur, dubitatum est. Quum tamen omnes fere LEUWENHOECKII sententiam amplexi sint, globulum sanguineum sex serosis ad se mutuo compactis constare, crediderunt chylum omnino prius in serum mutari, quoniam globulos serosos præexistere necesse sit, ut inde rubri globuli componantur. Verum hæc speculationes sponte ruunt cum illa globulorum hypothetica theoria, cum cruorem non sola compactione, sed etiam principiis a seroso liquido differre demonstratum sit. Et id præterea non potest non admirationem movere, quod viri celeberrimi ex eodem sero & crassissimum

ssimum rubrum sanguinem componi & simul subtilissimum tenuissimum humorem nutritivum elaborari crediderint. Sed missis his dicam, quod mihi videtur. Chylus per ductum thoracicum in sanguinem transfusus & cum eodem nunc per universum corpus in circulum ductus, potissimam aquei sui vehiculi partem tradit renibus; inde urina chyli paulo post partum missa, fere aquosa, limpida. Hac parte levior aquosa orbatur chylus, jam specificè densior humor & minus dilutus, fabrica mammarum secernitur, fitque lac, quod nondum perfectè animalis naturæ, sæpe adhuc ingestorum dotes retinet, imo vero acidulam ex cibo vegetabili naturam constanter habet, nec fere alia proprietate, quam densitate, a chylo differt. Lac porro & in viris, & in foeminis non lactantibus resorbetur & in circulum denuo ducitur & mutatur in humorem alcalescentem, jam naturæ nostræ magis analogum. Et quidem pars lactis butyracea cum terra martiali unita & robore vasorum compacta, cruorem constituit; pars tenuis aquosa lactis aqueum sanguinis & feri vehiculum format, pars vero plastica, gelatinosa, eaque maxime nutriens, calore & vasorum actione attenuata, in serum gelatinosum, viscidulum, plasticum transit; pars denique oleosa superabundans in telam cellulosam secedit & adipem corporis auget. Atque ita ex hac sententia, quæ quidem mihi probabilissima videtur, eodem tempore, diversa lactis principia in partes sanguinis diversas successive mutantur; nec necesse est, prius serum nasci & ex hoc demum cruorem, aut vicissim.

Inter omnes autem liquores nostros serum sanguinis albumini ovorum simillimum est. Nam & gelatinosam plasticam indolem habet, ut albumen & calore moderato, qualis sani hominis est, fluidum manet, imo attenuatur, ut albumen,

& majore coloris gradu & spiritu vini meraco coagulatur, ut albumen. Atque ea etiam est indoles lymphæ vasorum lymphaticorum, quam ego quidem a sero non distinguo. Cum autem videamus in ovis incubatis, fœcundis, ex albumine vitale pulli rudimentum nutriri, increfcere & spatio dierum 21. albumen, cujus nullum jam vestigium superest, in viscera & substantiam pulli conversum esse; cum porro ex nostris humoribus serum sanguinis albumini simillimum sit, hinc recte concludere licebit, serum sanguinis præcipue materiem illam præbere, unde solida nostra reparantur.

§. CCCCCLII.

Verum vascula dantur in corpore animali plurima, serosis multo minora, quæ perinde nutrienda sunt. Itaque necesse est, ut serum sanguinis minima vascula subire & nutrire possit, ita illud ipsum attenuari, ut albumen ovi attenuatur, dum per subtilissima vascula membranarum vitelli & his subtiliora alia pulli vascula trajicitur. Id in ovo incubato solus calor efficit. Verum in nostro corpore idem, qui gallinæ incubantis, caloris gradus est. Non ergo improbabile est, serum sanguinis viscerum & vasorum actione & moderato calore similiter, ut albumen, attenuari, atque ita attenuatum esse demum veram & proximam nutritionis materiem. Hæc tamen omnia ita accipi velim, ut summa illa attenuatio non nisi in minimis vasis locum habeat; in aliis vasculis simplicibus quidem, & non minimis nutrititia materies his ipsis proportionalis sit. Nam si etiam ponas, ex albumine & cerebrum pulli & ossa formari, non tamen adeo tenuem facies ossium nutrititium humorem, ut cerebri.

§. C C C C L I I I.

Quæ quam sit simplex &c. Hæc iterum cum limitatione quadam sumenda sunt. Omnis pars solida nostri corporis constat elementis terreis intercedente fluido glutine conjunctis. Fluidum illud glutinis haudquaquam simplex est, sed ex aqua, oleo & aëre manifeste componitur, quod analysi chemica demonstrat alibi jam dicta. Porro partes solidæ nostri corporis, ut variis gradibus firmitatis inter se differunt, ita etiam differunt proportionem elementi terrei & fluidi glutinis; ut omnino plurimam terræ portionem ossa habeant, reliquæ solidæ partes eo minus terrei elementi contineant, quo molliores sunt. Et gluten quoque illud diversum est pro diverso gradu firmitatis. Quo pars corporis nostri firmior, eo fere plus aëris fixi continet, plus etiam olei, aquæ minus. Mollissimæ partes pluri aqua, pauciore oleo constant; excepta tela cellulosa, quæ adipis reservatorium est. Et alibi demonstratum est, intercedente oleoso glutine firmiter elementa terreæ coherere, quam aqueo. Nunc cum nutritio partium solidarum in eo versetur, ut talia ipsis apponantur, qualia viribus vitæ inde detrita fuerunt, clarum est, succum nutritivum diversarum partium etiam diversâ proportionem elementi terrei, aquei, oleosi, aërei, præditum esse debere. Materiem ergo nutritivam pro diversitate partium diversam, nec adeo simplicem esse, ut ex BOERHAAVII verbis videri posset. Certe neque serum sanguinis, nec ovi albumen simplex humor est, sed & putrefactione terram relinquit serum & albumen & analysi chemica si examinatur uterque humor, aquam, oleum, aërem, ac terram elementarem præbet. Neque certe hæc principia solidis partibus nostris apponi possent, nisi jam in humore nutritio continerentur. Quomodo autem terra subtilissima in fluidis abscondi possit

invisibilis, docent olea, quæ per retortam destillata semper crustam carbonaceam relinquunt, igne aperto in cineres terreos fatiscentem; docet idem aqua fere omnis, non minimam portionem terræ continens, quæ affusa plumbi solutione aut oleo tartari per deliquium manifestatur, antea ita abscondita, ut fluiditatem & pelluciditatem aquei liquoris non turbet. Ad hanc intime in aqueo fluido absconditam terram non advertentes quidam philosophi, perperam crediderunt, aquam solam rerum omnium principium esse & ex ea sola vegetabilia nutriri, eamque mutata particularum textura in terream naturam degenerare.

§. C C C C L I V.

Non nisi his gradibus. Primum quod ex ingestis elicitur, chylus est, ex hoc ablata parte aquosa superflua lac generatur; ex lacte reliqui humores, cruor, serum sanguinis & lymphæ, vi vasorum ac viscerum elaborantur. Serum porro actione vasorum & calore attenuatum, humor nutritivus est. Quod ergo ex ingestis extrahitur alibile non protinus nutrit, sed successivis hisce gradibus mutatum tandem proximam nutritionis materiem constituit. An vero illi gradus mutationum successivi perpetuo locum habeant, ut BOERHAAVIUS contendit, non dixero. Crediderim potius, eo plures gradus mutationum necessarios esse, quo magis alimentum quodque a natura nostra diversum, contra vero eo pauciores mutationes requiri, quo alimentum naturæ nostræ magis analogum est & illud denique paucissima vel nulla mutatione indigere, quod proxime cum feri nostri indole convenit. Itaque vegetabilia quidem, cum a natura nostrorum humorum maxime differunt, mutationes etiam plures & majores exigunt, ut in humorem nutritivum cedant. Lac quod inter vegetabilem & animale naturam me-

dium quasi ambigit, minore mutatione opus habet. Omnium puto minima mutatione indigent jufcula carniū & ova forbilia; jufcula enim folutam in aqua habent ipfam nutrititiā materiā, gelatinofam, quæ carnibus infuit; fubftantiā igitur continent jam chylo & lacte perfectiorem; & ovi forbilis albumen tremulum nonne ipfum totum nutrititiū humor eſt, etiam BOERHAAVIO fatente? Cur ergo neceſſe ſit, hæc prius in chylum & lac converti, tum demum in ſeram nutrititiū elaborari, quæ chylo & lacte multo perfectiora, quæ ſero ſanguinis ſimillimā materiā jam continent, ego quidem non perſpicio. Certe a nullo alimento adeo cito & adeo bene reficimur, quam quidem a jufculo bono, quod nutrititiū humorem ex carnibus proleſtum jam continet, eumque multo aqueo vehiculo ſolutum & attenuatum, ut facillime in ſanguinem penetrare & cum eo per vaſcula minora diſtribui poſſit. Non ergo ſemper illis gradibus mutationum opus eſt, ut ex alimento nutrititiū humor elaboretur, ſed pro diverſitate alimenti mutatio jam major, jam iterum minor exigitur. Hinc debiliſſimos ægros ſolis jufculis nutrimus, cum hæc nullam fere aut minimam mutationem requirant.

§. C C C C L V.

Hoc de omnibus noſtris humoribus verum eſt. Calore nimirum diu continuato & repetita multoties circulatione, non ſolum ſubtiliora continuo liquida de corpore diſſipantur & maſſa humorum diminuitur, ſed & principia humorum alterantur, atque ex blanda ſua indole acrimoniam contrahunt rodentem; ſic vero nutritioni denuo inepti fiunt, nec id ſolum, ſed etiam corpus noſtrum magis deſtruunt, quum attritui nunc alia adjungatur cauſa, acrimonia. Fiunt hæ mutationes gradatim, ſic, ut lac manifeſte adhuc aceſcens mutetur in ſanguinem & ſeroſum humo-

rem non amplius acescentem, hæc vero liquida, initio blanda, continuo magis magisque in putridam corruptionem tendant, quo sæpius caloris & attritus efficaciam perpeffa sunt.

§. C C C C L V I.

Quum igitur humores nostri persæpe repetitas circulationes, perque calorem circulationis comitem, continuo acriores & ad nutritionem inepti fiant, facile patet, corpus nostrum brevi destructum iri, nisi novo chylo reficeretur, qui non solum acescente sua indole corruptioni jam incipienti resistit, sed & novam materiem adfert, unde denuo blandus nutritivus humor elaborari possit, qui solida detrita reparet; dum interim acres humorum particulæ assumpto diluente potu eluuntur, atque per renes cum urina de corpore eliminantur. Sic restituitur pristinus corporis status; sic indies quasi renascimur.

§. CCCCLVII. §. CCCCLVIII.

Nunc expendendus est motus, quo nutritio peragitur. Sequens consideratio aliquam lucem huic obscurissimo negotio affundet: omnes canales nostri flexiles sunt & elastici & liquidis impulsis cedunt; omnes canales nostri in statu naturali, quamdiu vita durat, semper pleni sunt; omnes canales nostri flexuosi sunt. Hæc ex alibi dictis constant. Porro quo origini suæ propior est homo, eo canales sunt teneriores, molliores, flexiliores, simulque & cor respective majus & irritabilius est; hæc etiam alibi jam dicta sunt. In hos canales vitale liquidum singulis momentis a corde propellitur; cum autem arteriæ semper plenæ sint, cum eadem ex amplo lumine successive decrescant, cum flexuosæ sint, cumque vis cordis harum resistantiam, imo & aggregatum omnium resistantiarum superet, cum deni-

que liquidum, in arterias projectum, incompressibile sit, necessario sequitur dilatatio vasorum secundum omnem horum dimensionem. Ergo canales nostri & elongantur & expanduntur, eo quidem efficacius, quo vis cordis vividior & quo ceteræ partes flexiliores, molliores, quo debiliora vasa sunt & minus resistunt. Verum ea dilatatio & elongatio arteriarum fieri non potest, quin elementa harum a mutuo contactu magis distrahantur, atque adeo interstitia nascantur minima quidem in parietibus vasculorum, in quæ interstitia particulæ humoris nutrititii his congruentes, sese insinuant & a flumine liquidi retro urgente impinguntur, impactæque mutua attractione cum reliquis vasorum elementis cohærent. Sic necesse est, vasa & in longitudinem crescere & diametro transversa augeri, simulque ex appositione plurium elementorum, eorumque contactu propinquiore, etiam robur vasorum augeri. Huc totum redit, quod sequentibus paragraphis BOERHAAVIUS fusius expendit. Neque venæ excipiendæ sunt, quas omnino etiam a propriis humoribus & elongari & dilatari necesse est. Nam etsi vis tanta non est humorum per vasa venosa fluentium, tamen parietes venarum debiliores sunt, faciliusque cedunt. Deinde etsi canales venosi, quia divergunt, minus liquido fluenti obstant, quam arteriæ, tamen venæ perinde flexuosæ sunt ac arteriæ; per eas flexiones fit, ut tota liquidi columna in parietes incurrat, eosque urgeat & producere conetur. Denique cum in venoso systemate liquidum ex ramis in truncum confluat, truncus autem multo minor sit omnibus suis ramis simul sumptis, sanguis reapse in spatium angustius fluit, dum ex ramis venosis in truncum confluit. Adeoque licet venæ continuo divergant, quia tamen sanguis reapse in spatium minus capax fluit, non solum in transversum, sed etiam in longitudinem parietes ve-

narum extendet, etsi vi multo minore, quam quæ sanguinis arteriosi est. *Receptacula* vero membranis fiunt, inter quas media decurrunt vascula arteriosa & venosa, adeoque his elongatis etiam membranas, receptaculum formantes, ampliores fieri necesse est. Sed & præterea receptacula a proprio humore, quem in cavo suo continent, distenduntur. Unde omnia ad prius dicta redeunt. Ipsa ossa in origine sua mollia & vasculosa sunt & quamdiu vascula hæc elongari viribus vitæ patiuntur, tamdiu & ossa incrementum sumunt.

§. C C C C L I X.

De his jam dictum est. Fient autem hæc omnia eo magis, quo major erit impetus humorum in vascula & quo eadem magis flexilia ac debiliora erunt.

§. CCCCLX. CCCCLXI.

Ultimæ extremitates &c. Nescio an hæc legitime deducantur. Verum est, ultimas vasculorum extremitates, si patulæ sint, ceteris paribus debiliores esse, quia in his elementa ex una tantum parte cohærent. At simul eo minor erit actio liquidi in parietes vasculi extremi, quo minor eidem in osculo vasis extremi resistentia opponitur. Hinc ego quidem non perspicio id necessario sequi, quod vult BOERHAAVIUS. Omittis ergo his speculationibus, quæ parum profunt, id dicamus, quod verosimilius est, nempe omnia vasa nostri corporis viribus humorum circulantium continuo deteri, detritum autem se habere in ratione composita impetus humorum circulantium & superficiiei vasorum; hinc & vasa majora deteri, quum in his magno impetu moveantur humores; & minora non minus deteri, cum in his multo major sit ratio superficiiei, etsi vis impellens omnino minor sit.

§. C C C C L X I I.

Detritæ ergo solidorum nostrorum particulæ & fluidis abreptæ, iterum in fluidi indolem transibunt; neque id mirum, cum ex fluidis olim ortæ fuerint & in iisdem hæserint, priusquam solidis applicatæ & in unam massam coherentem compactæ fuerunt. Hæc fient in quacumque parte corporis, quamdiu vita persistit, maxime vero, si actiones vitæ validæ fuerint, sive ab interna causa motus humorum exagitetur, sive ab externa, v. g. exercitio corporis vehemente. Dum autem ita per vim vitæ continuo elementa solidarum partium deteruntur, facile patet, interstitia vacua nasci illis in locis, ubi quædam particulæ a mutua cum aliis cohesione solutæ ac detritæ fuerunt.

§. C C C C L X I I I.

Verum succus nutritivus, qui per omnia vascula distribuitur, etsi non ejusdem in omnibus indolis, nec eadem principiorum proportionem ubique præditus, continet tamen & terreas particulas, quæ in locum perditarum succedere, earumque jacturam reparare possint, continet etiam aqueas oleosas, aëreas particulas, quæ consociatæ varia inter se proportionem gluten illud plasticum restituere, terreasque particulas in interstitia fibrarum impactas glutinare & cum vicinis elementisnectere possint. Ergo dum motu humorum per vasa particulæ solidæ minimæ deteruntur & fluido torrente abripiuntur, aliæ ac recentes ejusdem indolis particulæ in locum perditarum succedunt, in interstitia ab his relicta vi liquidi succedentis & a tergo urgentis adiguntur, ea explent perfectissime & simul mediante glutine recenti cum reliquis elementis connectuntur. Sic eadem causa corpus nostrum & destruit perpetuo & constanter reparat.

§. C C C C L X I V.

Patet inde iterum sapientia inimitabilis conditoris, qui talem fecit machinam nostram, ut se ipsam repararet. Utcumque exulta scientia mechanica nullam adhuc machinam produxit, quæ se ipsam perenni motu moveret, quæ continua motus decrementa resarciret, quæ denique jacturam ex continuo attritu oriundam ipsa repararet.

Quo majus dispendium, eo largius supplementum. Hoc non universaliter, sed iis in casibus tantummodo verum est, ubi nullum nutritionis impedimentum occurrit. In senibus certe dispendium largius est, neque supplementum umquam respondet huic dispendio. In pueris ob alias causas largius supplementum est, dispendium vero minus. In illis autem, qui ad subsistentiam nutriuntur, ut sunt omnes mediæ ætatis homines, dum recte valent, supplementum semper respondet dispendio, tantumque restituitur quantum deperditur. Dum per labores validos & auctum corporis exercitium plus solito deteritur, tantumdem facile bono victu & quiete resarcitur, jactura partium fluidarum & solidarum per morbos acutos inducta, iis sublatis, victu eupepto facile & brevi tempore reparatur.

Quod illæ partes &c. Exemplum hujus rei habemus in epidermide, pilis, unguibus. Epidermis a cute soluta statim fere renascitur; pili de rasu continuo recrescunt, & intra spatium diei ultra æquabilem epidermidis superficiem prostant; ungues resecti cito prolongantur. Et partes internas corporis quasque eo citius, eoque magis reparari, quo magis præ aliis deteruntur, ipse effectus docet, persistens nimirum integritas illarum partium, quæ brevi tempore fatiscerent, nisi eadem omnino proportionem, qua deteruntur, etiam reficerentur.

§. CCCCLXV. §. CCCCLXVI.

Omne animal, quo est origini suæ proprius, eo velocius & majus incrementum capit. Docet id pullus, qui spatio dierum 21. ex minima & inconspicua molecula ita excrescit, ut quatuor pollices sua longitudine attingat, utque viscera, carnes, ossa perfecta habeat. Docet idem foetus humanus, qui pariter spatio mensium novem ex imperceptibili molecula ad pondus octo, novem & subinde plurium librarum increfcit; & qui, si in lucem editus eadem proportionem pergeret incrementum, intra annos non plurimos atlantis magnitudinem attingeret. Ut concipiatis, quam ingens hoc sit incrementum, quod foetus in utero capit, ponamus calculum moderatissimum. Ponamus itaque rudimentum foetus in prima suæ vitæ periodo, sive in puncto conceptionis, dum vitam auspicatur, æquale esse $\frac{1}{3}$ grani, licet non $\frac{1}{50}$ grani æquet; ponamus porro foetum maturum, perfectum, recens in lucem editum æqualem esse ponderi librarum octo, quod sæpe superat. Quod si jam pondus 8. librarum conferas cum $\frac{1}{3}$ grani, videbis foetum spatio novem mensium tantum fumpfisse incrementum, ut nunc in lucem editus se ipso 138., 240. vicibus major sit. Ponamus nunc eundem recens natum homunculum in virum excrescere & ab octo librarum pondere, quod natus habuit, terminum totius incrementi attingere cum pondere 200. librarum anno quadragesimo. Totum hoc pondus corporis, totum hoc incrementum, quod spatio 40. annorum accessit, non nisi vigecies quinquies majus est illo, quod in lucem editus infans habuit, qui tamen in utero materno spatio novem mensium ad pondus plus 10000. suo rudimento majus increvit. Idem & in aliis animantibus & in insectis observatur. Vidit Cel. REAUMUR ovula muscarum cœrulearum adeo magnum & velox incrementum capere, ut intra

horam centies majus volumen acquirerent. Causa hujus incrementi adeo magni in origine nostra non unica & simplex est. Corculum foetus majorem habet proportionem ad reliquum corpusculum, quam in adulto cor habeat ad reliquam corporis molem. Cor etiam in foetu multo irritabilius est, quam in omni alia ætate. Cor foetus duplo celerius movetur, ac duplo plures intra idem tempus pulsus absolvit. Porro foetus in origine sua fere mucidus est, vascula mollissima & minima vi distensilia & extremitates vasculorum corculo multo viciniore; & ipsæ illæ partes, quæ in homine adulto solidissimæ, in foetu gelatinosæ, molles, vasculosæ sunt. Solidarum denique partium proportio ad fluida in foetu immenso minor, quam in omni alia ætate; ergo resistentiæ, a vasculis oriundæ, in foetu immenso minores, quo propior origini suæ; & contra vis corculi & fluidorum ab eo impulsorum immenso major respectu vasculorum mollissimorum, quam in adulto. Ergo vascula subtilissima, debilissima, continuo elongantur, ampliantur, & eo magis, quo origini propior homo est. Sed distractis ita vasculis debilissimis, humor nutritivus continuo in interstitia fibrarum distractarum se insinuat, puncta contactuum auget, cum reliquis elementis cohæret, sic augetur & moles partium corporis & cum mole etiam firmitas, ex continua similium particularum adhæsiōe, interpositione ac concrectione cum sui similibus. Nunc cum maxima sit vis corculi in prima origine, cum ejusdem distantia ab extremis vasculis minima sit eodem tempore, cum minima tunc sit vasculorum resistentia, necessario maxima partium evolutio & maximum incrementum fiet in tempore origini vitæ proximo.

§. C C C C L X V I I.

Interim quo vascula magis elongantur & a principio motus removentur, quo pluribus eadem

particulis appositis confirmantur, quo magis elementa solidarum partium mutua attractione ad se invicem accedunt, eo magis augmentur resistentiæ cordi oppositæ, eo magis etiam proportio solidarum partium increfcit, eo magis proportio fluidorum diminuitur. Ergo quo magis corpus nutritur & increfcit, eo magis vascula elongationi suæ ac distractioni resistunt. Cumque partium solidarum proportio & robur continuo increfcant, etiam continuo increfcunt resistentiæ, quæ minimæ fuerant in prima origine. Ergo & continuo decrefcit proportio incrementi & nutritionis, quo magis ab origine nostra distamus. Et si rationem habeamus primi incrementi, respectu hujus continuo decrefcimus, licet corpus nostrum adhuc magnitudine & pondere increfcant ad certum usque terminum. Nam licet adhuc continuo nutriamur ad incrementum, tamen ea ipsa nutritio perpetuo decrefcit; minus jam nutritur infans, quam foetus, minus puer biennis, quam semestris infans, minus iterum puero adolescens, minus adolescente juvenis, minus juvenili ætas virilis. Ergo reipsa nutritio continuo fluxu a prima origine decrefcit, etiam dum corpus nostrum ad sensum increfcit. Ergo continuis gradibus a primo vitæ momento in mortem tendit machina nostra. Ergo morimur, quia vivere cœpimus, si etiam nulla alia causa vitæ destructrix accederet. Increfcit autem corpus nostrum, vasa adhuc viribus vitæ elongantur. Nec alia est ratio, cur sæpe videamus pueros & adolescentes post morbos acutos prægressos subitum & magnum incrementum capere, quam quod vasa per impetum febris debilitata, distracta insigniter fuerint & nunc viribus vitæ facilius elongantur. Ubi vero ossa & cartilagine & muscoli terminum incrementi sui attigerunt, nec vasa jam ultra in majorem longitudinem produci possunt, pergunt eadem vis vitalis augere latitudinem vasorum & inde jam consisten-

te longitudinis incremento, corpus adhuc in latitudinem crescit. Sed & huic tandem periodo terminus suus est, ubi vasorum robur ita increvit, ut alternum cum fluidis æquilibrium obtineat, utque non plus fluidis vasa cedant, quam quantum ad motum vitalem reciprocum sustinendum opus est, ulterius vero extendi non possint. Ea virilis ætas est & status corporis, ubi illud aliquo tempore sine incremento & decremento persistere videtur, licet reipsa indies jam decrescat, sed gradibus adeo parvis & obscuris, ut decrementum sensibile non nisi post aliquot annorum intervallum advertatur. Tum senectutis initium est, in qua manifeste robur solidarum partium fluidis prævalere incipit & continuo augeatur. Multæ in hunc effectum causæ conspirant. Non solum per ætatem plus terrei elementi intra corpus aggeritur & partibus solidis apponitur, unde harum robur & firmitas augetur, adeo ut & ossa in senibus manifeste rigidiora sint & cerebrum ipsum siccius ac compactius deprehendatur; sed etiam innumera vascula in juniore ætate aperta & humoribus pervia, sensim abolentur & cum suis humoribus concresecunt, aut a vasis majoribus compresse delentur, aut vitio fluidorum sensim spissiorum obturantur. Nam arteriæ majores e. g. & ossa & cartilagines, in prima ætate manifestis & plurimis vasculis percurruntur; ea vascula in vasis majoribus eliduntur ab illa continua parietum trunci majoris pressione, quæ a fluido, a corde pulso, oritur & eo magis latera arteriarum urget, quo major in finibus extremis resistentia adest. In ossibus succus nutritivus e vasculis effusus, in fibras & laminae indurescit & intercepta vascula, saltem plurima, delet. Ipsi muscoli continuo labore magis indurescunt, multaque caro vitio ætatis in tendineam naturam mutatur, in qua difficulter vascula demonstrantur, cum caro musculi antea vasculis confertissimis prædita esset.

Dum ita innumera vascula fluidis impervia fiunt & concreſcunt, augetur utique firmitas partium ſolidarum & rigiditas corpori inducitur, eo citius quidem, quo majore labore id exercitatur. Simul vero ita reſiſtentiae cordi oppoſitae augentur. Sed ipſa etiam cordis vis irritabilis per ætatem minuitur, hinc pulſus in ſenectute multo tardior, quam in juvenili ætate. Minuitur pariter ſenſibilitas, docet id hebetudo viſus, auditus, guſtus, olfactus, tactus. Minuitur nervorum in muſculos actio, ut docet tremulus ſeniculorum ingreſſus & cita ad exiguum motum defatigatio. Hinc ſtimulis indigent ſeniculi, ut languſcentem vitam excitent; & inde *vinum*, lac ſenum appellatur. Pergit tamen minui continuo vis cordis, augetur continuo partium rigiditas, indies increſcunt reſiſtentiae, circulatio minuitur & ob minus celerem circulationem lenteſcunt humores; eo ipſo difficultas augetur circulationis per vascula minora adhuc libera; hinc augentur concreſiones vaſculorum cum ſuis humoribus; inde iterum rigiditas continuo major fit. Non interim detritus minuitur, imo vero augetur pro reſiſtentiæ augmento & rigiditatis. In arteriis majoribus ſenum manifeſtas ſcrobis ex detritu natas viſus diſtinguit attentioris anatomici. Atque aucto attritu fluidorum diſſiciliter meabilium ad vaſa rigidiora, etiam blanda alias humorum indoles corrumpitur & acrimonia accedit comes. Certe in ſenibus omnes humores acriores ſunt; urina acerrima, ipſe halitus & fudor & ſaliva foetent. Hinc alia demum cauſa decrementi. Ille detritus præterea terræa elementa in ſanguine accumulatur, quæ niſi tota per urinam eliminetur, ad alias partes delata, oſſeas concreſiones efficit, ut in arteriarum membranis, aut ad extrema corporis propulſa, dum per vascula jam calloſa tranſire nequit, dolores podagricos ciet, ligamenta articulorum & cutem tophacea calce replet, obſtruit, ut obſervata præctica teſtantur.

Conspirat cum hisce causis victus, quo seniculi utuntur, plerumque meracus, potus spirituosus, vel aquosus in frigidis corporibus assumptus; & cum his quies necessaria, musculis jam obsequium ferre negantibus. Mollis diæta & humectans: & usus balneorum & unguentorum, quibus veteres adeo affuetos fuisse novimus & quibus hodiedum aliqui populi indulgent, etsi non impedire potest illam rigiditatem senilem, tamen procrastinare hanc potest & vitam magis longævam reddere. Tandem tamen semper ab ipsis vitæ actionibus rigiditas inducitur & vasculorum excæcatio & immeabilitas humorum, donec resistentiæ adeo adauctæ fuerint & vis cordis adeo diminuta, ut motus ille reciprocus solidorum & fluidorum ultra subsistere non possit. Tum vivere cessat decrepitus senex, sine morbo in mortem transiens, nisi senectutis vitium ineluctabile pro morbo habeas. Atque hæc mortis pure senilis ratio est.

Robur fibræ a cohæsione &c. Hæc facile intelliguntur ex numero punctorum contactus mutuï, majore, vel minore; & inde distincta idea habetur, quomodo abolitis vasculis, fluidis expulsi, parietibus vasculorum concretis, firmitas & rigiditas partium augeatur.

§. C C C C L X V I I I.

Ligamenta. Arteriæ umbilicales quæ in foetu sanguinem ad placentam referebant, vena umbilicalis, quæ sanguinem a placenta ad foetum attulit, in homine nato, ligato umbilicali funiculo, cum proprio humore concresecunt, excæcantur & in speciem ligamenti vertuntur. Sed & canalis arteriosus in foetu pervius, in homine nato obturatur & foramen ovale. Sed harum viarum abolitiones non ad senectutis vitia pertinent. Neque dici potest, quod per senectutem vasa in ligamenta concresecant; sed hoc certum est, innu-
mera

nera vascula minora aboleri & concrefcere impervia; prout antea de offibus, cartilaginibus, tendinibus, demonftravi. Nunc etiam futuræ cranii exemplo funt ulteriori. Nam in fœtu & in recens natis infantibus loco futurarum membranæ funt, quæ offa cranii hiantia conjungunt, & pericranium iis in locis duræ matri proximum eft, & vascula utriusque membranæ frequentiffimis anafomofibus inter fe concurrunt. Per ætatem illæ membranæ minuuntur, offa cranii increfcunt & futuris feſe mutuo recipiunt, compreffis & abolitis illis vasculis, quæ inter duram matrem & pericranium intercedebant. In ſummo ſenio ita arête offa cranii inter fe conjunguntur & quaſi conferruminantur, ut & ipſæ futuræ deleantur & veſtigia duræ matris nulla ſint, quæ ſe inter futuras immiſerat. In aliis corporis partibus ſimiles mutationes contingunt.

§. CCCCLXIX - §. CCCCLXXI.

Ergo numerus vaſorum in embryo maximus &c. Hoc evidentiffime ex præcedentibus patet, licet prima fronte paradoxum videatur. Nullum vas eſt in adulto, quod non fuerit in embryo, licet ingenti proportionemina embryonis vaſa fuerint in origine vitæ. Quodſi vero etiam conſideres, vaſa quædam embryoni propria, ſtatim fere, atque is in lucem editus eſt, aboleri, ut vena umbilicalis, arteriæ cognomines, canalis arterioſus BOTALLI; ſi conſideres in multis partibus adulti corporis, v. g. offibus, cartilaginibus, tendinibus pauca & hæc ægre demonſtrari vaſcula, cum tamen in embryo hæ partes vaſculofiffimæ deprehendantur; ſi conſideres cutim calloſam hinc inde fieri & innumera vaſcula exhalantia & inhalantia deleri, alias partes in fœtu magnas per ætatem minui, glandulas meſeraicas & alias conglobatas in ſenio obliterari; evidens

est, numerum vasorum in embryone maximum, crescente ætate sensim minui.

§. C C C C L X X I I.

Partium solidarum nostri corporis robur & firmitas pendet a copia elementi terrei & ab arcta hujus unione mediante glutine. Quo magis elementa solidorum ad se invicem compacta sunt, eo partes solidæ firmiores sunt, exemplo ossium, dentium, tendinum. Quo plus fluidi inter elementa solida intercedit, eo nexus horum debiliior est & pars solida inde composita laxior molliorque. Jam vero per ætatem augetur continuo proportio elementi terrei & multa vascula fluidis olim pervia delentur & concrescunt; sic augentur simul puncta contactuum in solidis, & fluidi intercedentis proportio minuitur. Itaque firmitas & robur partium solidarum continuo per ætatem augetur. Non autem hic de robore musculari sermo est, quod in senio manifeste ad summam imbecillitatem decrescit; tum quia liquidi nervei secretio in his parciior fit, tum quia muscularis substantia minuitur & tendinescit, tum etiam, quia irritabilitas fibrarum muscularium paulatim elanguet.

§. C C C C L X X I I I.

Hæc ex prædictis patent. Considera originem pulli ex ovi humoribus, considera originem fœtus ex humore materno ad uterum delato. Considera ossa, cartilagine, dentes, in fœtu gelatinosa, viscera, membranas, tegumenta, fere mucosa, considera cerebrum in fœtu instar aquæ fluidum; & comparisonem institue cum partibus solidis hominis nati. Iterum considera partes solidas infantis recens nati succulentas, manifeste vasculosas & fluidis pervias & comparisonem institue cum partibus solidis hominis adulti. Videbis immensè majorem proportionem esse fluidorum ad solida, quo recentior ætas & origini suæ propior fuerit.

§. C C C C L X X I V.

In senibus omnia exsueca sunt, quæ madida erant in infantibus. Rugosa cutis & arida, cellulosa firmior, siccior, tenacior, articuli rigidi, ægre mobiles ob deficiens linimentum Haversianum. Ossâ rigidiora, vix amplius, aut ægerrime coalitura, si forte per infortunium fracta fuerint. Tendines plurimi, longi, compacti, ligamenta indurata. Caro ipsa multo durior. Et hæc perinde in animalibus ut in homine obtinent. Caro pulli junioris cito emollitur coctione & fere butyri instar, masticata cedit; galli senioris caro etiam multis horis cocta vix dentibus discerpitur. Tantum ævi longinqua valet mutare vetustas.

§. C C C C L X X V.

Hoc jam explicatum fuit. Tamdiu nempe crescimus, quamdiu vis fluidorum superat resistantiam partium solidarum. Verum ubi resistantiæ omnes ita augentur, ut solida vi cordis ulterius elongari nequeant, cessat incrementum longitudinis; permanet aliquod adhuc latitudinis augmentum, donec aucta vasorum firmitate inter hæc & cordis potentiam æquilibrium nascatur. In hoc æquilibrium aliquo tempore ad sensum subsistere videtur corpus, inde continuo in decrementum ruit, eo velocius, quo citius vasa & fibræ rigescunt. Hinc validis laboribus dediti citius senescunt. Dum denique solidarum resistantia eousque augetur, ut ne quidem liquidis a corde pulsus in tantum cedant, quantum necesse est ad continuandum motum reciprocum, quo vita sustinetur, aut ubi vires cordis ita elanguescunt, ut non sufficiant propellendis in circulum humoribus, tum denique, ut cum LUCRETIO loquar, frigida vitæ pausa fit, quæ mors pure senilis, felicissima, sine omni fere lucta, placida vitæ quies est, omnibus optanda; sed

paucis mortalibus ea felicitas obtingit. — Ceterum hoc loco explicandum est phænomenon, cum decremento senili conjunctum, nempe staturæ corporis diminutio. Universa quidem corporis moles minuitur, diminuta scilicet fluidorum proportionem, solidis partibus magis ad se invicem compacta, cellulosa tela sicciore & cutim arctius adducente; verum etiam longitudo corporis diminuitur in senectute, simulque truncus corporis in anteriora propendit incurvatus. Hujus phænomeni ratio latet in lamellis cartilagineis, flexilibus, elasticis, inter singulas vertebrae interpositis. Lamellæ hæ in anteriore vertebrarum parte crassiores, in posteriore tenuiores sunt, quod ideo factum est, ut facilius spina dorsi & truncus corporis erectus teneretur, cum alioquin pondus corporis in anteriora magis propendeat. Observatum est ab academicis Parisinis, hominis staturam de die minui, dum lamellæ illæ cartilagineæ a pondere totius trunci corporis comprimuntur; de nocte autem dum in lecto decumbit, lamellas hæc vi elastica sese restituere & vertebrae magis dimoveri, ut surgens e lecto homo major sit se ipso, dum pridie lectum petebat. Nunc vero in senibus, ut omnes cartilaginee valde extenuantur & compinguntur, ita etiam lamellæ hæ cartilagineæ vertebrarum tandem continuo onere victæ extenuantur, complanantur, obrigescent, vimque elasticam, qua olim pollebant, amittunt. Inde tota longitudo spinæ, atque adeo trunci corporis diminuitur. Accedit alia causa, nempe musculorum imbecillitas in senio; cumque pondus corporis sponte sua magis in anteriora nitatur & muscoli flexores, ut alibi dixi, passim extensoribus prævaleant, magna vis musculorum extensorum requiratur, ut spina dorsi cum toto trunco corporis erecta servetur, sit hinc, ut deficiente robore musculorum, spinam extendentium, pondus

corporis antrorsum ruat & spinam incurvet. Hinc curvuli incedunt omnes decrepiti senes.

§. CCCCLXXVI.

Haftenus absolvimus nutritionem generatim spectatam, incrementum, statum, decrementum corporis. Non tamen omnia diximus, nec totam hanc materiem exhaustimus & multum abest, ut exhauriatur unquam. Multum enim sibi hac in re arcani reservavit natura, quod pertinaciter celat. Sane non videtur idem modus esse nutritionis in omni parte corporis. Omnes quidem solidas nostri corporis partes ex liquidis reparari, certum est, sed eodem omnes modo reparari haud probabile. Aliter pili & ungues, aliter vasculosae partes, de quibus diximus, aliter cellulosa tela, aliter epidermis, aliter fibra muscularis, aliter ossea substantia reparari videtur. Pilos quidem & ungues sola protrusione crescere verosimile est; nam resecti pili, aut æquabiliter abradi, satis cito extra epidermidem prominent; nempe succus nutritivus ad bulbum pili per propria vascula allatus & in cavitatem bulbi hujus effusus, subit ipsum pili tubulum, ejusque vaginam protrudit, eo magis, quo efficacius a succedente succo nutritio urgetur. Tale etiam prorsus unguium incrementum esse videtur. Ungues enim vasculosi non sunt; ad radicem solum unguis, quæ intra cutim delitescit, vascula adhærent; & si ungui pone lunulam ope solutionis metallicæ maculam aliquam permanentem inuras, videbis, ungue crescente, eam maculam non crescentem, sensim magis magisque antrorsum promoveri, donec tandem extimum unguis marginem teneat & resecetur. Ungues ergo protrusione crescunt, videturque succus nutritivus solummodo ad radicem unguis apponi, atque illa aducta totum unguem anteriorem continuo urgere & protrudere. Cellulosa tela ut nutriatur, obscurum est. Vasa qui-

dem copiosa per cellulosa[m] telam excurrunt & ex his etiam vascula vaporem exhalantia, atque oleum vehentia in cellulas hujus telæ patent; sed ipsæ lamellæ, quibus ea tela componitur, vasculosa non sunt. Hinc credit Cel. HALLERUS, telam hanc ex succo halituofo, gelatinosa indolis, qui per eam movetur, nutriri. Mihi hæc sententia non improbabilis videtur, quum & extravasata in cavum abdominis aqua gelatinosa, ut in hydropicis frequens, telas, cellulosa[m] similes, quas spurias membranas vocant, certo producat. In cadaveribus hydropicorum non raro viscera abdominalia ejusmodi tela obducuntur. Vidi in cadavere fæminæ hydropicæ natam talem membranam, quæ cavum abdominis in duas cavitates discriminavit, ita undique ambitu suo accreta, ut cavitas superior nullam cum inferiore communicationem habuerit & aquis ex pelvi evacuat[is], regio abdominis superior aquis distenta manserit, donec seorsim incideretur. Atque hæc membrana non aliunde, quam ex ipsa lymphâ extravasata nata fuit. De epidermide etiam suspicari possit, eam ex peculiari humore, qui mucida indolis sit, de cute exsudante reparari. Rationes alibi dixi, quia reticulum maceratione in mucum resolvitur, & ipsa epidermis, licet diuturniore maceratione indigeat, pariter in ejusmodi mucum deliquescat. Videtur id ipsum suadere teneritas epidermidis major a balneo & ablutione per saponacea. Et dum epidermis de cute solvitur, videmus omnino humorem viscidulum de cute exsudare, sub quo novum reticulum & nova epidermis generatur. In aëre, superficiem corporis externam exsiccante, videtur latere ratio, cur epidermis reticulo firmior & compactior sit. Difficilius dictu[m] est, quomodo fibra nutriatur. An ex eodem succo, quo tela cellulosa, jacturam suam refarcit? an ex liquido nerveo usu suo functo? Quominus aliquid hac in re decidi potest, vetat

partium subtilitas. Certiores sumus de ossium nutritione, quæ ex succo peculiari gelatinoso, multis terreis particulis gravido, formari docent observata Clarissimorum Virorum & imprimis HALLERI in ovis incubatis instituta tentamina. Omnium nimirum ossium initium tremula gelatina est. In latis ossibus ea gelatina membranæ similis est; paulatim hæc gelatina in cartilagineam firmitatem mutatur. Tum porro nondum apparente rubro sanguine, plerumque in media hujus substantiæ parte apparet particula aliqua opaca, reliquis firmitior & compactior, quam punctum ossificationis vocant. Ab eo puncto, primum microscopio, deinde nudo etiam oculo, emitti cernuntur fibræ minimæ albicantes osseæ, quæ in planioribus ossibus ex puncto hoc tamquam ad peripheriam in omnem latitudinem sparguntur, in longis vero imprimis longitudinem sequuntur. Ex his fibris primæ fiunt lamellæ osseæ, sub quibus aliæ atque aliæ subnascuntur. Inter has laminas vasa manifeste rubra, longa, recta, cum cellulosa tela sese insinuant, tumque os plurimis punctis rubris interstinctum cernitur, quæ vestigia sunt arteriolarum nutritiarum. Ab iis demum omnis ulterior ossis perfectio pendet. Ab his & elongatio ossium pendet & aucta sensim crassities, quo plus succi gelatinosi cum sanguine rubro adfertur & ab hoc secretum in interstitia laminarum ossearum effunditur. Ab iisdem pendet calli generatio, quo ossa fracta sponte natura glutinantur. Et calli quidem genesis etiam ossium generationem ac nutritionem pulchre illustrat. Nam dum os fractum in situm suum reponitur, ut extrema fracturæ utrimque sibi congruant, undique ex ossis fracti substantia exsudat humor gelatinosus viscidus, qui & ipse paulatim per varios gradus in osseam firmitatem induratur & partes ossis, fractura divulsas, conglutinat, imo firmiorem, quam prius habuerint, earum cohæsionem efficit. Hæc visum fuit ad-

dere illis, quæ hætenus de nutritione generatim dicta sunt. Nunc redeo ad paragraphum BOERHAAVII, qui hoc loco demonstrare satagit, etiam solidas partes, quemadmodum dictum est, reparari & destrui, atque adeo viribus vitæ mutari, cum aliqui, infirmis rationibus nixi, solida in universum mutari & reparari negaverint. Non multis opus est ratiociniis, dum res ipsa loquitur. Epidermis certe continuo, insensibiliter fere, desquamatur, eademque reparatur perpetuo. Si quis partem corporis quamcumque holoserico fricet, dein microscopio lustret, evidenter in hoc squamulas minimas ab epidermide detritas conspiciet. Post morbos nonnullos desquamatio illa evidens est; sed etiam continuo in sanitate fit, licet ob minutiam detritarum particularum vix bene advertatur. Rursus pili & ungues resecti continuo reparantur. Dentem crederes ab hac lege exceptum, cum dentes omnia ossa duritie vincant & aliis ossibus fere omnibus citius perficiantur. Et tamen in adulto etiam homine continuo increfcet & ultra reliquorum ordinem protuberare incipiet, si oppositum illi dentem in altera maxilla excidere contigerit. Ossa denique fracta substantiam suam callo reparant & vicissim durities ossium & rigiditas per morbos nonnullos in cartilagineam flexilitatem redit & si a morbis præscindas, per ætatem manifeste ossium rigiditas augetur. Quæ omnia satis demonstrant, partes solidas nostri corporis reapse viribus vitæ mutari.

§. C C C C L X X V I I.

Ex dictis patet, firmitatem corporis nostri pendere a copia staminum solidorum iusta proportionem glutinis cohærentium. Aucta vero moles corporis universi in plerisque hominibus ab olei in cellulosa tela accumulatione, aut a sanguinis copia maiore & vasorum repletionem, pen-

det. Hinc laxa ejusmodi corpora sunt & debilia. Contra vero homines strictioris habitus, labore indurati, quadrati, quibus solidorum elementorum major copia & cohæsiō firmior est, robustissimi sunt. Nimia tamen rigiditas ut partium firmitatem auget, ita contra robur activum corporis minuit, ob rationes alibi dictas. Hinc debilissimi senes in summa partium rigiditate. Hinc & laxitas nimia & nimia rigiditas vires corporis frangit; optima etiam hic mediocritas est, quando justa fluidorum & solidorum proportio obtinet.

§. C C C C L X X V I I I.

Quare nervis correptis pereat nutritio? idemque simul in arteria obtineat? Arteria rescissa, si unica fuerit, nutritionem ejus partis perire, ad quam arteria tendebat, planum est; deficit enim vitalis liquidi & succi nutrititii in eam partem influxus. Nervo autem compresso, resecto, vel aliis modis vitiato cur pereat nutritio, difficile dictu esset, si certum esset phænomenon. BOERHAAVIUS quidem facile rationem redderet, nutritionem a nervis repetendo ex hypothesi, quam satis refutatam esse puto & nunc ex BOERHAAVII principiis iterum subvertam. Hic enim de nervis sensoriis & motoriis quæstio est; sed BOERHAAVIUS nutritionis officium tribuit nervis naturalibus, sive ultimis arteriis in tenuitatem nerveam in quacumque parte extenuatis. Non potest ergo ratio læsæ nutritionis repeti a læsis nervis motoriis aut sensoriis. Sed non est, ut multum nos torqueamus in hac difficultate; neque enim phænomenon aut certum aut constans est. Dantur sane paralysees partium singularem ex vitio nervorum & tamen partes illæ corporis per annos nutriuntur. Dantur etiam, ubi pars paralytica simul atrophica fit; atque ista species paralyseos rarior est & vix curabilis. Sed non protinus inferre licet, ex vitio nervi, unde pa-

ralysis ortum habet, etiam atrophiam secutam esse. Videndum est, num eadem causa, quæ nervum e. g. compressit, non perinde arteriam affecerit? videndum est, numne atrophia præcedens causa fuerit ipsius potius paralyssis? Certe vagæ ejusmodi observationes & obscuræ non debent opponi phænomenis frequentioribus & clarioribus, dum directæ experimenta desunt. Directum autem experimentum nec BOERHAAVIUS attulit, nec alii, tale enim experimentum jure postulo, ut certo constet a solo nervo læso nutritionem partis abolitam fuisse. Si dicas e. g. colicæ pictonum supervenire paralyssin & sæpe etiam atrophiam, indeque pro nervis triumphare velis, facile demonstrabo causas colicæ pictonum ex sua indole pares esse abolendæ nutritioni, etiam servata partium mobilitate.

Cetera quæ in textu proponuntur, ex prædictis patent.

§. C C C C L X X I X.

Quotuplex sit circuitus humorum? &c. Totuplex est diversa circulatio, quot diversæ sunt vasorum series, quot diversi vasculorum reptatus, quot viscera diversa, quot diversæ partes corporis humani.

Effectus est vita partium, earum destructio, reparatio, diversorum humorum secretio.

Problema. Si assumatur quantitas probabilis humorum, in circulum currentium, quantitas item sanguinis singula contractione cordis in aortam expulsi & tempusculum quo cor ad plenariam systolen ac diastolen indiget, potest utique determinari tempus, intra quod universa humorum massa semel transeat per cor. Sed in eo calculo negligitur indoles diversorum humorum fluidior, vel viscidior, partis distantia a corde major vel minor, series vasorum major vel minor, rep-

tatus intricatior vel simplicior & aliæ conditiones, quæ velocitatem humorum in singula parte corporis aliam efficiunt. Unde si singulorum humorum rationem habeas, omnino problema solvi non potest, quia nescimus, quæ sit in singulis partibus singulorum humorum velocitas; & dum demonstro, intra determinatum tempus quinquaginta libras humorum per cor transire, massam autem universam humorum circulantium æqualem esse libris 50. id solum demonstro, intra hoc tempus per cor transire eam humorum quantitatem, quæ sit æqualis massæ humorum universæ, non autem singulos humores intra idem tempus transire per cor, cum sanguis aliarum partium intra idem tempus decies e. g. tardius, aliarum decies velocius moveatur. Interim tamen habita ratione cordis idem semper erit, ac si tota omnium humorum massa intra hoc tempus per illud trajiceretur. Semper enim eadem quantitas sanguinis, in universum spectati, cordi redit uniformiter, cum defectum velocitatis in illis partibus, velocitas in his aucta compenset. E. g. sanguis arteriæ cœliacæ tardius redit in venam cavam, cum prius venam mesentericam, tum portarum venam & denique hepaticas perfluere debeat; contra sanguis renalis arteriæ citissime & brevissima via venæ cavæ reditur.

§. C C C C L X X X.

Somnus est quies motuum voluntariorum & sensuum. Priusquam igitur de somno agamus, sensuum functiones explicandæ sunt, nam motum musculorum jam pertractavimus. Omnium vero sensuum generalissimus & latissime patens est tactus, quem natura per universam corporis superficiem distribuit. De eo primum dicemus.

D E T A C T U.

§. CCCCLXXI.

Dum de cutis functione agebatur, dictum fuit, nervos subcutaneos undique exiguis ramulis, sed copiosissimis cutim subire & in ejus exteriori superficie assurgere in papillas minimas; simul vascula cutanea subtilissima nervulos hosce comitari, nec papillas ex solis nervorum extremitatibus, sed accedente subtilissimorum vasculorum congerie & subtilissimo celluloso textu componi, ut subtilior anatome per injectiones & microscopica præparata demonstrat. Hæ papillæ, diversæ in diversis cutis partibus figuræ, organum tactus constituunt. Ut autem sensiles manerent, oportebat illas continuo humidas conservari; nam nervus siccus aut non sentit, aut certe minus exquisitè, quam humidus. Lingua sicca & arida gustum non percipit; siccis naribus minuitur olfactus; exsiccato optico nervo visus interdum abolitus est, oculo licet sano & integerrimo. Humectantur continuo papillæ tactiles partim ab illo vapore, qui per universam cutim exhalat, partim a propriis vasculis subtilissimis, quæ ad fabricam papillarem constituendam concurrunt, irrigantur. Rursus autem non poterant nervi nudi extremæ corporis superficiei exponi, tum ab aëre ambiente cito exsiccarentur, tum quia impressio objectorum tactilium in nervos nudos nimis vivida fieret; omnis vero sensatio nimis vivida dolorifica est, aut molesta, aut denique alio modo ingrata. Et certe loco tactus dolor intolerabilis perciperetur, si nudæ nerveæ fibrillæ in extima superficie corporis disponerentur. Patet id, si epidermis ambustione, vel vesicante emplastro, vel alio modo de cute soluta est. Ergo papillæ tactiles involucro peculiari defendi debebant, quod aërem ambientem ab his arceret, earumque exsiccationem prohiberet & simul actionem objectorum tactilium in papillas cutaneas ita

moderaretur, ut nec nimis debilem, nec nimis vividam impressionem ab attractu reciperent. Id præstat epidermis cum reticulo, de quibus diximus. Porro necesse erat, ut papillæ ultra cutis superficiem prominerent, quo distinctius a superficie corporum, quæ tactu explorantur, afficerentur; itaque & reticulum, quod papillis & cuti ubique insternitur, foveolis innumeris excavatum interius esse debebat, in quas foveolas papillæ tactiles ultra cutis superficiem assurgentes recipiantur. Has foveolas anatomici in ablato cum epidermide reticulo facile demonstrant. Cumque epidermis adeo arcte ubique reticulo cohæreat, ut tantum exterior hujus superficies esse videatur, hinc omnibus illis in locis, ubi reticulum intus foveolis impressum est, epidermis exterius in eminentes strias & lineolas attollitur, inter quas fulci excurrunt, cum eminentibus illis striis alternantes. Sic videmus totam cuticulæ superficiem externam inæqualem esse & lineolis aliis fulcatis, aliis eminentibus, alternatim exarata; eminentes istas lineolas intus papillæ tactiles occupant & replent; per fulcatas autem & profundiores lineolas reticulum immediate cuti adhæret; & in iisdem fulcis præcipue vascula exhalantia ordinantur. Sic fit, ut, cum epidermidis superficies inæqualis sit & papillæ tactiles juga epidermidis eminentiora ubique occupent, ut, inquam, impressiones, a superficie corporis attracti oriundæ, distinctius papillas afficiant, quam si his planum & æquabile velamentum supertenderetur. Nam quo exactius papillæ eminent, eo exactius in superficiem corporis incurrunt, adeoque & vividius afficiuntur.

Pyramidales. Non eadem ubique aut copia papillarum est, aut figura. Majores sunt in illis partibus, quæ acutius sentiunt & evidentiores & copiosiores. In lingua detracto epithelio distincte cernuntur, in digitis manuum pedumque ablata

epidermide etiam nudo oculo conspiciuntur, uti etiam sub unguibus digitorum manuum & pedum & in digitis quidem oblongæ & acutiores sunt. In labiis, buccis, facie, quasi villosæ apparent; in glande penis ad instar flocculorum antrosum procumbentium se habent; in lingua aliæ inversæ conicæ, aliæ fungiformes, pleræque conicæ acuminatæ sunt. In mamma muliebri obtusæ, in aliis cutis regionibus minimæ, sine microscopio vix cernendæ, eo autem admoto obtusæ & latiusculæ videntur. Acutiores papillæ exactius in superficiem corporum & minimas depressiones & inæqualitates incurrunt. Hinc tactus ceteris paribus exquisitior, ubi papillæ acutiores, longiores, ut in apicibus digitorum.

Contractiles, iterumque emissiles. Hæc MALPIGHII conjectura fuit, papillas nimirum sensiles, dum objectum tangere volumus, erigi & altius intra foveolas assurgere, ut accuratius objectum explorent. Eam conjecturam assumpsit BOERHAAVIUS & ornavit. Nam & papillas linguæ erigi, si homo famelicus ante speculum saccharum, aut aliud sapidum corpus linguæ offerat gustandum, experientia constare aiebat. Addiderunt alii, papillas in vivo homine magis eminere, quam in cadavere; addiderunt exemplum papillæ mammarum, quæ titillata sese erigit. Id certum est, erectas papillas melius in superficiem corporis explorandi incurrere, atque hinc etiam exactius sentire. Sed an reipsa ad voluntatis imperium, dum corpus tactu exploramus, papillæ erigantur, an vicissim attentione mentis ablata subsideant, id quidem certo dici non potest, licet non improbabilis conjectura sit. Opponi quidem potest, nullam vim elasticam nervis inesse, qua se aut elongent, aut restituant; sed ea objectio hic locum non habet, siquidem papillæ hæ non ex mera pulpa nervea, sed ex strue elegantissima vasculorum & celluloso textu, fabricatæ sunt.

In locis tactui exercendo propriis. Tactus organum per omnem cutis superficiem distributum est, non externam solum, sed etiam internam, quæ os, linguam, fauces, nares, laryngem, ventriculum, œsophagum, intestina, integit. Sed proprium tactus organum, quo ad explorandas obsectorum qualitates tactiles, easque accuratius cognoscendas utimur, in apicibus digitorum manuum pedumque collocavit natura. Peculiaris hic est epidermidis in sulcos & lineas spirales ordinatio, qualis in nulla alia cutis regione observatur. Peculiaris etiam hic adest, firmior quam alibi & elastica cellulosa tela, quæ papillas sustinet. Peculiaris denique hic est nervorum dispositio, qui secundum flexoriam digitorum partem & per latera advenientes, ultimis suis ramulis undique in longitudinem versus apices digitorum exporriguntur & in papillas oblongas, acutas, antrorsum inclinatas desinunt, quas spirales epidermidis lineolæ & his respondentes fulci reticuli protegent. Majores etiam hæ papillæ sunt in apicibus digitorum, quam ubique fere in corpore. Nunc cum eadem fabrica sit in apicibus digitorum pedis, possemus utique etiam his uti ad explorandas tactiles corporum qualitates; sed per incessum & calceamentorum usum & pressionem ponderis totius corporis, sensibilitas digitorum pedis multum imminuitur & ad exquisitiorem tactum inepta redditur. In eo peculiarem prærogativam præ omnibus animantibus, si simias exceperis, homo habet, quod molles digitos & nervosissimos & ad subtiliora corpora exploranda aptos nactus est, dum cetera animantia duras ungulas, aut unguiculos & callos insensiles in extremitatibus habent. Alia digitorum prærogativa est, quod variæ figuræ corpora, quadrata, rotunda, cylindrica, sphaerica, plana, longa &c. prehendere, regere, firmiterque continere possint & subtilissima etiam opera tractare; qua præro-

gativa omnia animantia carent, similiis iterum exceptis, quarum fabrica ad humanam maxime accedit.

§. CCCCLXXII.

Densentur in ungues. Hoc loco tradenda est unguium historia, de quorum origine variæ olim auctorum sententiæ fuerunt. Papillas nerveas induratas in unguem mutari, MALPIGHIUS credit & fere eandem BOERHAAVII opinionem fuisse, ex textu videri posset & magis adhuc ex propria explicatione, quam in hunc textum auditoribus suis proposuit. Sed quomodo cum hac opinione BOERHAAVII conciliari poterunt verba mox sequentia in textu: *defendendis papillis, earumque callositati impediendæ aptos.* Quomodo, inquam, concipi potest, ungues ex papillis callosis induratis nasci & simul harum callositatem impedire? Non ego sum œdipus, ut hoc ænigma resolvere audeam. Cum pilis ungues comparavit Cel. LUDWIGIUS. Alii partem epidermidis esse voluerunt; HALLERUS reticulum induratum in corneam unguis naturam degenerare contendit. Male dixisse MALPIGHIUM & BOERHAAVIUM, nec ungues exsiccatis & induratis papillis nerveis fieri, continuo apparet, quia ipsæ papillæ integerrimæ sub ungue hærent, eoque veluti scuto defenduntur & quia inter papillas eas & unguem, reticulum manifeste intercedit. Propius illi ad veritatem accesserunt, qui ungues epidermidis propaginem esse scripserunt. Nam ungues epidermidi omnino adhærent, eamque in cadavere detractam sequuntur. Epidermis insensilis est, ungues etiam sine dolore refecari possunt, modo caveas, ne, arctius præsecando unguem, vicinam cutim lædas. Epidermis vasis caret, caret etiam vasis unguis. Epidermis ablata renascitur; unguis præfectus continuo succedit recrefcens. Epidermidi proxime reticulum subest, idem etiam subest unguis

gui & in Æthiope quidem sub ungue nigricans, ut sub epidermide nigrum. Hinc patet, ungues reipsa cuticulæ propaginem esse; utrum autem extrema hujus superficies, seu epidermis proprie dicta, an vero interior, seu reticulum in unguem densetur, anatome accuratior decidet. In ungue tria distinguuntur, primum epidermis, tum vera unguis substantia, denique huic subjectum reticulum sulcatum, sulcis longitudinem sequentibus, in quos longæ sub ungue papillæ recipiuntur & ad reticulum adhærent. In fœtu & in adulto homine, cui recens unguis renascitur, primum mollis plicatilis, inde magis elasticus, per varios gradus durefcit in corneam fere soliditatem & fibris componitur longis, parallelis, cohærentibus & lamellatim sibi mutuo superstratis. Pars unguis intra cutim absconditur, quam radicem unguis appellant. Ea pars unguis alba est & mollior, flexilior & quadrato tenui margine intra duplicem cutis lamellam reconditur, eodemque margine pertinacissime epidermidi adhæret, cuti autem per solam cellulofam fabricam neçtitur. Quæ ut melius intelligantur, notandum est, in parte superiore ultimæ phalangis digitorum cutim in duas laminas secedere, quarum alia exterior & conspicua unguis radici supersternitur, atque aliquo spatio antrorsum migrans arcu quodam semicirculari, quasi in modum lunulæ terminatur, nudum jam unguem relinquens; altera vero cutis lamella, cum periosteo mista, sub ungue antrorsum pergit & in apices digitorum exit. Inter has duas cutis lamellas quadrata radix unguis intercipitur, quæ quanto spatio tecta delitescat, quivis in se ipso facili experimento videre potest, si unguem pone lunulam premat. Margini huic posteriori radiceis unguis etiam cutis adhærescit. Jam porro epidermis, quæ cutim digitorum ubique sequitur, ubi cutis lunula terminatur & unguis ex illa conspicuus emergere incipit, mox se supra unguis

exteriorem superficiem projicit, illumque antrorsum tendentem comitatur & integit; pars vero altera epidermidis a lunula reflectitur introrsum retrorsumque contraria directione & radici unguis superstrata atque accreta, ad ejus postremum usque marginem retroit, cui etiam pertinacissime nectitur. At sub ungue reticulum pergit, sive, ut proprie loquar, interiorem unguis faciem ipsum reticulum constituit. Nam ab apicibus digitorum ad unguis liberum & prominulum marginem accedens epidermis huic ipsi, quousque liber est, adhæret, dein qua parte unguis cuti incumbens papillas subjectas protegit, reticulum ungui adnascitur, ejusque interiorem superficiem occupat, ad eam usque plagam, cui exterius lunula respondet. Reticulum hoc tota hac longitudine sulcatum est & in eos sulcos recipit papillas tactiles, oblongas, quæ instar filorum tenerorum de cuti secedunt, in sulcatum unguis reticulum se demergunt & longitudinem suam emensæ ad idem adhærescunt, licet maceratione facile separentur. Id præcipue de reticulo hoc notandum est, quod ea facie, qua cutim ungui subjectam & papillas proxime amplectitur, molle sit, sensim vero, quo proprius ungui, eo durius fiat; donec tandem omnino ab ungue distingui nequeat; neque exactus limes definiri possit, ubi unguis incipiat, aut reticulum desinat. Ob hanc rationem non abs re contendit Cel. HALLERUS, reticulum ipsum induratum unguis efficere; licet fateatur, se rationem non videre, cur hic loci magis, quam alibi, indurescat. Sed ratio procul dubio jam in primitiva fabrica latet, perinde ut in foetu jam crassiores in vola manuum & plantis pedum epidermidem videmus, etsi nullum adhuc attritum & pressionem externam hæc partes subiverint. Ceterum ut induratum reticulum & indurata epidermis in corneam soliditatem, qualis unguium est, degenerare possint, docent calli

durissimi & clavi pedum ex pressione multa & attritu nati. Vitium enim hoc solum in epidermide & reticulo hæret; sub clavis latent papillæ sensilissimæ in cuti expansæ, quas si læseris incautius clavum refecando, atrocissimus dolor exoritur & pejora mala, ipsaque gangræna, sequi possunt, cujusmodi exempla in casibus medicis habentur.

Unguium utilitas in tactu exercendo non minima est. Papillas tactiles, per apices digitorum in spiralibus cuticulæ lineis ordinatas, fulciunt, ut papillæ hæc, quando ad corpus tactile apprimuntur, ab ejus superficie refugere non possint, sed sustineantur, atque ita impressionem fortio-rem recipiant, quam alias nimium cedendo evitarent. Præter hunc usum etiam ad fortio-rem comprehensionem corporum & ad apprehendendas, tractandasque res minutulas, inserviunt, tum ad fricandam cutim scalpendamque. Animalibus ungulæ & calceorum usum præstant & armorum; homines animantibus ingeniosiores & imbecilliores, efficaciora in sui tutelam præsidia inveniunt; atque utinam non nimis hac in re ingeniosi fuissent!

Ceterum ungues sibi relictæ, nec præfecti, in hominibus etiam ad notabilem longitudinem aliquot pollicum excrescunt. Ejusmodi ungues Chienensibus decori sunt.

§. C C C C L X X X I I I.

Tactus igitur fit, si apex digiti applicatur objecto explorando &c. Hoc totum, quod dicere possumus; neque enim, quomodo hic vel alius sensus ultimo ab anima percipiatur, nobis intellectu assequi datum est. Volo explorare tactu objectum aliquod, apices digitorum huic admoveo, leniter apprimo & contra superficiem ejus corporis cum attentione quadam mentis adfrico.

Ita multa puncta superficiei ejus corporis ad multas papillas tactiles appressa iisdem mutationem aliquam inducunt. Hanc mutationem superficiei nervi inductam per singulas fibrillas nerveas ad sensorium commune in cerebri medullam usque propagari debere, inde novimus, quia, si quod obstaculum est in itinere nervi, quod ejus cum cerebro commercium impedit, nulla percipitur sensatio, etiamsi papillis cutaneis mutatio validissima inducatur. Nimirum omnis ex sensibus nata perceptio in encephalo fit. Itaque mutatio superficiei papillarum nervearum in cuti inducta ad sensorium commune propagari debet; & prout mutatio hæc nervearum fibrillarum alia atque alia ab objecto explorato producit, ita etiam alia atque alia in mente perceptio nascitur, aliudque de qualitatibus objecti judicium; licet non sciamus, qualis præcise ab hoc illove objecto mutatio nervis inducatur & multo minus, quare ad certas nervis inductas mutationes certæ in mente ideæ sequantur. Sufficit autem medico, eousque deduxisse explicationem actionis, quousque corporea est. Ubi ad immateriale principium ventum est, satius putemus, ignorantiam nostram libere profiteri, quam inutili inquisitione tempus perdere & magno verborum apparatu nihil dicere.

Attentione mentis emittuntur papillæ. De hac conjectura BOERHAAVII jam antea dictum est, quæ si etiam falsa esset, hoc tamen certum est, distinctiores nos rerum externarum impressiones percipere, dum dedita opera & cum attentione objectum exploramus. Nempe anima unicam solummodo ideam in unico tempusculo distincte percipit; quo pluribus impressionibus simul afficitur, eo minus distincte singulas advertit. Hinc nocturno tempore, ubi omnes alii strepitus silent, concentus musicus longe distinctius nos afficit,

quam diurno. Hinc cæci tactu exquisitiore pol-
lent & qui accuratius quid tangere volunt, etiam
oculos claudunt, quo ipso minus ab aliis objec-
tis distrahuntur. Hinc literati silentiosos recessus
& solitaria loca, a strepitu vulgi remota, quæ-
runt. Hinc etiam, dum objectum aliquod distinc-
tius percipere volumus, omnium aliarum idea-
rum pro tempore obliviscimur & ab iis præscin-
dimus, ut illius objecti, quod explorandum no-
bis sumpsimus, impressionem vividiorē anima
recipiat. Atque in hoc attentio mentis consistit.

Menti excitat ideam calidi, frigidi, humidī &c.
Sequuntur nunc qualitates corporum, quas tactu
dignoscimus & ex quibus de variis corporum con-
ditionibus judicamus. Inter has qualitates recen-
setur primo : calor & frigus.

Et calorem quidem solum percipimus, quan-
do corpus illud, quod attingimus, digitis nostris
magis calet, si vero minus calet, frigoris sensum
percipimus. Atque in hoc fallimur, si ex tactu
solo iudicium de frigore & calore formamus,
quia utriusque non nisi relativam mensuram tac-
tu inire possumus. Sit aqua parum infra gradum
corporis humani calida; huic alter calidam ma-
num suam immittat, alter frigidam manum infe-
rat, prior frigidam aquam, secundus calidam ex-
perietur. Uterque certe percipit, at in iudicio
fallitur. Hinc ubi gradus caloris sine errore de-
finire volumus & sine habito respectu nostri cor-
poris, thermometro utimur.

Secundo : humiditas, siccitas. Humida & sicca
etiam relate ad nostrum corpus sumuntur. Hu-
mida percipimus, quæ cuti nostræ sensibilibiter ad-
hærent, eamque madefaciunt, ut aqua & alii li-
quores; sicca vero quorum particulæ nec cuti
adhærent, nec illam madefaciunt; hinc mercu-

rius respectu nostri corporis ficcus est; neque enim adhæret cuti argentum vivum, nullo menstruo solutum, sed sine vestigio relicto delabitur, Idem tamen respectu metallorum humidum est.

Tertio : mollities, durities. Molle tactu corpus percipimus, quod digitis prementibus facile cedit; durum vero illud, cui pressio ipsa digitorum pulpa cedit.

Quarto : asperitas, inæqualitas & æqualitas, seu glabrities. Asperam & inæqualem objecti superficiem sentimus, quando papillæ tactiles a diversis ejus superficiei punctis diverso modo, ab aliis nempe minus, ab aliis vehementius afficiuntur; glabra autem & æqualis videtur superficies, dum papillæ ab omnibus ejusdem punctis æqualiter afficiuntur. Qui exquisitissimo tactu gaudent, illi etiam asperitatem in illis corporibus deprehendunt, quæ aliis polita videntur. Epidermidis tenuitas multum ad hoc confert. Puerorum & mulierum delicatulæ manus facile offenduntur asperitate corporum & multo magis, quam virorum, quorum epidermis labore induruit. Seniores etiam fiunt digiti a balneo, ut omnia, quæ tunc attingimus, multo asperiora nobis videantur. Nempe aqua, epidermidem & reticulum & cutim macerando, tactus organum tenerius reddit & pulposius & aliquid forte de reticuli mucida substantia solvit, ita velamenta papillarum attenuat; sed & humiditas nervi sensilitatem auget. Ad asperitatem etiam referenda videntur rariora illa exempla, dum cæci solo tactu diversos colores rerum distinguunt. Exstant aliquæ hujus generis historiæ a gravissimis testibus relatæ, quæ negari non possunt. Organi pneumatici magister, cujus historiam exacte refert BOYLEUS *tract. de color.* p. 18. ex variolis a secundo ætatis suæ anno per omnem vitam cæcus solo tactu, quo exquisitissimo pollebat, colores dijudicavit, asperi-

tatem majorem minoremve pro norma fumens. Hallucinabatur autem subinde in albo colore a nigro & in rubro a cœruleo discernendo; ceteros expedite divinabat. Examinatus, cujus generis discriminationem haberet per tactum suum, responderebat discrimen colorum ex majore minoreve asperitate oriri, a nigro colore digitum suum non aliter affici, ac si cuspides acicularum, vel duriores quasdam arenulas tangeret, rubrum vero colorem glabri sensationem efficere. Porro interrogatus, quo ordine & quibus gradibus asperitatis colores sibi succederent, respondit, nigrum & album maxime asperos & inæquales & adeo sibi invicem similes esse, ut difficile admodum sit, eos distinguere; attamen asperiores esse nigrum; viridem asperitate proximum albo, cæsum viridi, flavum quinto loco esse, rubrum & cœruleum minime asperos iterum difficulter discriminari, rubrum tamen cœruleo aliquanto asperiores esse, adeo ut ruber sextum, cœruleus septimum in asperitate locum teneat. Similes historiae & apud alios leguntur. Ex quibus patet, etiam minimas corporum asperitates, quales a nobis non animadvertuntur, tactu exquisitiore percipi posse ab iis, quos natura hoc sensu liberalius dotavit.

Quinto : figura. Et figuras corporum tactu discernere licet, etsi visu simul ad eas dijudicandas utimur. Acumen corporis ex valida in exiguo puncto pressione, rotunditatem ex angulorum absentia, reliquas figuras ex lineis, planis & angulis variis, quibus superficies horum circumscribitur, cognoscimus, etiam citra oculorum usum.

„JOANNES GAMBASSIUS VOLATERRANUS, cum
 „jam artificis cæcitas supervenisset, perpetua in-
 „genii tactusque exercitatione hoc effecit, ut
 „vultus quosvis & inter hos Pontificis Maximi
 „Urbani VIII. molli & frequenti manuum tactu

„recognitos, statuam pulcherrime exprimeret.“ Refert PECHLINUS historiam fabri lignarii cæci, qui non solum omnes lignorum species tactu discernibat, verum etiam proportionibus mechanicis & egregiorum operum tessellatorum auctor erat, ad unguem curiosus. *Lib. III. obs. VIII.*

Sexto : motus & quies. Motum corporis tactu percipimus, dum corpus cuti nostræ contiguum, illa non mota, alias atque alias cutis partes diverso tempore & continua tamen actione afficit. Ita advertimus e. g. insectum cutim perreptans, licet illud non videamus. Aut cognoscimus motum corporis, dum illud pressioni corporis nostri cedere sentimus; aut denique, dum corpus, quod antea a corpore nostro remotum esse novimus, nunc nostrum corpus afficit, dum hoc situm suum non mutavit. Ita si quis quiescentem baculo a tergo percutiat, percussus, licet baculum moveri non viderit, novit tamen hunc versus tergum suum moveri debuisse, cum antea illi contiguus non fuerit, nec ullam ejus antea perceptionem habuerit.

Septimo : gravitas, levitas. Has qualitates ex pressione dijudicamus; quo validius cutis nostra a corpore aliquo premitur, eo illud gravius judicamus & contra; licet pressio hæc a pondere oriunda non solum tactus organum, sed etiam musculos afficiat.

Octavo : distantia. Distantiam objectorum remotorum solo visu, propinquorum autem & visu & tactu metiri possumus. In defectu visus solo tactu utimur. Cæci baculo prævie explorant loca & manu prætensa, ut lapsum præcaveant & obstacula evitent. Et nos etiam in caligine nocturna idem facimus. Cæcus homo, cujus CARTESIUS meminit *lib. de hom.* utebatur baculis duobus decussatis, ut de distantia objectorum judicaret : & ex angulo majore vel minore, quo illi

baculi se secabant, de minore vel majore distantia corporum certus fiebat. Nempe ab experientia noverat, angulum eum eo majorem esse debere, quo propius obstaculum esset, in quod apices baculorum incurrerent & contra.

Titillationis, pruritus, doloris. Hæ peculiæ affectiones organi tactus sunt. *Titillatio* gratissima nervorum affectio est, cum tanta voluptate conjuncta, ut præ nimia voluptate intolerabilis fiat & si paulo diutius duret, in convulsionem hominem conjiciat, qualem casum in puella vidit Ill. VAN SWIETEN. Eodem artificio milites a rusticis pecunias elicuisse novimus, dum suspensos titillarent tamdiu, donec, intolerabili sensationi ulterius ferendæ impares, nummos cælatos proderent. *Pruritus* similis nervorum affectio est, etiam cum voluptate conjuncta, sed dolori proxima, & si partem prurientem fricas, continuo acerbus dolor voluptatem prægressam sequitur. Adeo propinqua sunt voluptatis & doloris confinia! Ceterum nolite a me petere exactam definitionem harum affectionum, quarum ideam distinctam non habemus, nisi cum illas actu percipimus. Et id quidem magno hominis bono factum est.

§. CCCCLXXXIV.

Cur deterfa, macerata, abluta, exusta epidermide dolor a tactili? Epidermidis utilitas est in defendendis papillis cutaneis, earumque sensilitate temperanda. Nimis vivide sentiunt nudati nervi; sed nimis vivida sensatio dolorifica est. Quo epidermis tenuior, eo nervi cutanei nudis proximiores sunt, adeoque & eo acrius sentiunt. Hinc abluta per lixivium saponaceum parte epidermidis, quod lotrices norunt, tactus acutior & ob id ipsum ingrator, eadem vero integre de cuti

soluta, per ambustionem, vesicantia, aut exco-
riationem, cum jam nullo velamento tegantur
papillæ, ab omni tactili objecto vividissime affi-
ciuntur, quæ affectio in mente ideam doloris
excitat. Dum interim epidermis renascitur, ces-
sat dolor, sed manet adhuc in ea parte cutis ex-
quisitior, quam in aliis, sensilitas, quia renata
epidermis multo tenerior est veteri ablata & illa,
quæ in vicina cuti relicta est.

*Cur crassa, dura, callosa, cicatrice corrupta
epidermide tactus perit.* Ratio phænomeni contra-
ria est. Quo tenuior est epidermis, eo papillæ
nervæ propius superficiei objecti tactilis appli-
cantur, ut parum differant a nudis. Contra ve-
ro quo crassior est epidermis, quo densior & ma-
gis indurata & quo profundior callus, eo papil-
læ nervæ longius a superficie objecti tactilis re-
moventur. Hinc sensilitas in ea ratione minui-
tur, in qua epidermidis crassities augetur. Imo
vero, si valde profunda callositate epidermis cras-
sescit, etiam sensilitas cutis perit, non quod ner-
vi ipsi insensiles reddantur, sed quia adeo pro-
funde sub crasso & duro callo hærent, ut nul-
lam fere impressionem, nisi obtusissimam ab ob-
jectis tactilibus recipere possint. Hinc mirum non
est, dari homines, qui supra carbones ardentes
nudis pedibus impune incedant, qui ferrum ig-
nitum, fustum metallum, aut vitrum summo ig-
ne liquatum, manu contineant; cujusmodi exem-
pla gravissimi viri autoptæ referunt. PECHLINUS
narrat: „objectum sibi in Batavia portentum ho-
„minis, qui de foculo rapiebat ferrea ramenta,
„ut erant, tota ignibus perusta ac candentia;
„hæc tamdiu manibus versabat collidebatque in-
„vicem, donec, frequentatis in numerum ictibus,
„coalescerent, provocato tandem etiam, si forte
„longius moraretur ferri durities, fumo & nidore
„igneo, qui cornu ustum referebat. Inspectæ au-

tem hujus hominis manus durissimo & corneo „callo obductæ erant.„ Similia de fabris ancho-
rariis Amstelodamensibus refert KAAVIUS BOER-
HAAVIUS; a se visa & de Leodiensibus alium,
qui fusum candens vitrum manu contineret, in
officinis vitriariis vidit HALLERUS; alium jam lau-
datus PECHLINUS senem, „qui, quod ceteris par-
„tibus non poterat, sola lingua carbonem vivos
„delibabat lambebatque, tralatitio ut plurimum
„spectaculo. *Observ. med. Lib. III. p. 410. 411.*„
Quam profundos ejusmodi hominum callos esse
oporteat, facile patet. Nec repugnat, ipsam cu-
tim, nervosque cutaneos continua pressione cal-
lescere & sensilitate privari. Nam idem videmus
in fibris muscularibus, quæ sensiles continuo la-
bore & ætatis vitio, in tendineas insensiles fi-
bras degenerant.

*Quæ causa miri motus a tremore & torpedine pis-
ce, tam ingrati sensimque in stuporem abeuntis?*
Mira sunt veterum de torpedine pisce commenta,
hunc non solum omnia, quæ attigerit stupeface-
re, sed etiam nullo intermedio corpore per aquam
vim suam exserere. Recentiores accuratius inda-
gantes, non nisi manu vel solido corpore inter-
medio attactum hunc piscem, stuporem inducere
deprehenderunt. Causam alii in effluvia refunde-
bant, quæ ex pisce emanantia, dum cutim ho-
minis tangentis subeunt, nervis ingratum illum
sensum inducerent, alii præeunte BORELLO tre-
moribus, quos piscis ille per suos musculos ho-
mini incuteret, adscripserunt. Unde etiam Ger-
manis *der Sitterfisch* appellatur. Cel. REAUMUR,
cujus hac de re commentarius exstat in *Act. Pa-
ris. 1714.* omnia sollicitè perquisivit, piscesque hos
vivos in littore Pictaviensi captos examinavit, qui
de genere piscium planorum sunt. Sequentia au-
tem tentavit & comperiit: duas torpedines vivas
a piscatoribus recens captas cum variis in locis

contrectaret sæpius, nullum omnino stuporem advertit, licet pisces vegeti essent & aquæ marinæ innatarent. Jam de veritate historiæ dubitare coeperat, nisi fida dignorum virorum testimonia ipsum impulissent, ut his non acquiescens ulteriora tentamina caperet. Aliam ergo captivam torpedinem in ipso mari attrectavit sæpius, visurus quid contingeret. Piscis attactum patienter tulit. Jam magis nutabat REAUMURIUS, magis dubitabat, utrum quid veri subesset relationibus de hoc pisce divulgatis. Tandem vero cum frequentiore attrectatione iram forte animalis concitasset, subito & præter opinionem stuporem percepit, qui manum totumque brachium ad summum usque humerum occupabat. Hunc stuporem ab alio ordinario diversum & cum dolore satis vehemente conjunctum fuisse ait; stuporem tamen utcumque similem esse illi, qui percipitur, dum quis cubito in durum quoddam obstaculum celeriter impingit, dolorem autem majorem fuisse & tantum, ut jam ulterius idem experimentum repetendi animum non haberet. Adstantium aliqui idem tentare ausi perinde plectebantur. Dolor nihilominus cito remiserat & post aliquot momenta totus evanuit. Cum adeo brevi tempore molestus esset, iterum piscem attrectavit REAUMURIUS repetitis vicibus, iterumque stuporem & dolorem percepit, debiliorem tamen & qui non ultra cubitum nunc pertigerat, forte quia piscis ipse jam debilitatus erat. Cum BORELLUS tremori, quo piscis concutitur, vehementissimo & celerissimo stuporem inductum tribuerit, sollicitè in id ipsum indagavit REAUMURIUS, numquam tamen tremorem ullum in pisci advertere potuit. Tandem accuratissime ad singula attendens, arcum deprehendit. Nempe torpedo etsi planus piscis, dorsum tamen aliquantulum gibbum, imo totam superficiem corporis leviter convexam habet. Dum nullum stuporem infert, immutata

manet corporis superficies, dum autem se vindicaturum est iratum animal, dorſi partes laterales in planitiem, imo ſubinde etiam in concavitate quamdam contrahit. Hoc ipſum momentum eſt, quo manui tangenti iſtum & ſtuporem inferit. Nam dorſum in planitiem retractum ſenſim, tanta velocitate in priſtinam convexitatem reſtituit & in puncto temporis digitum tangentem adeo vehementer percutit, ut iſtus in momento brachium humerumque pervadat & dolorem vehementem cum ſtupore inferat. Motum hunc piſcis efficit ope duorum muſculorum, qui falcati, aut ſemilunares, partes dorſi laterales, alter dextram, alter ſiniſtram, occupant & ſimul ſumpti fere dimidiam partem corporis totius piſcis æquant, a fine capitis ad initium uſque caudæ extenſi. Hos adeo validos muſculos lente in planitiem contrahit & ſubita repercuſſione iſtum inferit contiguis corporibus, eo vehementiorem, quod maxima celeritate peragatur, quam velocitati globi ex ſclopeto exploſi nihil cedere putat REAUMURIUS, quia ne quidem ſenſibus adverti poteſt, quomodo ſe ex planitie in priſtinam convexitatem hi muſculi reſtituant, ſed ubi dolorem & ſtuporem percipis, ipſo illo momento jam vides reſtitutos eſſe. Non ergo per effluvia venenata ſtuporem inferit & dolorem, nec tremore, ut BORELLUS volvit, ſed iſtu ſimplici, celerrimo & vehementiſſimo, qui non digitos modo, ſed & manum, & brachium, & humerum momentanee pervadit. Nonne vero idem fit, dum cubitus iſtu ſubito in durum quoddam obſtaculum impingit? nonne idem fit, dum homo non electricus corpus electrificatum contingit? Nonne ab iſtu electrico ſimiliter ſtupore & dolore manus, brachia, humeri afficiuntur? cauda piſcis hujus impune attingi poteſt; ſed etiam muſculi illi falcati jam in principio caudæ finiuntur. Hinc clarum eſt, ab iis omnem hunc effectum repeti debere. Si ma-

nus aliquo intervallo a corpore piscis distat, numquam stuporem aut dolorem percipiet; si proxime attingat, percipiet, sed non antequam musculos dictos in planitiem extendere piscis coeperit. Pedibus similem stuporem infert, imo & ictu suo corpus quandoque subvertit, quod piscatoribus quandoque accidit, dum incaute in aqua supra piscis hujus dorsum ingrederentur. Baculo longo attactus vix sensibilem stuporem infert. Minoribus animalibus plus nocet, quam homini, imo & occidit. Anatem cum hoc pisce eodem vase conclusit REAUMURIUS, quod linteo solum contexit, ne evolare posset. Post aliquot horas mortuam anatem deprehendit, quam procul dubio repetitis ictibus piscis enecuit. Ceterum mortuus piscis non nocet & impune comeditur, ut alii pisces, licet minus grati saporis carnem habeat. Hæc sunt observata Viri Cel. quæ breviter ex *Ad. Paris.* excerpta retuli. Quod vero ad theoriam stuporis attinet, credit, ictum celerrimum, quo piscis manum tangentis percutit, nervis tremorem ingratum conciliare, aut fluidi nervi actionem suspendere, illique contrariam & retrogradam directionem impertire, unde sensus tactus pro tempore pereat. Videtur omnino a succussu nervorum totum phænomenon pendere; cum & ictus mechanicus & electrica succussio idem efficiat.

Unde ad unguium superficiem internam cuti subjunctæ affixam & ad radicem eorum tam atrox dolor? Et si unguis ipse insensibilis sit, sub ungue tamen hærent papillæ nervæ confertissimæ, longæ, sulcis reticuli unguis receptæ. His læsis dolor isthic acerrimus, ut alibi, oritur. Hinc ungue incautius resecto, si forfex ultra liberum hujus marginem penetraverit, dolor vehemens; hinc inflammatio hujus loci gravissima & eo magis dolorifica, quod durities unguis partem inflammata

continuo premit. Hinc illa crudelis barbarorum tortura, qui miseris ungues evellunt, quo in casu omnes papillas lacerari necesse est & dolorem oriri, cui ferendo vix durissimus mortalium par sit.

Cur sensus acutissimus tactus, ubi ungues & ubi sulci cuticulæ spirales fiunt? Hic nempe proprium tactus organum locavit natura, hic papillæ maximæ & confertissimæ sunt; hic & firmiore elastica cellulosa & firmiore ungue sustentur papillæ, ut objecti tactilis impressionem exactius percipiant, quæ omnia jam satis declarata sunt.

D E G U S T U.

§ CCCCLXXXV.

Lingua præter tactum, quem cum externa corporis superficie communem habet, particulari sensu gustus prædita est. Linguam enim proprium gustus organum esse, extra dubium videtur. Saccharum non alibi mentem afficit, quam lingua applicatum, palato dulcedinem nullam imprimit, nec buccis aut labiis, aut œsophago. Salia non alibi saporem excitant. Non ideo absolute contendere velim, alias oris partes omni gustu destitui, nam palatum belladonnæ saporem distinguit, uvula pimpinellam percipit & sinapi, œsophagus absinthii amarorem sentit; sed lingua omnis generis sapes percipit, ceteræ partes oris subinde peculiarem aliquem saporem distinguunt a plurimis vero non afficiuntur, hinc recte concluditur, proprium gustus organum in lingua distributum esse. Nec opponi debent rarissima quædam exempla, quod absente etiam lingua gustus adfuerit, cujusmodi historiam in *Actis Parisinis* 1718. Cel. JUSSIEU refert de puellâ, cui pro lingua nihil nisi exiguum tuberculum erat & quæ tamen sapes esculentorum omnes perceperat. Nam in

eiusmodi casibus, qui oppido rari sunt, solet natura aliis modis compensare defectum.

Nunc fabrica linguæ describenda est, ut videamus, quid proprie illud ipsum in hac sit, quod gustus organum constituit. Musculos linguæ, tum eos, quibus ipsa constat, tum illos, qui huic inferuntur, jam in deglutitionis negotio dixi. Superfunt velamenta linguæ & arteriæ venæque & nervi, nervorumque in superficie linguæ distributio. Scire ergo juvat substantiæ linguæ musculosæ proximæ membranam superduci, cuti continuam & veram ejus propaginem, admodum nervosam, cuti tamen molliorem & magis pulposam. In superiore hujus membranæ superficie, quæ palati fornicem spectant, maxime vero in apice & margine utroque linguæ papillæ sedent, distinctissimæ, numerosæ, diversi generis, diversæ figuræ. Harum aliæ maximæ, *inversæ conicæ* sunt, sine libero crassiore & obtuso, radice vero tenuiore & acuta, quasi coni apice linguæ innixæ, hæ dorsi linguæ partem posteriorem circa foramen cœcum occupant, duriusculæ, ex multis conspicuis nervulis vasculisque, mediante celluloso textu in papillarem aggerem congestis, fabricatæ & in media sui parte eminente quasi puncto perforatæ, aut in exiguam cavitatem infundibili similem depressæ. Alterum papillarum genus est *fungiformium*; hæ potissimum cylindricæ, apice obtuso, subrotundo, mediam circiter dorsi linguæ regionem occupant, sensim minores & confertiores versus linguæ apicem. Tertium genus est papillarum *conicarum*, hæ numerosissimæ omnium, anteriorem linguæ partem & apicem fere solæ inhabitant, basi crassiore membranæ linguæ adhærentes, apice tenuiore, acuto, liberæ. Aliquæ tamen illarum & posteriora linguæ tenent pone cœcum foramen & illæ rectiores, anteriores magis inclinatæ, ma-

ta, magisque liberæ, omnium plurimæ in margine apicis linguæ. Intercedunt aliæ papillæ, filiformes, cylindricæ, longæ, simili fabrica, sed figura sola a prioribus diversæ. Et fabrica quidem omnium papillarum linguæ magis in aprico posita est, quam cutanearum. Evidens in his cellulosa tela est, alba, firmula; evidentia etiam vascula arteriosa, quas cera injecta subit & aqua in speciem roris exhalans. Nervi denique ipsi, in aliis partibus vix, aut difficillime, in lingua minore difficultate ad ipsas usque papillas scalpello nudari & ostendi possunt. Omnibus autem hisce papillis, totique linguæ exterius epidermis cum suo reticulo infertur, satis hic crassa, alba, in vivo sanoque homine plurimis punctis eminentibus extrinsecus inæqualis, quibus in interiore superficie totidem impressiones seu foveolæ respondent, in quas papillæ recipiuntur. Hanc extimam linguæ membranam alii *epithelium* vocant; pertinaciter ubique subjectæ linguæ, ipsisque papillis adhæret, separatur tamen iisdem modis, quibus epidermis de cuti solvitur. Macératione, ambustione & sæpe in morbis acutis laciniae exsiccati nigri, fusci, gangranosi epithelii secedunt, maxime post aphthas. In brutis reticulum epithelii manifeste plurimis locis perforatum est, perque illa foraminula assurgentes papillæ in vaginulas epithelii recipiuntur. Hanc fabricam incautius a brutis ad hominem transtulit BOERHAAVIUS; nam in humana lingua neque foraminula reticuli, neque vaginulæ epidermidis manifestæ sunt; sed loco foraminulorum epithelium solummodo poris innumeris minimis pertusum est, ut alibi de epidermide dixi & foveolis impressum pro recipiendis papillis, quæ foveolæ valde differunt ab illis vaginulis epithelii brutorum. Ceterum quod alibi de papillis dictum est ex conjectura, emissiles esse & altius assurgere nonnumquam & vicissim subsidere, id in lingua se-

re extra conjecturam positum, ac tantum non manifestum est. Lingua hominis sani pura & for-
dibus libera tota papillis eminentibus hirta est,
maxime in apice & anteriore parte dorsi linguae,
ut quivis ante speculum in propria lingua videre
potest. Et magis etiam has papillas eminere obla-
to sapido gratoque cibo, quorundam observatio
est. In homine vero languido, debilitato, aut
morbo fracto, præcipue in morbis, ubi appeti-
tus gustusque prostratus est, papillæ hæ multo
minus eminent & linguae superficies glabra est,
quam inter mala signa retulit HIPPOCRATES &
plumbeam ejusmodi linguam appellavit, quod
instar plumbi polita & glabra sit.

§. CCCCLXXXVI.

Supersunt dicendæ arteriæ linguae & venæ &
glandulæ & denique nervi. *Arterias* lingua multas
habet, quarum maxima *lingualis* dicta passim ex
ipso carotidis externæ trunco oritur, eademque
inter musculos linguae variis ramis editis, ad api-
cem usque linguae excurrit, atque ibi subcutanea
finitur, cum vena focia prope frænulum linguae,
ubi peculiari nomine hæc vasa *ranina* dicuntur,
forte a ranis sumpta denominatione, quia, uti
ranæ in locis degunt humilibus & irriguis, ita
hæc vasa declivius in inferiore & maxime irri-
gua linguae parte decurrunt. Sunt & arteriolæ lin-
guæ minores aliæ, furculi labialium arteriarum &
tonsillarum, omnes carotidis externæ propagi-
nes. Ab his arteriis non solum musculis linguae
prospicitur, sed & ad papillas ramuli distribuun-
tur & in omni linguae superficie vascula emit-
tuntur exhalantia, facile ipso effectu demon-
stranda, si in arterias linguae aqua tepida inji-
ciatur. *Venæ* linguae, multiplices, varie im-
plexæ, sanguinem ad jugulares venas refe-
runt. *Glandulæ* linguae potissimum hujus radi-
cem occupant, inter epiglottidem & foramen

cæcum, tum & ante illud & ad latera linguæ, partemque radicis inferiorem. Muciparæ sunt, simplices, rotundæ, tectæ epithelio, quæ mucum præparant & excernunt, quo linguæ superficies lubricatur, tempore imprimis manducationis ac deglutitionis; sed & papillas gustatrices mucus hic oblnit & sapidorum acrium in has actionem temperat; id vel ex eo evidens, quod deterfsæ exactissime linguæ mucu gustus vividior sit, contra vero eo magis languidus & obtusus, quo majore mucii copia papillæ linguæ obsidentur. Folliculos hosce muciparos linguæ *expansionis glandulosæ* nomine comprehendit Cel. MORGAGNIUS. Multi horum folliculorum foramen cæcum circumfident & tamquam in communem sinum mucum suum illuc effundunt. Hæc, utpote ad fabricam linguæ pertinentia, breviter attingi saltem debebant, nunc ad *nervos* linguæ transeo; de quibus in hoc paragrapho agitur, decidendumque est, a quibus nervis gustus & tactus in lingua sensus, a quibus motus linguæ pendeat. Nempe a triplici nervorum distincto pari lingua suos accipit nervos. Ramus unus a pari vago descendit ad linguam, comes stylopharyngei musculi & stylohyoidei; is profunde ad posteriores linguæ carnes distribuitur, cum ramis quinti & noni paris communicans, longe tamen ab apice linguæ remotus. Deinde novum par nervorum encephali ex intervallo corporum olivarium & pyramidalium medullæ oblongatæ exortum, ubi per foramina condyloidea ossis occipitis de cranio emerfit, celluloso plexu cum pare octavo revinctum & aliquot a primo & secundo cervicalium furculis auctum, ramum edit descendentem ad musculos ossis hyoidis, sterno- & coracohyoideum & sternothyroideum; ipsæ vero truncus noni paris in singulo latere, arcu facta ad linguam accedit, datisque plurimis ramis ad musculos & cum quinti ramulis communicans, ad distantiam

pollicis ab apice linguæ finitur, fodalis arteriæ lingualis. Denique quinti nervorum paris ramus tertius, maxillaris inferior, dat peculiarem & grandem nerveum ramum *lingualem*, qui potius ipsius trunci continuatio est; is variis multisque ramulis ad musculos linguæ, glandulasque salivales editis, profundo itinere inter genioglossum & styloglossum incedit antrorsum & ad apicem linguæ excurrit, ibique cutaneus finitur. Communicat in posteriore linguæ parte cum ramo linguali noni paris. De his nervis nunc quæstio est, quinam ex illis gustui inserviant, an quinti paris ramus, an truncus noni, an lingualis ramus octavi? Cel. BOERHAAVIUS existimat a nono pari nervorum potius, quam a quinti paris ramo linguali gustum pendere, hoc unico nixus fundamento, si fundamentum dici possit, quod nonum par nervorum soli linguæ prospiciat, quintum vero & ad varios musculos distribuatur & ad alia sensuum organa v. g. ad nares. Verum erravit BOERHAAVIUS, si credidit nonum par nervorum soli linguæ prospicere, nam & is ipse nervus non solum in musculos linguæ proprios pro maxima sui parte absumitur, qui certe gustus organum non sunt, sed præterea etiam ad alios musculos ossis hyoidis, ossis sterni & cartilaginis thyroideæ ramulos largitur. Multo majore fundamento a tertio ramo quinti paris gustum repetendum esse contendit Cel. HALLERUS, cum octavi paris ramus in musculis linguæ posterioribus fere totus finiatur, nonum par ad pollicis ab apice linguæ distantiam evanescat, quinti vero paris ramus ad ipsum usque apicem linguæ excurrat, in quo sensus gustus præcipue residet. Imo vero non semel hujus nervi ramulos in grandiores usque linguæ papillas profecutus est HALLERUS & dignus HALLERO discipulus MECKELIUS. Verum papillæ dictæ sub epithelio linguæ hærentes proprium gustus organum sunt, si ergo ra-

muli quinti paris evidenter ad ipsas linguæ papillas scalpello deduci possunt, dubium non est, quin hujus nervi ramuli superficiales gustui famulentur. Quod ad musculos cum linguæ tum aliarum partium, ramos spargat, id certe non impedit, quominus alii ejusdem ramuli gustui præstentur. Nam & subcutanei nervi hic in musculos, illic in cutim, ramos edunt, quorum illi regendis musculis destinantur, hi organum tactus constituunt. Sed etiam morbi confirmant, quintum par nervorum gustui inservire. In spasmo cynico gustus abolitus fuisse legitur, in *Eph. nat. cur.* vol. VIII. *obs.* 86. Sed spasmus cynicus musculorum maxillæ affectio est, quibus quintum par nervorum prospicit, nonum nullos ramos largitur. Hinc vitiato nervo quinti paris hoc in casu gustus videtur sublatus fuisse. Hoc ipsum Cel. HALLERUS in confirmationem suæ sententiæ adfert. Minime tamen convincens hoc argumentum est, quia potuit spasmus ille cynicus ex vitio in encephalo hærente natus fuisse, potuit alia causa fuisse, quam vitium nervi quinti paris. Et Cel. HEVERMANNUS alium casum recenset, ex quo concludi posset, a noni paris nervo vitiato gustum deletum fuisse, cum ramus ejus ob scirrhum glandulæ resectus fuisset. Mihi quidem ita videtur rectissime concludi: omnes eos lingualium nervorum ramulos, qui in carnem musculosam linguæ inferuntur, ad gustum nihil omnino facere, omnes vero illos ramulos, qui ad superficiem linguæ cutaneam emergunt & in papillas linguæ desinunt, sensui tactus & gustus præfici, sive sint quinti paris propagines, sive octavi, sive noni. Idem enim nervus jam motui famulatur, jam sensui, pro diversa organi fabrica, in quod impenditur & pro diversa ultimarum nervi extremitatum expansione, ac ordinatione. De quinto pari certo constat, ramum ejus lingualem ad apicem linguæ usque excurrere,

ramulosque in ipsas papillas emittere, hinc de eo nervo nullum mihi dubium est, quin is ipse, præterquam quod motui linguæ famuletur, etiam gustus organo præfectus sit. Ramus vero lingualis octavi paris musculis linguæ immergitur, noni paris truncus etsi longius antrorsum progrediatur, tamen citra apicem linguæ finitur, nec ex his duobus ultimis nervis ad ipsam linguæ superficiem & ad papillas ramulos emergere viderunt anatomici. Unde dubium manet, num hi ad gustus organum aliquid conferant. Forte tamen, quia cum quinti paris nervo communicant, aliquos cum hujus ramulis surculos ad superficiem linguæ emittunt, non facile demonstrandos, qui & ipsi gustatorii sint. Quidquid vero sit, id saltem ex omnibus hætenus dictis evincitur, minus accurate ratiocinatum esse BOERHAAVIUM, dum quinti paris nervum a gustus organo exclusit.

§. CCCCLXXXVII.

Primus omnium LAURENTIUS BELLINUS gustus organon in papillis, sub epithelio linguæ hærentibus, residere demonstravit, facilibus experimentis, quæ & BOERHAAVIUS repetiit & unusquisque in propria lingua repetere potest. Si stans ante speculum, ore diducto, penicillum falso, vel alio sapido humore madidum ori immittas & varias oris partes hoc penicillo tangas, e. g. palatum, gingivas, labia, buccarum interiora, nullum saporem percipies, solummodo sensu tactus & ideis cum hoc sensu connexis, afficeris. Sed in his locis nullæ sunt papillæ ejusmodi, quales sub linguæ epithelio hærent. Iterum si ipsam linguam in inferiore hujus superficie juxta frænulum eodem penicillo sapido attingas, nullam habebis ideam sapidi. Verum & inferior linguæ superficies papillis ejusmodi caret. Si vero quancunque partem dorsi linguæ penicillo hoc attingas,

continuo saporem percipies & eo exquisitius ac distinctius hunc percipies, quo magis anteriori linguæ parti penicillum admoveris, in apice omnium exquisitissime, continuo minus exquiste, quo magis versus radicem linguæ retrocesseris. Atqui ad anteriora linguæ papillæ multo confertiores & acutiores sunt, versus posteriora rarefunt magis & in obtusas degenerant. Cum ergo in illis solum linguæ partibus sapor percipiatur, cum percipiatur vividior, distinctior, ubi papillæ plures & confertiores, minus vivide, ubi pauciores, grandiores & obtusæ papillæ subsunt, recte infertur, eas ipsas papillas, sub epithelio linguæ distributas, gustus organum constituere. Hæc tamen omnia cum aliqua limitatione accipienda sunt, ut non absolute aliis oris partibus omnem gustus sensationem denegemus, siquidem & aliqua corpora esse dicantur, quæ palatum & œsophagum quoque afficiant. Sed pauca ejusmodi phænomena ad peculiarem corporum quorundam naturam referri debent; nam si verum est, quod palatum belladonnæ saporem distinguat, certum tamen est, a centum aliis sapidis palato applicatis, nullam saporis ideam oriri; dum contra lingua sapores omnis generis percipit.

Forte autem illæ, quæ &c. In brutis, præcipue ruminantibus etiam in palato, in buccarum cavea, in faucibus, tonsillis, œsophago, papillæ sub epithelio reconduntur & propriis hujus vaginulis includuntur. Unde in his forte organum gustus latius patet, ut & olfactus organum in his multo, quam in homine, amplius est & exquisitius; puto non alia de causa, quam quin bruta ex solo fere olfactu & gustu sibi noxia discernunt a salubri pabulo. In homine quidem etiam papillas sub epithelio labiorum, palati, buccarum circa ostium ductus stenoniani, imo & in œsophago, ventriculo & intestinis descrip-

fit RUYSCHIUS. Sed has papillas nihil nisi villos inhalantes & exhalantes esse, Cel. ALBINUS & KAAW & Clarissimi alii anatomici contendunt. Certe in his partibus ejusmodi evidentes papillæ, quales in lingua sunt, nemini anatomicorum obtigerunt.

§. CCCCLXXXVIII.

Ut lux colorum principium, ita sal principium saporum & primarium gustus objectum est. Insipida sunt corpora, quæ aut omni sale penitus carent, aut ita firmiter hunc cum reliquis principiis unitum habent, ut admittance salivæ nostræ extricari non possit. Ita vitrum insipidum est, non quod sale careat, quum potius sal præcipuum vitri ingrediens sit, sed quia salinæ moleculæ adeo firmo nexu cum terreis coaluerunt, ut ab his actione salivæ extricari non possint. Vicissim corpus sapidum insipidum fit, si omne ex eo salinum eliciatur. Ita cineres falsi, aqua excocti tamdiu, donec illa æque insipida redeat, ac affusa fuerat, insipidam terram relinquunt, nec præterea quidquam. Et omnis terra simplex pura, sive ex vegetabili regno, sive ex animali, sive ex fossili, insipida est. Omnis item aqua pura insipida est, nihilque præter humiditatis & frigoris sensum linguæ imprimit. Aër alioquin gustum nullo sensu afficit. De oleo dubitare posses, cum olea dentur sapidissima, acerrima, ex plantis aromaticis parata, e. g. oleum cinnamomi & hoc oleo educto cinnamomi cortex insipidus remaneat. Vegetabilia & animalium carnes, longa decoctione, nova semper aqua affusa, omni tandem sapore privantur. Verum hac methodo non modo salinum principium, sed & oleosum elicitur. Estne igitur oleum, perinde ut sal, objectum gustus? Etiam oleum, quo purius est, eo minus sapidum invenitur, penitus insipidum futurum, si

purissimum & omni salino principio liberum foret. Olea illa essentialia, seu ætherea stirpium aromaticarum, omnia multo acido, latente sale imprægnata sunt, qui ipse causa est, cur in spiritu vini rectificatissimo solvantur & qui latens hospes olea hæc mora temporis in balsami spissitudinem cogit. Cetera olea quo blandiora & minus sapida, eo minus salini principii in sinu suo foveant. Omnia tamen aliquam acidi dosin, majorem hæc, illa minorem possident. Ipsa spissitudo butyri, adipis, sebi animalis ab acido est, quo particulæ oleosæ ligantur. Dumque corrumpuntur, dum rancescunt & acria fiunt olea alias blanda, hæc ipsa corruptio, hæc acrimonia recens nata soboles est acidi, motu intestino & calore sensim evoluti. Denique sapida & acria fiunt olea alias mitia, si valido igne urgentur; sed quod ex igne illis accedit, acidum est peculiare, sui generis, causticum, subtilissimum. Id acidum ex igne subit terras calcareas calcinatas, easque solubiles reddit & sapidas, dum antea insipidæ fuerunt & aqua non solubiles. Hæc omnia ita se habere per experimenta chemicorum, nostra ætate clarissimorum, evictum est. Ut adeo manifestum sit, nec aquam, nec terram, nec oleum, sapida esse, si omni salino principio destituantur. Spiritus dicti chemicorum aut manifeste salini sunt, sive acidi, sive alcalini, aut inflammabiles, ut spiritus vini, frumentique, aut spiritus rectores vegetantium & animalium. Sed & spiritus ardentes principio salino gaudent, acido subtilissimo, quod unionem inter aquam & oleum in his efficit. Spiritus autem rectores ut olfactum vehementer, ita gustum vix afficiunt & omnino non, nisi aliis principiis consociati. Unde omnibus computatis solum salinum principium saporum rudimentum & verum gustus objectum est. Interea tamen, licet reliqua corporum principia suapte natura insipida sint, non ideo nihil ad varietatem & ut

cum scholasticis loquar, ad modificationem saporum conferunt. Aqua insipida mutat utique salium saponem pro varia sui proportionem. Alius est sapor salis alcalini caustici ignei & alius multo mitior saponis veneti ex hoc sale cum oleo olivarum parati. Terra insipida est; junge illam salii cuidam acido & jam alius nascetur sapor longe diversus ab acido. Insidum argentum vivum junge acido salis meraco, habebis venenum rodentissimum, quod quidem maxima aquae copia enervatum jam medicamenti loco sumi potest, sed saporem horrendum retinet etiam in tanta dilutione, dum acidum solum tanta aquae copia jam enervatum fuisset. Solve cretam in spiritu nitri, peribit acor huius & nascetur sapor amarus ex acerrimo acido sale & insipida creta. Possent plurima exempla afferri, sed pauca hæc sufficiunt, ut intelligatis, etiam reliqua principia, licet insipida, ad saporum tamen compositionem & variam modificationem omnino concurrere, neque adeo omnem diversitatem saporis a diversitate salini principii, sed & a varia huius cum reliquis principii mixtione pendere. In sensu latiore igitur etiam reliqua principia, quatenus cum salinis moleculis varia proportionem, variisque modis confociata, objectum gustus constituunt, non autem seorsim sumpta.

§. CCCCLXXXIX.

Ut gustemus, variæ conditiones requiruntur & plures adhuc, ut recte gustemus. *Primo* oportet epithelium linguae nec nimis crassum esse, nec siccum; crassum nimis epithelium gustum hebetat, ut callosa epidermis tactus sensum minuit; idem si qua parte linguae ablatum fuerit, ut nuda papillae prostent, saporis loco dolor percipietur, nisi blandissima sint & penitus insipida esculenta. Similis fere linguae conditio est post aphthas deciduas, aut post acutos morbos, in quibus epithelium secessit, renato novo, tene-

riore, unde tunc lingua multo exquisitius sentit. Siccum epithelium etiam gustum hebetat, aut penitus delet; hinc sicco ore sapor nullus, aut certe obtusus, hinc gustus in siccitate febrili deletus. Hinc os in statu naturali semper humidum, semper madida lingua, non a propriis solum humoribus, sed etiam salivali latice constanter humectata. Præter has conditiones requiritur, ut saliva nostra naturaliter se habeat; nam si illa sapida est, ut sæpe in morbis accidit, genuinum gustatorum corporum saporem non percipimus, sed vel a prædominante salivæ sapore afficimur, vel sapore confuso ex illo salivæ & corporis degustati. Quibus os per morbos amarum est, iis omnia fere quæ degustant, amarum sapere videntur. Quibus dulcescit saliva, iis pleraque gustata subdulcia videntur, aut fatua; & acida, quibus acescit. Eadem si nimis lenta ac viscosa fuerit, facit, ut talia quoque putentur degustata. Hinc sæpe conqueruntur ægri, os sibi quasi limo obductum esse & omnia, quæ degustant, sibi limosa videri. Denique corpus ipsum, quod degustatur, ejus naturæ esse debet, ut non solum principia sapida contineat, sed etiam ut sapida illa principia mediante saliva elici, solvi & in statum fluidum deduci possint, atque ita cum saliva poros epithelii subire & papillis linguæ applicari. Hinc fluida jam per se vel insipida, vel sapida sunt; insipida quidem, si nihil continent salini, sapida vero, si eo elemento gaudent, neque hæc salivæ vehiculo indigent. Solida vero corpora, etiam si sale prædita, nullum tamen saporem excitant, nisi id ipsum, quod illis inest sapidum, ope salivæ eliciatur, solvatur & in fluidi naturam redigatur; ipsa solida non sapiunt, nisi soluta. Hinc solida corpora primo gustu etiam insipida, dum aliquo tempore masticantur & saliva imprægnantur, demum saporem suum nobis communicant & alia omnino etiam insipida manent, licet sale prædita,

licet masticata & saliva perfusa, si nimirum ita cum reliquis principiis firmo nexu unitum salinum est, ut saliva solvi & extricari non possit, exemplo vitri. Porro & hoc requiritur, ut degustatum corpus moderate caleat, vel saltem in ore calefiat, nam lingua exquisitè frigida minus bene gustum percipit & sapidissima, si vehementer frigida, minus sapida videntur. Vinum ipsum valde refrigeratum genuinum suum saporem non imprimit linguæ, nisi aliquo tempore ore detentum incaluerit. Nempe frigore pori epithelii contrahuntur, atque ita minuitur actio sapidi in papillas linguæ gustatorias. Sed & præterea sensatio vehementior semper minorem obscurat & imperceptibilem reddit; hinc si impressio nervis a frigore inducta major est impressione illa, quæ a sapido nascitur, etiam sapor minus vivide, aut omnino non percipitur. Omnibus ergo dictis conditionibus positis, dum materies gustanda attenuata & saliva plerumque soluta, per poros epithelii insinuata papillas linguæ afficit & movet, motusque ille in superficie papillarum impressus ad sensorium commune propagatur, gustus fit excitaturque in mente hanc mutationem advertente idea saporis, diversi omnino pro diversa mutatione papillarum linguæ. Quæ autem præcise mutatio papillis ab hoc illove sapido inducatur, nobis scire datum non est; id solum scimus, cum certis nervorum mutationibus certas animæ ideas connexas esse; & prout a diversis aëris tremoribus diversorum sonorum ideæ, prout a diversa radiorum luminis refractione & reflexione diversorum colorum ideæ in mente nascuntur, ita a diversa affectione papillarum linguæ diversæ excitantur ideæ saporum. Atque ut præcipui quidam colores sunt, ex quorum mutua variaque inter se commistione innumeri alii compositi exsurgunt, ita etiam præcipui quidam saporibus sunt, ex quorum commistione innumeri alii compositi exsurgunt, quos enumerare

longum foret. Præcipui autem istiusmodi sapes sunt : *primo : salsus*, qualis a sale communi degustato nascitur & penetrantior ab ammoniaco, qualem etiam omnes fere medii sales excitant, plus minusve intensum & alium tamen in unoquoque sale medio. *Secundo : acidus*, qualis oritur ab aceto degustato, succo citri, tartaro, ribesii, acetosella & multo fortior ab acidis mineralibus dilutis. *Tertio : alcalinus*, qualem percipis, dum lixivium degustas, aut sale volatilem alcalinum, spiritum salis ammoniaci, aut fixa salia lixiva, sal tartari, nitrum fixum, cineres clavellatos, sodam Hispanicam, plantarum fixa salia, incineratione parata. *Quarto : dulcis*, qualis sacchari, mellis, fructuum passorum est, hic per varios gradus imminuta dulcedine in fatuum transit. *Quinto : vinosus*, qualis ab omni liquore fermentato oritur, vino, cerevisia, spiritu vini, hydromelle. Adeo penetrabilis hic sapor est, ut etiam paucae vini guttulæ in ingenti aquæ amphora percipiantur. Et licet singulum vinum peculiari sapore gaudeat, quo ab omni alio distinguitur, conveniunt tamen omnia in illo præcipuo sapore, quem vinosum dicimus. *Sexto : spirituosus*, qui vinoso latius patet, nam omnis quidem vinosus sapor spirituosus est, at non omnis sapor spirituosus etiam vinosus est. Vocamus autem spirituosum saporem, qui vividissime nervos afficit & celerrime se diffundit; talis etiam sapor est quarundam aquarum mineralium spirituosarum. *Septimo : amarus*, qualis ab absynthio, bile animalium &c. *Octavo : aromaticus*; vocantur autem aromata corpora vegetabilia, quæ manducata & calidum saporem linguæ imprimunt & naribus odorem penetrantem. E. g. cinnamomum, nuxmoschata, allium, majorana, thymus, plantæ innumerae. *Nono : calidus acer*, qui linguam sensu mordace afficit & valida irritatione calorem & dolorem excitat. Talis a capsico, pipere, euphorbio,

ari foliis & radice oritur. *Decimo: austerus*, qualis fructuum horæorum, immaturorum est, acerbus; linguam adstringens & exsiccans; talis est gallarum turcicarum, vitrioli martis, aluminis &c. *Compositus*. Ex hisce varie inter se concurrentibus innumeri saporés compositi exsurgunt. Ex acido & dulci *acido-dulcis*, qualis in plerisque fructibus horæis maturis est; *dulcis & vinosus*, qualis in hydromelle; *vinosus & acidus*, qualis in vinis tenuibus Austriacis & Rhenanis; *vinosus & acerbus*, qualis in Budensi vino & magis in illo de monte Pulciano; *amarus & aromaticus* in absynthio & sic porro, nam omnes illas compositorum saporum species aut varietates enumerare, non est hominis. Imo & ex recensitis saporibus præcipuis aliqui jam ad compositos pertinent. *Salsus* sapor certe ex *acido & alcalino* compositus est, *aromaticus* ex *acri & spirituosus*, *austerus* ex *acido & terreo elemento*, ut omnino definire non possimus, quinam *primigenii* saporés dicendi sint, idque vel ideo, quia ipsa corpora, quæ gustamus, jam nimis composita sunt.

Ceterum hoc loco paucis attingenda quæstio est, num saporum diversitas a diversa particularum salinarum figura pendeat, num ab alia actione nobis ignota? Primum probabile videri posset, quia cuique fere salii sua propria figura est; nitrum crystallos prismaticas hexagonas, sal commune cubicas, vitriolum parallelepipedas rhomboideas, alumen octædras, exhibet & alia salia alias. Sed non est ita, ut quidem prima fronte videtur, nam exigua circumstantia in crystallificatione prætermissa salium figuram mutat, non mutat interim saporem. Sal marinus coctione paratus abit in pyramides cavas, ex planis quadratis sibi impositis fastigiatas; idem lenissimo igne, aut solis calore in crystallos redactus in cubicam solidam figuram abit. Easdem omnino crystallus sal

gemma, marinus & fontanus præbet, si recte processeris, nec tamen eodem præcise sapore præditas, mitiores fontani, acriores fossiles & marinales. Vitriolum martis capillare album, pellucidum, Hydriense, a Cel. SCOPOLI descriptum sapore convenit cum alio vitriolo martis, styptico, adstringente & tamen crystallis maxime differt. Vitriolum Trichites HENCKELII, *Pyritol.* p. 842, 843. crystallis differt, ceterum cum aliis vitriolis convenit. Missis aliis unico exemplo ostendam, quid de figura salium, ut causa saporis, tenendum. Distinctæ sunt crystalli salis communis & nitri, distincti etiam sunt horum salium saporibus. Nunc possum ex basi salis communis acido nitri saturata per artem nitrum producere cubicum, quod crystallos format perfecte similes crystallis salis communis & quam maxime differt a crystallis nitri officinalis. Et tamen hoc nitrum cubicum saporem mihi imprimit omnino diversum a sapore salis communis, cujus figuram exacte refert & imprimit mihi saporem prorsus eundem cum sapore nitri officinalis, a quo figura crystallorum adeo multum differt, ut ipse sal communis. Rursus affundo nitro huic cubico spiritum salis communis & destillo. Expellitur sic acidum nitrosum vice versa, eoque expulso iterum saltem communem verum habeo, qui figura crystallorum nihil differt ab illo nitro cubico, & tamen saporem jam proprium habet diversum a nitroso. Hoc in casu saporis mutatio a solo acido mutato evidenter pendet. Possem aliis exemplis ostendere, ut manente eodem acido mutata basi saporibus alterentur. Interim ex dictis sufficienter patet, non a figura crystallorum, sed ab aliis omnino conditionibus saporem salium pendere.

§. C C C C X C.

Non solum variat sapor pro varietate objecti sapidi, sed idem etiam corpus lapidum diversis

modis linguam afficit pro varietate aliarum conditionum, quæ in textu recensentur. Et primo quidem posito eodem objecto sapor variat pro *varietate ætatis*. Pueri solis blandis & dulcibus delectantur, respuunt alia, quæ adulti amant. Ab aliquot guttulis vini linguæ instillatis nasum crispabit & horrebit tenellus & lacti assuetus infans; adultis vinum nectar est. Semen sinapi cum bubula nobis gratum præbet stimulum, pueris hoc aroma fere venenum videtur. Nempe in universum sensilior est homo, quo suæ origini propior; per ætatem minuitur paulatim partium sensilitas. Hinc lenissime sapida, quæ gustum infantum grate excitabant, adultorum minus sensiles nervos non movent, sed acriori stimulo opus est.

Temperiei. Calidi temperamenti homini multo calidior & intolerabilis videbitur sapor fervidi aromatis, caryophylli, aut zingiberis; idem leucophlegmatico frigidoque gratissimus erit. Illi refrigerantia placent, fructus horæi, gelatinæ frigidae, emulsiones; hic vinum & spirituosos potus præferet.

Morbi. Qui morbis putridis laborant, de nausea & amaritie oris conqueruntur & de putrido nonnumquam sapore. Omnia quæ illis exhibes, eodem sapore imprægnata putant; exceptis acidis, quæ summo studio expetunt & quibus delectantur. Post morbos acutos, aut etiam post febres intermittentes omnia nonnumquam falsa videntur convalescentibus. Amara omnia ictericis, quibus bilis salivam infecerit.

Sexus aliquam etiam, non perpetuam tamen diversitatem efficit. In universum quidem feminæ delicatiores sunt viris, qui plerumque aciora amant, sed dantur etiam viri effeminati & feminæ viragines.

Con-

Consuetudinis. Tabacum si quis prima vice gustaverit, continuo nauseabit. Sola tamen consuetudo efficit, ut multi ejus fumo perditæ delectentur, potiusque pane carere vellent, quam gratissimo tabaci stimulo, qui primo adeo ingratus fuerat. Sola certe consuetudo facit, ut aliæ gentes delectentur gustu sordidarum rerum, quas nos quam maxime detestamur. Antiqui scythæ carnibus equinis crudis vescerantur, quas sub ephippio positas emolliebant & idem hodie Tartarorum mos est. Nemo nostrum est, qui non amaritiem bilis excretur; eadem tamen nonnullis gentibus in deliciis est & in Habessinia regum mensis apponitur.

Aliorum prius gustui applicatorum. Idem sapidum corpus, in eodem homine alium atque alium saporem excitabit, pro diversitate aliorum prægustatorum; tunc enim sapor corporis recens gustati cum sapore prægustati, adhuc linguae inhaerente confunditur & mixtus oritur sapor ex utroque, qualem a neutro seorsim expectes. Vinum post dulcia prægustata acidissimum videtur & acerbum; idem post caseum prægustatum suavissimum & sapidissimum est. Solus etiam ordo, quo cibi se invicem excipiunt, gustum vel excitare potest vel deprimere, quod omnibus notum est.

Cur autem sapidissima dolorificis proxima? ut salina aromatica &c. Si nudis applicantur nervis? Quo magis sapidum corpus, eo idem illud acrius est, & contra, quo minus sapidum, eo blandius. Lac oculo instillatum fertur sine incommodo, vini guttula oculo applicata jam dolorem ciet; hinc excoriata lingua, aut vulnerata, epithelio fisso, a sapidissimis dolorem excitari, dum nudis papillis applicantur mirum non est, cum & in tactus organo nudis papillis applicata corpora quantumvis polita dolorem excitent.

Quare sapida cito instaurantia? Ratio est in citâ horum penetrabilitate & stimulo, quo nervos non

linguæ solum, sed & ventriculi ac intestinorum afficiunt, digestionem ac chylicationem promouent & ipsam denique circulationem humorum languentem incitant.

Quamobrem aqua, olea lenia, terra, insipida?
Aqua pura omni salino principio caret; hinc insipida. Terra pura & ex eadem ratione insipida est & ex altera hac, quia in saliva indissolubilis est. Olea lenia non utique omni sapore carent, uti neque salino destituuntur principio; imo vero eadem acerrima fiunt, dum acidum in iis latens sensim evolvi incipit. In genere notari debet, omnia ea corpora nobis insipida videri, quæ aut omni salino elemento destituuntur, aut minus hujus elementi, quam nostra saliva, continent, aut illud adeo intricatum habent, ut per salivam elici non possit. In sulphure e. g. abundantissimum est acidum vitriolicum, sed arctissime cum phlogisto conjunctum, ut nullam acidi notam præferat, nec aqua, nec saliva inde acidum elici possit. Hinc insipidum sulphur, cujus maximam partem efficit fortissimum chalcanthi acidum.

DE OLFACTU.

§. CCCCXCI.

Olfactus organum per nares distributum est, quo nomine cavum duplex plurium ossium concursu formatum & intermedio sepimento divisum, retro velum palatinum in fauces apertum, comprehendimus. Si calvaria mundata inspiciatur, ingens hæc cavitas apparet, semperque latior versus fauces, ut angustiora videantur anteriora narium foramina, posteriora pateant hiatu latissimo. Apparet autem cavum hoc adeo magnum, quia membrana partes has investiens & officula spongiosa defunt. In vivente enim non adeo vastum est cavum narium, ut in calvaria apparet, quum & officula illa spongiosa & medium septum

& pulposa has partes cingens membrana multum spatii ejus repleat, quod inane totum in sceletocernitur. Omnibus his partibus in suo situ naturali relictis nares manifeste ab anterioribus foraminibus sursum convergunt, deinde vero posttrorsum latefcunt. Hanc anterioris narium cavitatis in spatium paulatim angustius reductionem ideo fecit natura, ut corpuscula odorata cum aëre per nares inducta majori copia in membranam narium impingerent, in qua nervi olfactorii sensilissimi sub tenuissima epidermide expanduntur; utque adeo odores rerum vividius percipiamus; nam si amplius adeo esset aëris in nares aditus, qualis in calvaria est, plurima corpuscula odorifera cum plurimo aëre membranam olfactoriam libere præterlaberentur, nec ullam in nervis sensationem excitarent; nunc vero dum aër per anteriora narium foramina in spatium continuo angustius adducitur, fieri non potest, quin odorata corpuscula cum eodem adducta multa plura, multoque exactius in narium membranam incurrant, nervosque in ea distributos vividius afficiant.

Sed jam danda est descriptio totius organi. Ex osteologia notum suppono, totam narium cavitatem sequentibus ossibus circumscribi & componi: *primo* osse frontis, *secundo* osse ethmoideo, *tertio* osse sphænoideo, *quarto* vomere, *quinto* duobus ossiculis nasi, *sexto* duobus ossibus palatinis, *septimo* sex ossiculis spongiosis, sive turbinatis, *octavo* duobus ossibus maxillarum superiorum, *nono* duobus ossibus planis, *décimo* duobus ossibus unguis, quæ omnia, si seorsim numerentur, sunt in universum ossa *viginti*, licet ossa plana & spongiosa solummodo partes ethmoidei sint. Ossa hæc enumerata varias formant cavitates minores, quibus omnibus capacitas cavi narium augetur; de his autem sequente paragrapho dicetur. Nunc initium sumamus ab ea parte narium, quæ libe-

ra in facie prominet, proprieque *nasus* appellatur. Hujus pars suprema fit ab officulis nasi propriis, pars media tumidior a processu nasali ossis utriusque maxillaris superioris, pars nasi inferior & latior, quæ in calvaria deest, ex cartilagine perficitur. Ea cartilago non simplex est, sed ex pluribus portionibus cartilagineis componitur, mediante cellulosa tela & ad se mutuo & ad ossa revinctis; quinque ejusmodi portiones cartilagineas passim numerant anatomici, aut sex, alii etiam plures, quod quidem non multum refert. Ab his fiunt partes nasi laterales inferiores, alæ nasi dictæ & septum nasi cartilagineum, quod anteriora narium foramina determinat & cui superius septum osseum a lamina cribrosa descendens respondet, posterius autem vomer. Cartilagineam hanc infimam nasi partem ideo fecisse videtur natura, ut mobilis esset, utque diduci & constringi posset prout plus minusve aëris attrahere & exquisitius olfacere volumus, aut contra. Videmus certe in brutis, dum quid exquisite olfaciunt, e. g. canes venaticos nares celeriter & vehementer diducere, ut majorem aëris copiam, & cum eo etiam majorem copiam odoriferi halitus attrahant; idem & nos ipsi facimus. Ob hanc rationem etiam non ex una & indiscreta cartilagine, sed ex pluribus particulis composuit nasum & musculos his præfecit, quibus moverentur. Musculi hi sequentes sunt :

Primo : constrictor nasi, aut compressor naris
ALBINO dictus, utrimque ab eminentia ossis maxillaris superioris, supra dentes molares anteriores exoritur & a parte exteriori radice alæ nasi; inde sursum inflexus expanditur per dorsum nasi & superiorem hujus cartilagineam, partimque cum sodali suo fibris quibusdam concurrat, partim in membranam extenuatus desinit. Agens uterque, latus mobile, seu alam nasi premit versus sep-

tum, atque ita nares aliquantulum comprimit & angustat.

Secundo : depressor alæ nasi. Oritur ab alveolis dentium incisorum superiorum, aut a superiore parte alveoli canini, inde latefcens ascendit, feque integumentis nasi inferit pone feptum & ad radicem alæ nasi, quam partem agens deorfum trahit, parumque alam nasi verfus feptum premit.

Tertio : levator labii superioris alæque nasi, qui ab inferiore & interiore orbitæ margine & a proceffu nafali offis maxillaris, fupra & infra ligamentum mufculi orbicularis palpebrarum duplici origine natus, inde deorfum excurrrens, mittit fasciculum ad alam nasi infertum, reliquis fuis fibris extrorfum deorfumque fparfis in cutim labii fuperioris, ejufque orbicularem finitur. Hic & labium fuperius elevat, atque oris rimam ducit & altero fasciculo agens alas nasi furfum extrorfumque ducit ac dilatat, antagonifta præcedentium.

Alios adhuc nasi mufculos, quos Cel. SANTORINUS defcripfit, omittere poffumus, ut qui nec perpetui fint, nec aliis anatomicis memoratu digni vifi, minutuli.

§. C C C C X C I I.

Dixi narium cavum augeri cavitatibus aliis accessoriis, quas offa ad cavum narium formandum concurrentia intercipiunt. Hæ cavitates accessoriæ breviter recensendæ funt.

Primo : sinus frontales, fupremam cavi narium partem efficiunt. Sunt autem sinus hi cellulae inter fecedentes laminas offis frontis interceptæ, in ea circiter regione, quæ eminenti supercilio offeo & mediæ inferiori offis frontis parti refpondet, qua id cum officulis nasi & ethmoideo concurrir. In foetu conftanter defunt, nec nifi per ætatem nascuntur, dum laminæ offis frontis a fe

mutuo discedere incipiunt. Irregularis autem horum sinuum figura est & numerus quoque incertus; subinde unica ampla cavea adest, subinde multæ cellulæ tres, quatuor, sex & totidem septa, subinde duo sinus frontales dexter & sinister, imperfecte divisi conspiciuntur; subinde deficit in uno latere, adest in altero; subinde totam orbitæ latitudinem occupant, subinde dimidiam ejus partem. Aperiantur autem in cellulas ossis ethmoidi, potissimum anteriores, obliquo ductu, vel unico, vel duplici, atque ita cum media narium cavea communicant.

Secundo : antra Higmoriana, sive sinus maxillares, qui in adulto homine magni utrimque in osse maxillari superiori sub orbita hærent, inter processum orbitalem & marginem alveolarum dentium molarium superiorum intercepti. In sicca calvaria amplo foramine utrumque hoc antrum patet in medium narium hiatum, sed omnibus in statu naturali relictis apertura ea multo minor est, quum partem ejus aperturæ os spongiosum inferius, partem aliam anteriorem os unguis, posteriorem os palati & membrana denique pituitaria omnia hæc ossa investiens, compleat. Hinc ostium calamo non majus remanet, quod ad intervallum medii & infimi ossis spongiosi patet; parte vero anteriore sub orbita idem antrum in appendicem quamdam alveolatam oblongam procedit & cum cellulis ethmoideis anterioribus, ac proinde illarum ope etiam cum sinibus frontalibus communicat, observante Ill. HALLERO. Ceterum sinus hi maxillares, seu potius primordia horum sinuum in foetu jam conspicua sunt, licet exigua, dum frontaliū sinuum nullum adhuc initium adparet.

Tertio : cellulæ sphenoidales. Pars anterior media ossis multiformis, in foetu quidem solida, in adulto autem homine excavata est sinu vel uni-

co, vel, ut plerumque, duabus cellis magnis, osseo septo divisis, sub anteriore fellæ equinæ parte & foraminibus opticis. Undique clausæ hæ cellæ antrorsum patent rotundo utrimque ostio, in recessu supremi narium meatus.

Quarto: cellulæ ethmoideæ, quas BOERHAAVIUS prætermisit, incerto numero, quatuor, aut etiam plures utrimque, reliquis sinibus cellulisque minores, favorum utcumque similes in parte laterali ossis cribriformis exsculptæ, aliæ interiores & septo propiores, aliæ magis exteriores & inferiores, in supremum narium meatum aperiuntur pluribus tubulis. Communicant cum sinibus frontalibus & sphænoideis. Cellulæ orbitariæ tum in osse plano, tum in processu orbitali ossis maxillaris, a Cel. HALLERO^o adnotatæ, ad minutias anatomicas augendas potius videntur pertinere, quam ad augendam narium capacitatem.

§. C C C C X C I I I.

Officula spongiosa vulgo quatuor, duo superiora, totidemque inferiora ab anatomicis descripta sunt; addiderunt alii duo officula spongiosa suprema, ut adeo in singulo narium latere tria sint, supremum, medium & inferius. Officula spongiosa suprema, reliquis minora, sunt partes ossis plani interiores, cellulis ethmoideis exsculptæ & posterius in exiguam caudatam appendicem terminatæ. Os spongiosum medium, vulgo superius dictum, utrimque in media circiter narium altitudine suspenditur, conchæ mytuli utcumque simile, superius & anterius cum aspera ossis plani superficie cohærens & eminentia transversa ossis palati & maxillæ superioris suffultum, extrorsum concavum, introrsum, qua septum narium respicit, convexum, intus foveolis multis & spongiosis recessibus exasperatum. Os spongiosum inferius, mytuli pariter figuram referens,

infra priora positum, longius, nectitur, aut infidet potius lineæ asperæ ossis palati & maxillaris, juxta aperturam antri Higmoreani, sursumque processum latum brevem oblique emittit, qui cum ossē spongioso medio plerumque concurrit, sinusque maxillaris magnam aperturam pro parte regit, similemque processum etiam posterius ad claudendum eum sinum deorsum emittit. Tenuissima sunt hæc officula & instar papyri tenera, facile frangenda, hinc difficilia præparatu. Foraminula & cryptulas spongiosas in homine superinducta æquabilis membrana mucosâ quasi delet; augment tamen expansione sua olfactus territorium, nariumque meatus angustant. In animalibus sagacioribus & mole majora sunt & in elegantissimam spiræ formam contorta, unde etiam turbinata dicta sunt. Quo magis vero tortuosa sunt, eo ampliore superficiem habent, eoque magis augeatur superficies membranæ mucosæ, in qua nervi olfactorii distribuuntur, hinc ceteris paribus eo sagacior olfactus. Hinc odoratus adeo exquisitus iis animalibus, quibus & nares ampliores & ossa spongiosa magis tortuosa natura dedit, ut canibus venaticis &c. Hinc a contrario destructis illis officulis, quod subinde per luem veneream fit, olfactus minuitur. Ceterum ossa spongiosa inferiora pro peculiaribus plerique anatomici habent, suprema & media solummodo partes sunt ossis ethmoidi. Inter officula hæc medium intercedit septum narium, quod totum olfactus organum bipartitur; septum illud partim osseum est, ex descendente media lamella ethmoidis & vomere factum, partim cartilagineum in anteriore & inferiore narium parte, quæ alas nasi dissepit. Distant autem a septo officula spongiosa, ut a summo osse cribroso ad imum narium fundum via sit continua prope septum & patula, qua mucus delabi possit. Sed recedendo a septo extrorsum versus latera narium adherent, suprema quidem &

media ossi cribriformi, inferiora autem ossi maxillari & palatino, cumque introrsum versus septum narium convexitate sua protuberent, hinc tribus præcipuis locis cavum narium magis angustatur, inter quas angustias totidem spatia majora & ampliora intercedunt, qui meatus narium appellantur, suntque meatus supremus, medius & infimus. Iste amplissimus supra palatum fornicatum versus fauces incedit, versus septum cum medio communicans, lateraliter ossi spongioso inferiore protectus. Medius narium meatus longior, sed minus amplus, sub ossi spongioso medio pergit itidem retrorsum in fauces. Meatus supremus brevior & perangustus inter septum & cellulas ethmoideas & ossa spongiosa suprema, initio sub lamina cribrifera sumpto, posttrorsum fertur & terminatur sinu sphænoideo. Hæc quidem fabrica ut valde intricata, ita dictu difficilis est & difficilior notatu. Peculiari etiam administratione anatomica opus est, ut illi narium meatus recte in conspectum dentur. Figuram æri accurate incisam, qualis toto organo ad perpendiculum secto adparet, exhibuit Cel. MORGAGNIUS *Advers. Anat. VI. Tabul. II. Fig. 3.*

§. C C C C X C I V.

Omnia hæc ossa ad formandam narium cavitatem concurrentia, suo investuntur periosteo & ipsæ etiam nasi cartilagines suam habent periosteo continuam membranam, quæ mutato nomine perichondrium appellatur. Sed præter eam membranam ipsa cutis per foramina narium anteriora introrsum flectitur, mutata tamen fabrica, mollior, magis pulposa, rubicunda, in membranam mucosam degenerat, quæ perichondrio & periosteo, narium ope, cellulosa telæ ubique conjuncta, omnem cavi narium superficiem, omnes officulorum spongiosorum anfractus, omnes sinus cellu-

lasque investit. Non ejusdem ubique densitatis est, crassior in septo narium & ossibus spongiosis & nasi cavitate, in sinibus tenuior, eoque tenerior, quo longius ab origine sua in sinuum recessus sese abscondit. Vocatur ab Auctore *Schneideriana*, quum CONRADUS SCHNEIDERUS eam primus exactius descripserit, in eaque mucii officinam esse contra veteres demonstravit, qui crediderunt, mucum ab encephalo per foramina ossis cribrosi in nares depluere. Vascularis plenissimam esse, etiam absque injectione apparet; post injectiones tota intense rubet. In hac ipsa membrana organum olfactus distributum est; nervi nempe, de quibus deinde dicetur, in superficie ejus expanduntur, non illi tamen nudi, sed ut alibi, ita & hic epidermide tecti, quæ simili ratione, ut de cuti dixi, per foramina narium introflectitur. Quo autem sensiles conservarentur nervi olfactorii, oportebat eosdem perpetuo humectari, nam siccis naribus olfactus aut nullus est, aut debilis. Videmus a contrario in sagacissimis animalibus nares semper humidas esse; exemplo sunt canes. Humectantur autem nares partim illo perspirabili halitu arterioso, qui ex omni superficie membranae Schneiderianæ continuo exhalat & qui hyemali tempore specie fumi de naribus prodit & in seniculis etiam ob deficientem calorem in guttas colligitur de naribus stillantes; partim etiam halitu aquoso quem expirando de pulmonibus per nares exhalamus, sed omnium maxime mucosus, qui in toto olfactus territorio, in omnibus sinibus & cellulis, in omni fere puncto membrana narium secernitur, tenuis primum, mora autem & stagnatione, parte subtiliore resorpta spissescens. De fontibus mucii hujus & modo secretionis, utrum per vasa arteriosa, an per glandulas præparetur, non convenit inter physiologos. Ex solis arteriis SCHNEIDERUS repetiit, tum Cel. Viri LIEUTAUD & SENAC,

qui glandulas membranæ pituitariæ reperiri negarunt. Sed invenerunt alii Clarissimi Viri folliculos, etsi parvos, nec semper facile conspicuos, vidit NICOL. STENONIS & ipse BOERHAAVIUS & ABRAH. KAAU, vidit MORGAGNIUS accuratissimus in lateribus septi narium stratum glandulosum; vidit etiam folliculos HALLERUS & ad latera septi utrimque & ad ossa spongiosa media ac inferiora & in infimo narium meatu, maxime in parte faucibus propiore; dicitque esse de cryptarum genere folliculos pulposos, rotundos vel ovaes. Denique & pori mucosi passim in membrana pituitaria deprehenduntur agminati; & sinus mucosos, grandes in septo, vomere, multis folliculis communes, RUYCHIIUS & alii anatomici viderunt. Et analogia suadet, etiam hic ut alibi, per folliculos mucum parari; adhæc mucus narium in statu naturali crassus & viscidus est, qualis certe per arterias non videtur secerni posse; si autem sine folliculis secerneretur per arterias tenuis, videretur citius dilapsurus, quam satis inspissaretur. In sinibus tamen & cellulis, ubi & mora datur & quies, nihil repugnat etiam per sola vascula arteriosa mucum tenuem secerni, qui stagnando paulatim crassescat, maxime in antris hignorianis & sinibus sphænoideis. In hisce sola fabrica arteriosa mucum secerni omnino persuadeor, tum ob rationem dictam, tum quia in sinuum pituitaria membrana nec Illustris HALLERUS, nec alii exactissimi Anatomici folliculos umquam deprehendere potuerunt. *Conf.* SANTORINI *obs. anat.* p. 91. Potest ergo utraque sententia Clarissim. Virorum conciliari & duplex admitti muci secretio, partim per folliculos, partim arteriosa recta vascula, nullis glandulis interrupta, sed in cavum commune patula, qualia RUYCHIIUS in superficie ossium spongiosorum ovis & vaccæ demonstravit & vasa nominavit arterioso-mucosa. Quæ in anteriore & cuti propinqua narium

parte apparent glandulæ, sebaceæ sunt ex illisque pili emergunt, vibrissæ dicti, quibus insecta a naribus arcentur, nervique titillantur, atque in sternutationem cientur, qua proflato per nares copiosa aëre irritamentum excutitur.

§. C C C C X C V.

Primum par nervorum cerebri, quod olfactorium dicitur, partim ex fine inferiore lobi anterioris cerebri recta directione, partim ex intervallo lobi anterioris & posterioris obliqua, exortus antrorsum procedit, sensimque dilatatur, atque ubi laminam cribrosam ossis ethmoidei pervenit, in filamenta pluscula dissolvitur. Ea lamina multis foraminulis pertusa est, in quæ exterior duræ matris lamella sese demittit & infundibula parva constituit ad septum narium ducentia, in eoque evanescentia. Per ea jam foraminula, perque infundibula hæc duræ matris, filamenta nervi olfactorii medullaria, sua pia matre investita in septum narium ex cranio descendunt & in membrana pituitaria, septum illud cingente, ramosa finiuntur. Grandior in quadrupedibus plerumque hic nervus est, quam in homine; & passim eo grandior, quo majore narium sagacitate animalia pollent. Is ergo verus est nervus olfactorius. Utrum vero unicus sit, alibi discutiemus; nam præter hoc primum par nervorum alii adhuc & frequentes a quinto pare rami in nares & in membranam pituitariam penetrant, de quibus seorsim dicetur. Ceterum vix opus est refutare veterum errorem, qui foramina ossis cribrosi patula esse, perque ea aërem ex naribus cum corpusculis odoratis in ventriculos cerebri ascendere, sic olfactum peragi & eadem via ex cerebri ventriculis mucum descendere crediderunt. Solide hæc deliramenta ex anatome refutavit dudum SCHNEIDERUS. Nam foramina illa & alioquin exigua sunt & adhuc obturantur a dura

matre, quæ non majus relinquit spatium, quam per quod recte filamenta nervi olfactorii penetrare possint & ipsa denique pituitaria membrana ab interiore lamellæ cribrosæ parte omnia hæc foraminula obducit. Nec ulla via est patula inter cerebri ventriculos & nervum olfactorium.

Distribuuntur per totam illam amplam superficiem usque in omnes sinus & cellulas accurate. Hæc non respondent observationibus anatomicis; sparguntur in membranam septi narium filamenta nervi olfactorii, in eaque finiuntur. Ad ipsos sinus maxillares & sphænoideos penetrare, ex hypothese scripsit BOERHAAVIUS. Sunt quidem & in istis sinibus nervi per pituitariam membranam distributi, sed illi a quinto pare, non a primo, adveniunt.

§. C C C C X C V I.

Latissimam esse horum nervorum expansionem. Hoc corollarium ex mox dicta hypothese fluit. Latissimum certe est olfactus territorium & latissima expansio membranæ Schneiderianæ, quæ omnem cavarum narium superficiem, omnes cryptas, cellulas, sinus investit; unde & latissima foret expansio nervorum olfactoriorum, si quidem hi per omnem membranæ pituitariæ superficiem spargerentur. Nunc hoc fundamento sublato ruit etiam corollarium. Verumtamen si quinti paris rami nasales etiam olfactui famulentur, quod suo loco videbimus, tum quidem recte dici potest, latissimam esse expansionem nervorum olfacientium, sed non primi paris, sic dicti olfactorii.

Nec usquam in nostro corpore nervos tam molles, adeoque nudos esse. Hæc iterum cum aliqua restrictione accipienda sunt, ne forte credamus nervos olfactorios reapse nudos esse. Nullus in toto corpore nudus aëris contactui exponitur;

& in nares perinde epidermis intrat, quæ nervos contegit. Mollities etiam olfactorii nervi nihil peculiare habet, qui firmior esset, si, ut alii, vaginam a dura matre haberet, aut a celluloso contextu; non autem indiget ejusmodi vagina, cum vix encephalo egressus jam finem suum inveniat in membrana pituitaria. Opticus nervus longius iter emetitur, hinc firmo involucri indiget. Mollis est etiam acousticus; & omnes alii nervi, etiam firmo in volucri cincti, in origine sua, inque fine, perinde molles sunt, ut olfactorius. Teneriorem autem esse epidermidem narium, quam quæ cutim externam tegit, adeoque hoc sensu nervos olfactorios respective magis nudos esse aliis, id quidem dicere per me licet. Sed non ideo omnium in toto corpore nudissimos cum BOERHAAVIO affirmare velim. Non advertit Cel. Vir, majorem longe sensilitatem esse nervorum laryngis & hos quidem nudis propiores esse, quam olfactorios. Aqua certe nervos olfactorios non vellicat; sed guttula aquæ in tracheam illapsa acriter afficit nervos laryngis.

Alia quæstio est, num nervi, in membrana pituitaria distributi, ultimis suis finibus etiam abeant in papillas, quales in cuti corporis externa & in lingua reperiri, dictum est. Fuerunt omnino physiologi, qui & in organo olfactus similem fabricam adesse scripserunt. Injecta membrana pituitaria & in aqua macerata, flocculenta fit & quasi villosa; eos villos pro papillis nerveis habuerunt. Sed neque HALLERUS, nec MORGAGNIUS, nec alii Clar. Anatomici, papillas hic distincte videre potuerunt. Nec certe maceratione multa opus esset, si adeo distinctæ adessent papillæ, ut in cuti. Et denique longa maceratione quævis membrana flocculos agit, cum dissolvi incipit, quin ideo ejusmodi flocculi & villi papillæ nerveæ sint.

§. C C C C X C V I I.

Nervos olfactorios humidos oportebat conservari. Hæc muci necessitas est in toto cavo narium secreti, maxime cum aëris contactui immediato nares continuo pateant & vel ideo exsiccationi magis obnoxia sint. Tenuis humor exhalans non suffecisset huic muneri; nam etiam pergente ea exhalatione & accedente insuper exhalatione pulmonali, hebes tamen olfactus est, nisi muco madidæ sint nares. Sed & viscida muci indoles aptior est excipiendis retinendisque corpusculis odoratis fugacissimis; & hæc altera muci necessitas est. Sic autem factum est cavum narium, ut in omni situ capitis mucus ex his illisve sinibus effluere possit. Capite erecto ex sinibus frontalibus & cellulis ethmoideis defluit, stagnat interim in sphænoideis & maxillaribus, donec redundet & ostia sinuum transcendat, capite vero in anteriora declivi ex sinibus sphænoideis prona muco via est, capite in alterutrum latus inclinato ex alterutro sinu maxillari facillimus conceditur exitus. Accumulatur interim semper in aliis e quibus exitus difficilior; ita fit, ut numquam non præsto sit mucus, quo olfactoria membrana servetur humida & sua nervis maneat sensilitas. Mucum hunc fabrica glandulosa, in sinibus vero arteriosa solum fabrica secerni, alibi dixi. Superest nunc, ut arteriæ narium breviter recenseantur, præsertim cum illarum cognitio ad phænomena quædam morborum intelligenda requiratur. Pleræque narium arteriæ propagines sunt maxillaris internæ, aliæ ex ipso hujus trunco, aliæ ex ramis enatæ, ab infraorbitali, dentali, palatina. Sed præter has, quæ omnes ad systema carotidis externæ pertinent, etiam ab internæ carotidis ramulis aliqui furculi in nares descendunt. Talis arteriola a carotide interna, utrimque una, exigua, in cranio prodit, quæ in sinum

sphænoideum penetrat. Sed præcipue memorabilis, itidem rami carotidis internæ ramulus, *arteria ethmoidea* est, quæ ex ophthalmica nascitur, dum ad interiorem orbitæ parietem applicatur. Ea arteriola bifurcata alio ramo in dura matre manet, alio vero ramo per foramina cribrosi ossis in nares descendit & ad septum, cellulasque ethmoideas & sinus frontales, & os spongiosum medium furculos edit. Hæc est illa arteriola, per quam salutare illæ narium hæmorrhagiæ in morbis præsertim capitis internis contingere videntur, per quas immediata ab encephalo sanguinis revulsio fit & plus quam pluribus venæ sectionibus, morbus emendatur. Sunt illæ hæmorrhagiæ criticæ dictæ, quia morbum auferunt. Intelligimus inde simul, cur antequam tales hæmorrhagiæ oriantur, præter alia phænomena etiam oculorum functiones turbentur & ægri colores varios & scintillas, aut spectra ante oculos sibi obversari putent, quæ omnia cessant, postquam largo rivo sanguis e naribus proruperit. Nempe arteriola hæc ramus est, ut dixi arteriæ ophthalmicæ; dum nunc sanguis majori copia & impetu ophthalmicam arteriam subit, fibrillæ nervi optici hoc impetu micantium oculi arteriolarum vividius afficiuntur; hinc perversa in oculis sensatio; dum autem eodem impetu dilatata arteriola ethmoidea sanguinem per nares profunderé incipit, exoneratur simul eadem via arteria ophthalmica, imo & ceteri carotidis internæ rami; hinc depletis vasis cerebralibus omnia illa terrificæ symptomata cessant. In genere quidem omnes narium arteriolæ ob laxitatem membranæ pituitariæ facile dilatantur, & sanguinem fundunt sine ruptura; sed in morbis non perinde est, an ex internæ carotidis, an vero ex externæ ramulis ejusmodi hæmorrhagia fiat; hinc neque omnes hæmorrhagiæ criticæ sunt. Nam cerebro affecto parum juvat sanguinem ex ramis maxillaris arteriæ nasalibus

salibus effundi, juvat vero plurimum, si ex ethmoideæ arteriolæ furculis profluxerit, cum sic immediate ex vasis cerebralibus sanguis subducatur.

Venæ narium majores ad venam temporalem & ramum profundum venæ jugularis, aliæ minores in sinus duræ matris se exonerant; venæ ethmoideæ arterioliis suis sociæ ad ophthalmicam venam redeunt.

§. C C C C X C V I I I.

Dum nares vel acrimonia, vel mechanico quodam stimulo irritantur, oritur sternutatio, verus automaticus motus, quo natura stimulum eum laceffentem propellere conatur. Fit nempe profunda & lenta inspiratio, quâ multum aërem haurimus, inde aliquod intervallum sequitur, quo meditabundi quasi haustum aërem retinemus, mox dein convulsis abdominalibus musculis, repulso intra pectus diaphragmate, aërem haustum subito, magnoque impetu & cum sono explodimus per os naresque. Ita id ipsum, quod nares irritaverat, flumine aëreo abreptum excutitur & si non excutiatur, denuo redit sternutatio, tamdiu perseverans, donec stimulum hunc propulerit. Convulsivus hic motus est, a mente non dependens & validissimus, quo totum corpus concutitur. Non solum autem peregrina corpora in nares suscepta sternutationem movent, sed etiam ipse naribus inquilinus mucus, sive mora, aut ex alio vitio acrior factus fuerit, sive in lemmas ficcas concreverit, quæ stimulo mechanico nervos laceffunt, ut plumula naribus immissa titillationem excitat, quam sternutatio subsequitur. Quæstio jam est, a quibus nervis oriatur sternutatio, cum nares præter primum par olfactorium, etiam ramos frequentes a quinto pari habeant. BOERHAAVIUS a quinto pare sternutationem, a primo olfactum repetit, eo pexus fundamento,

quod par quintum, ramum ad nares mittat, ex *adunatione cum nervo sexti paris* factum, sextum vero par intercostalis magni radicem edat, qui & cum pari vago communicat. Hinc credit, irritatis in naribus nervis quinti paris, irritationem eam ad sextum par nervorum & ad intercostalem magnum ac par vagum propagari, inde organa respirationis, quibus hi nervi prospiciunt, convelli & in sternutationem cieri. Hæc theoria valde arbitraria est & fundamentum ipsum falsum. Nam ramum quinti paris aliquem naribus prospicientem *ex adunatione cum nervo sexti paris* factum esse, anatome refellit. Ramulum diximus secundi rami quinti paris, qui in cranium redit & ad sexti paris furculum accedens, intercostalem magnum generat, hinc aliqua quidem communicatio inter quintum & sextum par atque intercostalem nervum intercedit, sed ea communicatio non est cum ramis quinti paris nasalibus. Deinde vero ponatur esse inter hos nervos immediatam communicationem, qualis tamen non est, non ideo rami primi paris seu olfactorii sternutationem producendi potentia carerent. Nam & primum par nervorum cum ramis quinti paris nasalibus communicat, in sinibus frontalibus teste Cel. WINSLOWIO. Posset ergo & affecto solum primo pari irritatio perinde ad nervos quinti paris & ad intercostalem ac par vagum propagari. Et reapse etiam a fortioribus odoratis sternutatio perinde oritur, ut a mechanica irritatione; adeoque a nervo olfactorio primi paris perinde ut a quinti paris ramis nasalibus sternutatio repeti posset, quod BOERHAAVIUS non perspexit. Sed insuper hoc addere debeo, omne id, quod de communicatione nervorum dicitur vanum esse; nervi enim, non ut arteriæ sibi inosculantur, sed etiam ubi ad se mutuo accedunt, ut conjungi videantur, tamen fibrillas cujusque nervi simplices distinctas, separatas manere ab origine sua

ad finem usque, alibi declaratum est. Iterum ergo cadit BOERHAAVII fundamentum, nec communicatio quinti paris cum sexto & intercostali magno, quidquam favet explicandæ sternutationi, sed omnino dicendum est, irritationem in aliquo nervo factam propagari ad sensorium commune & inde demum alios nervos affici. In gangliis nervorum forte aliqua vera communicatio adesse posset; sed nulla sunt in naribus nervorum ganglia. Denique exemplo demonstrabo evidente citra omnem nervi A & B communicationem tamen affecto nervo A etiam nervum B affici. Nulla est communicatio inter nervos ciliares & inter nervum opticum, nullum cum pupilla oculi nervo optico commercium est, & tamen luce vividiore affecto nervo optico afficiuntur nervi ciliares & contrahitur pupilla; nervo optico parum affecto in debili luce aut in tenebris parum etiam afficiuntur nervi ciliares & pupilla ampla dilatata manet. Nunc dico, prout pupilla convellitur luce vividiore affecto optico nervo, cum quo nullum habet commercium, nisi id forte in intima cerebri structura lateat; ita etiam irritationis nervis nasalibus tum primi paris, tum quinti, convelli possunt organa respirationis & in sternutationem cieri, si etiam nullum omnino inter organa respirationis & nasales nervos commercium esset. Sic enim facti sumus, ut ad certas in sensorio communi factas impressiones, certæ in remotissimis & distinctissimis corporis partibus mutationes sequantur, quarum ratio in intimis latet, nulli mortalium eruenda, in instituto sapientissimi Creatoris fundata.

Nunc his expositis videamus, num solum primum par nervorum olfaciat, num vero præter BOERHAAVII opinionem etiam quinti paris nasales rami, quos ille ad sternutationem unice facere putavit, olfactui inserviant. Præter jam dictum primum par nervorum cavitas narium plu-

res & insignes ramulos accipit a quinti paris primo ramo ophthalmico & a secundi rami paris ejusdem ramo pterygoideo, palatino, atque infraorbitali. Et ophthalmicus quidem furculos in nares ex orbita emittit, qui ad anteriora septi descendunt & ad os spongiosum superius alios, aliosque ad sinum frontalem. Pterygoideus plures ramulos ad meatum narium supremum, os spongiosum superius, septi partem posteriorem & posteriores cellulas ethmoideas; infraorbitalis ad sinum maxillarem, *palatinus* ad medium narium meatum & os spongiosum inferius, ac superioris posticam partem, furculos distribuit. Nunc non videtur a sensu olfactus excludi posse, quidquid nervorum a quinto pari in nares venit. Nam & ad sinum frontalem & ad septum narium & ad ossa spongiosa & ad sinus maxillares, & sphænoideas ethmoideasque cellulas, ramuli quinti paris sparguntur, dum primi paris ramuli in septo narium potissimum finiuntur. Et perinde molles sunt ramuli hi quinti paris, ac illi a primo pari emissi. Nec certe alium in usum latissima membranae *Schneiderianæ* superficies tot accessoriis a quinto pari ramulis indiguisset, si primum par nervorum solum ad olfactum sufficeret. Et in lingua idem quintum par certo gustui famulatur; cur in naribus non perinde ad olfactum concurreret? Nulla certe ratio contrarium suadet. Olfaciunt ergo & primi paris & quinti nervi, quicumque in superficiem membranae *Schneiderianæ* expanduntur & simul hi atque illi perinde sternutationem cient, sicubi validius irritantur. Alia vero quaestio est, an olfactus organum per omnem membranae pituitariae superficiem distributum sit? an etiam in sinibus frontalibus, sphænoideis, maxillaribus hæreat? An solummodo in spongiosis ossibus & cellulis ethmoideis & septo narium? Officula certe spongiosa in animalibus constanter deprehenduntur, adsunt in avibus,

piscibus, quadrupedibus & eo majora quo animal sagacius. Sinus frontales in fœtu inque recens nato infante defunt, sinus maxillares in ea ætate vix coepti, multo tempore post in eam amplitudinem dilatantur. Et tamen infantes olfactu pollent exquisitissimo. Has ob rationes physiologi nonnulli sinus maxillares & frontales & sphænoideos ab olfactus organo excluderunt, solumque pro muci habuerunt receptaculis. Addam aliam rationem HAMBERGERI magis convincentem. Nempe vehiculum corpusculorum odoratorum aër est, quam naribus attrahimus, quique corpuscula hæc iis membranæ pituitariæ partibus applicat, quas alluit. Nunc vero aër, quem inspirando per nares adducimus, nec in sinus frontales, nec in maxillares, nec in sphænoideos adducitur, sed per infimum mediumque narium meatum in fauces, indeque in asperam venit arteriam, adeoque sinus illos præterlabitur, ut hinc ad olfactum nil videantur conferre. Sed ex his argumentis nequaquam id sequitur, quod sequi putant Clarissimi Viri. Concedo septum narium & spongiosa officula directe ab aëre per nares inspirato allui; concedo etiam præcipuum olfactus organum & sensum exquisitissimum hic latere & ideo has partes latissime per omnia animantia regnare & concedo, quia sinus dicti ab aëre directe non alluuntur, sensum olfactus in his minus exquisitum esse; at nullum prorsus esse, non est cur admittam. Defunt in fœtu sinus & in recens nato infante. Sed etiam in fœtu deest meatus auditorius osseus externus, cujus loco annulus solummodo adest. Nihilne ad auditum confert meatus auditorius in homine perfecto, quia in fœtu deest? Nemo nostrum ita ratiocinabitur. Imo aliud potius hic subest. Videmus enim, cum nervi eo sensiliores sint, quo homo origini suæ propior est, studiose naturam nimiam futuram sensilitatem diminuisse imperfectione orga-

norum sensoriorum. Ita in auditus organo externo fecit, cui osseus canalis externus paulatim accrescit; & insuper tympani membranam peculiari mucoso tegumento cinxit, quod aëris sonori actionem pro magna parte suffocat & auditum alias nimis vividum futurum minuit, quodque sensim contabescendo evanescit, dum paulatim sonis affuescit natus puer. Ita pupillam simili mucosa membrana cinxit, nimiam lucis insuetæ actionem moderatura. Ita & organum olfactus minus esse voluit in recens nato, ex eadem plane ratione. Quod denique aër per nares adductus in sinus non penetret, id quidem speciosius, quam verius, dicitur. Dum enim per nares inspiramus, primum eum ipsum aërem, qui in naribus hospitatur in laryngem adducimus, antequam externus in nares subire possit. Dum vero eum, qui in naribus hospitatur aërem primo adducimus, etiam aër, qui in sinibus hospitabatur, diminuta resistantia, ex sinibus exit, inque ejus locum penetrat externus aër per foramina narium anteriora illapsus. Penetrat ergo etiam in sinus narium aër externus & corpuscula odorata secum invehit; cumque eadem membrana pituitaria per omnes hos sinus distribuatur & iisdem nervis prædita, quibus est in septo narium & officulis spongiosis, etiam in sinibus olfactum aliquem haberi probabile est, adeoque per ea antra non solum muci officinam, sed & olfactus territorium augeri. Tum præterea, etiamsi aër directe in sinus non impellatur, ipsa tamen corpuscula odorata, quo sunt copiosius aggesta & quo fugaciora, sua sponte ut quaquaversum diffugiunt, ita nihil est, quod aditum illis in sinus narium prohibere posset. Distinctiorem tamen & magis exquisitum olfactus sensum in septo narium & in spongiosis officulis habitare, cum hæc & directe ab aëre alluantur & in angustias adactam atmosphæram olentem recipiant, id quidem & ipse statuo. Sed & in aliis

organis sensoriis pars aliqua organi præ aliis exquisitius sentit. Tactus in digitis exquisitior, licet per omnem cutim regnet. Gustus in dorso linguæ habitat, exquisitissimus tamen in apice. Et in ipsa retina oculi alia puncta sunt aliis sensibilia.

§. CCCCXCIX.

Quid proprie sit objectum olfactus, seu quid proprie sit odoratum illud, quod corporibus inhæret & ex illis exhalat, dictu difficile est, siquidem summa & incredibilis horum corpusculorum tenuitas est, nec alio sensu, quam olfactu capi aut dijudicari possunt. Id certum est, non omnia corpora perinde odora esse; sed alia aliis odorem spirare fortiolem, alia nostras nares omnino non adficere; neque ea tamen penitus inodora esse, cum a sagacioribus animalibus percipiuntur, cumque ea, quæ jam inodora putamus, paucis circumstantiis mutatis odora fiant; ita vitrum frictione odorem spirat & corpora omnia per se electrica & ipsa denique metalla communicatione electrica facta halitum spargunt odoratum. Latissime ergo patet odorum imperium, perque omnia naturæ regna se extendit & dubium est, num ullum in rerum natura corpus absolute inodorum sit, quod nihil exhalat, licet multa sint, quæ nostrum olfactus organum non afficiunt. Nunc autem, cum de homine imprimis sermo sit, ea nobis unice corpora odora videntur, quæ spiritu, aut oleo aut sale, aut hisce unitis gaudent, eaque adeo oportet esse fugacia, ut sponte sua de corporibus, quibus adhærent, in aërem ambientem exhalent & mediante hoc vehiculo naribus nostris inferantur. Quæ oleo, spiritu, sale carent volatili, ea nobis inodora sunt. Hinc aqua pura nobis inodora, hinc inodora pura & elementaris terra, sed in hac, alia etiam ratio in fixitate est; & ipsi sales medii & alcalini fixi ob eandem rationem inodori sunt. An porro corpuscula illa odorata quid distinctum sint

ab oleo & fale volatili? an id ipsum quod odorum de corporibus exhalat, salinum sit tennerrimum elementum? an potius phlogiston subtilissimum? definiri non potest. Id certum est, etiam in odoratissimis corporibus, id, quod proprie odoratum est, minima quantitate inesse, licet exhalatione sua spatia in aëre ingentia repleat, ex quo simul incredibilis illorum corpusculorum subtilitas & divisio omnes imaginationis humanæ vires transcendens elucescit. Pone aquam stillatitiam cinnamomi odoratissimam, eamque in libero aëre relinque, ut exhalet spiritus rector, qui vastum conclave per multos dies late fuso replebit odore; ubi omnis exhalavit spiritus, aquam inodoram effœtam deprehendes. Est ergo quid distinctum ab aqua odoratus ille spiritus, cui aqua solum vehiculum præbuit. Oleis athereis volatilibus similis spiritus inest, qui ubi omnis exhalavit, relinquit oleum, vix ad sensum pondere diminutum, inamœnum, spissum, omni fragrantia orbum, qua prius adeo excellebat. Est ergo pariter quid ab oleo distinctum spiritus rector; oleumque solum ejus vehiculum est & firmitus quidem vinculum, quam aqua; hinc aromata aquosa cito effœta fiunt, oleosa diutissime spiritum suum rectorem conservant. Salia volatilia aqua soluta, libero in aëre exhalant & aufugiunt & aquam relinquunt inspidam & inodoram. Camphoræ pauca grana totum conclave odore suo replent & in camphora quidem sensibile decrementum advertitur, adeo ut etiam tota sua substantia tandem in auras diffleat; sed camphora multo penetrantior, moschus & asa foetida longe lateque aërem inficiunt, sine sensibili diminutione ponderis; longo demum tempore exiguum quid asæ foetidæ decessisse observavit BOYLEUS. Hæc quidem omnia subtilitatem ingentem illius odorati principii demonstrant, naturam autem ejus non illustrent.

Et tamen in tanta subtilitate & divisibilitate incredibili neque simplex esse videtur, cum in omni corpore odorato alius atque alius spiritus rector habitet, quem dissimilibus principiis & horum diversa quoque proportionem componi, necessario consequitur; neque tenuissimum esse videtur hoc odoratum principium, cum saltem vitris hermetice clausis conservetur, neque per poros vitri penetret, quos materia lucis & ignis tranat facile. Plerique phlogiston, seu inflammabile principium corporum simul principium odorum esse existimant, eademque mea opinio est, sic tamen accipienda, ut, quemadmodum sal primum sapidum est, quemadmodum cetera principia etsi insipida varie cum sale combinata diversos & innumeros sapores producant, ita phlogiston, primum odorum, cum salibus vicissim ceterisque principiis diversa proportionem consociatum, diversos innumerosque odores producat. Salia enim ipsa volatilia non viderentur odoratura futura, si omni phlogisto libera essent; huic principio & volatilitatem suam & odorem debent; certe eo magis odorata sunt, quo pluri phlogisto abundant; magis foetet & penetrantior spiritus cornu cervi spiritu salis ammoniaci est. Ad hæc phlogiston omnibus fere corporibus inest, aliis laxius adhærens, aliis fixius. Illa per se odorata sunt; hæc odorata fiunt, ut primum phlogiston in motum deducitur. Hinc inodora metalla igne fusa odorem spargunt, quem non ab oleo possis repetere, non a sale, sed a solo phlogisto, quod igne in motum ducitur & exhalat. Hinc & vitrum frictione odorum fit & alia corpora electrica, aut electrificata, quia his modis, quod illis corporibus inhæret phlogiston, in motum agitur. Nihil obstat sales acidos, spiritus minerales, odores esse; numquam omni phlogisto carent, quod vel color indicat.

§. D.

Experimentum a LOWERO factum est. Ratio phaenomeni facile patet. Rescissa enim aspera arteria aër jam non per os & nares pulmonem ingreditur, sed diducto thorace statim via brevissima per ipsum asperæ arteriæ vulnus in bronchia descendit, iterumque ex his per idem expellitur. Aër autem vehiculum est odorum; hinc cum rescissa aspera arteria aër cesset nares subire, nec ulla alia potentia sit, quæ illum in nares alliciat, etiam eo in casu corpuscula odorata nulla membranæ olfactoriæ applicantur, adeoque non est ratio, cur odorem percipiat animal. Accedit vero & alia ratio, cur animal nulla signa edat percepti odoris; nempe quia vividior sensatio constanter minus vividam delet. Utcumque autem odoratum sit corpus, quod naribus animalis præposueris, multo tamen vividius animal, a dolore nunc præsentē afficietur, quam afficeretur ab odorato halitu, si is etiam nares subiret.

§. D I. — §. D I I I.

De his omnibus propria experientia convincimur. Dum per loca foetida transimus, spiritum cohibemus, aut etiam de naribus aërem proflamus; quamdiu hoc continuare possumus, nullum percipimus odorem etiam a rebus foetidissimis & graveolentibus. Eadem ratio est, quare nares occludant & comprimant homines, dum nauseosi odoris medicamenta assumunt. Nempe omnibus hisce modis impeditur aëris & odoris in aëre hærentis, ad membranam narium olfactoriam allapsus; maxime vero dum spiritum patulis naribus proflamus, quo externum aërem & una odorata effluvia propellimus atque a nobis elongamus. Polypi narium, excrescentiæ fungosæ, degeneres membranæ pituitariæ, dum nares ita occludunt, ut aëris per eas viam intercipient,

etiam olfactum tollunt, qualem casum habet Cel. LEURETUS. Nempe omnino ad olfactum requiritur, ut aër per nares adducatur & corpuscula odorata olfactus organo applicet, neque enim in distans agunt nervi.

§. D I V.

Hoc & in animalibus sagacioribus, præcipue in canibus, observamus, qui, dum quid exactius olfacere volunt, aërem frequentissime & celerrime per nares attrahunt; & hoc idem nos ipsi facimus. Hoc modo intra datum tempus plus aëris in nares adducimus, novaque corpuscula odorata attrahimus, priusquam mox ante recepta diffugerint. Simul aucta celeritate aëris in nares adducti effluvia illa odorata etiam vi quadam majore in nervos olfactorios impelluntur. Utroque hoc modo impressio in nervis vividior nascitur.

§. D V.

Motu & tritu multa corpora alias inodora odorem spargunt, odora vero halitum spirant fortio-rem. Lignum fagineum sub ferro tornatoris gratum odorem spargere BOYLEUS notavit. Silex percussus olet, olet vitrum frictione attritum. Succinum si teratur, halitum gratio-rem spirat & sic porro. Nempe cum suapte natura mobilissimum sit odorum principium, accedente motu extrinseco & tritu magis exagitur, & in fugam conjicitur.

Miscela diversorum &c. Mira sunt phænomena odorum, quæ ex diversorum corporum miscela oriuntur; mire sæpe augetur fragrantia hujus illiusve corporis, addito alio. Ambra gryseæ odor suavissimus mire exaltatur, addito exiguo Moschi vel Zibethi. Curiosum est phænomenon, quod Cel. LEMERY obtigit. Emit ille in officina Galbani, sagapeni, bituminis judaici ana libram ss,

atque opopanacis uncias quatuor. Has merces commistas in eodem sacco domum reportavit, quo cum pervenisset, omnibus domesticis visus est vehementem moschi odorem totus spirare. Cum vero sciret, se moschum non emisisse, separavit omnes has distinctas merces, ut videret, an non forte frustulum moschi per incuriam admistum accepisset. Nihil autem moschi invenit & cum omnia hæc separaret, singulum sibi proprium odorem spirare observavit, jamque omnis moschi odor evanuit. Ut primum iterum separata mutuo confudit, periit odor proprius singulorum & odor moschi denuo exsurgebat. Ita quatuor a moscho & natura & odore distincta corpore mista producebant odorem moscho alias proprium. Innumera exempla adferri possent miræ odorum varietatis a diversorum corporum miscela. Sal ammoniacus inodorus est nobis, inodorus sal fixus tartari, inodora aqua; interim si salem ammoniacum cum sale tartari miscueris & addito tantillo aquæ massam hanc madefeceris, mox de inodoris hisce corporibus halitus exsurget urinosus, acer, alcalinus, volatilis, oculos naresque acriter vellicans. Iterum si miscueris salem ammoniacum cum calce viva, similis halitus & multo penetrantior priori & acrior exsurget. Sulphur vix levissime odoratum si misceas cum sale tartari inodoro & leni igne in unam massam conjungas, habebis hepar sulphuris chemicis dictum, quod instar stercoreis foetet & magis ille foetor augebitur, si affuso acido, debilissimo licet, sulphur denuo ex vehiculo alcalino præcipitaveris. Nitrum inodorum est, inodorum vitriolum, si hæc ambo mixta destillaveris, aquam fortem obtinebis, foetido odore gravidam. Contra si foetidum hunc nitri spiritum cum alcohole miscueris, odorem produces amoenissimum, fragrantissimum. Ex oleo vitrioli purissimo & phlogistico quocumque corpore mox produces spiritum acrem suffocantem sulphureum;

ex eodem acido vitriolico & alcohole mixtis, lenissimo igne digestis & caute destillatis, amoenissimum & suavissimum liquorem æthereum & fragrantissimum oleum vitrioli dulce conficies. Finem non invenirem, si omnem vellem persequi odorum varietatem, quæ miscela diversorum corporum in experimentis chemicis observatur. Hæc pauca exempli loco sufficiant.

Calore. Calore augetur exhalatio corporum, vel producitur exhalatio, quæ prius non adfuerat. Hinc calore non solum odores rerum odoratarum augentur, sed & inodora alia corpora odorem fundunt. Spiritus vini hyemali tempore levem odorem spargit, æstivo gratissimum halitum diffundit. Sulphur igne agitatum odore suo statim se prodit & accensum halitu intolerabili nares & laryngem vellicat. Thus, myrrha, mastix, ambra &c. in ignem projecta multo fortius fragrant. Cadavera animalium aut hominum æstivo tempore multo intensius fœtent. Ipsa denique metalla inodora, igne fusa & exhalant manifeste & odorem spargunt vehementem, auro solum & argento exceptis.

§. D V I.

Aër ergo odoratis effluviis gravidus inspirando per nares adductus, applicat corpuscula hæc molli & mucosæ madidæ membranæ narium, cui dum inhærent, ipsamque subeunt, nervi mollissimi per eam membranam distributi certa mutatione in superficie afficiuntur, quæ qualis sit, dicere non licet, aliam tamen atque aliam esse, pro diversitate odorum, rationi consentaneum est. Ea mutatio porro ad sensorium commune propagari debet, ibique animæ repræsentari; atque tum nascitur idea odoris, acidi, alcalini, aromatici, putrefacti & aliorum, pro diversa constitutione organi, pro diversa indole effluviorum, pro di-

versa eorumdem in organum olfactus actione. Ipsa quidem effluvia odorata fugacitate sua incoëribili videntur per totum membranæ pituitariæ territorium diffundi; inque sinus omnes & antranarium penetrare; sed maxima tamen illorum actio videtur esse in parte narium angustissima & quæ directe ab aëre alluitur; hinc præcipuam sedem olfactus exquisitioris in septo narium & officulis spongiosis latere probabile est.

§. D V I I.

I. *Quam magna affinitas inter odora & sapida.* Multa admodum corpora sunt sapida simulque odora, ut aromata omnia & alia, quæ linguæ applicata saporem, naribus odorem imprimunt. Idem præterea spiritus rector & gustus & olfactus objectum est; nam etsi quidem id absolute dicere non possimus, purum & ab omni alio principio liberum spiritum rectorem, si talis haberi posset, etiam sapidum futurum, id tamen certum est, eum ipsum aliis principiis mixtum ad saporem multum conferre, eoque ablato aromata aut penitus insipida, aut minus sapida, aut minus grate sapida relinqui. In catarrho, coryza; ubi obstructa narium membrana olfactus immittitur aut aboletur, etiam gustus manifeste minuitur. Addi etiam potest similitudo membranæ narium & oris, etsi ea similitudo non penitus quadrat. Est ergo utique aliqua affinitas inter odora & sapida, sed est tamen manifestissima in utroque elemento diversitas. Dantur corpora valde odorata & vix sapida, cujusmodi sunt vegetabilia pleraque, quorum spiritus rector aquæ inhæret, violæ, rosæ, lilia &c. Et contra dantur corpora sapida & vehementer sapida vel paucodode prædita, vel nullo. Ita sales omnes medii, sal communis, nitrum, tartarus vitriolatus, sal ammoniacus, vehementer sapidi, odore carent.

Ita vehementer sapida sunt amara omnia, pleraque tamen horum parum odora. Iterum in eodem corpore nonnumquam gratus odor cum ingrato sapore conjungitur & vicissim. Oleum Cajeput, quod ex semine Cardamomi medii in Indiis paratur, odorem spirat gratissimum, displicet sapore; casei vetusti sapor placet, odor ingratus est, nisi quis putrida olfacere amet ex consuetudine, aut idiosyncrasia. Ita etiam carnes ferinæ semiputridæ sapore sunt gratissimo, ingrato odore. Denique sapidum elementum fixis plerumque principiis inhærescit, odorum contra volatilibus; & odorum quidem cum aliis principiis conjunctum semper sapidum fieri potest, sapidum vero vicissim non potest in odorum transire, nisi adeo attenuetur & volatile fiat, ut in aërem sponte exhalet. Tum porro sapidi vehiculum saliva est, vel alius humor, odori vehiculum aër est. De diversitate fabricæ organorum gustus & olfactus nihil dicam, ut quæ ex jam dictis patet.

2. *Quare odores uno sæpe momento vitam reddant?* Phænomena hæc vulgo nota sunt. Cadit homo in animi deliquium; applicato naribus aceto vini fragrante, aut spiritu cornu cervi, aut alio odoramento forti penetrabili, redit ad se & sensuum mentisque usum recuperat. Hoc mulieres quoque usu doctæ sine medicis norint facere. Ita solent etiam apoplecticos odoramentis acerbis perfricare, nares circum & tempora, non utili semper consilio. Facit organi olfactorii sensibilitas & nervorum mollities, tenuissima epidermide munitorum & propinquitas denique cerebri, ut applicatis ejusmodi vehementer odoratis corporibus fortis impressio fiat in sensorio communi & fortior quam per alias vias communicari possit, hinc etiam odoramentis facile revocantur in animi deliquium lapsi, nisi id a valde gravi & permanente causa ortum fuerit.

3. *Qua causa aliquando morbos & mortem & omne fere genus operationis medicamentariae & venenatae exercent.* Miri sunt effectus effluviorum in corpus humanum & inter hos etiam non pauci noxii ac venenati. Musti fermentantis halitus uno quasi ictu fortissimum hominem prostermit apoplecticum. Ex arsenici vapore naribus attracto TACHENIUS in summum vitae periculum incidit, dirissimis malis diu misere conflictatus, donec longo demum tempore, optimis medicamentis usus, ægre evasisset. Alius etiam momentanee mortuus concidit, cum arsenici vaporem naribus hausisset. Croci & opii halitus naribus attractus vertiginem, stuporem, oblivionem, somnum & gradatim apoplexiam inducit; bajuli supra sarcinas croci obdormientes somnum dormiverunt aeternum. Ex foetore putridi bovis & ex foetore cadaverum, mors subita in homine observata est. Ex foetore faccis dysentericae mox in eundem morbum incidit medicus teste Illustri VAN SWIETEN. Historiae exstant apud BECHLINUM & alios, hominum, qui ex solo odore purgantium medicamentorum egregie purgati sunt, aliorum, qui ex odore medicamenti nauseoso vomuerunt. Omitto plurima id genus exempla, quorum non pauca ad Idiosyncrasiam pertinent. Nunc causae horum effectuum latent in peculiari effluviorum odoratorum indole; non enim aliam possum dare rationem, cur hæc effluvia salubria, illa venenata sint. Dicam genuinam rationem ut primum mihi dixeris intimam horum effluviorum naturam, intimam cerebri & nervorum fabricam & horum cum aliis consensum. Dum hæc ignoro, nulla spes affulget, quod umquam exactam ejusmodi phaenomenorum rationem redditurus sim. Id equidem capio, venenata arsenici effluvia naribus suscepta, nervis olfactoriis perinde inimica esse, ut sunt nervis ventriculi & intestinorum, cumque nervis ventriculi & intestinorum ab arseni-

eo arrosis dirissima symptomata mox oriantur & mors ipsa plerumque subsequatur, facile concipio, ea omnia perinde fieri posse affectis nervis olfactoriis & etiam expeditius fieri, quia & ipsum olfactus organum sensilius est & cerebro vicinius & arsenicum eo profundius penetrare potest, quod in halitum attenuatum naribus suscipiatur. Atque hoc, quod de arsenico, etiam de aliis venenis concipio. Iterum concipio, posse hominem solo odore purgantis medicamenti purgari; scio enim odorem eum ingratum olfactoriis nervis communicatum deferri ad sensorium commune; & jam concipio, posse similem mutationem communicari nervis ventriculi & intestinorum, a sensorio communi propagatam, qualis alias ipsis his nervis ab odorato purgantis medicamenti principio inducitur; adeoque ex olfactu medicamenti purgantis alvum posse sollicitari in subiecto sensiliore, mihi persuadeo; atque ita utcumque in intellectum causæ latentis assurgere possum scalis hypotheticis; non ideo tamen intelligo, cur hoc corpus, ejusque effluvia, hunc effectum, alterius alium, sed perinde certum, producant.

4. *Quam ob rem in diversis hominibus odor idem ejusdem odorati adeo oppositos effectus edat?* Certa iterum sunt phænomena, causæ in puteo democriti latent. Fæminæ hystericæ non ferunt gratos odores rosarum, violarum, moschi, ambrae, pessime inde habent & in convulsiones aguntur; ferunt autem optime foetida, castoreum, asam foetidam, sagapœnum, odorem plumarum incensarum, odores urinosos salium alcalinorum volatiliū. Ab his levamen capiunt, quæ aliis maxime displicent. Si porro idiosyncrasias referre vellem, innumeræ sunt historiae. Alii vini odorem non ferunt, alii casei; alii a fele, etiam non visa, sed olfactu tantum percepta, in animi deliquium

labuntur &c. Ut ejusmodi effectus explicaret, hominem in internum & externum divisit SYDENHAMUS; hominem internum dicebat id omne, quod in homine nerveum est & ab encephalo procedit; externum, quod a cordis & vasorum systemate pendet. Sed ejusmodi conceptus nihil explicant. In hystericis certe maxime patitur systema nerveum, seu homo internus SYDENHAMI. Sed cur maxime patitur ille homo internus præ alio homine interno? vides facile, nihil juvare eam distinctionem, cum post illam eadem redeat difficultas, quæ fuit ante. Hoc unicum dicere possumus & ratione evincere, quæcumque fuerit causa ejusmodi effectuum, eam in nervis illius individui hominis latere, qui præ millenis aliis ita afficitur; in objecto enim ipso causa individui talis phaenomeni latere non potest, cum idem objectum centum & mille alios homines non sic afficiat. Sed qualis sit peculiaris illa in nervis illius hominis individui conditio, nobis rescire datum non est.

5. *Quomodo animalia, quibus rostra, nares, longissima, officula spongiosa maxima, acutiorem odoratum nanciscantur.* Ratio dudum ante dicta est. Canes venatici nares habent longas, vastissimas, officula spongiosa plurima, multis vicibus convoluta, turbinata, nervos olfactorios grandes. Hinc tanta horum canum sagacitas est. Omnia autem fere animantia sagacitate olfactus superat elephas; sed huic organum olfactus vastissimum, per totam illam ingentem proboscidem, quæ simul manuum officium huic animanti præstat, distributum est. Vidit ipse BOERHAAVIUS elephantem, nummum æneum inter mille alios confusum, ex solis effluviis, quæ magister in nummo leviter contacto, reliquerat, selegisse, heroque suo reddidisse.

6. *Qui corpuscula exilissima exhalantia, mole, unde expirant, vix imminuta, tam diuturnum &*

validum odorem largiri queant. Certum est, corpuscula odorata ultra imaginationis humanæ vim exilia esse. Ea stupenda particularum exilitas facit, ut corpora odorata longissimo tempore exhalare possint, quin notabile in iis decrementum ponderis inveniatur. Nam certe totum etiam illud, quod corporibus inest odorum, vix videtur ad pondus redigi posse. Cista, in qua moschus aliquamdiu detentus est, adeo pertinaciter odorem moschi retinet, ut nulla arte, nulla lotionē, deleri possit; atque hic odor etiam per triginta annos corporibus inhæret. BOYLEUS examinare voluit, quantum asa foetida deperderet de sua substantia per effluvia odorata. Longo tempore demum exiguum & vix notabile ponderis decrementum in exactissima bilance deprehendit. Verum adhuc superest dubium, utrum scilicet ipsum illud ponderis decrementum adscribendum effluviis odoratis, an potius humiditati aquæ, quæ una cum hisce effluviis exhalavit? Ita videmus etiam picem aliquamdiu in aëre detentam sensim minui, dum scilicet aquea humiditas, intra reliqua principia latens, ab aëre sicco calidoque dispergitur. Jam vero si tanta est subtilitas, tanta tenuitas odorati principii, poterit minima & insensibilis pondere quantitas exhalatione sua non solum per spatia ingentia diffundi, sed & diffundi multo tempore, sine perceptibili, aut certe sine valde notabili ponderis massæ diminutione, ex qua exhalant. Atque hæc ex principiis physicis intelliguntur.

7. *Quam ob rem foetor exhalans ex putrefactis partibus animalium & vegetabilium, semel impressus naribus tam pertinax?* Ratio hujus phænomeni videtur esse, quod particulæ illæ, de putridis animalium aut vegetabilium partibus exhalantes, multa olei per putredinem attenuati portione consent. Semper vero odoratum principium oleo irretitum fixius, hinc & nervis olfactoriis appli-

catum non adeo cito evanescit, sed inhæret diutius. Exemplum in hanc rem habes in vegetabilibus odoratis aquosis & dispar in oleosis. Si melissam citratam, quæ amœnissimi odoris est, sed parum oleosa planta, cum aliis conferas; si melissæ folium decerptum digitis aliquamdiu frices & atteras, post pauculum tempus amœnus ille odor dissipabitur; contra vero si sabinam, plantam admodum oleosam, similiter digitis frices, digiti longo satis tempore sabinam redolebunt. Diutius ergo corporibus inhæret odorum principium cum oleoso vehiculo consociatum. Fœtor sebi rancidi exusti non ob aliam rationem adeo diu, adeoque pertinaciter, naribus inhæret.

8. *Fortissima odorifera nonne sternutatoria?* Quidquid nervos olfactorios insueto modo afficit, irritat, vellicat, id sternutationem ciet. Hinc fortissima odorifera, quia nimis vivide nervos olfactorios afficiunt, sternutatoria sunt. Ita Marum verum, Majorana, Tabacum &c. sed & alia sternutatoria sunt, ex acrimonia potissimum, etsi non valde odorata, ut asarum, helleborus niger, euphorbium; alia denique, neque odora, neque acria, sternutatoria sunt irritatione sola mechanica; ut plumula in nares immissa & agitata. Alia quoque habentur, neque acria, neque odora, neque mechanica irritatione, sed vi specifica, qua organum olfactus præ omni alio afficiunt, sternutationem cientia, ut succus radicis betæ insulsus & vix odoratus. Sed ut alibi jam dixi, datur peculiaris in certis corporis humani partibus irritabilitas & dantur etiam stimuli peculiare, qui unam corporis nostri partem præ alia afficiunt.

9. *Quis usus humoris & muci in naribus assiduo generati?* Membranam Schneiderianam mollem, pulposam, sensilem conservat, nervos oblini,

odorata effluvia suscipit, retinetque parumper, contra acrium incursum nerveas fibrillas tuetur.

10. *Cur evigilanti hebes odoratus, post sternutationem acuitur?* Nocturno tempore partim ob somnum, in quo omnes secretiones minuuntur, partim ob situm corporis plerumque resupinum, mucus in sinibus narium & secernitur parcius & id, quod secernitur, aggeritur in sinibus & per moram spissescit. Hinc evigilantes plerumque siccas nares habemus & inde primo hebes odoratus. Acuitur vero post sternutationem, quia aër vi maxima ex pulmone per nares explosus abripit simul secum aggestum in sinibus mucum; sic & anteriores nares humectantur & concussu quoque illo, quo sternutatio peragitur, simul mucī recentis secretio promovetur; unde redit iterum sua membranæ pituitariæ sensibilitas.

11. *Estne ille humor repurgando cerebro utilis & quousque hoc verum?* Diximus non a cerebro defluere mucum, ut veteres crediderunt. Non ergo repurgando cerebro utilis est, nec is fuit scopus naturæ. Alio tamen sensu etiam repurgando cerebro utilis est, quatenus lentus ille humor per externæ carotidis ramos a sanguine separatur, atque ita ab internæ carotidis cerebralibus ramis avertitur, quos potius lentore suo obstrueret. Hoc in exemplo melius patebit. Sit homo valde pituitosus, vertigine, debilitate, sensuum hebetudine laborans, obliviosus, somnulentus, pronus in lethargum. Medicus rerum suarum peritus intelligit, omnia hæc symptomata oriri ex nimia copia pituitæ, quæ jam obstruere & infarcire incipit vascula minima cerebri, per quæ ob lentorem suum difficillime movetur. Prævidet hunc hominem lethargo moriturum, nisi ingens illa visceri mucī in sanguine copia subtrahatur & lentor humorum attenuetur. Ergo injiciet illi homini, clyf-

ma acre revellens, ut magnam statim mucī copiam ex glandulis intestinorum crassorum subducatur; præscribet eidem purgans acre ex salinis & amaris, mucum fundentibus medicamentis, ut ventriculi & tenuium intestinorum glandulas emungat. Quo plus mucī ægro subtraxerit, hoc magis ille levabitur. Liberantur enim sensim vascula encephali, dummodo ulterior pituitæ in cerebrum affluxus præcaveatur. Porro his factis idem medicus dabit ægro suo masticanda acria, quæ salivam & mucum ex ore subtrahunt, dabit porro sternutatoria, quibus secretio & excretio mucī in toto narium ambitu augetur. Hæc omnia faciet, non ut ab encephalo mucum ad nares, aut ad alvum revellat, quod legibus circulationis & structuræ corporis humani repugnare novit; sed, ut subducendo mucum ex omnibus aliis corporis partibus, ejus in encephalo ulteriorem collectionem impediat; eam enim pituitam, quæ jam in vasis encephali hæret, novit non posse regredi, non posse revelli, sed attenuari debere partim vasorum actione, partim diluentibus medicamentis, atque ita in venas transpirari, quo facto æger salvus erit, cum ob prægressas mucī evacuationes jam ulterior mucī accumulatio in encephalo timenda haud sit. Scitur ergo, quo sensu mucī excretio utilis dici possit repurgando cerebro.

12. *An mucus in initio crassus? an postea talis fit?* Nullus humor stagnans talis est, qualis in initio secernitur, hinc neque mucus. Ratio sæpius dicta est.

13. *Unde nasci interioris communicatio tam magna cum musculis respirationi servientibus?* Contrarium supra demonstratum est. Non solum non magna communicatio, sed nulla plane, inter nervos nasi interioris & intercostalem magnum ac par vagum obtinet. Communicat utique par quintum

cum vago & intercostali, sed ea communicatio non est per nervos nasales interiores quinti paris, ut BOERHAAVIUS credidit. Neque ea communicatione indigemus ad explicandam sternutationem, neque ea assumpta actionem hanc melius explicaremus, cum reipsa vera in nervis communicatio, qualis in arteriis est, nullibi sit, aut si sit alicubi, in solis forte gangliis locum habeat, qualia in nervis narium nulla sunt.

14. *Estne sternutatio convulsio?* Est omnino. Convulsionem enim dicimus violentam & involuntariam musculi contractionem. In sternutatione musculi respirationis & violentissime agunt & præter animæ imperium. *An hinc adeo delassans, sæpe dolores creans, aliquando lethalis?* Qui considerat, quanto impetu universum corpus in sternutatione concutitur, non mirabitur, cur diutius protracta adeo delasset & dolores cieat. Qui porro considerat, quod experimentis alibi adductis ostendi, in expiratione paulo validiore sanguinem a cordis dextri sinu per venas jugulares versus encephalon repelli, ille facile intelliget, etiam in sternutatione idem fieri & eo efficacius, quo hæc fortior, celeriorque est alia expiratione; metum ergo esse, ne repulsu sanguinis adeo forti vasculum aliquod in encephalo rumpatur & apoplexia sternutationi succedat; quod periculum maxime plethoricis imminet. Cæcitates ex diuturnis sternutationibus ortas observata medica testantur. Periculosa est etiam hæmoptoicis, phthificis, herniosis, gravidis. Hæc ratio est, cur inter moratiores homines usu receptum sit sternutantibus, ut saluti cedat, apprecari. Interim in sanis hominibus haud mali ominis est sternutatio, imo vero motum cerebri, humorum omnium excitat, auget, sensus acuit. *Cur mane a somno frequens?* & cui bono? Mane evigilantibus nares potissimum ficcæ sunt, mucusque non raro in lemas concre-

tus, quæ mechanica irritatione sternutationem cient atque nares expurgantur, humectantur, muci secretio restituitur &c.

D E V I S U.

§. D V I I I.

Hunc sensum brutis & hominibus natura dedit; illis quidem, ut ab obstaculis insidiisque monita sibi caverent; nobis vero cum eundem in finem, tum idcirco maxime, ut mirabilia adorandi Creatoris opera contemplari & ex his potestatem supremi artificis & sapientiam admirari possemus.

*Pronaque cum spectent animantia cetera terram,
Os homini sublime dedit, cœlumque tueri
Jussit & erectos ad sidera tollere vultus.* Ovid. Met.

Tuto autem loco recondi debebat oculus, organon nobilissimum ac delicatissimum, nec solum ab incurso externorum corporum, sed etiam a nimia luce defendi. Hinc illum in orbita ossea inclusit natura & tutamina præposuit palpebrarum & adjecit umbracula, nimiam lucem moderatura, *supercilia & cilia*. De his primo dicemus.

Supercilia vocamus congeriem pilorum brevium, conicorum, imbricatim sibi mutuo incumbentium, qui marginem eum prominentem, superiorem orbitæ, cui interius sinus frontales respondent, a radice nasi ad externum usque orbitæ angulum occupant, bubillis suis in cute & subiecta cellulosa radicati & apicibus suis extrorsum directi. Cutis ea in parte laxè mobilis est, potestque per musculos continuo dicendos una cum superciliis & attolli, & deorsum introrsumque trahi versus nasum. In priore casu oculus luci plenius patet, in posteriore corrugato deorsumque tracto supercilio idem obumbratur & a

nimia luce defenditur. Sed eadem etiam pulverum a superiore plaga in oculos illapsum sustinent & sudoris guttas ex fronte delabentes arcent, atque extrorsum in genas determinant. Præter hanc, quam oculis præstant, utilitatem, ad exprimendos etiam animi affectus serviunt. Nam est solliciti & gravis atque occupati curis animi indicium, supercilium corrugatum; levis animi & incurii, planum; elatum, superbi & arrogantis. Alius est ordo pilorum, qui in exteriori palpebrarum limbo oriuntur, extrorsum repandi & incurvati, superiores sursum, inferiores deorsum reflexi; hi cilia dicuntur. Arcent ab oculis infecta in aëre obvolitantia, simulque in nimia luce adductis ad se mutuo & conniventibus palpebris, umbram oculo præficiunt, radios lucidos nimis obliquos & visum turbaturos excludunt, sic ad visum quoque distinctiorem faciunt.

§. D I X.

Cranii ossibus omnibus exterius proxime adhæret periossteum suum, quod peculiari nomine pericranium anatomici appellant. Huic alia peculiaris membrana, tendineæ similis, splendens superinducta est, quæ per cellulosam telam hic cum pericranio, illuc cum cuti capitis mobili nexu conjungitur. Hanc membranam vocant *Epicraniam*, eaque musculo quadruplici prædita est, quem alii ceu unicum spectant & *epicranium* musculum nominant, alii in quatuor musculos distinguunt, duos nempe *frontales*, totidemque *occipitales*. Occipitalis utrimque oritur a radice processus mammillaris ossis temporum & ab osse occipitis, in parte postica a linea transversa superiore ejus ossis, inde utrimque ascendit oblique extrorsum divergens, atque in ipsa dictæ membranæ expansione aponeurotica, brevis latusque musculus finitur. Eam ergo expansionem tendit agens & si satis obsequiosa est, cum illa

etiam cutim capillatam capitis retrorsum trahit; ita adjuvat actionem *frontalium*, qui in parte anteriore hujus expansionis epicraniae hærent, superius divergentes, inde circa mediam frontem in unum conjunguntur, totamque frontis latitudinem ad tempora usque occupant & fibris suis partim in corrugatorem supercilii, partim in orbicularem palpebrarum, partim in nasi musculos ultimo abeunt. Actio hujus musculi varia esse videtur. Agente simul occipitali tensaque membrana epicrania punctum fixum nanciscitur frontalis; tunc modica vi agens, frontis cutem depressam restituit & una supercilium sursum ducit, frontem explicat, qualis in lætitia frontis aspectus est; majore vero vi agens & supercilium cum palpebra superiore altius adducit & simul cutem frontis in rugas transversas agit, dum illam elevatam abbreviat. Est antagonista hujus *corrugator supercilii*, quem BOERHAAVIUS depressorem vocat. Hic musculus, unus utrimque, oritur utrimque ab osse frontis in glabella, ubi alter alterum fere contingit, modo unico, modo pluribus tendinosiis principiis, inde latescens, fibris suis per dorsum supercilii ossei se inflectit &, ubi ultra mediam ejus longitudinem processit, valde extenuatus, confluit cum orbiculari palpebrarum, partim etiam extremo frontalis musculi continuatur. Hinc agens utrimque cutim frontis cum supercilio deprimit, supercilia non deorsum modo, sed & introrsum versus glabellam trahit, pilos horum in priora erigit, sic oculum obumbrat. Simul vero & glabellam & cutim frontis in rugas oblongas contrahit & palpebram superiorem non nihil deprimit.

§. D X.

Dedit natura oculo cortinas mobiles, quibus prætensis ab illapsu sordium pulverumque defenderetur, eo præcipue tempore, dum somno in-

dulgemus, inscii rerum extra nos positarum. Hæ cortinæ palpebræ sunt, ex duplici cutanea plica & lamella peculiari cartilaginea factæ, nervis, vas-
 sis, musculisque præditæ, perpetuoque mobiles. Structura harum partium non facillima est cap-
 tu, nisi in cadavere distincte visa sit; conabor ta-
 men, ut perspicue hanc tradam, etsi breviter. Ergo, quod cuivis oculum alterius inspicienti pa-
 tet, cutis externa a supercilio descendens atque
 intropressa supra anteriorem partem globi oculi
 sese projicit, eumque magna parte contegens &
 plusquam dimidio, nisi elevata sit, tandem quasi
 abscissa desinit in marginem semilunarem, ex quo
 cilia prodeunt. Hæc plica cutanea palpebra su-
 perior est, quod ad ejus exteriorem faciem atti-
 net. Simili plane modo, sed contraria directione
 cutis inferiora orbitæ cingens versus globulum
 oculi accedit, similemque plicam semilunarem;
 sed minorem efficit, simili margine finitam, ciliis
 etiam obsito, sed paucioribus; hæc palpebra in-
 ferior est. Hæ duæ plicæ a se mutuo disjunctæ
 utrimque conveniunt in angulis seu canthis ocu-
 lorum, quorum ille, qui naso proximus, can-
 thus internus vel major, alter oppositus exter-
 nus & minor appellatur; in his cutis inferioris
 palpebræ cum superiore confluit. Cutis autem pal-
 pebrarum insigniter tenuior est & tenerior, quam
 in aliis partibus. Jam porro sciri debet, cutim,
 ubi in margine palpebrarum quasi abscissa desi-
 nere videtur, nequaquam hic terminari, sed in-
 trorsum reflecti una cum sua epidermide, atque
 internam, oculo contiguam, palpebrarum super-
 ficiem investire. Sed hæc interna palpebrarum cu-
 tis tenerrima est, tota rubicunda, vasculis plenif-
 sima, ut veræ cutis continuationem esse vix cre-
 deres, nisi id anatome accuratior demonstraret.
 Magna quoque huic internæ cuti sensibilitas est &
 multo major, quam in cuti externa, ubicumque
 demum, major etiam, quam in ipsa oculi superfi-

cie; nam aspera e. g. arenula intra oculum & palpebras illapsa, has potissimum laceffit. Sed & valde nervosæ sunt palpebræ & papillas nerveas in interiore superficie palpebrarum vidit RUYSCHIUS. Nunc, ut in ordinem redeam, interna palpebrarum membrana, cuti continua, fabrica tantum ab illa differens, ad marginem fere orbitæ & superiorem & inferiorem procedit, inde vero reflexa palpebras deserit & supra ipsum oculi bulbum antè se projicit, primum scleroticæ partem anteriorem undique, tum corneam totam investiens & mediante cellulosa tela, scleroticæ quidem laxæ, corneæ vero arctè adhærens, tumque mutato nomine tunica *adnata* oculi vocatur, vel *conjunctiva*, quia palpebras cum oculis conjungit. Veræ adhuc cutis propaginem esse, licet fabrica degenerem, docet vel ipse culter anatomicus, imprimis adjuvante maceratione, cujus ope continuitatem ostendere licet. Etiam epidermidem habet comitem; fabrica autem non solum a cuti externa, sed etiam ab interiore palpebrarum differt *adnata*; nam super sclerotica album colorem habet & mediocriter vasculosa est, super cornea vero tota pellucet, quod ad visum omnino requirebatur. In laxiore illa cellulosa, quæ inter scleroticam & adnatam intercedit & adeps aliquis exiguusprehenditur & plura vascula; in his potissimum sedes est ophthalmiæ & leucomatum, aliorumque oculi vitiorum. Hæc de exteriori & interiore palpebrarum superficie notanda sunt. In margine vero utriusque palpebræ & superioris & inferioris, inter duplicem descriptam cutis lamellam intercipitur lamella arcuata, cartilaginea, qua fit, ut palpebræ exactissimæ semper bulbo oculi applicatæ maneant, eumque nitide detergant & impeditur, ne palpebræ in plicas longitudinales collabantur, neve facile quid intra oculorum & palpebrarum superficiem illabi possit. Has lamellas cartilagineas *tarfos* nominant anatomici.

Tarsus superioris palpebræ major est & magis lunatus, inferioris minor & rectior; uterque versus externum oculi canthum gracilescit & alter alterum fere contingit; uterque ad internum oculi canthum citius deficit, nec eum angulum attingit, sed latiore segmento finitur & ab opposito quoque tarso notabili intervallo distat. Ad ipsum tamen limbum, seu marginem liberum palpebrarum tarsi non perveniunt; sed eum limbum crassiusculum & tumidulum ipsa cutis hic solidior & fere callosa efficit; ZINN *de fabr. ocul.* p. 246. atque ex hoc margine cutis cilia emergunt. De hoc extimo palpebrarum limbo notandum est, superficiem ejus inæqualem convexam tumidulam esse & quasi oblique sectam, ita ut linea limbi extima in superiore & inferiore palpebra magis ultra reliquas producta sit, linea vero limbi interior oculo contigua magis sit reducta; ita fit, ut, dum palpebræ ad se mutuo adducuntur, limbi utriusque palpebræ numquam tota superficie se contingant, sed in extrema linea quidem inter se concurrant, interius vero a se mutuo adhuc distent & carinam triangularem relinquant, quæ a cantho externo oculi versus internum excurrit; & in ea carina humor lacrymalis oculum humectans, quem palpebræ continua nictitatione abstergunt, ad internum oculi canthum & ad carunculam lacrymalem deducitur. Sic factæ palpebræ proprios habent musculos, quibus moventur, quorum unus palpebræ superiori soli, alter utrique movendæ destinatur. Sunt musculi hi in textu recensiti, *Levator* nempe palpebræ superioris & *orbicularis* palpebrarum. *Levator* palpebræ superioris oritur in fundo orbitæ ex sola dura matre (ZINN) ad oram superiorem foraminis optici tenui & tendineo principio, inde supra musculum attollentem oculi antrorsum procedit, conscendit bulbum oculi & super eum reflexus, descendens, dilatatur, atque inseritur tendineus in tarsum superioris palpebræ. Agens igitur

tur, palpebram superiorem elevat, eamque ab inferiore abducit, oculum aperit. Hypomochlion huic musculo præbet bulbus oculi, quem superfundit incurvatus. Alter musculus orbicularis palpebrarum in duas partes, cohærentes tamen dividi potest, quarum altera cavum orbitæ exterius circumlegit, altera propius ad palpebras pertinet, iisque ipsis supersternitur. Partis exterioris fibræ in cantho majore oriuntur a ligamento, quod a processu frontali ossis maxillaris ex transverso ad commissuram palpebrarum ducitur, inde sparsæ in ambitum fibræ, aliæ superiores ossi frontis, aliæ inferiores ossi jugali & maxillari inferuntur, sæpe profunde descendentes. Partis interioris fibræ in arcum minorem flexæ, ex eodem ligamento educæ ambiunt & superiorem & inferiorem palpebram, atque ad externum oculi canthum angulis acutis concurrunt & sese decussant. Hic musculus agens, diductas palpebras ad se mutuo adducit, dum eodem tempore superiorem detrahit, inferiorem elevat; hinc superior palpebra non habet depressorem proprium, nec inferior proprium elevatorem musculum habet. Hanc enim elevat, illam deprimit idem orbicularis musculus. Idem ergo & antagonista est levatoris palpebræ superioris. Idem humorem lacrymalem, oculos humectantem, adductis palpebris continuo detergit & versus canthum internum propellit & dum fortius agit, etiam ipsas palpebras versus eum canthum trahit. Ambo vero hi muscoli, levator palpebræ superioris & orbicularis alternatim agentes, illas perpetuas nictitationes efficiunt, quas palpebris peragere solemus, quasque adeo sæpe in die, & adeo celeriter peragimus, ut ea celeritas in proverbium abierit, quo quid nictu oculi citius fieri dicimus. Sunt certe muscoli hi ex diligentissimis, neque tamen facile delassantur.

Aperitur vero palpebra inferior &c. Dixi paulo antea ex strato exteriori & inferiore orbicularis

palpebrarum fibras aliquas ad os jugale & maxillare descendere; hæ fibræ agentes, si orbicularis agere cessaverit, possunt palpebram inferiorem in situm suum naturalem deprimere.

§. D X I.

Cum palpebræ perpetuis nictitationibus & ad oculi superficiem affricentur & ad se mutuo limbis suis confligant, requirebatur humor, oculum constanter lubricans, isque pinguis oleosæ naturæ, qui ad minuendum affrictum maxime opportunus. Ergo natura paravit smegma lubricum, pingue, quod initio quidem, dum secernitur, tenuius, oculi bulbum & palpebrarum interiora continuo lubricat, iisdem vero abstersum & ad canthum oculi majorem depulsum, mora & aëris actione in lemas pingues exsiccatum visitur, præcipue dum mane e lecto surgentes oculos detergimus. Hoc linimentum præparatur a glandulis in interiore limbo palpebrarum reconditis, peculiaribus, a Cel. MEIBOMIO descriptis & inde *Meibomianis* dictis. Adparent inversa palpebra in interiore hujus superficie, pone limbum, pori exigui, multi admodum triginta ad quadraginta usque, in unam aut duas etiam lineas juxta limbum palpebræ dispositi, non tamen totam ejus longitudinem occupantes. Singulus talis porus ducit in cavum exiguum, flexuosum, in modum intestinuli contortum. Atque hæc exigua cava intestinula sunt illæ glandulæ *Meibomianæ*. Sed ipsæ hæc cava intestinula, accuratius lustrata, cernuntur constare aliis multis minoribus sacculis, aut folliculis, brevibus, subrotundis, cryptarum similibus, qui adunati smegma suum in unum communem ductulum congerunt & excernunt. Hinc pori illi non sunt ductus excretorii cryptarum simplicium, sed multarum ejusmodi cryptarum coacervatarum tubuli communes. Humor quem præparant manifeste pinguis est, sebaceus, mollis

tamen & nonnumquam instar vermiculi exprimitur. Poros in figura inversam palpebræ superficiem exhibente delineavit MORGAGNIUS, *Advers. I. Tab. 4. Fig. I.* Pulcherrime non solum ostia hæc, sed ipsos etiam plexus glandulosos expressos dedit Clar. ZINNIUS *Tab. VII. Fig. 8. 10.* Ceterum mirum est, BOERHAAVIUM alias strenuum MALPIGHII defensorem hic a partibus RUYSCHII stare, qui corpuscula hæc glandulas esse negavit, quia cera injecta in ductus excretorios penetrat.

§. D X I I.

Glandula innominata veteribus dicta, rectius hodie ab usu *lacrymalis* appellatur. Est vera glandula conglomerata, plerisque aliis durior, in lobulos distincta, per quorum intervalia vasa & nervi transeunt, atque illi ipsi lobuli ex acinibus minoribus tela cellulosa nexis consurgunt. Sed & illa ad angulum externum orbitæ in recessu cavo ossis frontis versus tempora, ubi impressio quædam manifeste in osse frontis cernitur pro recipienda hac glandula. De ductibus vero hujus glandulæ quæstio semper magna fuit, fluctuantibus etiam summis anatomicis, & ab arte sua destitutis. In brutis quidem & speciatim in oculo bubulo, NICOL. STENONIS hosce ductus invenit & demonstravit, postea alii in aliorum animalium oculis eosdem viderunt. De humana autem fabrica dubitatum est, cum nec MORGAGNIUS, nec ZINNIUS solertissimus, nec HALLERUS, umquam ductum glandulæ lacrymalis humanæ viderint. Erant tamen jam tunc viri graves testes, qui viderant, SANTORINUS, WINSLOW, LIEUTAUD, CASSEBOMIUS & inter Anglos Cel. HUNTER. Nuper vero Cel. ALEX. MONRO, filius, vidit & ostia & ductus excretorios glandulæ lacrymalis, eosque etiam dexterrime argento vivo replevit. Vidit autem esse sex septemve

temve ductus de glandula prodeuntes, inter se nusquam connexos, qui per faciem internam membranae conjunctivae palpebrarum descendunt & aliquot lineis supra tarsum aperiuntur in conjunctiva membrana scleroticæ. Nullum ergo jam de his ductibus dubium restat. Per hosce ductus, quos hygrophthalmicos BOERHAAVIUS appellat continuo tenuis, aquosus, falsus, humor lacrymalis intra concavam palpebrarum & convexam oculi superficiem exsudat, sed minima in statu naturali quantitate, non ut redundet, aut oculum suffundat, sed ut humectet solum, quantum satis est. Sed in animi affectu tristi, aut irritatione quacumque oculi ac palpebrarum, copia adeo magna secernitur, ut extra palpebras exundet & in genas devolvatur. Musculus orbicularis, cui vulgo hoc officium adscribunt, ut glandulam lacrymalem oculi bulbo represso emulgeat & lacrymarum copiam augeat, parum ad id conferre videtur, vix enim lacrymas videbis effundi utcumque etiam agente hoc musculo, nisi vel oculi irritamentum adsit, vel tristis animæ repræsentata idea vel mixtum tenero amore gaudium, vel impetus humoris in glandulam major, ut in morbis encephali inflammatoriis, ex qua causa potissimum in his oculi lacrymosi sunt. Præter hujus glandulae humorem etiam vapor arteriosus ex omni interna superficie tunicae palpebrarum & conjunctivae exhalat, quem aqua carotidi injecta tepida etiam in cadavere demonstrat. Triplex ergo liquidum est, quod oculos palpebrasque internas humectat & lubricat, humor glandulae lacrymalis, vapor exhalans arteriosus & smegma pingue glandularum *Meibomianarum*.

Cui forte similis exiguis in palpebra superiore glandulis conficitur. Nullæ peculiare in palpebra superiore glandulae adsunt, nisi Meibomianas jam dic-

tas velit BOERHAAVIUS, sed illæ perinde in palpebra inferiore habitant & liquidum præparant diversum ab humore lacrymali.

§. D X I I I.

Humor ille triplex oculum lubricans continuo secernitur, neque tamen in statu naturali accumulatur, neque exundat; videndum ergo, quorsum deferatur. Aliqua pars, eaque subtilior, resorberi videtur per venas bibulas in superficie interna palpebrarum & tunica conjunctiva patentes. Sed quo minus omnis resorbeatur intra idem tempus, quo secernitur, prohibet partim ipse hujus humoris lentor ex admisto smegmate *Meibomiano*, partim vero continua palpebrarum nictitatio, qua oculi globus constanter abstergitur. Quidquid ergo humoris per venas bibulas non satis tempestive resorptum est, id subsequente palpebrarum nictitatione detersum versus canthum oculi internum depellitur, ibique per tubulos peculiares, venis bibulis tamen multo majores, resorbetur, de quibus deinde dicam. Nunc prius ut intelligatur, quomodo humor lacrymalis versus canthum internum propellatur, revocandum est in memoriam, quod supra de figura limbi palpebrarum dixi, nempe limbum eum non plana superficie terminari, neque limbos superioris & inferioris palpebræ sese in omni puncto contingere, sed marginem eum tumidulum esse & in exteriori linea, qua cilia emittit, magis prominulum, in interiori, qua oculum contingit, depressum, humiliorem, magis reductum, ut adeo adductæ ad se palpebræ, dum in linea exteriori limbi sui utrimque se contingunt, in linea interiori adhuc a se mutuo distent; sic necessario relinquatur etiam inter adductas palpebras carina aliqua triangularis: quando jam palpebræ ad se mutuo adducuntur, quod perpetuis nictitationibus sit actione musculi orbicularis, humor oculum lu-

bricans a superiore palpebra versus inferiorem & ab hac contraria directione versus superiorem propellitur, jamque limbis utriusque palpebræ in exteriori linea sese contingentibus, humor ille omnis deterfus in carinam illam triangularem, quæ inter palpebrarum limbos interius relicta est, compellitur. Nunc porro, quia musculus orbicularis palpebrarum, quo hac actio peragitur, juxta canthum oculi internum originem sumit & quia, ut monui, palpebras non solum claudit, sed etiam versus canthum internum trahit, hinc lacrymalis iste humor, jam in triangularem illam palpebrarum carinam depulsus, versus internum oculi canthum promovetur. Accedit alia ratio mechanica, quæ humoris illius iter hac directione determinat; nempe in cantho externo oculi tarfi palpebrarum sese contingunt angulo acuto, in cantho vero interno iidem citius deficiunt & notabili intervallo a se mutuo distant; hinc majus in cantho interno spatium, atque adeo minorem resistantiam offendit humor lacrymalis; unde & huc potius confluit. Denique & canthus exterior manifeste altiore loco, internus humiliore ponitur; sic etiam declivitas viæ humorem illum versus internum canthum ducit. Hinc & in lacrymantibus guttæ lacrymarum numquam fere ex cantho externo, sed vel ex humiliore margine palpebrarum, vel ex cantho interno in genas exundant. Nunc ex cantho interno ulterius vias humoris lacrymalis prosequamur.

Ibi crassior pars affixa & collecta &c. — liquidior vero abit in puncta lacrymalia &c. Est in cantho oculi interno, paulo ante palpebræ superioris cum inferiore conjunctionem, particula rubella, oblonga, extrorsum conica, facta ex interiori palpebrarum tunica, hic complicata, *carunculam* lacrymalem vocant anatomici. In ea particula sedent glandulæ sebaceæ, subrotundæ, poris suis

extrorsum apertæ, quæ & pilos exiguos, brevissimos, agre conspicuos producant. Usus hujus carunculæ est, ut palpebras ibi loci aliquantulum distineat, humorique lacrymali ad canthum internum obsistens eum ad illas, quas mox dicemus vias, divertere faciat. Tum præterea & ipsa smegma lubricum, glandulis sebaceis præparatum, excernit, palpebrasque hoc in loco oblinat, ubi deficientibus jam tarsis alioquin nullæ sunt *Meibomianæ* glandulæ; & denique partem lacrymarum crassiores, inspissatas, pilis suis minimis hic sistit retinetque, quæ dein in lemas exsiccantur & digitis ex cantho interno expurgantur. Lemæ hæc partim smegmate *Meibomianarum* cryptarum, partim inspissato humore lacrymali, partim pulvisculis ex aëre in oculum illapsis, subtilissimis, constant; matutino potissimum tempore collectæ, visuntur. Sed tenuior lacrymalis humor, utrimque & in superiore & inferiore palpebra, paulo ante carunculam lacrymalem & nonnihil interius quam in linea tarforum, offendit osculum, naturaliter patulum, palpebra parumper extrorsum flexa facile conspicuum, in quod seta intrudi potest; eminet non nihil albo papillari colliculo, & duriuscula, quasi callosa cellulositate sustinetur patulum, ne collabatur. Hæc oscula *puncta lacrymalia* vocantur, suntque duo ad utrumque oculi canthum internum, alterum superius, alterum inferius. Singulo horum punctorum continuatur introrsum tubulus, ipsis osculis amplior, intra duplicem lamellam commissuræ palpebrarum versus nasum excurrentem, ex alba tenera membrana factus, illa tamen cuti palpebrarum & epidermidi continua. Vocantur hi tubuli *ductus lacrymales*. Eorum superior carunculam lacrymalem superascendit, inde descendit versus nasum, sodali suo propior; inferior sub caruncula fere transversus excurrit & superior quoque transversum situm obtinet clausis oculis, dum palpebra superior

ad inferiorem deducta est. Vid. de his partibus figur. Clar. ZINNI Tab. VII. Fig. 10. Abeunt hi tubuli in *sacculum lacrymalem*, de quo mox dicitur, in eumque aperiuntur vel duobus osculis, vel unico, dum prius conjunguntur. *Saccus* porro *lacrymalis* utcumque ovalis cavitas est, osseo versus nasum pariete fulta, quem os unguis & ossis maxillaris processus frontalis efficiunt, a parte anteriore deficientem & membrana completum. Firmiter his ipsis ossibus, in quorum sulcum recipitur, adhæret hoc receptaculum, duplicique constat membrana, exteriori tenui, nervea, alba & alia interiore rubra, pulposa, vasculosa, quæ tunicae narium pituitosæ continuatio est. Anteriorius nullo osse firmatus hic sacculus latet intra ac retro musculum orbicularem palpebrarum ejusque ligamentum; & obducitur fortiore ligamentosa membrana, quæ illi robur addit. Parte sui superiore ultra punctorum lacrymalium altitudinem assurgit & cæco fine terminatur, parte vero inferiore continuatur in canalem nasalem, eadem pituitaria membrana investitum, qui a conjunctione ossium unguis, maxillaris superioris & spongiosi inferioris efficitur, & paulum retrorsum descendens, tectus dicto osse spongioso, aperitur in infimum narium meatum obliqua longaue apertura. Lacrymalis ergo humor, usu suo functus, niçtitatione palpebrarum ad canthum oculi internum propulsus, a punctis lacrymalibus resorptus, per ductus lacrymales defertur in sacculum lacrymalem & ex hoc demum in meatum narium infimum. Hinc lacrymantibus quandoque de naribus stillat liquidum. Fabrica harum partium accurate cognoscenda est medico, ut earumdem morbos peculiares recte perspiciat, de quibus hic non est locus dicendi. Ceterum Viri Clarissimi credunt sacculum lacrymalem & ductum nasalem, præter id, quod humorem lacrymalem ab oculo revehant, alium adhuc usum habere, proprium-

que etiam humorem fecernere, qui eadem via ad nares descendat. Eaue opinio gravibus nititur argumentis. Nam certe nulla est proportio ampli adeo sacci lacrymalis & ampli ductus nasalis, ad exiguos ductus lacrymales & exilissima puncta lacrymalia. Si soli humori lacrymali recipiendo & ad nares deferendo destinatur saccus lacrymalis, cur natura eum fecit ampliozem & multoties ampliozem, quam necesse sit pro ratione resorpti humoris lacrymalis? Nihil autem natura frustra molitur. Alterum argumentum est, quod membranam pituitariam intus contineat, quæ certe cum in toto narium tractu proprium fecernat humorem, cur hic loci nihil fecerneret? Tertio verum mucum in sacco lacrymali interdum vidit Cel. ZINNIUS, vidit etiam Experientissimus PALLUCCI, & hinc ingeniose rationem reddit, cur adeo facile, adeo sæpe, ductus nasalis obstruatur & fistulæ lacrymali rudimentum sternat. Addit porro idem egregius vir, plurima vascula undique ad hunc saccum confluere, quibus pariter opus non fuisset, si modo merum lacrymalis humoris receptaculum esset. Et denique Clar. ZINNIUS, cum saccum hunc & ductum nasalem per orificium inferius cera replevisset, multa vidit vascula ex sacco prodeuntia, quæ per vicinas membranas ludentia versus utramque palpebram decurrebant, in itinere suo etiam in minores ramulos divisa & pariter cera repleta. Quæ omnia confirmant dictam opinionem, quod in sacco lacrymali, præter adventitium per ductus lacrymales humorem, etiam proprii humoris secretio fiat. Et ille ipse humor contraria directione ex sacco lacrymali regurgitat, quoties in ductu nasali obstaculum insuperabile, quod ejus descensum in nares intercipit; aut quoties cum impetu quodam versus superiora urgetur. Hinc post sternutationem validam, aliquoties repetitam oculus lacrymis suffunditur, quum aër ingenti impetu per na-

res explosus, aliqua sui parte in ostium ductus nasalis adactus, humorem ejus omnem, contraria directione, versus puncta lacrymalia palpebrasque impellat.

§. D X I V.

Humidi, nitidi, pellucidi, flexiles molles mobiles &c. Oculi parte sui anteriore debuerant aëris contactui exponi, aër vero corpora fere omnia exsiccat, hinc & oculi brevi tempore exsiccarentur, nisi continuo novus humor secerneretur; qui humidus conservat. Sed illa ipsa humiditas *pellucidas* servat oculi membranas; nam exsiccata hinc vel inde cornea oculi, aut corneæ super-tensa adnata, continuo opaca fit & nascuntur maculæ albæ visum turbantes, leucomata dictæ. Servat etiam *molles & flexiles*, nam, ut ex alibi dictis constat, humiditas mollitiem & flexilitatem, siccitas rigiditatem partibus nostri corporis conciliat. *Lubrici* etiam sic, *mobiles*, facile obsequiosi musculis trahentibus servantur oculi, eamque lubricitatem auget magis pinguedo, qua globus oculi undique circumfunditur, parte solum anteriore excepta. *Calidi* servantur a vasculis rubris confertissimis membranæ interioris palpebrarum, oculis proxime applicatarum. Denique *ab omni illapso aspero vel acri hoc modo cito liberantur*; siquidem irritatione quadam in oculo præsentem, sive ab acri, sive aspera particula illapsa, continuo ingens sequitur humoris lacrymalis profluvium, eoque ipso acrimonia temperatur, aut particula aspera illapsa eluitur. Chirurghi hoc in casu naturam imitantur, si ipsa sibi non sufficiat, & per siphunculum aquam tepidam intra oculum palpebrasque injiciunt, quo corpusculum illapsum eluatur.

§. D X V. §. D X V I.

Nervi optici in interiore & posteriore parte ventriculorum cerebri lateralium oriuntur ex illis

colliculis medullaribus, quos in historia cerebri thalamos nervorum opticorum nominari dixi; ab hac sua origine extrorsum primo, dein in basi cerebri introrsum ad se mutuo vergunt, aucti fibris utrimque a crure cerebri accedentibus, antrorsum procedunt convergentes & super sella turcica uniuntur; post eam conjunctionem, quæ utcumque figuram crucis + obliquæ exprimit, secedunt a se mutuo divergentes & singulus ad singuli lateris orbitam tendit, eam subiens per foramen ophthalmicum, quod in processibus tenuibus ossis multiformis exsculptum & dura matre investitum est. Inde per orbitam antrorsum & extrorsum ac paulum deorsum tendit, non penitus recto itinere, sed nonnihil flexuoso. Accedit denique ad posteriorem globi oculi partem, non tamen in media hujus plaga, quæ axivisus respondet, sed multo interiorius versus nasum, ut pars ea globi oculi quæ ad exteriora inserti nervi optici relinquitur, multo major sit, quam ea, quæ ad interiora nervi versus nasum ponitur. Hujus insertionis utilitas & necessitas ex alibi dicendis patebit. Plura habet hic nervus peculiaria, quibus ab aliis nervis discrepat. Et primo quidem solus omnium nervorum id habet peculiare, quod duram matrem ad usque finem suum secum ex encephalo deducat. Ceteri enim nervi ex foraminibus cranii egressi mox relinquunt duram matrem; sed opticus, ubi per suum foramen in orbitam exit, duræ matri foramen illud investienti multa cellulositate adnectitur, simulque internam duræ matris lamellam in vaginam productam accipit, quæ illum in oculum usque comitatur, dum exterior ejusdem lamella ex eodem foramine egressa reflectitur & orbitæ periossteum constituit. Habet præterea interiorem aliam vaginam a pia matre, quæ omnes ejus funiculos universali involucri obvolvit & in unum teretem nervum conjungit. Estque hic iterum quædam ab aliis nervis differentia,

siquidem in reliquis nervis, qui in itinere suo ramosi fiunt, pia mater singulos funiculos nerveos seorsim involvit, extimum vero universale involucrum ascititia cellulosa tela iis præbet; opticus nervus totus universalem a pia matre vaginam habet; sed & undique intra substantiam nervi ab hac piæ matris vagina, demittuntur propagines cellulosæ & sepimentula, quibus singuli funiculi medullares a se mutuo discriminantur & seorsim involvuntur. Illi omnes sibi mutuo paralleli accumbunt, nulloque ramulo secedente omnes in oculum abeunt. Expressa medulla hujus nervi remanet cellulosa structura vaginæ piæ matris, saltem nunc fabricam cellulosam referens, etsi meris parvis vaginulis constet. Denique & illud nervo optico peculiare est, quod non solum externam ejus superficiem plurima vascula perreptent, sed & in medio sui complectatur arteriolam rubram nudo oculo conspicuam, venulam sodalem, præter innumera alia vascula minima, secundum vaginulas cellulosas repentia, quorum lumina disseccto nervo sub specie pororum minutissimorum difficulter cernuntur. Arteriola illa princeps optici nervi, ab arteria ophthalmica in orbita oritur, dicta *centralis*; hæc per medium nervum ad tunicam oculi retinam excurrit. Apparet distincte admodum, discisso nervo optico, instar pori fere conspicua, etiam veteribus dudum cognita, sed pro poro habita fuit, perque eum porum cavum crediderunt *species vivas* ad cerebrum venire. Venulam centralem, huic arteriolæ respondentem, a retina retrogradam, per medium quoque nervum opticum deferri & in venam ophthalmicam se exonerare, est inventum Cel. HALLERI.

Hic porro solus nervus est, qui visui famulatur, dum mutationem, quam in oculo a luce recipit, ad sensorium commune defert. Id docent eviden-

ter cæcitates ex vitio hujus nervi subsecutæ, oculo licet in ceteris partibus sano. Ejusmodi cæcitates observatæ sunt a calculis nervum opticum comprimantibus, ab aliis tumoribus, a glandula pituitaria turgida, ab aqua in cerebro extravasata; a vasis hujus nervi solito plus distentis & infarctis &c. Quare de eo nulla inter physiologos controversia est. Sed multa disputatio fuit de conjunctione nervorum opticorum in sella turcica, priusquam orbitam ingrediantur; neque illa hodiernum composita est. Quæritur scilicet, num nervi hi medullam suam vere commisceant? num cohæreant solum sine miscela medullæ? num singulus post conjunctionem in directum abeat ad sui lateris oculum? num contra sese in illa conjunctione decussent & dexter nervus opticus sinister, sinister dextrum oculum petat. Pro decussatione stetit Cel. PETITUS *Mem. de Paris* 1736. negant alii observatis nixi. Vidit VESALIUS cum vitium esset in dextro oculo, etiã dextrum nervum opticum extenuatum fuisse & ante conjunctionem & post illam, sinistro nervo integro & incorrupto. Vidit CÆSALPINUS in cadavere hominis, cui dextri lateris oculus debili erat visu, etiã dextri lateris nervum opticum marcidum fuisse, bono sinistro. Similis est observatio Cel. Anatomici SANTORINI, quam hic ipse verbis referam. Sic autem habet observatio anatomica cap. III. p. 63. &c. „cuidam anatomicæ disquisitioni nobis incumbentibus relatum forte fuit, „ei homini, qui tum nostro sub scalpello erat, „cæcum jam diu dextrum oculum fuisse, nulla „quidem licet conspicua vitii nota indicante, quo „perlibenter audito ad id protinus manum ad- „movimus, nulloque deprehenso conspicuo oculi „vitio nervum opticum offendimus tum æquo graciliorem, tum colore obscuriorem, ille siquidem „ut assolet candidus, hic cinereus erat; quem cum „anxie prosequeremur, eum semper dextrum latus

„tenentem ad suum usque principium talem ubique
 „reperimus, qualem intra orbitam; contra autem
 „sinister secundum omnem longitudinem albus
 „omnino erat; qua vero in cerebro congre-
 „diebantur, alterum ab altero coloris diversitas
 „plane discernebat, ut facile inde colligi potue-
 „rit, eorum nervorum fibras non modo non de-
 „cussari, quod evidentissimum est, sed ne impli-
 „cari quidem, verum alterum alteri dumtaxat
 „accedere, ut deinceps disjungerentur., Hacte-
 nus SANTORINUS. Certum itaque ex hisce est,
 nervos opticos in ea conjunctione se non decus-
 sare, sed singulum etiam post conjunctionem ad
 sui lateris oculum accedere. Nam si se decussarent
 optici, in casu SANTORINI vitium nervi optici
 dextri post conjunctionem in sinistrum transire
 debuisset, quod non erat, aut homo ille utroque
 oculo captus esse debuisset, quod etiam non erat.
 Verumtamen licet se non decussent hi nervi,
 non ideo tamen sequitur, nullam omnino me-
 dullæ miscelam fieri, ut continuo nimius intulit
 SANTORINUS. Nam *ideo alterum alteri dumtaxat*
accedere, ut deinceps disjungerentur, non est natu-
 ræ sapientiæ consentaneum. Si nulla esset in ea
 conjunctione utilitas, præstitisset utique disjunc-
 tos orbitam subire. Quare videntur omnino fibræ
 medullares aliquæ horum nervorum inter se mis-
 ceri, & singulus oculus quidem sui lateris ner-
 vum opticum accipere, sed forte tamen aliquas
 etiam alterius lateris nervi fibrillas participare.
 Aliquid enim ejusmodi subesse suadet accuratior
 consideratio hujus unionis, & particularia quæ-
 dam phænomena. Reapse enim latiuscula plaga
 est, qua sese contingunt nervi optici, neque pe-
 nitus cruciformis; neque se contingunt tantum,
 aut cellulosa aliqua intercedente connectuntur,
 sed ipsam suam medullam confundunt. Suffe-
 cerat autem nexus cellulosus, si solum necti de-

buerant sine substantiæ miscela. Porro suo loco dicetur, pupillæ constrictionem aut dilatationem a nervi optici affectione tantummodo pendere, & hanc quidem constringi eo magis, quo vividius lux nervum opticum affecerit, dilatari autem in luce debili & languida. Jam vero phænomenon est, quod etiam oculi aperti pupilla dilatetur altero oculo clauso, citra omnem luminis mutationem. Hoc quisque in se ipso ante speculum experiri potest; sed multa attentione opus est. Vides ante speculum dextri oculi pupillam ejusdem cum sinistra diametri esse, nunc omnibus iisdem manentibus, si oculos simul claudas, & aliquo tempore clausos relinquo, tum subito aperias, videbis pupillam utramque ampliore esse, quam prius fuerit, sed mox in pristinum diametrum constringi. Ratio hujus rei est, quia clausis oculis nervus opticus a luce non afficitur, hinc pupillæ amplæ sunt; dum oculos aperis, nervus luce perculsus irritatur, & mox pupillæ stringuntur, ut nimiam lucem arceant. Nunc vero id mirum non est, si in utroque simul idem fiat experimentum. Sed hoc mirum est, unico oculo clauso, quando hujus pupilla dilatatur, etiam alterius oculi patentis, & luci expositi pupillam amplificari; neque certe ratio sufficiens hujus phænomenon invenitur, nisi vera inter fibrillas utrimque optici nervi conjunctio sit. Simili etiam ratione sæpe in amaurosi oculi cæci pupilla constringitur; dum oculi sani pupilla admoto lumine arctatur. Alii etiam ideo conjunctionem opticorum nervorum necessariam esse putarunt, quia duobus oculis unicum tantummodo objectum videmus. Sed hoc argumentum imbecillum est, quia etiam duabus auribus unicum tantummodo sonum percipimus, neque tamen acoustici nervi inter se conjuncti sunt, nisi forte in origine.

§. D X V I I.

Orbitam vocant anatomici cavum infundibuliforme ex pluribus ossibus conjunctis formatum, anterius ampla, fere elliptica ora circumscriptum, inde postrosum anguste convergens, in quo oculus, partesque aliæ ad oculum pertinentes locantur. Fit ex concursu septem ossium, ex osse frontis, maxillari superiori, multiformi, osse plano, osse unguis, osse jugali, & parte exigua ascendente ossis palati. Longe majus autem hoc cavum est, quam quod pro globo oculi continendo requiratur, sed id omne spatium, quod ab oculo relinquitur, partim musculis, partim vasis & nervis, & glandula lacrymali, partim denique pinguedine expletur. Nam ipse oculus pinguedine hic circumstrata, tamquam molli pulvinari fulcitur. Ea & bulbum oculi ab omni affricu tuetur, & musculos ejus constanter lubricat, agilesque conservat, & bulbum oculi sustinet. Pinguedine hac per morbos consumpta oculi introsum in orbitam recedunt, tristi aspectu, quasi intropressi. Periosteum orbitæ ab externa duræ matris lamella, quæ cum nervo optico per foramen ophthalmicum egressa reflectitur, & proxime ossa orbitam componentia investit, dum interior duræ matris lamina in vaginam nervi producta ad usque bulbum oculi progreditur.

§. D X V I I I.

Nunc ad fabricam ipsius oculi progredimur. Bulbus oculi ex tunicis componitur & sic dictis humoribus, intra tunicas comprehensis, etsi non omnes nomen humorum mereantur. De *adnata* tunica seu *conjunctiva* jam dixi, quæ interioris tunicæ palpebrarum continuatio est, & anteriorem globi oculi partem protegit. Hæc accessoria tunica est, oculo cum palpebris communis. Sed

jam de propriis oculi tunicis agere oportet. Prima harum eaque extima, a duritie sua *sclerotica* appellatur, alba, densa, compacta, crassa, crassissima in posteriore oculi parte, versus anteriora constanter tenuior, vasculis percursa sanguineis, etsi non multis, etiam ob tenacitatem suam difficulter cera replendis. Figura huic tunicae globosa est, sphaerica, ita tamen, ut in parte anteriore deficiat notabili sphaerae segmento. Ille defectus anterior scleroticae suppletur imposita tunica cornea, quae a sclerotica diversa, tota pellucidissima, lamellis concentricis sibi mutuo superincumbentibus composita, & minoris sphaerae segmentum est, quam sclerotica, opaca sclerotica transitum prohibuisset radiis lucidis; itaque necessum erat, ut sclerotica anterieus deficeret, & ejus loco alia, firma quidem & densa, sed pellucida tunica substitueretur. Praecipuum oculi firmamentum sclerotica est; ea incisa collabitur oculus, nec figuram suam ultra sustinet. Ceterum unde oriatur sclerotica, disputant anatomici. Plerique veterum eam pro continuatione durae matris habent, creduntque vaginam nervi optici a dura matre factam, eo nervo in oculum inserto ampliari & extimam oculi tunicam constituere; eademque sententia etiam quibusdam nostrae aetatis Anatomicis Clarissimis probatur, iisdemque auctoribus interior oculi tunica, quae sub sclerotica est, habetur pro continuatione pia matris nervi optici. Alii contra accuratiori indagine scleroticam pro peculiari omnino tunica habent, non continua durae matri; nam & manifeste crassior est sclerotica & in avibus ac piscibus passim cartilaginea. Sed & Celeberrimus ZINNIIUS, qui omnes alios in anatomico oculorum superavit, manifeste vidit, anteriorem vaginae nervi optici laminam, priusquam ipsum oculi bulbum attingit, colligi in

multas fibras solidas, splendentes, firmulas, quæ limiti posteriori craffiori scleroticæ, ubi nervus per illius craffitiam penetrat, eodem modo, ut alibi in corpore humano ligamenta inferuntur. Est ergo verus limes inter vaginam nervi optici & scleroticam, nec is adeo obscurus, ut dubitationi locum relinquere posse videatur, monente ZINNIO; atque adeo sclerotica non duræ matris propago, sed peculiaris naturæ membrana est. Similis de cornea membrana lis viget, quum hanc alii pro peculiari membrana, alii pro scleroticæ propagine haberent, & imprimis Gallo- rum plerique, qui etiam uno eodemque nomine & scleroticam & corneam insigniunt, addito solum epitheto corneæ *transparentis*, quo ab opaca cornea sive sclerotica distinguatur. Etiam Clarissimus ZINNIUS ingenue fatetur, se numquam potuisse accuratos observare limites inter scleroticam & corneam, neque apparere liquido, ubi præcise sclerotica desinat, cornea incipiat, sed limites utriusque inter se confluere, & fibras scleroticæ albas, opacas, dum corneæ proximæ fiunt, paulatim & sensim in pellucidam corneam transire. Vidit etiam in oculis infantum conjunctionem corneæ cum sclerotica ita se habere, ut sclerotica exterius & interius longius procurrat, & in parte intermedia citius in corneam degeneret, quo bifurcato fine, cornea in cuneum producta excipitur. Frequentissimam autem conjunctionem ita se habere deprehendit, „ut fibræ scleroticæ quo sunt interiores, eo citius in corneam pellucidam degenerent, & ita corneam exterius angustiores reddant, quod ipsum tamen non ita accurate contingit, quin interdum particula alba scleroticæ longius in corneæ substantiam immittatur, & utriusque partis fibræ sese mutuo excipientes, eandem fere figuram exprimant, qua pictores usi flammæ ignis delineare solent. „ His ita constitutis

non dubitat Clarissimus ZINNIUS, corneam pro vera scleroticæ continuatione habere. Nunc si-
 ve hoc ita sit, si-ve non, parum utique refert;
 id enim perpetuo verum manet, corneam, si
 etiam propago scleroticæ sit, tamen fabrica sua
 a sclerotica quam maxime differre. Alba enim
 & opaca sclerotica est, cornea tota nitidissime
 pellucet. Sclerotica majoris, cornea minoris
 sphaeræ segmentum est. Nam ex dimensionibus
 Clarissimorum Virorum PETIT, MAITREJEAN,
 PORTE-FIELD, diameter sphaeræ, quam sclero-
 tica conficeret octo linearum, ejus vero sphæ-
 ræ, cujus segmentum cornea est, diameter sep-
 tem tantummodo linearum cum $\frac{1}{2}$ aut $\frac{3}{4}$ est.
 Hinc cornea etiam magis convexa est, quam
 sclerotica. Deinde sclerotica vix potest arte in
 laminas distincte separari; cornea constat mani-
 feste multis laminis concentricis, in ambitu
 crassioribus, tenuioribus in parte media, quæ
 tenerrimis cellulosis filis inter se conjunguntur,
 & scalpello separari possunt, & subinde per mor-
 bos secedunt. Eæque laminæ perpetuo limpidis-
 simo humore inebriantur, in areolas cellulosas
 effuso. Dum areolæ illæ aqua turgent, cornea
 pellucidissima est, opaca vero & turbida reddi-
 tur in mortuis, dum liquore illo aqueo in auras
 dissipato lamellæ corneæ ad se propius accedunt.
 Observavit porro Clarissimus ZINNIUS, areolas
 illas cellulosas omnes apertas esse, & per lamel-
 larum poros ita inter se consentire, ut aquam
 facillime exsudent, & vicissim iterum imbibant.
 Id experimento constat; nam ad singulas com-
 pressiones, sæpius licet iteratas, corneæ facies
 madore quodam obduci cernitur, qui in guttu-
 las manifestas demum confluit, & vicissim ita
 compressa cornea facillime iterum turgescit, &
 humorem amissum imbibit, si in aquam immit-
 tatur. Patent autem pori illi tum in externa,
 tum

tum etiam in interna corneæ superficie. Craffit-
 ties corneæ parti anteriori scleroticæ nihil cedit,
 imo vero eandem superat, in foetu multo ad-
 huc quam in adulto crassior est, & minus con-
 vexa, minus pellucida, roseo colore tincta, aqua
 turgidissima, & laminis laxius inter se connexis.
 Post mortem craffitie multum decrescit, dum
 magna pars aquei illius liquoris, inter lamina-
 s corneæ hærentis, exhalavit. Per ætatem etiam
 sensim obscuratur, & in senio glauca fit, immi-
 nuta pelluciditate. Quin vasculis prædita fit,
 quæ inter lamellas concentricas humorem aqueum
 in cellulosas areolas secernant, non videtur pos-
 se dubitari, etsi ea minima sint, & nihil rubri
 humoris aut feri flavescentis naturaliter admit-
 tentia; apparent tamen in gravissima oculi in-
 flammatione, dum sanguis in vascula minima
 corneæ adigitur impetu circulationis, hac in par-
 te injectione anatomica efficacioris. Dico autem
 in gravissima ophthalmia id solum fieri, tumque
 etiam non resoluta inflammatione, ex impacto
 humore inter lamellas corneæ maculæ opacæ re-
 linquuntur, visum obfuscantes. Passim tamen oph-
 thalmiæ sedes in tunica adnata est, quæ cum
 epidermide ab interiore palpebrarum superficie
 reflexa, anteriorem scleroticæ partem, ipsamque
 corneam integit; & in eadem maculæ similes nas-
 cuntur, sed tamen medelam recipiente, cum su-
 perficiales sint, & facile exfoliari possint; dum
 contra maculæ in ipsa cornea natæ per omnem
 vitam indelebiles & immedicabiles permanent.
 Num nervos accipiat cornea, dubium videtur.
 De sclerotica certum nervis perfundi, sed ad cor-
 neam nemo anatomicorum nervos perduxit. Vix
 etiam sensibilis deprehenditur, dum depositione ca-
 taractæ methodo Celeberrimi DAVIELII inciditur.
 Et si quis sensus percipiatur, is ad tunicæ ad-
 natæ læsionem referri potest, quæ utpote cutis

palpebrarum propago sensilis est, & quæ ipsa ad illapsi asperi corpusculi affrictum dolet.

§. D X I X.

Qui scleroticam pro continuatione duræ matris nervum opticum investientis habuerunt, illi alteram internam oculi tunicam, quæ *choroidea* appellatur, & scleroticæ proxime subest, propaginem statuunt piæ matris, quæ eidem nervo vaginam præbuit. Vocatur choroidea, aut choroidea a similitudine fabricæ, quæ inter hanc oculi tunicam, & membranam foetum involventem, vulgo chorion dictam, veteribus intercedere visa est, quod illa tunica oculi, perinde ut illa foetum involvens, unice fere ex venis & arteriis conflata sit, & uti membrana chorion utero, sic ista plurimis vasculis scleroticæ adhaereat. Alia superficies est exterior hujus tunicæ, quæ ad internam scleroticæ superficiem adhæret, alia interior, quæ retinam complectitur. Imo vero RUYSCHIIUS choroideam in duas lamellas distinctas separavit, & exteriori lamellæ nomen antiquum choroideæ reliquit, internam autem *Ruyfchianam* nominavit, & pro peculiari oculi tunica descripsit. Inde hypothesis illa de involucribus nervi optici, in tunicas oculi continuatis, magis ornata fuit; tum enim & arachnoidea suum obtinuit officium, ut ex dura matre sclerotica, ex arachnoidea ipsa proprie dicta *choroidea*, ex pia matre demum *Ruyfchiana* oriretur. Alii contra ut scleroticam a dura matre non oriri, sic neque *choroideam* & *Ruyfchianam* arachnoideæ & piæ matris propagines esse, docuerunt. Post multas anatomicorum lites Clarissimus ZINNIUS ostendit, rem ita se habere. Ad ingressum nervi optici in oculum, pone scleroticæ originem, ubi nervus opticus exutis invo-

lucris in papillam obtuse conicam angustatur, jamjam in retinam abiturus, ibi finis hujus nervi optici membrana orbiculari, cribrosa, multis foraminulis pertusa obtegitur, per cujus membranae porulos medulla nervi, quasi per cribrum transmittitur ad retinam, una cum arteriola & venula centrali & filis cellulosis subtilissimis. Numerus foraminulorum ad triginta usque ascendit, inter quae unum alterumve in medio majus est pro arteriola dicta venulaque. Ipsa membrana haec subtilissima & pellucida, circularis figurae, intra scleroticæ orientis crassum limbum continetur. Nunc pia mater, quæ hactenus nervum opticum ad finem suum comitabatur, ad ambitum illius laminæ cribrosæ circum aliquem crassiolem format, aliquantulum in oculi cavitatem prominulum, qui laminam cribrosam terminat, (vid. ZINN. Tab. I. fig. 1.) & ex eo circulo ab omni nervi ambitu circumcirca reflectitur & ad vicinam scleroticam accedit hujusque faciei internæ ita sese applicat, ut intimam eamque fuscā scleroticæ laminam constituat, illi non modo exactissime ad incipientem usque corneam applicata, sed etiam fibris multis transversis arctissimo nexu ita juncta & agglutinata, ut maceratione etiam longissime protracta numquam sponte ab illa secedat, cultro vero anatomico & suspensa manu, vix, nisi difficillime, integra & illæsa sclerotica solvi ac separari possit. In foetu tamen laxius nexa est, & facile divellitur. Ergo reapse pia mater intra scleroticam reflectitur, sed ea reflexa piæ matris lamella, non est tunica choroidea; est solum facies intima scleroticæ; & nunc primo choroidea sequitur, distincta omnino a pia matre, ut pro hujus propagine haberi non possit. Nempe eidem circulo laminam cribrosam terminanti, ex quo pia mater reflecti-

tur, arctissime adnectitur tunica choroidea, & ope brevissimæ ac densissimæ cellulosæ telæ cum pia matre cohæret, simulque foramine circulari & margine integro papillam medullarem nervi optici ambit. Hoc ejus principium est. Inde nata hæc membrana, mollis, vasculis innumeris percursa, accedit ad scleroticam & secundum ejus interiorem lamellam, quæ a pia matre est, pergit huic concentrica usque ad limbum interiorem corneæ, & cellulosa tela & vasis nervisque cum sclerotica connexa, & maceratione facile inde separanda, dum lamella interior scleroticæ, piæ matris propago, vel post longissimam macerationem difficillime separatur. Exterior ejus superficies fusca est, interior nigro pigmento obducitur, quod peculiaris naturæ esse videtur, ut tamen ad mucî naturam accedat, cum macerando in aqua solvatur & elui possit, & aquam colore suo inficiat. In foetu & in homine recens nato rubri coloris est, inde sensim obscuratur magis & in nigrum colorem vergit, per multam tamen ætatem etiam ille color expallescit. Vasculis adeo referta est hæc tunica, ut post injectionem tota rubeat, non aliter, ac si picta esset, aut rubro colore oblita; applicata dein lente vitrea, magnitudinem augente, vides innumera & distinctissima vascula, arteriosa & venosa, cum externam ejus superficiem, tum internam perreptantia; vides simul alium esse reptatum vasorum in exteriori superficie, ubi vascula minora ex trunculis suis tamquam ex centro ad peripheriam more radiorum sparguntur, & stellulas imitantur; quæ vorticosa vascula venulas esse non arterias HALLERUS ostendit, etsi per arterias injiciantur, & vulgo pro arteriis habita sint. Alium in superficie interiore seu *Ruyschiana*, ubi vascula rectius a posterioribus antrorsum, & magis parallela excurrunt, ut tamen transversis laterali-

bus ramusculis retiola elegantissima constituent. (ZINN. pag. 47. Tab. I. fig. 2.) Hic distinctus in utraque choroideæ superficie vasculorum reptatus, & coloris differentia, tum observata in oculis quorundam animantium divisibilitas, permovisse videntur Anatomicos, ut choroideam duplici distincta lamella constare crederent, & interiorem ejus paginam *Ruyschianæ* nomine insignitam pro peculiari oculi tunica haberent. Negat autem duplicem eam lamellam Celeberrimus ALBINUS; Negat HALLERUS, negat ZINNIUS; etsi enim in oculis quorundam animalium experimentum subinde succedat, in homine tamen sine laceratione *Ruyschiana* a choroideâ separari non potest, sic utriusque vascula sibi intricata sunt mutuo; neque inter hanc & illam conspicua tela cellulosa intercedit, quæ tamen ubique intercedit, ubicumque tunicæ diversæ sibi mutuo applicantur. Hinc verius choroideâ simplex membrana statuitur; potest tamen *Ruyschianæ* nomen retineri ad denotandam interiorem choroideæ superficiem nigram, & floccis minimis villosam, & diverso vasculorum reptatu percussam. Hæc de choroideâ tunica tenenda sunt, quæ & nomen suum servat, quamdiu scleroticæ contigua & concentrica est; nempe ab illo circulo reflexæ piæ matris usque ad limbum nascentis ex sclerotica corneæ. Verum ubi ad illum limbum interiorem nascentis corneæ pervenit, ibi multa cellulositate cum scleroticæ limite cohærescit, & albo circulo oram nascentis corneæ intus legit; quem circulum *orbiculum ciliarem* vocant anatomici. Inde & directionem suam mutat choroideâ & nomen pariter exuit. Namque dum antea scleroticæ concentrica pergebat, nunc ab illo orbiculo ciliari undique recta introrsum se demittit, & corneam subtendit velo plano circulari, quod antea diversis coloribus variegatum, *Iris*, postea

atro pigmento obductum *uvea* appellatur, atque hoc velum corneæ subtensum, in medio foramen habet circulare, variabilis magnitudinis, quod radios lucis in oculum admittit; hoc *pupillam* dicimus. Iris ergo propago est choroideæ ab orbiculo ciliari introrsum flexæ & corneam sub-tendentis, uvea vero *Ruyschianæ* propago est. Celeberrimus HALLERUS non penitus circum-larem nec penitus planam facit iridem, sed aliquantulum versus corneæ segmentum convexam, tum etiam versus nasum aliquanto brevior, versus tempora magis productum; atque id etiam accurate attendendo, & oculum alterius, vel proprium in speculo contemplan-do observatur. Pulcherrimum vero spectaculum cernitur, si iridis faciem anteriorem in oculo recenti lente vitrea, magnitudinem augente inspicias. Tum enim vides fibras innumeras, magis minusve albidæ & gryseæ, alias majores, minores alias, omnes parallelas, densissimo ordine sibi adpositas, quæ ab annulo majori, seu ambitu exteriori iridis versus annulum minorem & pupillam serpentinis flexionibus incedunt, eo magis flexuosæ, quo velum iridis minus & pupilla amplior fuerit, minus contra serpentinae, & magis ad rectam lineam accedentes, quo magis expansum iridis velum, & pupilla arctior fuerit. (vid. ZINN. pag. 87. & Tab. IV. fig. I.) Ubi autem ad annulum minorem, qui pupillæ proximus est, pervenerunt, fibræ illæ majores passim in duos ramos secedere videntur, qui ad angulum obtusum divergentes, & vascula minora interposita præterlegentes, facto arcu cum sui similibus uniuntur. Fibræ autem tenuiores, majoribus interpositæ, sub trunculos majores ad alterutrum latus deflexos, se demergere, & ex conspectu subducere se videntur. Hic & illic tamen inter majores fibræ relinquuntur intervalla saturationis semper

coloris, ubi fibræ conspicuæ deficere videntur, nec nisi ad microscopium apparent. In universum variegatus est color iridis, alterne sese excipientibus diversi coloris striis; unde & nomen iridis habet. Porro ex mutua conjunctione fibrillarum majorum in arcus secedentium, & inter se denovo confluentium, nascitur circulus in iride serratus, flexuosus, qui anulum anteriorem majorem ab interno quasi determinat. Ex circulo illo serrato & in arcibus dictis, oriuntur plurimæ fibræ tenuissimæ, parallelæ fere, rectæ, quæ in modum radiorum undique versus centrum pupillæ concurrunt, & subtilissima cellulosa inter se connexæ anulum iridis anteriorem pupillæ proximum constituunt. Præter hæc fibras RUYSCHIUS etiam alias orbiculares ex brutis primum descripsit, tum in humanis quoque oculis reperire voluit, etsi paucas admodum fateretur. Assumpsit easdem Celeberrimus WINSLOW & alii. Et has porro fibras, & radiatas illas musculosæ naturæ esse, & ab orbicularibus pupillæ contractionem, a radiatis ejusdem dilatationem pendere, creditum est. Sed neque MORGAGNIUS, nec HALLERUS, nec ZINNIUS, nec alii Cel. Anatomici fibras orbiculares in iride umquam deprehendere potuerunt, & videtur RUYSCHIUS anulum illum serratum iridis pro orbicularibus fibris habuisse. Neque radiatæ illæ demonstrabiles fibræ, optimis licet microscopiis lustratæ, musculosæ visæ sunt citatis auctoribus. Et Celeberrimus FERREIN fere unice ex vasculis iridem compositam esse asserit, nulla facta mentione fabricæ musculosæ, & HALLERUS quoque ab humorum sanguine tenuiorum majore vel minore in vascula decolora iridis affluxu, pupillæ constrictionem aut dilatationem repetit. Quid de hac re censendum sit, deinde videbimus; Nunc enim de fabrica iridis solummodo sermo erat. Poste-

rior iridis facies, sive uvea, tota nigro pigmento quasi pasta obducitur; eo autem per aquam eluto, striæ itidem apparent rectæ, radiatæ, versus pupillam convergentes, maxime post prægressam macerationem, minus tamen floccosæ, & circa pupillam minus evidentes, quam in facie anteriore.

§. D X X.

Accipit simul nervos ab iis &c. Præter nervum opticum, qui solus visui præest, & in retinam expanditur, oculus nervos alios accipit, & quidem tria integra nervorum paria, tertium, quartum, & sextum, & denique quinti paris primum ramum ophthalmicum. Sed hi nervi ad partes externas oculi potissimum eunt. Tertiæ paris nervus ramis suis musculos adit, levatorem palpebræ, rectum oculi attollentem, rectum deprimentem, rectum adducentem sive internum, & obliquum inferiorem. Quartum par nervorum encephali soli musculo obliquo superiori, sextum par recto abducenti datur. Quinti paris primus ramus ophthalmicus, ad musculum orbicularem palpebrarum, ad glandulam lacrymalem, & canthum oculi ramos spargit, alias ad nares descendit ex orbita, alias ad frontem evagatur. Sed ad ipsum oculum veniunt nervi ciliares dicti, quos aut tertium par solum generat, aut tertiæ paris ramulus, cum furculo primi rami quinti paris concurrens, idque plerumque. Oriuntur hi nervuli ciliares ex ganglio peculiari, quod *ophthalmicum lenticulare* dicitur, omniumque fere gangliorum in toto corpore minimum, ex duplici radice nervea nascitur, alia brevior a ramo tertiæ paris ad musculum obliquum inferiorem missa, alia radice longiore a ramulo primi rami quinti paris. Adjacet nervo optico ad externum ejus latus, multaque

illi cellulosa tela cohæret. Ex hoc ganglio ex-
 orti nervi ciliares, exigui, incerto numero quin-
 que sex, ad novem usque, progrediuntur an-
 trorsum flexuoso itinere circa nervum opticum
 ludentes, & ad partem posteriorem bulbi oculi
 delati sensim a se invicem secedunt, & scleroti-
 cam pertundunt diversis locis, alii nervo opti-
 co propriiores, alii versus partem mediam scle-
 roticæ. (ZINN. Tab. VI. fig. I. & II. & Tab. IV.
 fig. I.) Oblique autem hanc ipsam subeunt, ea-
 que perforata ad choroideam sese applicant, &
 per ejus faciem exteriorem, nullis ad hanc tu-
 nicam editis conspicuis ramulis, excurrunt us-
 que ad orbiculum ciliarem, quo ubi pervene-
 runt, singuli bifurcantur in ramulos, qui cel-
 lulosa tela orbiculi ciliaris tecti, circa originem
 iridis ludunt, & sensim in minores ramulos di-
 visi, & vasculis minimis iridis interpositi, ser-
 pentino flexu ad annulum minorem excurrunt,
 & in iride magnam partem fibrarum radiata-
 rum, quas diximus, efficiunt.

Ex his & membrana fiunt fibræ musculares &c.
 Dixi priore paragrapho RUYSCHIUM strias illas
 iridis radiatas pro fibris muscularibus habuisse,
 & his addidisse alias orbiculares non demonst-
 randas: a multis tamen has fibras musculares iridis
 assumptas fuisse, cum explicatio constrictionis &
 relaxationis uveæ tales poscere videretur, dum
 contra alii Clarissimi Viri sepositis hypothsibus
 nihil musculosi in iride deprehenderent, etiam
 in minutissima quæque indagantes. Clarissimus
 ZINNIUS tamen anceps fluctuat, nec de natura
 striarum radiatarum iridis decidere audet, etsi
 oculo utcumque armato musculosæ non videan-
 tur. Agnoscit enim, posse eas nihilominus mus-
 culosas esse, etsi non videantur, quum & album
 colorem habeant, & cæteroquin fibrillæ muscula-
 res simpliciores aciem oculorum subterfugiant.

Celeberrimus HALLERUS vim muscularem iridi confidentius denegat. Nam radiatæ fibræ solæ cernuntur, orbiculares nullæ demonstrari possunt; earum tamen longe major est necessitas, ut contractionem pupillæ explices; nam dilatationem etiam sine fibris fieri concipias. Deinde & radiatas fibras illas musculares esse negat, cum propriis experimentis didicerit, iridem in animali vivo omni irritabilitate destitui, neque etiam a lucis stimulo contrahi, si lucis radii per conum chartaceum in solam iridem determinentur, ut nervum opticum non feriant, per experientiam Clarissimorum Virorum FONTANÆ & CALDANI. Sed musculo proprium est esse irritabilem. Quare cum iris irritabilitate destituatur, etiam vi musculari careat necesse est. Hinc potius credit Vir Illustris ex influxu majori humorum in vascula iridis, plicas ejusdem, striasque serpentinas in rectitudinem evolvi, sic iridem dilatari, pupillam vero arctari; hunc ipsum autem influxum humorum in vascula iridis ex affecta per lucem vividiorum retina oriri, & aliquid inflammationi simile habere. T. V. pag. 378. 379. Nunc ad hanc Illustris Viri sententiam reponi potest, fibras musculares vel per autopsiam innotescere, vel si visum effugiant, ab effectu cognosci, si verus in parte motus apprehenditur, & is quidem motui musculari similis. Jam vero iris manifeste & constringitur & dilatatur, possunt ergo fibræ musculares in iride supponi, etsi demonstrari non possint. Neque enim valet argumentum hoc: Nullæ in iride fibræ musculares cernuntur, ergo nullæ adsunt, quia novimus quanta sit exilitas fibrillarum muscularium, quæ nisi magno numero aggregatæ in sensus non incurrunt. Aut si hoc argumentum, ut HALLERUS prætenedit, vim habet, etiam istud vim habebit eandem: motum iridis ex influxu humorum in vascula iri-

dis pendere demonstrari non potest, nec HALLERUS, nec ullus alius anatomicus vidit copiosorem fieri influxum in vascula iridis, dum pupilla stringitur; ergo motus iridis non pendet ab ejusmodi influxu in vascula iridis. Non video certe ullam disparitatem, eademque difficultas. & HALLERI hypothesein premit, & illam, quæ a fabrica muscolari iridis motum deducit. Deinde certum est, strias illas serpentinatas radiatas iridis differre a vasculis iridis arteriosis & venosis, quorum alius decursus est, differre etiam a nervis, cum nimis sint pro nervorum proportionem hæc striæ; videntur ergo aliquid a vasculis & a nervis distinctum esse; & albus color earundem fabricam muscularem non excludit. Differre a vasculis & a nervis ipse agnovit HALLERUS, etsi dissimulando ita præterit, ut expresse non determinet; agnovit idem ZINNIUS. Jam porro interrogo, quomodo Viri Clarissimi absolute pronunciare potuerint, non esse musculares fibras? Pronunciant solum ita, nec addunt rationem, quæ sufficiat. Denique non obscurum est, quantum hac in re tergiversetur HALLERUS. Jam enim omnem iridi irritabilitatem denegat, ut vidimus, & pag. 376. Tom. V. addit: „si aliquot a morte diebus pupilla iterum arctatur (qualia observata sunt), „is effectus est exhalantis humoris aquei, atque adeo minoris spatii, cui iris prætenditur. „Et pag. 379. longe aliter loquitur de hoc effectu. Ita enim habet: „Non oportet hic „paradoxum sed certo mihi visum phænomenon non dissimulare. In fele juniore iris 23. post submersionem hora erat amplissima, & lens per eam pene opaca adparebat. Volebam ad „PETITI morem calore modico fornacis eam opacitatem dissipare. Ecce post minutum fere primum oculum refero, & invenio pupillam pene clausam, — tum infert: diu er-

„go a morte caloris stimulus vires iridem di-
 „latantes in motum excitavit. „ Sed hæc non
 consonant cum antea dictis, ubi pupillæ post
 mortem arctationem defectui humoris aquei ad-
 scribit, hic vires iridem dilatantes in subsidium
 vocat, quas caloris stimulus etiam diu post mor-
 tem excitarit. Et alio iterum loco pupillam ab
 irritatione nervorum mechanica etiam contrahi
 admittit, pag. 376. Non video autem, quo-
 modo hoc consentiat, si irritabilitate iris desti-
 tuitur. Et illud denique facile probat, nimium
 esse HALLERUM, quod etiam sensilitatem iri-
 di omnem adimat, quam numerosis nervis præ-
 ditam esse certo constat, siquidem ciliares ner-
 vi, nullo ad choroideam dato ramulo, in iridem
 solam desinunt. In *primis lineis* tamen parum
 sensilem pronunciat. Sed hæc omnia satis of-
 tendunt, quam parum sibi ipsi constans sit Ce-
 leberrimus HALLERUS, quam ipse vacillet &
 nutet in dubia hypothesi. Cautius hoc in ne-
 gotio processit Clarissimus ZINNIUS, qui strias
 illas radiatas iridis omnino & a vasculis & a
 nervis distinguit. Nam etiam post felicissimam
 injectionem, inter vascula tamen multæ fibræ
 albidæ, & membranæ fere substantia, vasorum
 mole multo major, superest; eademque fibræ
 tanta sunt copia, ut pro nervorum propagini-
 bus haberi non possint, „ etsi negandum non
 „ sit, plures nervos ad iridem mitti, molis
 „ nempe hujus partis habita ratione, quam ad
 „ ullam forte aliam corporis humani partem, si
 „ cordis musculum excipiamus. „ Ex his ita in-
 fert Clarissimus Vir : „ quum autem omnis ana-
 „ tome consentiat, partibus musculosis plurimos
 „ semper impendi nervos, ut, quo plures ad-
 „ sint fibræ musculosæ, eo plures nervi partem
 „ illam adeant; partes autem ex vasculis & te-
 „ la cellulosa potissimum conflatas eo pauciores
 „ accipere nervos exemplo viscerum, „ dubius

„certe hæreo, an non fabrica musculosa in iri-
 „de agnoscenda esse videatur, & annon summa
 „illius mobilitas fibris musculosis inter plurima
 „vascula admittis tribuenda sit? Hæc ZINNIUS.
 Ex quibus apparet, non admodum firmo loco
 stare Hypothesin HALLERI. Nunc vero ea so-
 lum difficultas superest, quod nullæ fibræ orbi-
 culares in iride appareant, quibus maxime opus
 esset ad constringendam pupillam; nam a ra-
 diatis illis agentibus solum dilatationem pupil-
 læ expectes, dum contractæ annulum mino-
 rem versus majorem trahunt. An tamen ad-
 sunt orbiculares fibræ, sed inconspicuæ & sub
 radiatis absconditæ? Etiam alibi orbiculares sub
 longitudinalibus latent. An potius fibræ illæ
 arcuatae, quæ circulum illum ferratum iridis
 constituunt, antagonistæ sunt fibrarum radiata-
 rum? An nullis omnino fibris orbicularibus
 opus est? An potius a relaxatione fibrarum ra-
 diatarum pupillæ constrictio oritur? Id *Halle-
 rianæ* opinioni propius accederet, ea tantum
 differentia, quod ille sola vascula dilatari ad-
 mittat. Dicam, quod mihi videtur. Fibras ra-
 diatas iridis musculosas esse omnino persuadeor,
 cum distinctæ sint a vasculis & nervis etiam
 fatente Accuratissimo ZINNIO. Nunc hæ fibræ
 agentes abbreviatæ necessario pupillam distra-
 hunt, velum iridis arctant. Actio ergo illarum
 est pupillæ dilatatio. Cum autem sint sine anta-
 gonismo, agent perpetuo, nisi illarum conditio
 ab alia causa mutetur; pupilla ergo naturaliter
 semper dilatata & amplior erit, iridis area minor.
 Pone nunc fibras illas quacumque de causa re-
 laxari, minuetur illarum actio, & elongari eas-
 dem necesse erit. Sic enim in aliis musculis res se
 habet; agentes fibræ crispantur in rugas undula-
 tas, relaxatæ in rectitudinem explicantur. At-
 qui in iride prorsus idem fit admota luce vi-
 vidiore; nam fibræ illæ radiatæ antea undula-

tæ & corrugatæ nunc manifeste elongantur & rectiores fiunt; ut omnino coincidant in phænomeno cum fibris muscularibus relaxatis. Jam vero dum relaxantur, necessario velum iridis expanditur, & in quantum iris latefcit, in tantum pupillam diametro minui neceffe est; ergo absque fibris antagoniftis explicari poteft pupillæ contractio, quæ reipfa contractio non est, fed relaxatio fibrarum radiatarum iridis. Nunc in eo ab HALLERO differo, quod ego a relaxatis fibris, ille a relaxatis vasculis, phænomenon repetamus. Dixi rationem non unicam, cur ab HALLERO dissentiam, nunc aliam addo, quæ non optime Clariffimo Viro favet. Nempe quando pupilla ampla est, striæ illæ radiatæ iridis magis serpentinæ sunt, dum pupilla stringitur, striæ fiunt rectiores. Hoc phænomenon non consentit opinioni HALLERI; etenim ab influxu humorum majore in vascula serpentine flexa adeo flexiones non abolentur, ut potius multiplicentur teste ipso Clariffimo Viro, qui de eo certiffime per anatomicas injectiones convictus est, & alibi id ipsum phænomenon diferte in libris fuis retulit. Adeoque ex HALLERI theoria fequeretur, ut vascula iridis tunc magis flexuofa fiant, quando majore humorum affluxu iris expanditur, pupilla minuitur; atqui phænomenon plane contrarium est; non ergo a vasculis plus repletis pupillæ arctationem repetere vellem. Sed quanto magis illi systemati phænomenon contrariatur, tanto exactius convenit cum phænomenis fibræ muscularis relaxatæ. Id vobis tamen mirum videri poffet, quod a luce, quæ potius ftimulus videatur, relaxationem iridis repetam; fed idem mirum vobis videri debet in *Halleriano* systemate. Porro autem fi attendatis, relaxationem eam iridis non ab affecta iride, fed a nervi optici affectione pendere, neque iridem, fed retinam a luce

stimulari, atque adeo omnem lucis actionem in retinam exerceri, & ab hac deinum affecta eam in inde mutationem sequi, disparebit admiratio. Id quippe per omnia phaenomena certum, etsi nulla communicatio inter iridis nervos & opticum extra encephalon appareat, tamen iridis motum unice ab affectione nervi optici pendere. Amplissima est pupilla foetui, cujus retina nulla luce afficitur, amplissima est in tenebris, minuitur diameter pupillae pro quantitate & vividitate radiorum lucis nervum opticum afficientium. In amaurosi perfecta, ubi caecitas ex vitio nervi optici adest, pupilla ampliter patet, neque contrahitur etiam proxime admota luce; nempe quia nervus opticus insensibilis est. Dilatatur etiam in cataracta, quando lens vitrea oculi opaca radiis lucis transitum prohibet ad retinam; tum tamen subinde admota luce contrahitur, ex paucis radiis oblique penetrantibus; & id adhuc bonum utcumque signum est, quia retinam adhuc sensilem denotat, & vitium in sola lente haerere, quae eximi potest. In apoplexia, comate soporoso, aliis ejusmodi cerebri morbis, pariter dilatata est pupilla; nempe iis in casibus retina oculi insensibilis est. Stringitur ad objecta propiora, quae vividius retinam afficiunt; dilatatur ad remotiora, quae ceteris paribus debilius radiant. In ophthalmia, ubi retina ex impetu humorum vividius afficitur, & ipsa pupilla coarctatur &c. Adeo ut semper ab affectione retinae & nervi optici, numquam ab ipsius iridis affectione, motus iridis pendeat. Quomodo autem id fiat, cum nulla connexio inter nervos ciliares & opticum nobis innotescat, perpetuo nos latebit. Sufficit nobis interim scire, quod ita fiat, & quod a debili luce affecta retina, fibrae radiatae iridis stringantur, pupilla dilatatur; contra vivide affecto nervo optico, fibrae iridis relaxentur, pupilla arctetur. Phaenome-

non illud HALLERO observatum, quod 23. a morte horis a calore iridem extendi & pupillam minui viderit, nostræ theoriæ nihil obest, nec mihi paradoxon videtur. Caloris erat effectus; calor relaxabat iridem, inde angustia pupillæ. Nec cum HALLERO ad stimulum vellem recurrere, cujus nulla jam efficacia esse potest, sensilitate retinæ abolita.

§. D X X I.

Hoc loco breviter recensenda sunt vasa oculi, etsi solum de vasculis iridis agat BOERHAAVIUS; non possumus autem de his dicere, nisi simul mentio fiat ceterorum, unde hæc oriuntur. Unica igitur est principalis oculi arteria, & reliquarum arteriolarum mater *ophthalmica*, quæ ab interna carotide in cranio intra receptaculum duræ matris ad latus sellæ equinæ edita, sensim sub nervo optico, antrosum & introrsum migrat. Ea ramos non solum partibus oculi externis, glandulæ lacrymali, palpebris, adnatæ, musculis oculi, & alium ramulum ethmoideum alibi dictum naribus largitur, sed edit etiam arteriolas ciliares, & centralem, quæ interiora ipsius oculi adeunt. Et de centrali quidem arteriola dictum est, & adhuc alio loco seorsim dicetur. Sed ciliares arteriæ partim ex ipso ophthalmicæ trunco, partim ex ejus ramis ortæ, quatuor & pluribus etiam trunculis serpentine flexis circa nervum opticum, quem comitantur, ludunt, ejusque involucrum ramulis aliquibus adeunt, & circa finem ejus communicantes circulum veluti arteriosum efficiunt. Inde prope nervi optici insertionem in parte postica oculi in plures finduntur furculos, ut quindecim, viginti, & ultra ramuli scleroticam perforent, alii autem tenuiores ramuli scleroticæ exteriorem faciem perreptent. (ZINN. Tab. III. fig. I.) Qui autem scleroticam per-

tundunt

tundunt ramuli, duorum sunt generum, aliæ plures & posteriores, quæ ciliares breves, aliæ anteriores duæ solummodo, quæ ciliares longæ arteriolæ dicuntur. Ciliares breves sive posteriores, sæpe ultra viginti recta scleroticam pertundunt, omnesque mox ab ingressu arbuscularum similes, ad acutos angulos ramosæ, per choroideam antrorsum pergunt, ita ut ramuli inde enati densissima serie sibi appositi & paralleli fere inter se decurrant, tamen & in itinere suo ramulis transversis inter se conjuncti, retiola forment elegantia, unde innumeri & minimi secedunt flocculi, qui concavam choroideæ, aut *Ruyfchianæ* faciem undique villosam reddunt. Atque hic potissimum illarum arteriolarum in interiore choroideæ superficie decursus est. In exteriori ejus superficie alius est vasculorum & potissimum quidem venosorum, reptatus, magis vorticofus, & radiatus, ut jam supra dixi de choroidea. Ubi ad anteriora choroideæ & ad orbiculum ciliarem perveniunt hæ arteriolæ, transversis ramulis in eodem fere plano ita inter se uniuntur, ut circulum constituent, in animalibus elegantissimum, in homine obscuriorem; ab eo circulo plurima vascula, tecta cellulositate orbiculi ciliaris, sed valde extenuata, circulum iridis adeunt.

— Sed arteriolæ *ciliares longæ*, (ZINN. Tab. III. fig. II.) seu anteriores dictæ, duæ potissimum, singula in singulo oculi latere, oblique pertusa sclerotica, nervulis ciliaribus arctissime junctæ, recta antrorsum inter scleroticam & choroideam decurrunt, non nisi paucis & minimis ramulis ad choroideam emissis. Prope orbiculum ciliarem eadem arteriolæ utrimque divaricantur, & ramulis suis se mutuo amplexæ, circulum formant ad radicem uveæ, cui ramuli anteriores ciliarium brevium se immiscent. Hujus circuli vasculosi fabrica elegantissima est; & ab eo numerosa vascula in uveam & iridem de-

scendunt forma radiorum, alia majora, alia minora, serpentina & flexuosa versus minorem tendunt, & sæpissime in medio itinere ramulis transversis emissis inter se junguntur. Plurimæ tamen & majusculæ arteriolæ ad confinia annuli majoris ita inter se coeunt & cum vicinis binæ semper in arcum inosculantur, ut inde circulus alius formetur, quem minorem iridis vocant, non semper tamen in omni ambitu continuus. Ex convexitate horum arcuum, & a vasculis etiam solitariis circulo non unitis, innumeri furculi oriuntur, quorum alii recta via per annulum iridis minorem versus centrum pupillæ excurrunt, alii iique plurimi ad alterutrum latus deflectunt, & itinere cum limbo iridis parallelo in annuli modum circumducti, oram internam iridis legunt, quæ vascula imprimis pro fibris orbicularibus nonnullis anatomicis imposuisse videntur. Arteriis hisce omnibus suæ respondent venulæ, aliæ in choroidea quasi stellatum decursum exhibent, ut dixi, aliæ ab iride & uvea reduces longæ similes arteriarum, inde paucioribus at majoribus trunculis quam arteriæ, per mediam scleroticæ partem exeunt, ciliares venæ dictæ, redeuntque ad venam ophthalmicam, quæ se in sinum aliquem duræ matris, non perpetuo eundem, aut in venam aliquam duræ matris, exonerat, incerto & inconstante ordine. Eadem vena ophthalmica recipit venulas exteriores oculi musculares, lacrymalem, ethmoideam, & venulam centram, quæ arteriæ centrali sociata per medium nervum opticum ex interiore oculo recurrit. (Venas ciliares, & venulas choroideæ ac iridis vide apud ZINN. Tab. IV. fig. II. majores oculi venæ Tab. III. fig. IV.) In fœtu circa iridem peculiare quid notandum est. Adest nimirum membranula tenuissima, cinerea, ex interiore iridis margine nata, in

quam undique vascula iridis prolongata, minima, non sanguifera, arte tamen replenda, excurrunt, quæ membranula, in foetu pupillam claudit sive obtegit, & ab HALLERO pupillaris dicta est. Ad septimum usque mensem in foetu humano constanter reperitur; ab eodem in lucem edito, maturo abest, nullo ejus vestigio superstiti. Quem in foetu usum habeat, ignoratur. Magna lis de hac membranula inter HALLERUM & ALBINUM exorta est, quum sibi gloriam inventi posterior vindicaret.

§. D X X I I.

Dixi, membranam choroideam, scleroticæ concentricam, ubi ad limbum nascentis corneæ pervenit, huic ipsi limbo circulari mediante celluloso plexu necti, cui nomen impositum est *orbiculi ciliaris*; inde introrsum fere recta extendi in iridem ac uveam corneamque subtendere. Jam porro retro uveam ex eodem orbiculo ciliari undique oritur alia membranula, choroideæ & Ruyschianæ continua, annularis, versus nasum tamen angustior, latior nonnihil versus tempora, secundum omnem sui longitudinem plicata, plicis & striis tenerrimis, quæ nigro undique pigmento obductæ, ab orbiculo ciliari & ab uveæ circulo maximo postorsum eunt, & membranæ humoris vitrei in omni ambitu lentis crystallinæ imponuntur, & adhærescunt membranæ vitreæ, finibus autem libere per lineam circiter fluctuantibus lenti crystallinæ paulo ultra ejus circulum maximum imponuntur solum, nec adhærent lenti in humano saltem oculo. Tota hæc membranula plicata, aliis *ligamentum ciliare*, aliis *corpus ciliare*, aliis *processus ciliaris* appellatur, aut ipsæ illæ striæ seu plicæ seorsim *processuum ciliarium* nomine insigniuntur. Choroideæ propaginem esse hanc membranulam hodie certo constat; plicis sit

alterne majoribus, suapte natura quidem albis, sed nigro pigmento *Ruyfchianæ* obductis, eoque per aquam eluto plicæ albæ remanent. Plicæ vero hæc observante Clarissimo ZINNIO nihil sunt nisi congeries arteriolarum minimarum, quæ a ciliaribus posterioribus tunicæ choroideæ oriuntur, & in plicas processuum ciliarium producuntur, ita ut ultra viginti sæpe arteriolæ ad singulam plicam veniant, quarum decursum pulcherrima icone expressit, Tab. II. fig. III. Observavit & venulas his arteriolis respondere, quæ ad venas vorticosas choroideæ abeunt. Plicas autem in ambitu hujus corporis ciliaris facile 70. numeravit, quæ oculo sponte occurrebant. Fines illarum plicarum, qui liberi margini lentis crystallinæ incumbunt, nulla membrana intermedia nectuntur. Quando porro de vitreo humore corpus ciliare accurate removetur, tum in membrana vitrea cernis similem, striatum, radiatum annulum, undique in ambitu & paulo ultra marginem lentis crystallinæ, striis nigris, in formam fere circuli dispositis, conspicuum. Hæ striæ sunt fines processuum ciliarium membranæ humoris vitrei adhærentes, & supra lentis convexitatem anteriorem aliquantulum producti, ibi autem finibus suis liberi. Annulum mucosum vocat HALLERUS, quia per mucum nigrum solummodo corpus ciliare humori vitreo necti credit. Circulus hic striatus non inepte comparari potest cum corolla floris radiati; ejusque striæ perfecte respondent plicis corporis ciliaris. Quod vero ad usum corporis ciliaris attinet, dissident inter se physiologi. BOERHAAVIUS & multi alii Clarissimi Viri plicas has vi musculosa præditas esse crediderunt, & muscularem fabricam, quasi certo jam demonstratam illis tribuit BOERHAAVIUS, ut ex textu apparet. Sed neque de actione musculari processuum horum concordant.

Alii enim ab his lentem antrosum trahi & pupillæ admoveri, alii lentem explanari, statuerunt, atque ita in oculo mutationem nasci, sine qua non possemus objectum aliquod in diversa distantia distincte cernere. Quid de hac re censendum sit, & quomodo oculus objectum idem in diversa distantia positum distincte cernere possit, alibi examinabimus, ubi de visu generatim dictum fuerit. Nunc interim notare juvat, nihil omnino musculosi processibus ciliaribus inesse, sed meris vasculis compositos cerni, ubi felicissima injectione repleti microscopio subjiciuntur; nec ullam fibrillam nerveam ex nervis ciliaribus ad hos processus abire, sed omnes in iridem desinere, quod omnes observationes Clarissimi ZINNII testantur. Hinc iste usus processuum ciliarium cum sua hypothese cadit. Celeberrimus HALLERUS cum in cadaveribus brutorum quadrupedum lentem crystallinam ita a vitrea tunica liberam reperiret, ut se pro lubitu subverteret, credidit hinc aliquod debere esse vinculum lentis crystallinæ, quod eam in situ suo retineret; hoc vinculum esse corpus ciliare, idque duobus modis lentem sustentare; & primo quidem processus hosce finibus suis, etsi liberi videntur, tamen ope muci nigri ad lentem agglutinari, quantum satis sit; & certo agglutinari ad membranam humoris vitrei in ambitu lentis, ut non sine aliquo separantis manus momento secedant; & in animalibus majoribus corpus ciliare fieri ex membrana utriculosa, cujus finis crassiore quasi ansa terminatur, adeoque firmiter amplecti lentem possit. Addit in confirmationem prioris observata sua in oculis quorundam animalium, in quibus firmo nexu corpus ciliare ad lentem adhæret; & hinc fere credit, apices liberos processuum ciliarium naturaliter quidem lenti agglutinari, sed accedente putredinis initio, mucum eum nigrum solvi, &

hinc libere fluctuare eos fines. Sed respondeo, exempla ab animalibus desumpta, in quibus alia manifeste fabrica sit, nihil probare. *Secundo* si ratio, cur libere fluctuent fines processuum ciliarium, esset in incipiente putredine, eadem utique causa processus hos ab humore vitreo solveret. *Tertio*, Clarissimus ZINNIUS etiam in oculis recentissimis ex cadavere desumptis, & oculis animalium quorundam recentissimis pariter caute indagando, semper libere fluctuantes invenit fines horum processuum. *Quarto*, nexus horum processuum cum vitreo humore ad lentis firmitatem nihil potest conferre, ut intuenti patet. *Quinto* denique ex eo, quod in cadavere, in oculo marcido, collapsio, perfosso, discisso, lentem crystallinam instabilem adeo in sua capsula deprehenderit HALLERUS, non illud sequitur, eam perinde instabilem esse in oculo integro, humoribus pleno, turgido, & etiam externa vi difficulter compressibili. Mihi quidem, omnia dum perpendo, is videtur processuum ciliarium usus verosimillimus esse, ut radios lucidos, qui nimis obliqui per pupillam hic & illic in oculum illabuntur, atro suo pigmento suffocent, ne visum turbent, quum ejusmodi obliqui radii in focus concentrari non possint. Hanc ob rationem corpus ciliare atro illo pigmento obductum est, & hanc ob rationem proxime in ambitu lentis humori vitreo nequitur, quo nexu fit, ut non alii radii, quam qui in lentem incidunt, retinam afficiant; deme autem corpus ciliare, & jam radiis valde obliquis iter patet, ne lentem prætervehti, per humorem vitreum in partem lateralem retinæ inciderent, adeoque visum necessario turbarent. Pone processus ciliares quidem sic factos nexosque, ut sunt, sed atro pigmento destitui; & jam radii lucidi obliquiores in parietes corporis ciliaris incidentes reflecterentur, & reflexi miscerentur aliis,

cum quibus tamen in focum coire non possent; hinc denuo visum perturbarent. Neque ob aliam causam solemus tubos opticos intus nigra charta exasciare, ut omnibus notum est. Et si recte consideras, quid aliud est corpus ciliare, quam tubus opticus, etsi brevissimus, ab uvea ad ambitum lentis extensus?

§. D X X I I I.

Prius quidem de retina agendum esset, quæ intima oculi tunica, ex vasculis arteriosis & venosis, & medullaribus optici nervi fibrillis composita, choroideæ concentrica, humorem vitreum ambit. Sed hujus descriptionem BOERHAAVIUS §. 525. dedit, & fere perinde est, modo notetur, humorem vitreum choroideæ non esse contiguum, sed inter hanc & illum, retinam intercedere, de qua postea seorsim dicetur. Hinc dum BOERHAAVIUS in textu dicit, *corpus vitreum tenuissimis undique vinculis choroideis cavo nexum esse*, id experientiæ anatomicæ non respondet, nisi processus ciliares pro illis vinculis sumas, qui utique choroideam cum vitreo humore nectunt. Est autem humor vitreus, improprie sic dictus, corpus sphæricum, nisi quod ab anteriore parte concavitatem quamdam impressam habeat, qua lentem recipit, pellucidissimum, adeo ut aquæ impositum non videatur, nisi vestigia processuum ciliarium in eo relictæ, nigris striis se proderent. Ob eam pelluciditatem corpus hoc *vitreum* dictum est; humor autem vitreus appellatur, quia revera humore pellucidissimo, intra subtilissimas cellulas & pellucidissimas membranas incluso, constat. Humor ille aquæ naturæ est, neque a fervida, neque ab igne cogitur, sed totus exhalat; congelatione pariter ut aqua indurescit simulque expanditur, ob aërem, qui per gelu extricatur. Non tamen pura & simplex aqua est, sed illa lentior & ma-

gis viscosus, minus in homine, præcipue autem in animantibus quibusdam. Aquam etiam pondere superat, utpote in qua fundum petit; sed ille excessus ponderis valde exiguus est, & forte tantummodo a membranulis ejus humoris pendet; densitatem enim humoris vitrei, ad densitatem aquæ, non majorem habere rationem, quam 10,024. ad 10,000. Celeberrimus WINTRINGHAM observat. Ceterum hoc corpus vitreum mole sua totam fere sphaeram oculi interiori, sive cavum, a concentricis oculi tunicis relictum, usque fere ad uveam replet. Coërcetur autem membrana subtilissima, quam græco nomine hyaloidem, latino vitream appellant. Facillime ostenditur hæc membranula vulnuscule inflicto, & flatu per tenuissimum siphunculum immisso, quo manifeste elevatur. Sed eadem membrana non solum commune externum involucrum humori vitreo præbet, sed intus etiam septula cellulosa plurima efficit, ut adeo humor vitreus quasi subdivisus in multis pellucidissimis cellulis & loculamentis membranæ hyaloideæ contineatur. Vulnuscule enim membranæ huic acicula inflicto, non mox totus humor vitreus effluit, sed guttula solum unica; si in alio loco simile vulnuscule infligas, similis guttula exstillabit; quod non fieret, nisi humor ille per septula membranosa subdivisus esset. Eadem septula distincte apparent in humore vitreo congelato, ut etiam specillo attolli & a glaciabilibus humoris vitrei particulis separari possint. Etiam ubi per ignem exhalavit aquula humoris vitrei, in glomorem quasi membranularum contrahitur. Cellulas autem illas in se mutuo patere observat Clarissimus ZINNIUS, quia vulnuscule, licet parvo inflicto, per id unum tamen totus humor paulatim exsudat. Sed etiam sine læsione membranulæ suæ, oculis tantum in aëre suspensis, sensim pondere imminuitur,

& vicissim in aquam demersus cito pondere augetur. Exhalat igitur humor iste per poros suæ membranulæ, eademque similem iterum imbibit. Atque ex hoc concludere possumus, humorem istum perpetuo in sanitate renovari, secerni, resorberi secretum, ejusque loco novum succedere. Habet certe vascula humor vitreus, etsi olim incognita, de quibus hodie nullum dubium est, a quibus ejus humoris secretionem expectes. Ea vascula ab arteria centrali retinæ oriuntur, pellucidum jam humorem vehentia, & ideo inconspicua. In felicissima tamen injectione vascula illa dilatata ceram recipiunt, tumque apparet arteriola, quæ per medium humorem vitreum ad ipsam usque lentem crySTALLINAM excurrit, & ramulos etiam laterales subtilissimos spargit. Humorem vitreum ranarum non difficillime cera injici posse, Celeberrimi GASSERI, præceptoris olim mei, observatio fuit. In foetu vascula illa naturaliter ampliora sunt, & humor vitreus, ut & de cornea dictum, roseo ac fere dilute sanguineo colore tinctus est; & in foetibus caninis recens natis, quorum palpebræ adhuc conglutinatæ erant, Clarissimus ZINNIUS certissima fide observavit in humore vitreo arteriolam sanguine plenam, quæ ex arteria centrali retinæ nata per corpus vitreum recta ad lentem fertur, & in itinere plurimos furculos rubellos tenuissimos in cellulas humoris vitrei distribuit, & alios itidem ex illo trunculo ramulos exortos vidit per exteriorem humoris vitrei superficiem repentes. In adulto autem animante, aut & in homine jam nato & adulto, omnia hæc vascula ob pelluciditatem inconspicua sunt; & ipse humor vitreus limpiditatem suam crySTALLINAM per omnem vitam conservat, nec vitio ætatis mutatur, dum lens crySTALLINA constanter per annos minus pellucida, & in senio extremo etiam

opaca fit. Per morbos tamen subinde opacatur, etsi rarius, quod vitium glaucoma appellatur, & immedicabile est. Nunc his expositis videamus, quomodo humor vitreus lentem crystallinam antè recipiat, qua parte concavus est. Difficilia hæc sunt, & Clarissimi etiam Viri in hac fabrica evolvenda impegerunt. Alii simpliciter membranam humoris vitrei supra anteriorem lentis faciem se projicere, & ita lentem ad humorem vitreum applicatam retinere dixerunt, WINSLOWUS autem tunicam vitream duabus lamellis constare, posterius arcte sibi mutuo agglutinatæ, antè eas lamellas a se discedere, & mediam lentem complecti, docuit, ut adeo lens in duplicatura tunice vitreæ hæreret. Alii membranam vitream posterius quidem simplicem esse, antè solum duplici folio constare, quorum alterum lenti se subjiceret, alterum eam super-scanderet, statuerunt, atque hæc sententia non multum a Winslowiana abludivit. Sed longe aliter res se habet ex observationibus accuratissimi ZINNII. Dicam breviter, & quam potero distinctissime, qualis hic nexus partium sit. Lens crystallina in propria capsula membranacea inclusa hæret, quæ & anteriorem & posteriorem ejus faciem tegit, sic tamen ut libera intra eandem & nullibi huic capsulæ connexa lens sit. Pars anterior hujus capsulæ pellucidissima quidem, sed valde elastica, & satis crassa ac tenax est, imprimis in animalibus majoribus, quæ nisi vi adhibita acie scalpelli percindi non potest, ZINN. pag. 136. Multis ergo modis superat membranam vitream & robore & crassitie; neque adeo hoc lentis involucrum a membrana vitrea repeti potest. Pars posterior capsulæ multo quidem tenuior & mollior & debilior est, distincta tamen a membrana vitrea, cum etiam integrum humorem vitreum, illæsa membrana vitrea, a parte poste-

riore hujus capsulæ solvi posse, non semel expertus fuerit ZINNIUS. Nunc vero capsula hæc modo plane peculiari cum membrana vitrea nequitur. Nempe antè undique pone circum maximum lentis, qua parte processus ciliares humori vitreo incumbunt & adhærentes illum annulum mucosum, jam dictum, formant, ibi loci sub ipso hoc annulo membrana vitrea reapse duas format lamellas, aut certe, quod ZINNIUS vult, novam producit lamellam, quæ prius non fuerat. Harum lamellarum anterior, inter corpus vitreum & processus ciliares progressa, sensim quo propius ad lentem accedit, eo magis a corpore vitreo dimovetur, & demum in convexitate anteriore lentis, ultra circum maximum, illius capsulæ inferitur. Lamella vero posterior vitreæ membranæ discedit ad originem processuum ciliarium & ad posteriorem lentis convexitatem venit, illique simili ratione tenaciter nequitur, non ipsi quidem lenti, sed parti posteriori capsulæ. Anteriorem illam lamellam peculiari nomine *coronam ciliarem* CAMPERUS, *zonam vero ciliarem* Clarissimus ZINNIUS appellavit. Quum vero zonula hæc in capsulam lentis inserta, a posteriore lamella aliquo intervallo exiguo distet, & circularem ambitum habeat, necessario spatium quoddam exiguum triangulare curvilineum inter posteriorem & anteriorem lamellam intercedit, in quod, inflicto vulnuscule, aërem impellere datur, qui undique sub zonula hac in circularem fere canalem distribuitur, & zonulam manifeste elevat; vocatur canalis iste *Petitianus* ab inventore Celeberrimo PETITO. Ejusdem ubique latitudinis est, ac corpus ciliare, latior ergo ad tempora, minus latus ea parte qua nasum respicit. In oculo recenti vacuus semper reperitur, & mechanica necessitate factus in statu naturali solo vapore repleti videtur. Flatus autem in eum canalem

immiffus numquam in capsulam lentis penetrat, nec ex capsula tranfit in canalem, nec ex canali *Petitiano* in humorem vitreum, aut viciffim, ut certum fit, nullam inter has partes communicationem effe, qualis adeffe deberet, fi capsula lentis ex duplicatura membranæ vitreæ fieret, ut multi docuerunt. Zonula illa præterea a prima fua ex tunica vitrea origine, ufque ad infertionem fuam in capsulam lentis, ftriis fulcata eft, quibus fulcis ftriæ proceffuum ciliarium adhærent. Iisdemque fulcis respondent plurimæ fibræ transversæ, ipfa illa membranula breviores, quæ illam per intervalla fic stringunt & arctant, ut, aëre in circulum *Petitianum* inflato, fpatia illius canalıs alterna flatu turgida, alterna ftriata cernantur, & fi comparationem inftituere liceat, figuram fere exprimere videatur intefhini coli flatu repleti & a fuis ligamentis alterne corrugati. Vid. ZINN. Tab. VII. fig. I.

§. D X X I V.

Lens cryftallina a figura, quam habet, lenticulari & cryftallina pelluciditate ita dicta, in anteriore excavata fede humoris vitrei propriæ capsulæ membranaceæ inclufa hæret, directe pupillæ obverfa, ita tamen, ut centrum ejus magis ad internum oculi angulum accedere videatur. Duplici confat fuperficie convexa, anteriore in homine planiore, posteriore magis gibba, ut adeo ex duplici fphæræ segmento compofita fit. PETITUS quidem & WINSLOWUS aliquando æqualem utriufque fuperficieı convexitatem obfervarunt, imo & anteriorem convexitatem majorem fuiſſe; fed id certe rarius eſt, & nunquam in hominibus ZINNIO viſum. Hoc autem iſte deprehendit, eo magis ſemper utramque lentis faciem convexam eſſe, quo propior origini homo eſt, (vid. Tab. VII. fig. 4. 5. 6.) ut in fetu aut infante recens nato, ad figuram fe-

re sphæricam accedat; eo contra planiorem fieri, quo homo adultior fuerit; post annum tamen trigesimum parum amplius figuram lentis mutari aut diminui. Coloris autem mutationi multo magis, quam humor vitreus, obnoxia lens est. In fœtu non solum capsula, sed ipsa lentis substantia interdum rubello colore tincta est; sed in homine in lucem edito summam statim pelluciditatem acquirit, tota excolor. Ab anno autem vigesimo quinto aut trigesimo levissimam cum pelluciditate flavedinem contrahere incipit, quæ per ætatem intenditur, ut anno septuagesimo vel octuagesimo fere succini flavi colorem habeat, in aliis etiam vitio humorum citius opacatur, & albedinem radiis lucis imperviam contrahit, quod vitium cataracta appellatur. Flavedinis initium in centro fieri observat ZINNIUS, inde ad marginem lentis sensim diffundi; sed & cataractæ passim e centro lentis originem sumunt, cujus phænomeni ratio in eo est, quod alioquin in centro lentis compactior substantia sit. Facile etiam a morte opaca fit, ut primum cadaver calorem amiserit; sed restituitur pelluciditas leni calore applicato, qualis homini naturalis est. Opacatur & congelatione, & citissime in spiritu vini cum lacteo colore, successu temporis etiam flavescente. Fabrica lentis plane peculiaris est, ex lamellis pellucidis sibi succedentibus, versus centrum arctius compactis, & per fibras cellulosæ tenuis telæ brevissimas connexis. Lamellæ illæ facile ostenduntur maceratione in aqua, vel simplici, vel acidiuscula facta, addito succo citri vel aceto. Imo ZINNIUS ulterius progressus lentem crystallinam pulcherrimo spectaculo in sena primum, dein protracta maceratione in octona triangula æquicrura, inter se tamen inæqualia & stellæ quasi figuram exhibentia dehiscere vidit (*Tab. VII. fig. 7.*) & ipsum nucleum lentis

solidiorem maceratum in segmenta triangularia dividi, quorum singulum iterum in duo alia minora dehiscat triangula, quæ ad intimam usque substantiam, lamellarum cepæ ad instar, a se invicem attolli & dividi facile possunt. Præterea in dissecta lente & aëri exposita vidit per circum-
 lum lentis maximum, decurrentem lineam, quæ perfecte monstrat, segmentum antèrius posterio-
 ri non continuum, sed ambo sibi mutuo appli-
 cata, & cellulosis filis connexa esse. Hæc cellu-
 losa brevissima, squammulas & lamellas lentis
 connectens facile apparet, dum lamellæ a se
 mutuo divelluntur; & in hac cellulosa inter fo-
 lia & squammulas lentis, humiditas aquea inter-
 cedit, quæ exsiccationem lentis & opacitatem
 præcavet. Sed & in capsula lentis aliquis con-
 tinetur humor lentem obliniens, aqueus, cujus
 quantitas dimidii fere grani est, & qui impri-
 mis lentis cum capsula concretionem impedire
 videtur. Densitatem etiam lentis crystallinæ di-
 metiri aggressi sunt Clarissimi Viri, etsi non con-
 veniat inter eos, & calculi varient. •Densio-
 rem aqua esse, certo constat, cum huic immersa fun-
 dum celeriter petat; densiorem esse vitreo &
 aqueo oculi humore, pariter certum est. Sed vi-
 tro multo minorem densitatem habet, siquidem
 a pondere vitri sub eodem volumine plus quam
 duplo superetur. Non ergo licebit assumere vim
 refringentem in lente crystallina tantam esse,
 quanta vitro est, ut vulgo quidem assumi sole-
 bat. Magis tamen radios lucis refringet, quam
 aqua & humor vitreus, cum iste aquam minima
 proportionè densitatis superet, lens vero ad
 aquam fere se habet, ut 11:10. Tum porro,
 quia constat, corpora particulis inflammabilibus
 prædita, lucem efficacius attrahere, quam pro
 ratione densitatis solius possent exemplo spiri-
 tus vini, & quia lens particulis ejusmodi magis
 abundat, quam aqua aut humor vitreus, erit

etiam ex hac ratione major illius vis refringens. Literarum, quibus imponitur, magnitudinem insigniter auget, & magis quam humor vitreus. De capsula lentis nihil addo, cujus fabricam supra exposui. Supereft, ut de vasculis lentis cryftallinæ dicam.

Tamen & suis vasculis construi ratio docet, ait BOERHAAVIUS. Dixi antea lentem in sua capsula liberam, nullibi huic accretam, intercedente aquula lubricam, desiderare; & id etiam experientiae satis respondet; nam incisa capsula, sive in vivo homine, cui cataracta deponitur, sive in oculo cadaveris, lens continuo sedem suam derelinquit & ex capsula exsilit, quod non fieret, si capsulae suae alicubi accreta esset. Verum si libera in capsula sua detinetur lens crySTALLINA, non videretur constare vasculis, siquidem ea non nisi per capsulam recipere potest. Fecit certe haec libertas lentis, ut Clarissimi Viri MAITREJEAN & PETITUS negarent lentem vasculis ullis constare, & peculiari modo nutriri crederent, dum humorem a vasculis tenuissimis in cavum capsulae secretum & effusum solum imbiberet. Sed recentiore aetate industria Clarissimorum Virorum vascula in lente crySTALLINA certa fide detexit. Et ALBINUS quidem olim in oculo balænae vascula ex processibus ciliaribus ad ipsam lentem venire, & a parte postica per ejus substantiam ramosa sese distribuere vidit & demonstravit; & in humano denique oculo idem Vir Illustris detexit ramulum arteriosum, ortum ab arteria centrali retinae, qui per axin humoris vitrei recta antrorsum excurrens, in mediam posteriorem capsulae partem abit, ibique in ramulos dividitur, quorum multi furculi ad interiora usque lentis se demergunt. Vidit eandem arteriolam HALLERUS, & ex processibus quoque ciliaribus vascula ad lentem delata, ramosa conspexit. Vi-

dit autem ZINNIUS in oculis catulorum recens natorum arteriolam ex centrali ortam, & sanguine rubro plenam, quæ per medium humorem vitreum, cui in itinere tenuissimos ramulos tribuit, recta ad lentem fertur, & in capsulæ posteriore lamella ramulos edit, qui tenuioribus furculis in ipsam lentis substantiam penetrant. Talia præparata quoque LIEBERKÜHNIIUS habuit; talia & Viennæ in Theatro Anatomico olim nobis ostensa fuerunt. Ut adeo de vasculis lentis hodie dubium supersit nullum; sed hæc adeo tenuia sunt, ut non nisi in foetu, aut felicissimis injectionibus in conspectum prodeant. Et ob eam tenuitatem fit, ut, lens incisa capsula, facillime abruptis vasculis, libera profiliat, & reapse libera in sua capsula hæsisse videatur, etsi omnino per vascula debilissima connexa fuerit. Ceterum his arteriolis suas venulas respondere ex analogia concludere licebit, etsi venulæ nondum demonstratæ sint.

§. D X X V.

Sequitur descriptio tunicæ retinæ quæ intima est, & ex nervo optico producta. Supra dixi, nervum opticum non recta sed obliqua via bulbum oculi subire, ut quidem in centro diametri altitudinis, non autem in centro diametri latitudinis oculi, sed parti oculi interiori, quæ nasum respicit, propior inferatur, quo ipso fit, ut axis nervi optici non in axin oculi aut visus incidat, cujus rei quæ fuerit necessitas, suo loco videbimus. Porro dixi nervum opticum, dum scleroticam subit, angustari & in papillam fere conicam contrahi; deinde, ubi angustissimus est, offendere laminam tenuissimam, orbicularem, pellucidam, cribrosam dictam, quæ multis, triginta circiter foraminulis pertusa est; per ea foraminula dissolutam quasi nervi optici medullam

lam cum tenerrimis filis cellulosis trajici, etiam centralem arteriam & venulam per propria foraminula eaque ceteris majora transire. Nunc trajecta lamina cribrosa, medulla nervi optici mox expanditur in speciem tenerrimæ subtilissimæ membranæ, quæ retina appellatur, & a dicto loco inter humorem vitreum & choroideæ tunicæ interiorem superficiem, huic ipsi concentrica, humorem vitreum in modum hæmisphæricæ cupulæ amplectitur, libera tamen & ab humore vitreo & a choroideæ; a choroideæ enim nullum plane vasculum retinam adit, neque ad humorem vitreum præter centralem arteriolam a retina vasculum advenit. Postquam ita humorem vitreum amplexa est, antè ad principium processuum ciliarium adhæret circulo evidente & paulo crassiore. Ab eo circulo HALLERUS & alii Clarissimi Viri laminam a retina tenuiorem emissi observarunt, quæ corpus ciliare intus convestiens inter annulum mucosum ad lentem producitur, ejusque capsulæ antè adhærescat, & retinam quoque cum vitrea membrana nectit: Sed eam laminam negabat Celeberrimus ZINNIVS, & suspicatur zonam ciliarem aliis visam pro hac lamina habitam fuisse. Vascula retina habet manifeste, rubra aliqua, quorum ramuli mox pellucunt, & decolores humores vehunt; injectione tamen & illa sanguiferis minora vascula ceram coloratam admittunt. Oriuntur hæc vascula ab arteria centrali nervi optici, quam alibi dixi; ea per laminam cribrosam penetrans, mox per retinæ interiorem, humori vitreo contiguam faciem incedit ramosa ramulis quibusdam sanguine conspicuis, & in vivis animalibus & in mortuis; sed illi ramuli continuo minores edunt, sola injectione manifestandos, ex quibus integra membrana vasculosa fit, quæ interiorem retinæ superficiem constituit, & humori vitreo proxime

incumbit, dum substantia medullosa nervea exteriora tenet choroideæ contigua. Hinc retina ex duplici lamella composita esse videtur, interiore mere vasculosa, exteriori medullari nervea. Nihilominus tamen unica & simplex oculi tunica plerisque habetur anatomicis, quia nulla arte humana medullaris lamella exterior ab interiore vasculosa solvi, aut altera ab altera detrahi potest. Nempe etiam hic idem obtinet, quod in aliis organis sensuum vidimus, ut ubique nervorum in organo sentiente distributis extremitatibus juncta sint vascula subtilissima arteriosa & venosa. Sic in organo tactus & gustus papillæ nerveæ non fiunt mere nervea substantia, sic neque retina mere nervea expansio est. Præter vascula autem interiori retinæ superficiem formantia, simul subtilissima tela cellulosa adest, illa vascula ordinans, cujus tenuissima fila pariter per laminæ cribrosæ foraminula se in retinam insinuarunt. Ab eadem porro arteria centrali retinæ, quam mox descripsi, ramulus minimus, in fœtu quidem rubellus, sed in homine nato, jam pellucidissimum humorem vehens, subit medium vitreum humorem, sparsisque per illum ramulis minutissimis recta progreditur antrorsum & mediam capsulam posteriorem lentis, & ipsam denique lentis substantiam in centro subit, perque illam dividitur, ut supra jam monui. Alia denique vascula ex ramulis retinæ anterioribus inter processus ciliares & vitreum humorem versus lentem decurrunt. Omnibus his vasculis suæ respondent venulæ, quæ in venam centralem retinæ & optici nervi jam dictam desinunt. Est autem ea omnium horum vasculorum tenuitas, ut exempta ex oculo retina in speciem muci mollissimi collabatur, & in aqua solum fluctuans, utcumque se sustineat.

Habet & lymphatica. De his nihil constat. Celeberrimus VALSALVA, quem BOERHAAVIUS citat, ait se vidisse in retina bovis vascula pellucida lymphatica; sunt & alii auctores, qui pariter lymphaticorum vasorum mentionem faciunt. Sed illi quidem omnes vascula viderunt pellucida, sanguineis minora, quæ quodam sensu lymphatica dici possunt, distincta autem sunt a vasis proprie dictis lymphaticis venosis & valvulosis, qualia in oculo certa fide hætenus deprehensa non sunt. Neque etiam glandulæ conglobatæ in vicinia sunt, quæ lymphaticâ reciperent.

§. D X X V I.

In oculo sic structo, quemadmodum dixi, duæ adhuc cavitates spectandæ sunt, quas *cameras oculi* vocant. Earum alia anterior, alia posterior est. Camera anterior appellatur illud spatium, quod inter concavam interiorem corneæ superficiem & iridem ac pupillam comprehenditur; posterior camera dicitur spatium inter uveam & lentem crySTALLINAM ac processus ciliares interceptum. Utramque hanc cameram replet humor aqueus. Celeberrimus PETITUS Med. Paris. multa experimenta instituit, ut capacitatem utriusque camerae, & quantitatem aquæ in singula contentæ determinaret. Congelatio oculi adminiculum parum firmum videbatur, quum expansus congelatione humor aqueus, situm partium naturalem mutet: itaque post varia tentata ultimo demum accuratissimis dimensionibus mathematicis invenit, capacitatem camerae anterioris = esse 12. lineis cubicis cum $\frac{1}{4}$; posterioris vero camerae capacitatem = lineis cubicis 6. & $\frac{12}{100}$; cameram ergo anteriorem insigniter majorem esse posteriore, & illam quidem grana II. $\frac{42}{100}$ humoris aquei, hanc granum I. & $\frac{52}{100}$, seu

vix non I. fem. continere, siquidem granum I. aquæ spatium occupet = lineis cubicis 4. & $\frac{6}{100}$. *Memoir. de l'Acad. de Paris* 1728. non accurate retulit *Hallerus*. Male hinc WINSLOWUS, SENACUS & LIEUTAUD cameram posteriorem oculi negarunt, lentemque uveæ contiguam posuerunt, decepti forsitan ex mutato situ partium in oculo congelato. Nam si etiam PETITI dimensionibus careremus, certum tamen est, inter uveam & lentem aliquod spatium, etsi minus intercedere, cum etiam in foetu, cujus pupilla per propriam membranulam occlusa est, inter pupillarem membranam interque uveam & lentem aliquis humor aqueus reperiatur, ut alia argumenta omittam, cum hodie alioquin vix quisquam amplius dubitet. Utraque hæc cavitas simul sumpta grana 4. & $\frac{8}{100}$ humoris aquei continet ex calculo PETITI, & ad grana 5. subinde ascendit. Minor ejus portio in foetu est, cui cornea crassior & lens convexior spatium utriusque cameræ minuit. In statu naturali semper utramque cameram exacte replet, & corneam in sphæroideam superficiem distendit; in moribundis autem deficit, & hinc illis cornea collabitur, nec necesse est ad hujus phænomeni explicationem cum BOERHAAVIO liquidum nervum advocare; constanter enim cornea collabitur, ut primum humor aqueus aut deficit, aut per vulnus effluit, ut fit in depositione cataractæ. Natura hujus humoris omnino aquea est, non coagulabilis ad ignem, neque ab alcohole, nec ab acidis; calore totus volatilis aufugit. Fluidissimus est, & pellucidissimus; in foetu autem turbidus & rubellus, & per morbos quoque subinde turbatur, & sunt, qui in senio turbidiorem fieri observarunt. Quam facile per corneam transpiret & exhalet, patet, si oculi animalium recens mactatorum aliquamdiu in aëre aperto destineantur. Cum adeo facile resorbeatur & tran-

spiret, clarum est, perpetuo novum in sanitate fecerni debere. Hoc ita fieri demonstrat experientia, siquidem incisa cornea, dum cataracta deponitur, mox omnis humor aqueus effluit, sed idem deligato oculo intra spatium 48. horarum, imo etiam citius, renatus cernitur, & corneam antea collapsam nunc denuo distendit, quæ res olim ignota favit aliquo tempore BURRHO circulatori, quintam essentiam Chelidoniæ in perduto visu jactitanti, donec deprehensum est, humorem aqueum sponte naturæ renasci, oculo solum deligato, & quocumque molli fomento, aut etiam nullo imposito subinde etiam nimia copia fecernitur & corneam in vitiosum tumorem protrudit. Ab arteriis fecerni hunc liquorem non est dubium; a quibus autem præcise arteriis fecernatur, disputant physiologi. Sed per me licet disputent; parum enim refert an ab arteriis iridis, an ab arteriis processuum ciliarium fecernatur; an ab utrisque simul; certe non video quid impediat, quominus & hinc & inde scaturigo humoris aquei derivetur. Recte autem notat BOERHAAVIUS, *ductus Nuckianos huic operi ineptos esse*, eo nempe sensu, quo NUCKIUS putavit. Ille enim duos peculiares ductus descripsit, & vocavit ductus aquosos, eosque fontes esse statuit, e quibus humor aqueus scaturiret. Sed demonstrarunt anatomici accuratiores, NUCKIUM deceptum fuisse & quos ductus aquosos invenisse sibi videbatur, fuisse arterias duas ciliares longas, rubrum sanguinem vehentes, quæ ad circulum iridis excurrunt.

Venulas adesse, quibus humor aqueus secretus resorbeatur, etsi certo demonstratæ non sint, suadet perpetua ejusdem secretio sine accumulatione tamen, suadet analogia ab aliis omnibus cavitatibus deducta, suadet denique turbidi per morbos humoris aquei sensim obser-

vata evanescencia, ut restituta pelluciditas. Pars autem ejus humoris omnino per poros inter corneæ lamellas penetrat, eas humectat, flexiles, pellucas conservat, & denique etiam per poros antèrius patentes exteriorem corneæ superficiem irrigat & exhalat.

§. D X X V I I.

De lente crySTALLINA jam egit BOERHAAVIUS §. 524., quo ejus situm potissimum consideravit, nunc præsentè paragrapho ejus fabricam expendit. Ego superiore loco omnia conjuncta tradidi, quare nihil jam dicendum restat. Id solum moneo iterum, centrum lentis crySTALLINÆ non perfecte axi oculi respondere, sed paulo propius versus angulum internum, quam axis oculi est, axin lentis crySTALLINÆ esse.

§. D X X V I I I.

Etiam vitrei humoris situm & fabricam, conjunctim tradidi atque absolvi. Unde & huic paragrapho supersedeo. Quæ autem BOERHAAVIUS hic de fibris arcuatis, seu processibus ciliaribus, adfert, quibus credit humorem vitreum in ambitu ita premi, ut lens crySTALLINA fibris illis agentibus situm suum mutare cogatur, & corneæ propior fiat, a retina magis elongatur, vicissim illis relaxatis magis a cornea removeatur, propior fiat retinæ, atque ita ad objecta in diversa distantia posita se accommodet, quod ad hæc inquam attinet, partim jam supra monui, processus ciliares musculari fabrica destitui, & membrana solum subtilissima, plicata, tota vasculosa constare, atque adeo actionem muscularem processuum horum ex hypothese fingi; partim vero alio loco videbimus, quomodo fiat, ut in diversa objecti ab oculo distantia, visus nihilominus distinctus habeatur.

Multa enim adhuc præmitti debent, priusquam ad eam quæstionem descendere liceat.

§. D X X I X.

De membrana adnata seu conjunctiva etiam jam egi, dum fabricam palpebrarum exposui. Male hanc a perioſteo orbitæ deducit BOERHAAVIUS. Est continuatio tunicæ interioris palpebrarum.

§. D X X X.

Inſectis immobiles oculos natura dedit, ſed immobilitatem compenſavit numero oculorum, quos ita multos plerisque tribuit, ut nihilominus vaſtum ſpatium viſu complecti, & multa ſimul corpora uno obtuitu intueri poſſent. Quadrupedibus, piſcibus, avibus, homini, mobiles oculi ſunt, & mobile præterea homini caput, ut immoto reliquo corpore pluſquam integrum hæmiſphærium, partim oculorum, partim capitis motu intueri poſſit. Sunt autem muſculi, qui oculum in homine regunt, in univerſum ſex, quatuor recti, & duo obliqui. Recti vel a ſitu, vel ab officio nomen habent, eſtque rectus attollens, vel ſuperior, rectus deprimens vel inferior, rectus adducens, vel internus, rectus abducens, vel externus. Nam denominatio ſuperbi, humilis, bibitorii, indignatorii, quibuſdam anatomicis recepta, mihi non placet. Obliqui quoque a ſitu nomen habent, eſtque alius obliquus ſuperior, alius inferior. De horum jam origine & inſertione ſeorſim dicendum eſt. Muſculus rectus ſuperior, ſive attollens, oritur obliqua origine partim ex perioſteo orbitæ, partim a dura nervi optici vagina, paulo interiorius quam levator palpebræ; inde ex tendineis fibris carnoſus factus aſcendit ſupra bulbum oculi, ad eum multa cellulosa tela revinctus, antrorſum tendit, & ſuperato oculi circulo maximo deſcen-

dens, iterum tendinescit, & tendine latiore, fere quadrato, in partem superiorem & anteriorem scleroticæ, jam corneæ propinquam inseritur. Agens igitur oculum sic rotat, ut pupilla sursum dirigatur, utque objecta supra altitudinem oculorum posita, etiam non moto capite intueri possimus; conspirante simul in eandem actionem levatore palpebræ. Id autem facit non reipsa attollendo oculum, sed rotando. Musculi enim hujus origo nequaquam altior est ejus insertione, imo potius inferior est, quia circa foramen opticum exoritur; sed quia ex ea origine ascendit supra bulbum oculi, & circa eum antrorsum ac nonnihil deorsum inflectitur, hinc ipse bulbus oculi huic musculo hypomochlion præbet; dumque contrahitur, oculum rotat, & superiorem ac anteriorem scleroticæ partem retrorsum ac sursum trahendo, ita oculum vertit, ut pupilla & axis visus sursum dirigatur. Atque id de reliquis quoque musculis rectis oculi perinde tenendum est, qui omnes circa bulbum oculi inflectuntur, & cum rotant, in suum quidem latus singuli.

Hujus musculi antagonista, rectus inferior, seu deprimens, tum etiam reliqui duo, rectus internus & externus, commune habent principium, inferiore loco sub nervo optico situm, natum ex dura matre nervum opticum involvente (ZINN. *Tab. V. fig. III. lit. f.*) inde quisque ad suum latus tendit, adducens ad internum, abducens ad externum, deprimens ad latus oculi inferius; quisque porro circa bulbum oculi, ejusque maximam convexitatem inflexus, simili modo, ut de attollente dictum est, tendinescit, antè in scleroticam inseritur; & singulus agens in suum latus oculum vertit. Ita rectus inferior partem anteriorem & inferiorem scleroticæ ita trahit, ut pupilla deorsum dirigatur, quæ actio e diametro opposita est actioni recti attollentis.

Rectus adducens sive internus oculum ita rotat, ut pupilla introrsum versus nasum dirigatur, rectus abducens, sive externus contraria ratione sic bulbum vertit, ut pupilla versus exteriora dirigatur; hinc & indignatorius appellatur, quia oculos avertimus ab homine, cui indignamur. Atque hæc istorum muscutorum actio est, dum seorsim operantur. Dum autem varie inter se conspirantes agunt, oculus aut figitur, aut motu movetur composito. Omnibus quatuor rectis simul agentibus oculus figitur, qui severus aspectus est; figitur etiam duobus antagonisticis simul agentibus, si neuter horum prævaleat. Si autem duo muscoli recti, oblique sibi oppositi simul agant, oculus ita vertitur, ut pupilla mediam sequatur directionem, quæ linea diagonalis est parallelo-grammi, cujus latera sunt ipsi illi muscoli. Ita si rectus superior & internus simul agant, pupilla oblique sursum & introrsum dirigatur; contra si rectus externus cum superiore conspiraret, pupilla sursum & extrorsum oblique iterum dirigatur. Ita rectus inferior cum interno agens eandem oblique introrsum ac deorsum versus nasum genamque vertit, idem rectus inferior cum externo pupillam oblique deorsum & extrorsum dirigit; si alterne remittentibus viribus agunt, potest oculus in ambitum rotari. Admodum irritabiles esse hos musculos observavit Celeberrimus WHYTT, sunt etiam mobilissimi; nam certe continuo fere & absque intermissione operantur, maxime vero lectione, unico enim tempusculo unicum fere punctum distinguimus, aut distincte cernimus; fit autem motu celerrimo horum muscutorum, ut plures simul literas lineasque, uno velut obtutu percurramus. Non possumus autem proprios horum muscutorum motus in speculo videre, sed solum oculum alterius inspiciendo, cujus rei ratio valde clara est. Dum enim ante speculum positus e. g. ocu-

los voluntario motu vel sursum tollis vel deprimis, vel introrsum adducis, vel avertis extrorsum, iis omnibus in casibus axis visus a speculo avertitur, hinc neque tunc oculos tuos in speculo cernis, ut primum vero oculos tuos iterum in speculo cernis, jam ipso hoc momento in situm pristinum restituti sunt, ut axis visus directe speculo obvertatur. Hoc præterea mirabile & notatu dignum phænomenon est, quod muscoli oculi dextri naturaliter semper conspirent cum musculis oculi sinistri, adeo ut ambo oculi semper parallelo motu moveantur. Si dextrum oculum a naso ad latus orbitæ externum abducis, sinister sponte sua, ut videtur, tantumdem introrsum versus nasum accedit, quantum dexter a naso ad latus externum deflectit, & vicissim, si hunc versus nasum trahas, alter tantumdem versus exteriora orbitæ movetur, ut semper sibi paralleli sint. Si dextrum attollas, attollitur etiam sinister, si illum deprimas, etiam hic deprimitur. Imo vero dum oculos movere non videris, moventur quasi sponte sua & parallelo motu. E. g. si objectum aliquod recta intuearis, & caput declines, semper tamen illud ipsum objectum intuendo, tum in ea ratione, in qua caput e. g. dextrorsum rotas, oculi ambo te nesciente volvuntur sinistrorsum & vicissim, si modo objectum perpetuo sub intorsione capitis recta intuearis. Et hoc phænomenon in speculo cernere licet, quia axis oculi directe speculo obvertitur. Si speculum intuens, nulla positiva voluntate oculos movendi, caput rotes in latus dextrum, semper intuendo speculum, videbis oculos tuos ambos, quos non jussisti moveri, moveri tamen & moveri sinistrorsum & situ moveri semper parallelo. Agunt tamen in hoc casu voluntarie, etsi non videantur. Voluntas enim tua est, ut etiam averso in dextrum latus capite speculum semper videas, necesse ergo est, ut muscoli ocu-

los moveant in latus oppositum, alioquin oculi speculo recta via obversi non essent, sed una cum capite averterentur; neque adeo speculum averso capite videres, quod tamen videre vis. Et idem fit, quaecumque demum objectum moto capite intuearis, modo illud intuearis constanter sub ipso motu capitis. Parallelus autem ille oculorum motus fere ex utilitate percepta nascitur, & per consuetudinem confirmatur. Nam infantes recens nati facile oculos distorquent & lусi fiunt, nisi bene iis invigilemus, & manifeste arbitrarios habent utriusque oculi motus, sensim vero discunt oculos parallelo motu regere, & utrumque objecto recta obvertere; inde per consuetudinem hic parallelismus oculorum adeo invalescit, ut oculos distorquere difficile nobis videatur, & aliquo conatu egeat, exceptis aliquibus, qui se in eo artificio peculiariter exercuerunt, aut qui ex vitio morbofo, vel vitio a pueritia superstite lусi sunt.

Superfunt adhuc dicendi musculi obliqui, superior & inferior. Musculus obliquus major, superior, vel trochlearis etiam dictus, longissimus & gracillimus oculi musculorum oritur etiam pone foramen opticum, juxta musculum adducentem, ab ipsa dura matre orbitæ periofteum formante, principio tenui tendineo. Gracili dein ventre carneo juxta latus internum orbitæ procedit antrorsum ad canthum internum, tumque in tendinem gracilem abit. Pro hoc tendine natura præparavit orbiculum proprium cartilagineum, ossi frontis ad canthum internum sub supercilio affixum. Per eum orbiculum cartilagineum, tamquam per trochleam, musculi hujus tendo trajicitur, inde reflexus retrorsum simulque extrorsum, & deorsum ad mediam superiorem partem scleroticæ venit, sub musculo recto attollente, paulumque posterius, quam sit linea media hæmisphærium oculi antèrius a postèrio-

re dividens, inferitur scleroticæ, tendine hic dilatato. (vid. ZINN. *Tab. V. fig. 1. 2. & optime fig. 4.*) Hinc agens trahit partem scleroticæ superiorem antrorsum atque introrsum versus trochleam suam, & oculi bulbum ita rotât, ut pupilla introrsum ac deorsum dirigatur, ut alas nasi intueri possimus, & partem genarum prominulam, siquidem valde turgeat, ut in obesitis.

Obliquus inferior, sive minor, solus in parte anteriore orbitæ oritur, inter foramen ductus nasalis & laminam osseam, quæ canalem infraorbitalem tegit, loco medio; mox carneus extrorsum vergit inter musculum deprimentem & oram orbitæ; inde simul oblique retrorsum & sursum circa bulbum oculi inflexus sub musculum abducentem per latus oculi externum ascendit, & inter hunc musculum & rectum attollentem scleroticæ inferitur sine tendineo. Agens igitur, scleroticæ partem, cui inferitur, deorsum & extrorsum trahit, oculum ita rotat, ut pupilla sursum & introrsum versus radicem nasi & originem supercilii dirigatur. Est antagonista obliqui superioris. Dum vero ambo simul agunt æquatis viribus, oculus antrorsum urgetur, quæ actio his duobus propria est; nam recti quatuor, oculum antrorsum trahere non possunt, utpote in fundo orbitæ exorti, potest autem id obliquus inferior, qui antè originem sumit, & superior, ob trochleæ mechanismum, quo actio ejus versus canthum determinatur. (*Fig. obliq. infer. vid. apud ZINN. Tab. V. fig. 5.*) ceterum motum oculi multa ex parte juvat pinguitudo copiosa huic circumstrata, cujus jam alibi mentionem feci. Visum est quibusdam anatomicis tunicas oculi augere nova accessoria, quam *albueam* dixerunt, & quæ ex confluxu tendinum, oculi musculorum fieret. Verum demonstravit ZINNIUS, & alii accuratissimi Viri, tendines

musculorum rectorum, tum & obliquorum, etsi ad insertionem suam latebant, distinctos tamen semper manere, nec inter se confundi aut commisceri, & immixtis in scleroticam fibris tam arcte huic affigi, ut sine laceratione ulterius dividi non possint. Magno semper intervallo a se remoti cum sint, neque se mutuo contingant, etiam nullam oculi tunicam formare possunt.

§. D X X X I.

Haftenus dicta solum fabricam oculi spectabant, quæ præsciri debet, antequam ejus functio exponatur. Nunc absoluta anatome, reliquum est, ut explicemus, quomodo visus peragatur. Multa autem hic assumenda sunt ex optica, catoptrica, dioptrica, in illis scientiis demonstrata, quibus tamquam fundamentis explicatio nostra nitetur. Primum autem de luce agendum.

§. D X X X I I.

Lux est illud ipsum, quod facit, ut objecta extra nos posita videamus; quidquid enim videtur, ope lucis videtur. Num quid ab igne diversum sit lux? num eadem & lucis & ignis materies? certo definiri non potest. Sæpe quidem eadem corpora & calent & lucent, simulque ignea & lucida sunt, & lux solis concentrata omnes ignis effectus edit, etiam violentissimos. Sed etiam dantur corpora calida & multo igne prædita, nec lucentia tamen, exemplo ferri calefacti solum, nondum candentis; & vicissim lux sine calore vividissima habetur, dum lunares radii ope speculi Villetiani in focum concentrantur. Et iterum lucis materies corporibus adhæret, ut ignis, exemplo phosphori urinæ, qui & ipse in tenebris lucet, & aliis corporibus vim lucentem communicat. Est ergo cer-

te non levis inter utramque materiem similitudo, si etiam prorsus eadem utriusque indoles non sit. Suspiciantur quidem Viri Clarissimi non aliam esse inter lucem & ignem differentiam, quam quod lux rectilineo motu moveatur, ignis motu perturbato exagitetur; si uterque motus in corpore quopiam adsit, tunc & ignem & lucem percipi, si alteruter tantum, calorem sine luce, aut vicissim subsistere. Hæc dici possunt, demonstrari non queunt. Sed neque hæc quaestio multæ utilitatis est, certe nullius est in medicina, hinc illi nolo inharere. Volens etiam illam philosophorum quaestionem prætereo: an lux omnis a sole emanet, ut *Newtoniani* volunt, an vero jam per universum diffusa materies lucis existat, eaque a sole tantummodo in lineas rectas agatur, & tum demum luceat, quæ quidem probabilior sententia est, & sacri codicis auctoritate firmatur, cum lux tribus ante solem & stellas diebus, prima nempe die creata sit. Sed ab hisce præscindere possumus, utpote quæ parum ad rem præsentem faciant; sive enim hoc, sive illud fuerit, id in explicatione phænomenorum visus nihil mutat, quæ id solum exigunt, ut proprietates legesque materiæ luminosæ cognitæ habeantur, quas breviter ex physicis repetere necesse erit.

Primo : itaque ex omnibus phænomenis evidens, lucem corpoream esse substantiam, quum leges motus corporeas sequatur, cum & diffundi & concentrari possit, cum impenetrabilis sit, & in solidas corporum moleculas incurrens repercutiatur ad angulos æquales angulis incidentiæ, ceteras affectiones corporeas præ se ferat.

Secundo : Esse autem materiem forte omnium subtilissimam, quippe quæ solidissima corpora penetrat, quæ per vitrum & adamantem, imo & aurum viam invenit; nam certe aurum etsi alias

opacum, in tenuissimas tamen bractæas attenuatum subpellucet. Porro ea subtilitas alio convincente experimento innotescit. Si enim exiguum tenui acicula foramen in charta facias ac dein resupino corpore in terra recubans per id foraminulum cœlum aspicias, integrum cœli hæmisphærium cum omnibus suis stellis distincte vides; unde sequitur, ex immenso illo cœli spatio radios prope modum infinitos per illud exiguum foraminulum transire, adeoque hos radios infinitæ subtilitatis esse, & fere absque omni physica latitudine longos, similes fere lineis mathematicis.

Tertio : Lucem actu moveri, & moveri celeritate incredibili. Motum certe lucis demonstrat incidentis in particulas solidas reflexio, demonstrat ejusdem a planetis per maximam distantiam ad nostram usque tellurem repercussio, nam ea corpora non alia quam reflexa luce fulgent. Celeritatem autem lucis tantam esse, ut ex calculo Clarissim. Virorum ROEMERI, CASSINI & BRADLEY spatio 7. vel 8. minutorum & 13. secundorum distantiam = 24000. semidiametris telluris a sole ad nostram tellurem percurrat; atque ex calculo Clarissimi MUSSCHENBROECKII velocitas lucis sit ad velocitatem globi tormentarii, maxima possibili celeritate moti, ut 19., 615., 782., pag. 509. cum tamen vires corporum, computante LEIBNITIO, vivæ, sint ut massæ ductæ in quadratum celeritatis, lux interim, tam stupenda velocitate mota, ne quidem tenera plantarum folia aut flores lædat, patet quanta cum hac velocitate conjuncta esse debeat lucis particularum subtilitas. Nam si lucis particula solummodo $\frac{1}{34,000,000}$ grani partem adæquaret, ostendit MUSSCHENBROECKIUS, vim ejus non minorem futuram vi globi tormentarii 10. librarum, & maxima possibili velocitate moti. Sed hic enormis calculus tamen

insigniter diminuitur, si lucis motum in solis vibrationibus cum aliis reponas.

Quarto : Esse in tanta partium subtilitate materiem hanc tamen solidissimam, ut quæ leges reflexionis ad angulos æquales perfecte observat, quæ etiam omnia nobis nota corpora, utut durissima & fixissima, penetrat, dissolvit, destruit & in auras disjicit, quando speculis Villetianis, aut lentibus *Tschirnhausianis* in focus concentratur.

Quinto : Esse alia corpora, quæ propria luce radiant, five ea ex illis emanet, five stagnantem lucis materiem vi propria impellant. Hæc lucida vel luminosa dici solent, cujusmodi sunt sol, & stellæ fixæ &c. Esse alia, quæ non modo propria luce non radiant, sed ne quidem conspicua fiunt, nisi lucem ab illis recipiant, receptamque reflectant. Hæc illuminata dicuntur corpora.

Sexto : Lucem porro moveri motu rectilineo, quamdiu in ejusdem densitatis medio movetur, deflectere autem a pressio tramite, quoties in medium diversæ densitatis incidit. Hæc deflexio lucis *refractio* vocatur, distincta a reflexione, quum hæc sit repercussio lucis ab obstaculo solido, quod transire non possit, refractio autem declinatio sit, quæ in ipso lucis per corpora alia transitu contingit.

Septimo : Non solum per lineas rectas moveri lucem, sed etiam moveri per lineas rectas a puncto quocumque visibili in omnem ambitum æqualiter, adeoque moveri ab omni puncto radiante tamquam a centro ad peripheriam, ut adeo lineæ, per quas objectum videtur, sint radii a puncto quocumque visibili objecti tamquam a centro ad peripheriam emissi. Et hæc ratio est, cur lineas illas radios lucis appellare soleamus.

Octavo :

Octavo : Hinc radios lucis, five a puncto lucido, five ab illuminato sparsos, necessario divergere, & divergere eo magis, quo magis a puncto illo, tamquam a suo centro elongantur. Atque adeo intensitatem lucis esse in ratione inversa quadratorum distantiae a centro luminoso; id est, decrescere intensitatem luminis in ratione duplicata semidiametrorum, seu distantiarum oculi ab objecto. In dupla ergo distantia lucem quadruplo, in tripla noncuplo, in quadrupla sedecuplo debiliorem esse. Numerus enim radiorum idem manet, dum interim spatium, per quod radii diffunduntur, in dicta proportionem incrementum; adeoque in eadem proportionem luminis intensitatem, aucta distantia, decrescere necesse est.

Nono : Radios ergo a puncto visibili in omnem ambitum sparsos, divergentes, in corneam oculi tunicam incidentes, formare conum lucidum, cujus apex in illo puncto visibili, basis vero circularis in cornea est.

Decimo : Etsi autem radii omnes, five ab objectis lucidis, five ab illuminatis sparsi, reapse divergentes in corneam incidant, posse tamen & hos sine notabili errore pro parallelis haberi, si ex valde magna distantia adveniant, etiam mathematici largiuntur. Nam quo magis objectum ab oculo distat, eo minus advertitur illa radiorum inclinatio, & in valde magna distantia penitus evanescit, ut omnino paralleli videantur radii, qui nonnisi in immensa distantia concurrunt. Hinc radii solares ab omnibus pro parallelis sumuntur. Denique etiam cum corneae superficies exigua sit, & basin tamen constituat radiorum lucidorum, illique ipsi radii etsi divergentes, tamen admodum sibi vicini sint, hinc fit, ut etiam in distantia objecti ab oculo non maxima, radii jam pro parallelis & habeantur, & citra notabilem errorem haberi possint. Hanc distantiam

alii ad 200., alii ad 100. pedes, alii ad minus spatium restringunt.

Undecimo : Esse alia corpora, quæ vi suæ densitatis & figuræ, radios lucis magis divergentes reddunt; esse alia, quæ eosdem divergentes colligunt & in unum quasi punctum, sive focum, compellunt.

Duodecimo : Sed licet infinite sibi vicinos lucis radios, aut etiam in focum collectos, numquam tamen inter se confundi, sed singulum id punctum, unde advenerat, repræsentare. Id docent omnia catoptrica & dioptrica phænomena. In camera obscura infiniti radii, ab objectis externis reflexi, speculo plano excepti, reflexi ab eodem intra tubum, per lentem vitream trajecti, collecti denique in focum, in tabula alba foco lentis admota, omnes objectorum externorum imagines, palatiorum, civitatum, regionum, hominum, clare distincteque depingunt, etiam tam sæpe mutatis directionibus nequaquam inter se mixti, aut confusi.

Decimotertio : Lucem utut subtilissimam, non tamen homogeneam materiem esse, sed singulum lucis radium, arte ab immortali NEWTONO detecta, in septem alios, eosque primitivos dissolvi, rubrum, aurantium, flavum, viridem, caruleum, purpureum, violaceum, quemque distinctissimo colore præditum, & nativo. Hos conjunctos quasi in fasciculum, nil nisi candidum jubar exhibere.

Decimoquarto : Septem illos colores primitivos esse & ex horum varia proportionem, aut conjunctionem, omnes aliorum colorum varietates nasci; etiam in experimento *Newtoniano*, sicubi circuli in tabula alba ab his radiis depicti non satis discreti fuerint, sed se mutuo contigerint, in locis illis contactus, ex miscela primitivorum colo-

rum, innumeras, pene colorum mixtorum varietates cerni; si autem recte discreti fuerint, quemlibet radium suo nativo & purissimo colore cerni, nec mixtam apparere varietatem. Hos porro radios, jam a se mutuo separatos, adeo immutabilem naturam habere, ut dein nulla amplius arte, nulla quantumvis repetita refractione ulterius dividi, aut in alios radios findi possint, sed suum singuli colorem constanter retineant, nisi dum in unum denuo fasciculum colliguntur, quo facto candidum jubar seu fulgidam lucem exhibent, evanidis illis coloribus, nec nisi post novam refractionem apparituris. Recte ergo lucem colorum omnium aggregatum appellat BOERHAAVIUS.

§. D X X X I I I.

Corpora omnia illuminata vel pellucida sunt, vel opaca. Pellucida vocantur ea, quæ radiis luminosis transitum sic concedunt, ut trans illa locatum corpus videri possit; quæ vero radios lucis sic intercipiunt, ut trans illa locatum corpus in linea recta cerni ab oculo non possit, opaca dicuntur. Observatum est, ea corpora imprimis pellucere, quorum pori occupantur a medio, quod ad densitatem particularum corporis proprius accedit. Charta e. g. opaca est; eadem tamen aqua vel oleo imbuta jam multo magis pellucet, quia aqueæ & oleosæ particulæ propius ad densitatem particularum chartæ accedunt, quam subtilius fluidum, quod prius inter eas particulas latitabat. Vicissim aqua pellucida opaca fit, quando cum aëre in spumam abit, quia aëreæ particulæ interpositæ multum a densitate aquearum distant. Pro varia ergo particularum, corpus aliquod constituentium, textura, dispositione ac indole, corpora plus minusve opaca aut pellucida sunt, prout variegatæ lucis radios incidentes mutant. Sed ex eodem etiam

fonte colores corporum repetendi sunt ; licet enim primitivos septem colores jam ipsi luci inesse demonstratum sit, tamen iidem non apparent, nisi a se mutuo separarentur. Corpora ergo non apparent colorata, nisi radii lucis in superficiem horum incidentes mutarentur, a se mutuo separarentur, alique horum intra corpora absorpti, ab aliis divellerentur, alii vero a superficie corporum reflecterentur. Imo vero ne quidem conspicuum fieret corpus illuminatum ullum, nisi lucem ex sua superficie reflecteret ; nam lucida solum corpora per radios directos, illuminata omnia per radios reflexos videmus. Necesse ergo est lucem a corporibus reflecti. Sed simul necesse est, non talem a corporibus lucem reflecti, qualis in horum superficiem incidit, alias lucida solum corpora, nec colorata videremus. Lux enim ipsa colores suos tunc solum prodit, quando radii lucis antea conjuncti separantur, & separati seorsim, vel paucis aliis, nec tamen omnibus conjuncti, moventur. Igitur, dum corpora cernimus colorata, clarum est, non talem ab iis corporibus lucem reflecti, qualis in eorum superficiem incidit, sed vi ipsorum corporum peculiari radios antea conjunctos separari, separatofque alios refringi atque intra corpus attrahi, alios a superficie corporum repelli, aut reflecti, & talem coloris ideam in mente nostra nasci, quales radii a superficie corporum reflexi, in oculum nostrum inciderint. Hæc ita se habere certis NEWTONI & aliorum experimentis constat. Unicum tantummodo in confirmationem adferam. Si radius aliquis primitivus a reliquis separatus in cubiculo obscuro, immittatur in objectum aliquod coloratum alias, sed diversi coloris a colore ejus radii, e. g. si radius ruber immittatur in objectum alias flavum, objectum hoc non alio quam rubro colore, & eo quidem debili illuminatum conspicietur, neque quidquam

flavedinis apparebit. Unde clarum est, singulum radium primitivum sui coloris tenacissimum esse, & ipsi radio non objecto colorem inesse. Atque hoc primum. Si vero huic radio rubro opponatur objectum alias rubrum, illud intensa rube-dine illuminatum conspicietur, dum objectum alias flavum a rubro radio non nisi debili rube-dine lucet. Ex qua disparitate nunc alterum pa-tet, nempe licet color ipsis radiis, non vero ob-jectis insit, ex parte tamen colorem a superficie objecti pendere, quatenus illa diversimode radios hos illosve reflectit, aut absorbet. Hinc in prio-re casu a radio rubro in flavum alias objectum illapso debilis solum rubeo apparet; hujus enim corporis superficies ita disposita est, ut ceteros radios omnes fere absorbeat aut attrahat, flavos vero potissimum reflectat; nunc in hoc experi-mento flavum colorem reflectere non potest, cum non lucis radius compositus, sed simplex a ceteris separatur ruber illi tantummodo immit-tatur; rubrum autem radium hoc corpus pro maxima parte attrahit; hinc & flavo colore pro eo tempore caret, & rubro solum debili lucet. Immitte autem in idem objectum radium lucis integrum, septem suis primitivis conjunctis ra-diis constantem, & mox flavo colore eoque dis-tincto conspicuum apparebit. Ipsum ergo hoc objectum vi densitatis & structuræ suæ radios lucis primitivos conjunctos separat & flavos qui-dem potissimum reflectit, ceteros sex attrahit at-que absorbet. Quumque corpora illuminata per radios reflexos videamus, & nunc flavi præ aliis omnibus ab eo objecto reflectantur, necessario flavo colore objectum hoc apparebit. MUSSCHEN-BROECK *Essai* p. 553. quodvis ergo corpus diversi coloris diversos lucis radios attrahit, qui ad vi-sum nihil conferunt, & diversos reflectit, a qui-bus diversitas colorum pendet. Ita rubra ob-jecta, ceteris radiis attractis, rubros potissimum

repellunt & reflectunt, flava flavos, aurantia aurantios, viridia virides, cærulea cæruleos, purpurea purpureos, violacea violaceos. Compositi autem colores oriuntur, dum ab eodem corpore præter radios primitivos unius speciei, e. g. rubros reflexos, etiam alii radii sed pauciores reflectuntur, ac prioribus admiscuntur, mixtique varia proportionem, varie priorum nativum colorem temperant alterantque, quod imprimis fieri videtur, dum heterogeneæ particulæ in superficie alicujus corporis pluribus homogeneis interponuntur. Alba corpora sunt, quæ non certos præ aliis radios, sed ipsam lucem reflectunt; nigra, quæ omnes fere radios attrahunt & absorbent, lumenque paucissimum reflectunt. Hinc alba corpora a sole minus incalescunt, nigra maxime & citissime. Hæc magni NEWTONI theoria est, quam BOERHAAVIUS assumpsit.

Nunc de legibus reflexionis & refractionis breviter dicendum est, quas radii lucis observant, dum vel a superficie corporum reperiuntur, vel attrahuntur. De reflexione nunc dicendum est, refractionem sequentibus paragraphis expendemus.

Vulgo dicitur reflecti radius lucis, quando in solidam corporis moleculam impingit, quam penetrare non potest; quando autem in porum incidit, hunc ipsum subire & refringi. Verum exactissimus NEWTONUS, omnia hæc subtilius rimatus, accuratissimis experimentis invenit, radios lucidos ante immediatum superficiem corporum contactum incurvari & reflecti, ut bene advertit BOERHAAVIUS, & hinc a vi repellente corporis reflexionem radiorum pendere ipsamque reflexionem hanc nil nisi repulsionem esse radii, antequam adhuc solidas corporis particulas proxime contigerit. Repelli autem radium ea obliquitate, qua advenerat, & hinc angulum reflexionis, æqualem esse angulo incidentiæ, & si

perpendiculari via inciderit radius, etiam perpendiculari & eadem directione repelli, simili autem obliquitate in oppositum latus detorqueri, si oblique inciderit. Nullum esse ex illuminatis corporibus, quod non aliquos radios repelleret, & pellucidissima etiam corpora, ipsumque aërem, aliquos reflectere radios, etsi plurimos attrahant & refringant. Alia vero corpora vi densitatis & fabricæ suæ alios lucis radios attrahere, alios reflectere, & inde diversitatem colorum pendere. Esse etiam inter ipsos radios aliquam diversitatem, & alios horum ab eodem corpore magis aliis attrahi, alios magis repelli. Per reflexos denique radios etiam pellucida corpora conspicua fieri, quæ alias sensum nostrum nullatenus afficerent. Hæc pauca de reflexione lucis prænotanda sunt, plura alia in catoptrica docentur, quibus tamen in explicatione visus, quatenus is ab oculi fabrica pendet, supersedere possumus, cum oculus dioptrica potius quam catoptrica machina sit.

§. D X X X I V.

Spatium illud per quod radius lucis movetur, *medium* appellatur, sive illud a corpore occupatum sit, sive vacuum; nam etiam per inane spatium lux movetur. Nunc hæc perpetua lex observata est, radium lucis, quamdiu in ejusdem densitatis medio movetur, eandem semper quam primitus impressam acceperat, directionem rectilineam servare, neque a tramite suo quidquam declinare. Quando vero ex medio rariore in densius, vel ex densiore in rarius incidit, refringi, id est, a recto suo tramite declinare. Et quidem si ex medio rariore in densius inciderit, refringi ad perpendicularum, seu propius accedere ad lineam perpendicularem, quæ ad planam illius medii superficiem, & ad punctum, in quod radius incidit, duci concipitur; quodsi autem e

medio denfiore in rarius incidet, refringi a perpendicularo, feu magis declinare ab illa linea, quæ ad planam medii superficiem adque punctum incidentiæ perpendiculari directione ducitur; folis illis radiis exceptis, qui fine omni obliquitate in medium diverfum incidunt, hi enim viam fuam rectilineam irrefracti continuant, five ex denfiori in rarius, five ex rariore medio in denfius incidunt. Obfervavit autem Clariffimus NEWTONUS, prout radii, qui reflectuntur, ante contactum superficiem corporum, incurvantur, ita etiam eos, qui refringuntur, antequam superficiem corporis contigerint, incurvari & ad idem medium denfius attrahi; unde & refractionis caufam ab attractione repetiit. Prout jam nullum corpus vi attractiva deftituitur, ita etiam nullum eft, quod lucis radios non attraheret & refringeret; præcipue autem ea vis fpectabilis eft in pellucidis corporibus, habetque fe ceteris paribus in ratione denfitatis medii, per quod radius lucidus movetur. Itaque denfius medium radios lucis ceteris paribus fortius attrahit medio rariore. Ita aqua magis radios lucidos ad perpendicularum refringit, quam aër, vitrum magis quam aqua, adamas magis quam vitrum & alia minus denfa corpora, & aër denique magis, quam fpatium aëre vacuum, ut experimentis oftendit Celeberrimus MUSSCHENBROECKIUS, incurvari radium ad perpendicularum, dum ex vacuo in aërem trajicitur. Eft tamen diverfitas quædam obfervata in corporibus inflammabili principio abundantius præditis, quæ magis quam pro denfitatis fuæ ratione radios attrahunt & ad perpendicularum refringunt, exemplo fpiritus vini, olei terebinthinæ, olei lini; ut hinc nomine medii denfioris ad evitandam confufionem tale medium intelligi velit MUSSCHENBROECKIUS, quod radios fortius attrahit, five vi denfitatis unice, five etiam vi

abundantis in eo principii inflammabilis. Observavit etiam NEWTONUS diversitatem aliquam esse in ipsis radiis lucis primitivis; alios enim in refractionem proniores & magis obsequiosos esse, alios pertinaciores & minus refractu faciles ab eodem medio; præ omnibus aliis rubros radios difficillime refringi, inde reliquos, ut sibi succedunt ordine, facilius, omnium facillime & citissime violaceos refringi, & fortissime attrahi. Interea tamen hæc lex perpetua est, ut idem radius ab eodem medio semper æqualiter attrahatur, atque adeo æqualiter refringatur. Quo magis autem ad perpendiculum accedit refractus radius, eo magis ejus iter accelerari necesse est, quia duplici vi nunc movetur, altera nempe velocitate propria, quam antea habuit, & altera nova superveniente, vi attractionis quæ continuo increfcit, prout idem radius medio densiori vicinior fit. Cumque ceteris paribus attractio lucis se habeat in ratione densitatis medii, accelerabitur etiam motus radiorum in ratione densitatis medii, per quod moventur.

§. D X X X V.

Observarunt physici constantem esse rationem anguli incidentiæ ad angulum refractionis, posito medio eodem, eodemque radio, quacumque etiam obliquitate radius ille inciderit. Refractio etenim unice pendet a vi attractiva medii densioris, & hæc in ejusdem medii partibus æqualis est, adeoque idem medium æqualiter agit in omnes radios ejusdem speciei, quacumque obliquitate inciderint. In tantum nempe quivis radius, dum per medium densius fertur, a pristino suo tramite deflectit, in quantum fortius ab hoc medio attrahitur. Cum autem vis attractiva in omnibus ejusdem medii partibus æqualis sit, etiam æqualiter agit in omnes ejusdem speciei

radios. Sit e. g. vis, qua medium densius radios attrahit = 10. Hæc vis æqualis est in omnibus hujus medii partibus, & hæc vis agit secundum lineas perpendiculares. Singulo ergo radio ejusdem speciei oblique in quamcumque hujus medii partem incidenti accedent 10. momenta potentiae perpendiculariter agentis; & hæc decem momenta perpendicularis potentiae singulo radio accedunt, quacumque etiam obliquitate incidat. Verum singulus radius, qui oblique in medium incidit, duplici potentia movetur, altera perpendiculari, altera horizontali; & inter has mediam directionem servat, cum neutri simul possit obedire. Nunc ubi is in medium densius incidit, accedit ad potentiam radii perpendicularem alia potentia similis ab attractione medii; augetur ergo directio radii perpendicularis, non aucta directione horizontali; verum aucta vi perpendiculari, horizontali vero manente eadem, radius non potest pristinum suum tramitem continuare, sed diagonalem quidem utriusque directionis viam percurreret, magis tamen nunc ad perpendicularum accedentem, cum potentiae perpendiculari augmentum accesserit ex densitate medii. Deflectet ergo a suo tramite versus perpendicularum. Verum cum augmentum perpendicularis directionis ex attractione natum æquale sit respectu omnium ejusdem speciei radiorum; cumque radius refractus lineam diagonalem percurrat parallelogrammi, cujus alterum latus vis perpendicularis radii cum vi attractionis, alterum vis radii horizontalis constituit, clarum est, proportionem refractionis manere eandem, quocumque angulo radii inciderint, & radios eos, qui ad angulos majores inciderint, etiam ad majores angulos refringi, qui ad angulos inciderint minores, ad minores refringi; adeoque ut se habent sinus angulorum incidentiae ad se mutuo, ita etiam se habere sinus angulorum re-

fractionis ad se mutuo. Proportio autem hæc inventa est experimentis exactissimis, ut sinus anguli incidentiæ radii ex aëre in aquam illabentis sit ad angulum refractionis ut 4. ad 3.; radii ex aëre in vitrum, ut 17. ad 11.; ex aqua in vitrum ut 51. ad 44. Sed in superficiebus curvilineis refractione peculiari modo se habet, quod scilicet ex ipsa superficiiei curvilineæ ad incidentes radios obliquitate, hi peculiari modo vel jungantur, vel dispergantur. Si radii ex majore distantia venientes & paralleli in superficiem convexam medii aëre densioris incidant, sic refringuntur, ut in punctum conveniant & inter se concurrant. Id punctum *focus* appellatur, & in perpendiculo per eam convexam superficiem producto jacet, jam vicinius, jam remotius, prout convexitas superficiiei major fuerit vel minor. Non tamen unicum punctum est, sed notabilem latitudinem habet, & circellum exiguum refert. Neque enim radii lucis utcumque subtiles penetrare se possunt, sed alter tamen extra alterum poni debet, hinc etiam utcumque concentrati spatium pluribus punctis comprehensum occupent, necesse est. Focus autem hic eo propior est centro convexitatis, quo vis medii refringens major est. In sphaera vitrea radii ex aëre parallele incidentes ad distantiam $\frac{1}{4}$ partis diametri retro eam sphaeram in focum concurrunt; in sphaera aquea ad distantiam semidiametri. In lentibus vitreis convexis, quarum utraque facies æquali sphaeræ segmento constat, focus est ad distantiam semidiametri a facie lentis anteriore. Alterutro autem segmento, magis convexo, focus adhuc vicinior, intra distantiam semidiametri cadit. Inde quo lens minor, & per consequens magis convexa est, eo focum habet brevior, & brevissimum quidem habent lentes minimæ microscopicae. In lentibus plano convexis, distantia foci æqualis est distantiae duorum radio-

rum, five integri diametri. Vitra concava prorsus contraria ratione radios cogunt ab axi divergere, eosque non in focum colligunt, sed ab axi removent & dispergunt.

§. D X X X V I.

Singulum punctum visibile objecti five lucidi, five illuminati, ex antea dictis radios lucidos spargit æqualiter in omnem ambitum, tamquam e centro ad peripheriam. Si igitur oculus intra sphaeram activitatis horum radiorum constitutus sit, etiam proportionalis quantitas radiorum, ab hoc puncto radiante emissorum, in superficiem oculi nudam incurret. Hanc nudam oculi superficiem constituit cornea pellucida, & anterior pars scleroticæ, vicina corneæ, cum adnata superinducta. Radii, qui in scleroticæ anteriorem partem incurrunt, cum opaca ea sit, nihil ad visum conferunt, neque in interiora oculi penetrant, sed illapsi reflectuntur extrorsum, & ipsam scleroticam conspicuam reddunt oculo hominis alterius, nostrum insipientis. Radii vero, qui a puncto radiante in corneam incidunt, si magnum angulum cum perpendiculo ad corneam ducto forment, five si valde magna obliquitate incidunt, etiam extrorsum reflectuntur, & in oculum alterius hominis incidentes faciunt, ut hic alterius corneam videat, licet summe pellucidam. Nam & pellucida media, etsi plurimos lucis radios attrahant & refringant, eos tamen, qui ad angulum majorem e. g. 48. graduum incidunt, reflectunt, & si vis medii refringens major est, etiam sub non ita magno angulo illapsos radios reflectit; & per eos radios reflexos etiam ipsum pellucidum medium conspicuum fit. Sed illi radii omnes, qui a puncto radiante emissi ad minorem, quam 48. graduum angulum, in corneam incidunt, subeunt corneam, eamque

fubeundo refringuntur. Radii enim illi ex aëre in corneam incidunt; cornea medium densius est aëre, imo vero etiam densius aqua, quæ densitatem aëris plus octingentis vicibus superat. Sed quotiescumque radii oblique incidunt in medium densius, refringuntur ad perpendicularum; ergo radii luminosi incidentes in corneam, eamque fubeutes refringuntur ad perpendicularum. Unicus ab hac lege radius excipitur, nempe qui axi visus respondet, & qui ad centrum corneæ perpendicularis incidit. Radii enim, a puncto radiante tamquam a centro ad peripheriam emissi, formant conum lucidum, cujus apex seu vertex ipsum illud punctum, basis vero area circularis corneæ est. Axis hujus conii luminosi est linea recta a vertice conii ducta ad centrum basios conii, adeoque ad centrum basios corneæ; & hæc linea ad superficiem corneæ perpendicularis est, si cornea directe puncto radianti obversa sit; radii autem perpendiculares licet in medium specificè densius illapsi, non refringuntur, sed irrefracti rectum suum tramitem continuant. Solo ergo eo radio excepto, qui solus ex omnibus perpendicularis in corneam incidit, & qui axi visus respondet, ceteri omnes refringuntur, & refringuntur ad perpendicularum. Verum cornea præterquam, quod medium sit aëre densius, est segmentum sphaericum; sphaerica autem segmenta radios illapsos ita refringunt, ut omnes in unum punctum conveniant, quod in axi ejus segmenti, seu in perpendiculo producto jacet, & focus appellatur. Radii ergo omnes, excepto eo, qui axin format conii lucidi & perpendicularis ad corneæ superficiem incidit, non solum refringuntur ad perpendicularum, sed ita etiam refringuntur, ut in unum fere punctum, sive in focum conveniant, quod punctum trans corneam in oculo in ipso axi visus jacet. Atque adeo omnes illi radii, a cornea refracti, tandem in aliquo

puncto trans corneam convenient cum eo radio, qui irretractus per centrum corneæ transivit. Ubinam loci in oculo & ad quam a cornea distantiam ille radiorum concursus fiat, deinde videbimus. Nunc radii hi a cornea contracti & convergentes transeunt in humorem aqueum. Cornea vero paululum densitate sua aquam superat, hinc & humore aqueo tantillum densior est; ergo refractione radiorum versus perpendicularum, seu axim visus, paulo major erit in cornea, quam in humore aqueo. Hinc radii a cornea refracti convergentes, dum ex hac in humorem aqueum feruntur, paulo minus ad perpendicularum accedent, quam accederent, si humor aqueus ejusdem prorsus cum cornea densitatis esset. Verumtamen, quia differentia densitatum humoris aquei & corneæ valde exigua est, etiam declinatio radiorum a perpendicularo, dum per humorem aqueum moventur, erit valde exigua; sic ut omnino convergentes per eum humorem incedant, sed aliquanto minus cito convergant, minusque cito in focum concurrant, quam concurrerent, posita eadem humoris aquei densitate, quæ corneæ est. Ergo collecti a cornea, in minus spatium contracti, convergentes radii per medium humorem aqueum projiciuntur in pupillam. Qui autem adeo oblique corneam subierunt radii, ut cum prioribus colligi, & in convergentem fasciculum refringi non potuerint, illi passim neque pupillam subire possunt, sed in faciem anteriorem iridis incidunt, indeque de novo extrorsum reflexi per humorem aqueum & corneam extrorsum reperiuntur, faciuntque ut iridem alterius, vel tuam etiam iridem in speculo videre possis. Si qui tamen radii valde obliqui & a prioribus devii per pupillam inter uveam & lentem crystallinam incidunt, illi continuo in atro illo pigmento, quod uveam & processus ciliares obducit, suffocantur, ne

ad alia retinae loca veniant, visumque turbent, dum cum prioribus colligi non possunt. Ex his patet, non omnes radios, quos cornea in convexa sua superficie collegit & refregit, ad interiora oculi & ad retinam pervenire, sed eos solum, qui perpendiculo, seu axi visus propiores, per pupillam trajiciuntur. Jam porro mox retro uveam & pupillam lens crystallina hæret, pauca tantum inter eam & uveam aquei humoris quantitate intercedente. Radii ergo hætenus a cornea contracti, convergentes, per humorem aqueum perque pupillam trajecti, incidunt in lentem crystallinam. Lens crystallina densior est humore aqueo, ipsaque cornea, constatque duplici sphaerae segmento, quorum anterius planius, posterius magis convexum est, & minorem anterioris segmenti convexitatem compensat. Radii ergo in lentem crystallinam jam convergentes illapsi, nunc ob hujus densitatem majorem magis refringuntur, magisque adeo convergentes per eam trajiciuntur, quam transiverint per humorem aqueum. Retro lentem humor vitreus est, qui quidem paulo majorem, quam aqueus, densitatem habet, sed minorem, quam lens crystallina. Hæc minor densitas humoris vitrei non quidem divergentes reddere potest lucis radios a lente jam collectos & versus axin opticum refractos; nam ne quidem aer id posset, qui non impedit, quo minus radii per lentem vitream trajecti etiam post transitum lentis convergant, & in focum coeant. Interea tamen, quia minorem lente crystallina densitatem habet humor vitreus, impedit saltem, ne radii a lente refracti, adeo cito in focum concurrant, quam concurrent alias, si ejusdem cum lente densitatis esset humor vitreus. Ita fit, ut radii demum in postica humoris vitrei parte in focum coeant,isque in retinam cadat humori vitreo contiguam. Verum retina est expansio nervi optici. Dum

ergo focus radiorum lucidorum in retinam cadit, inducitur mutatio qualiscumque fibrillis hisce nervi optici, eam retinæ partem constituentibus, in quam focus cadit; atque hæc mutatio per fibrillas easdem ad sensorium commune propagata, in anima, modo nobis incognito, ideam visus, seu ideam rei illius, ex qua radii advenierunt, excitat. Focus ille autem non cadit in centrum nervi optici; nam centrum nervi optici non respondet centro oculi, nec respondet axi optico, sive lineæ verticali per centrum corneæ ad retinam usque transeunti; focus autem cadit in axim opticum, ergo clarum est, focum non incidere in centrum nervi optici. Nunc hujus rei ratio evidens est, cur nimirum axis nervi optici non respondeat axi visus, & cur natura finem optici nervi naso propiorem in oculum deduxerit? Constat enim ex alibi dictis per medium nervum opticum decurrere arteriolam venulamque centram, sanguifera vascula; si jam optici nervi finis axi visus responderet, quia focus cadit in axim visus, incidisset ille in axim nervi optici, nempe in arteriolam & venulam centram; sed vascula hæc non sunt organum sentiens; adeoque mutatio a radiis lucis inducenda fibrillis nerveis sensilibus, induceretur vasculis insensilibus; ergo si nervi optici axis incideret in axim visus, aut plane non discerneremus objecta, & penitus cæci essemus, aut si quæ discerneremus ob latitudinem foci majorem, quam arteriæ centralis, ea tamen omnia perforata videremus, quum laterales tantummodo foci partes in sensiles fibrillas inciderent, medius ipse & principalis focus incideret in vascula centralia sensu carentia. Hoc provida præcavit natura, dum nervi optici finem in partem oculi internam, naso propiorem implantavit, ut focus ad exteriora hujus nervi in sensilem retinam caderet. Nam ad internum oculi latus,

ubi

ubi nervus opticus inferitur, focus radiorum lucidorum rarissime cadit, & sub certis tantum conditionibus, & dum in eam plagam cadit, objectum ex oculis evanescit. Contra vero quotiescumque more consueto objectum intuemur, axis opticus ad exteriora nervi optici cadere debet, quia & cornea versus nasum aliquanto magis gibba est, & pupilla pariter aliquanto plus versus nasum producta, sed maxime, quia objectum more consueto intuentes sic dirigimus oculos, ut ambo axes optici versus idem objecti punctum tendant; hinc ex eo puncto concursus, in oculum necessario divergunt, & quum divergant, necessario ad exteriora nervi optici utrimque cadunt; atque illuc etiam cadit focus principalis, qui cum ipso axi coincidit. Possētis mihi nunc objicere, etiam sic evitari non posse, quin focus radiorum in vascula incidat; retinam enim duplici constare fabrica, altera vasculosa, altera nervea; superficiem autem vasculosam humori vitreo contiguam esse, & inter eum humorem ac retinam intercedere; adeoque focum semper in vascula incidere. Ita est. Sed vascula illa retinæ subtilissima & pellucida sunt, & minimi diametri; per quæ, ubi transiverunt lucis radii, jam ipsas nerveas retinæ fibrillas attingunt & afficiunt. Sed vascula centralia nervi optici rubra sunt, neque ex rubris minima, cum nudo oculo conspiciantur, ac præterea non retro se mox nerveam substantiam habent, cum per magnam nervi optici longitudinem excurrant; focus ergo in vascula centralia incidens, retinam, aut nervi substantiam ferire non potest, adeoque etiam nullum sensum excitare.

Nunc redeamus in ordinem; multa enim adhuc dicenda supersunt, & hoc initium solum explicationis fuit. Dixi punctum radians, sive lucidum, sive illuminatum, radios spargere in om-

nem partem tamquam a centro ad peripheriam; dixi, radios hos in corneam illapsos formare conum lucidum, cujus vertex in puncto radiante, basis in superficie corneæ sit; dixi radios hos a cornea refringi, ut per eam transeuntes convergant, convergant etiam, sed aliquanto minus, in humore aqueo, collecti demum transeant per pupillam, incidantque in lentem crySTALLINAM; per eam dum transeunt, ob majorem hujus densitatem magis refringi & convergentes reddi, iterum aliquanto minus convergentes ferri per humorem vitreum & demum in postica ejus parte in punctum aliquod physicum collectos, in retinam incidere, & coincidere cum axi visus, sive cum radio centrali, qui irrefractus transit. Patet inde radios a puncto emanantes ita fabrica oculi iterum in punctum concentrari, quo ipso simul vis lucis, qua nerveam retinam afficiunt, multo efficacior est, quam si dispersi in retinam radii inciderent; atque id ipsum punctum, ex radiis intra oculum unitis formatum, est imago puncti illius radiantis, seu visibilis externi. Jam vero dum objectum aliquod majus intueris, non vides unicum ejus objecti punctum, sed vides totum objectum ab ea facie, qua oculis tuis obversum est; vides ergo multa millia punctorum. Sed singulum punctum visibile spargit radios ad peripheriam, singulum punctum visibile spargit conum lucidum, cujus vertex in suo puncto, basis in cornea est. Milleni ergo & milleni coni lucidi a diversis tot mille punctis objecti, in corneam eandem incidunt, & ab eadem refracti intra oculum convergentes in focum colliguntur. Verum cum omnia objecti visibilis puncta extra se mutuo posita sint, etsi alterum alteri infinite vicinum, clarum est, singulum conum lucidum a singulo puncto objecti profectum diversa obliquitate in corneam incidere, singulum aliam atque aliam directionem habere; ergo

etiam refracti a cornea & lente crySTALLINA tot mille radii lucidi a tot mille diversis punctis emanantes, non possunt ad idem prorsus punctum in retina cogi, atque adeo etiam focus, qui in retinam ex objecto cadit, non est punctum unicum, sed latitudinem aliquam habet, & circellum exiguum format; neque stricte loquendo unicus fit focus, sed fiunt milleni & milleni, & tot, quot sunt puncta objecti visibilia. Nam singulum punctum visibile objecti ad corneam projicit conum lucidum, diversum a cono lucido alterius puncti; & singulus conus lucis per corneam & lentem crySTALLINAM refractus in retina, in punctum peculiare concentratur, quod focus est respectu sui coni. Ergo tot in retina formantur puncta, tot fiunt foci minimi, infinite parvi, quot in cornea formantur coni lucidi, adeoque quot sunt puncta objecti externi radiantia seu visibilia. Atque hi foci cum sint infinite parvi & infinite sibi vicini, formant unicum ad sensum focum, sed illum aliquam omnino latitudinem habentem specie circelli exigui, cujus punctum medium in axi visus jacens *focus principalis* dicitur. Cum porro singulus focus infinite parvus, seu singulum punctum foci illius totius, respondeat singulo puncto objecti, & singulum punctum foci imaginem referat ejus puncti visibilis, e quo radiabat, hinc focus ille totus sive integer refert perfectissime imaginem objecti totius, minimam quidem, sed ita accuratam, ut etiam in hac minutie imaginis eadem prorsus partium inter se proportio sit, quæ est earumdem partium inter se in objecto externo, licet immenso, respectu hujus imagunculæ. Focus ergo ille est imago rei picta in retina. Hanc imaginem percipit anima, quando retinæ fibrillis inducta mutatio ad sensorium commune propagatur; & ex hujus imaginis lineamentis anima judicat de qualitatibus objecti externi visu per-

cepti. Notandum vero est, imaginem hanc semper inversam in retina pingi, ita ut dextræ partes objecti in oculo sinistro, & vicissim sinistrae objecti partes in oculo dextro sint, & partes objecti superiores in oculo inferiorem, inferiores superiorem locum picturæ teneant. De phænomeno nullum est dubium, & videri potest pictura objecti inversa in oculo recente animalis cujusdam majoris, si posterior pars scleroticæ & choroideæ ac retinæ auferatur, prudenter cavendo, ne humor vitreus elabatur; tum porro si ad eum humorem sustinendum chartula alba, oleo imbuta & pellucida reddita illi loco scleroticæ ablatae applicetur; si tum his factis cornea obvertatur objecto lucido, pingetur in chartula illa alba, quæ nunc retinæ ablatae locum occupat, imago illius objecti lucidi inversa, & a spectatore retro oculum posito cerneatur, modo oculus recens adhuc & humoribus plenus & pellucidus fuerit; distinctius quidem, si in cubiculo obscurato experimentum fiat, & radius lucidus per foramen in valva factum in oculum admittatur. Etiam in oculo artificiali, ex vitreo & aqua ad similitudinem veri oculi composito, idem experimentum succedit. Ratio vero, cur objecti imago inversa in oculo pingatur, etiam evidens est. Radii enim ab extremis objecti terminis in corneam incidentes sese decussant partim in aëre, partim in cornea & humore aqueo, ita ut illi solum radii, qui ex eo objecti puncto radiant, cui axis opticus directe obversus est, in medium oculum recta fere via & æquabiliter incident, illi vero, qui ab extremitate objecti sinistra emanant, necessario in dextram oculi partem tendant & axim opticum producti decussent; hinc necessario ad dextrum latus axis optici refringuntur. Contra illi, qui ab extremitate objecti dextra emanant ad oculum, pariter axim opticum decussant, &

in parietem oculi sinistrum tendunt; hinc etiam ad latus sinistrum axis optici refringuntur; illi, qui ab extremitate objecti inferiore ad oculum veniunt, cum veniant ascendentes, in superiorem oculi partem tendunt, hinc ad superius axis optici latus refringuntur; & ita contraria ratione, qui a superiore objecti extremitate adveniunt, ad latus axis optici inferius refringuntur. Ita fit necessario, ut imago in foco inversa pingatur. Idem fit etiam in lentibus optici ex eadem ratione. Melius autem ex figura capitur, quam ex verbis. *vide MUSSCHENBROECK essai de phys. Tom. 2. Tab. 16. Fig. 1.* Cur vero anima judicet, objectum in situ erecto esse, licet imago inversa pingatur in retina, alia questio est, de qua alibi dicetur.

Nunc videamus, an ea sit proportio partium oculi pellucidarum, & vis refractilis, ut focus in retinam cadere debeat. Nolui hæc commiscere cum prioribus, ut plerique auctores solent, ne magis composita & difficilior fiat explicatio nunc posteaquam novimus, focum in retinam cadere, facilius dicetur, quomodo fiat, ut illuc incidat. Dabo autem ideam, quam potero facillimam in re difficili. HALLERUS manifeste erravit, cum refractionem corneæ, sphaericæ consideratæ computet, & distantiam foci a cornea confundat cum distantia foci à sphaera, quam cornea undique producta formaret. Vid. *Elem. phys. Tom. V. p. 466.* Neque advertit ex ista dimensione focum non in retinam, sed multo citius ante eam in medium fere vitreum humorem, illapsurum. Sphaera aquea radios in focum colligit ad distantiam semidiametri retro sphaeram; sphaera autem vitrea focum projicit ad distantiam dimidii semidiametri, seu ad distantiam $\frac{1}{4}$ diametri. Cornea jam segmentum est sphaeræ, cujus diameter æqualis est lineis 7., aut paulo ultra in

quibusdam hominibus. Axis vero seu diameter oculi est 8. linearum observante PETITO aliisque. Si ergo cornea intra oculum produceretur in sphaericam expansionem postrosum & antrosum producit, cornea tantummodo ad 1. lineam a retina distaret, quia subtrahendo diametrum corneæ 7. linearum a diametro oculi 8. linearum remanet spatium unius lineæ. Nunc si cornea in ejusmodi sphaeram expansa haberet densitatem aquæ, projiceret focus ad eam distantiam retro se, quæ æqualis esset semidiametro corneæ, adeoque ad distantiam $3\frac{1}{2}$ linearum. Cum vero in hac idea corneæ in sphaeram perfectam expansæ distantia a retina unius tantum lineæ spatium æquet, & sphaera hæc retro se focus projiceret ad distantiam $3\frac{1}{2}$ linearum, posita densitate aquea, focus illius ad $2\frac{1}{2}$ lineas retro retinam caderet; & posita densitate corneæ æquali densitati vitri, focus corneæ caderet ad distantiam $1\frac{3}{4}$ linearum retro retinam. Utroque in casu focus non incideret in retinam. Sed cornea minorem densitatem habet, quam vitrum, minus ergo refringit radios, quam vitrum; adeoque ad majorem a retina distantiam projiciet, quam ad $1\frac{3}{4}$ lineas. Habet vero cornea paulo majorem densitatem quam aqua, in qua fundum petit, ergo & vim refractilem majorem habet, quam habeat aqua; ergo & ad minorem distantiam focus projicit, quam projiceret, si aqueam perfecte densitatem haberet. Sed præterea cornea cum inflammabilibus particulis constet, quibus aqua destituitur, etiam ex hac ratione vim refractilem majorem habebit, quam aqua. Cum vero præcise determinari non possit, in qua ratione vis refractilis corneæ major sit vi refractili aquæ, & minor vi refractili vitri, assumemus aliquam intermediam proportionem, sic ut sphaera corneæ completa focus re-

tro se projiciat ad $\frac{1}{3}$ partis diametri distantiam, quæ distantia major est, quam $\frac{1}{4}$ pars diametri, ad quam sphaeræ vitreæ focus esset, & minor $\frac{1}{2}$ parte diametri, ad quam focus esset sphaeræ aqueæ, eandem cum cornea magnitudinem habentis. Ergo cornea vi sua refractili sic colligit radios, ut illi in focum coeant, qui retro sphaeram corneæ completam distet lineis 2. & $\frac{1}{3}$. Sed distantia corneæ a retina, si sphaeram corneæ compleas, est tantummodo lineæ 1. Ergo focus, in quem radii a cornea refracti concurrerent, linea $1\frac{1}{2}$ retro retinam incideret. Si porro consideremus, radios a cornea refractos, dum per humorem aqueum moventur, moveri per medium cornea minus densum, & quia hujus humoris vis refractilis aliquanto minor, quam corneæ est, etiam impedire radios, quominus adeo cito convergant in focum, ac alias convergerent, si humor aqueus ejusdem cum cornea densitatis esset, si hæc inquam consideremus, focus adhuc ad paulo majorem distantiam retro retinam caderet, & forte non ad $1\frac{1}{2}$, sed ad duas omnino lineas. Verum radios a cornea refractos, & per humorem aqueum trajectos excipit lens crystallina, eosque magis refringit & ad perpendiculum cogit accedere, & compensat id, quod corneæ deficit. Compensat autem corneæ minorem refractilitatem, tum quia densitate corneam superat, tum quia lens jam convergentes jamque ad perpendiculum accedentes radios accipit, quos cornea acceperat divergentes. Ita fit, ut focus in retinam incidat, qui alias cecidisset retro eandem, nisi lens crystallina minorem corneæ vim refractilem adjuvaret & suppleret. Anterior quidem lentis crystallinæ convexitas, plerumque cornea planior est, utpote passim segmentum sphaeræ, cujus diameter $7\frac{1}{2}$ lineas æquat adeo-

que sphaeræ majoris, quam cornea, & ex hac ratione minus radios refringere posse videretur, quam cornea. Verum posterius segmentum lentis sphaeræ respondet, cujus diameter 5. tantummodo linearum est, observante PETITO adeoque sphaeræ multo minoris quam cornea; si ergo utraque lentis convexitas simul computetur, erit ex ipsa figura lentis crystallinæ major, quam corneæ refractilis potentia; sed & densitas lentis major, quam corneæ est, & radii in lentem incidentes jam alioquin magis sibi vicini, & ipsa denique lens retinae vicinior, quam cornea. Ergo lens crystallina facile id compensat, quod vi refractili corneæ deest, fitque adeo, ut focus hac ratione in retinam incidat. Sed ille focus rursus debebat aliquam habere latitudinem, debebat imago nitide & distincte pingi, debebant radii collecti non nimium sese urgere, nec in unicum punctum concentrari, sed singulus radius singulam in retina fibrillam afficere, ne confusa oriatur sensatio; ergo natura humorem vitreum lentem inter & retinam collocavit, qui cum aliquantulum lente minus densus sit, impedit, ne radii nimis arcte ad se invicem stipentur, sed ut in plagam latiusculam concurrant, quam Celeberrimus le CLERC adeo latam facit, ut producti ejus fines angulum fere 30. graduum comprehendant, & forte non abs re, cum non unus sit focus, sed plurimi foculi minimi juxta se invicem, quorum singuli, valde quidem sibi vicini, in diversa tamen retinae puncta incidunt; cumque non unicum, sed multa simul objecta in oculo pingantur.

His absolutis alia, quæ ad visum pertinent, pertractemus, & præstat, ni fallor, hæc conjuncta tradere, quam variis locis distracta dicere, ubi simul multa jam dicta repetenda essent, non sine temporis jactura.

Primo : Phænomenon constans est, quod, licet plura objecta simul videamus, unum tamen horum præ aliis omnibus distinctius videamus; & in hoc ipso objecto exiguum solummodo plagulam distinctissime videamus, quæ scilicet pupillæ directe opposita est. Id in lectione præcipue manifestum est, ubi, si attendere velimus, facile advertemus, nos unicam tantum alteramve literam unico tempusculo distincte, reliquas omnes confuse cernere; tum vero & reliquas æque distincte percipere, prout successive axis oculi in reliquas dirigitur. Inde discimus, etsi plura objecta simul in retina pingantur, id tamen solum distincte percipi, quod directe pupillæ obversum est, & cujus focus in eam retinæ plagam incidit, quæ pariter directe pupillæ obversa, ad exteriora nervi optici, ipsi axi visus respondet. Inde concluderunt Viri Clarissimi eam partem retinæ, quæ pupillæ adversa est, & in quam axis visus incidit, aliis retinæ plagis sensiliorem esse. Nec improbabilis hæc opinio est, siquidem & in aliis sensuum organis aliquis locus præ aliis majore sensilitate præditus est. Ita gustus in apice linguæ exquisitior, tactus exquisitior in apicibus digitorum, olfactus vividior in septo narium & spongiosis ossiculis, &c. ita etiam aliquam retinæ partem, & eam quidem, in quam axis opticus incidit, aliis sensiliorem esse, cum & phænomenon visus distinctioris conspiret, recte videtur statui posse. Sed & alia ratio accedit; nempe radii, qui in focum principalem, sive in axim visus incidunt, perpendicularibus proximi sunt, reliqui, quorum focus ab axi magis distat, obliquiores sunt, & eo magis quidem obliqui, quo magis ab axi distant. Jam vero ceteris paribus semper major est vis perpendicularis omni alia vi obliqua; ergo & illi radii, qui in axim visus, atque in retinæ plagam huic axi respondentem incidunt, fortius

fibrillas nerveas afficient, quam radii alii obliquiores magis ab axi distantes, etiam si eadem ubique retinæ sensibilitas esset.

Secundo : Constat ex anatome, quod retina totum humorem vitreum in modum cupulæ ambiat. Quæri nunc potest, cur id a natura factum sit, cum tamen imago objectorum in exiguo oculi, seu retinæ, spatio pingatur, & quidem in spatio pupillæ obverso. Sufficere videbatur, si solus iste locus retinam accepisset. Non est cur naturam frustra quid fecisse credamus, & in frustranea re tantam observare constantiam. Requirebatur omnino ut retinas totum humorem vitreum ambiret, ut & objecta a latere posita, etsi non adeo distincte, utcumque cernere possemus. Requirebatur secundo hæc structura, ut imago locum in retina alium atque alium afficere posset, dum corpus, quod intuemur, extra nos positum, locum suum mutat; ita enim de motu corporum per visum certiores fimus; nam dum fixis e. g. oculis corpus in motu constitutum aspicias, imago in retina depicta perinde locum mutat in oculo, ut corpus, cujus imago in oculo picta est, ea solum differentia, quod, dum corpus in dextrum latus movetur, imago in latus retinæ sinistrum transferatur, & vicissim. Debebant ergo & partes laterales humoris vitrei tunica retina cingi, alias aut omnino necesse esset, corpus quod movetur oculis in directum perpetuo motis prosequi, aut uno momento tantum videremus ejusmodi corpus, altero momento id jam ex oculis elapsum esset. Nunc vero etiam non motis oculis, corpora, quæ ante nos moventur, pluribus momentis percipimus, & tamdiu, quamdiu hæc intra eam distantiam moventur, ex qua radii non nimium obliqui, ad corneam unius alteriusve oculi adferri possunt. Præterea etsi obscurior fiat perceptio, quando in partes laterales retinæ imagines objectorum

incidunt, non inutilis tamen est, quum non impediatur distinctam perceptionem alterius objecti, cujus imago in axim opticum incidit. Imo verodum unum objectum distincte percipimus, alia vero omnia minus distincte, per hæc ipsa admonetur mens nostra, ut, si illi placeat, aut si res exigat, sciat illico, quorsum oculos dirigere debeat, si unum ex his minus distinctis objectis recte percipere velit dum alias primo oculos circumtorquendo locum hujus objecti explorare deberet. Atque sic securitati nostræ longe melius consultum est. Ut melius intelligatis, quid velim, dabo exemplum: intentus in objectum aliquod, recte oculis meis obversum, illud distincte video, video autem simul multa alia ab utroque latere, quamvis confuse. Nunc inter ea objecta quæ confuse video, apparet mihi, sed dubie, ac si periculum hinc vel inde mihi immineret, quidquid illud demum sit; etsi hoc confuse mihi tantummodo appareat, quia tamen vel confusa hæc perceptio cum vehemente idea conjungitur, illico dimisso priore objecto, in hoc nunc oculos convertam, ut distincte videam, num ita sit, num contra vane timuerim, utque possim tempestive adhuc evitare periculum, si quod mihi reapse imminet. Id autem non facerem, nisi prius obscuram saltem perceptionem habuissem, qua mens mea utcumque admonita fuisset. Ergo patet, ne quidem obscuras rerum perceptiones, quæ simul cum distincto visu habentur, utilitate carere.

Tertio: Explicandum superest, cur undique retinam exterius cingat interior choroideæ superficies, & ea quidem atro ubique pigmento obducta. Quis enim usus hujus pigmenti retro retinam? Hujus machinationis ratio facilis & evidens est. Si ante retinam poneretur choroidea, opacitate sua & atro pigmento radios interciperet impediretque, ne ulli ad retinam perveniant. Nunc

vero dum retro retinam hæret, eodem hoc atro pigmento radios lucis in retinam illapsos, jamque sua actione defunctos absorbet, sic vero præcavet, ne radii denuo intra ipsum oculum, postquam in retinam inciderunt, reflectantur, siquidem reflexi & cum aliis permisti distinctam visionem turbarent. Multum ergo ad distinctiorem visum confert atrum illud choroideæ pigmentum. Et eo quidem illustrior est objecti in oculo imago, quo magis oculi parietes obscurati sunt, & si ullibi, hic certe verissimum est illud axioma philosophorum, quod contraria juxta se posita magis elucescant. Confirmant idem machinæ opticae, & si recte omnia perpendimus, oculum veram cameram obscuram dicere licebit, in qua objectorum externorum imagines depinguntur. Analogia certe inter oculum & cameram obscuram summa est, ut bene olim peculiari dissertatione ostendit Celeberrimus STURMIUS. Dantur animalia, in quibus choroidea non nigro, sed fulvo & fulgido colore prædita est, ut in felibus videmus. Sed ea animalia de die vix quidquam vident, vix diurnam lucem perferre possunt, & pupillam habent interdiu angustissimam. Nimia enim his fit reflexio lucis intra oculum a refulgente choroidea, & ideo lux diurna his fere intolerabilis est. Contra vero in tenebris ejusmodi animalia distincte vident; iis enim lux minima sufficit; quæ nostros oculos ne quidem afficere potest. Si oculum felis in tenebris aspicias, videbis choroideam quasi vivo igne intus lucere. Sunt etiam integræ nationes hominum in Africa & America, nyctalopes, seu noctu tantum recte videntes, ob choroideam, quæ illis rosea est. Inde LINNÆUS hominem divisit in *diurnum* & *nocturnum*.

Quarto : Explicandum est phaenomenon pupillæ modo dilatatae, modo contractae. De causa hujus motus jam suo loco dictum est. Nunc so-

lum ratio phænomenorum danda est. Constringitur nempe pupilla ad lucem vividio-rem, dilatatur in luce debiliore, nisi insensilis retina sit. Quæ ratio? quis finis? quæ utilitas? oculus nos-ter certum lucis gradum ad distinctam visionem requirit; lux nimis debilis non satis afficit fibril-las retinæ, lux vividior nimium eas afficit. Er-go ad lucem vividio-rem, nobis etiam insciis constringitur pupilla & arctior nunc multo pau-ciores ad retinam radios admittit, sic autem lu-minis intensitatem minuit; contra vero dilatatur ad lucem debiliorem, ut eo plures radii nunc ad retinam admittantur, & multitudo radiorum in focum concurrentium augeat intensitatem lumi-nis. Sed etiam dilatatur pupilla, dum objecta remotiora, non lucida tamen, respicimus, con-trahitur, dum intuemur vicina. Hujus phæno-meni eadem, quæ prioris, est ratio. Lucis enim intensitas minuitur in ratione duplicata distan-tiarum a corpore radiante, ergo corpora remo-tiora, ceteris paribus, lucem minus intensam, viciniora magis intensam spargunt. Sed lex sta-bilita est, ut pupilla ad lucem debiliorem dilate-tur, ad vividio-rem contrahatur; cum ergo re-motiora objecta ceteris paribus lucē minus in-tensa radiant vicinis, necessario pupilla ad ob-tutum vicini objecti arctior, ad remoti conspec-tum amplior fiet. Subest præterea etiam alia ra-tio. Radii enim ab objectis valde remotis & pauci adveniunt, & parallelis proximi, a vicinis adveniunt & plures, & maxime divergentes. Contrahitur ergo pupilla ad vicinioris objecti conspectum, ut radii valde divergentes, qui cum aliis in focum communem refringi non possent, & distinctam visionem potius turbarent, excludantur, dum interim satis multi tamen ad retinam transmittuntur, sed illi rectiores & axi viciniores. Et ex opposita ratione ad objecta re-motiora dilatatur, ut quia pauci adveniunt,

aucta amplitudine, plures ad retinam transmittat, & quia radii ex objectis remotis reflexi alioquin parum divergunt, & fere pro parallelis haberi possunt, facileque hinc in focum confringuntur. Contrahitur etiam pupilla, aucta per morbos sensilitate retinæ, & dilatatur sensilitate retinæ imminuta. Idem enim est sive lucis intensitas augeatur, retina non mutata; sive manente eadem, quæ antea fuit, lucis intensitate retinæ sensilitas augeatur; tunc enim etiam lux alias debilis retinam fortiter afficiet, & vicissim. Adeoque pro varia sensilitate retinæ perinde ac pro varia lucis intensitate pupillam diametro minui vel augeri necesse est. — Hæc interim; nunc ad alia progrediamur.

§. D X X X V I I.

Corneæ sphaeræ segmentum est, & minoris quidem sphaeræ quam sclerotica, hinc etiam ultra scleroticæ peripheriam aliquantulum protuberat; & fit hac ratione, ut plures radios lucidos excipere possit, quam alias exciperet, si ejusdem cum sclerotica sphaeræ segmentum esset. Requiritur tamen ad visum perfectum & distinctum iusta corneæ convexitas, ut nec justo magis convexa, nec nimis plana sit. Hujus necessitatis ratio evidens est. Quo enim convexior est cornea, eo magis radios confringit eoque citius hos in focum colligit. Nam quo convexior est, eo minoris sphaeræ segmentum est; minor autem sphaera minorem habet diametrum, & cum posita densitate eadem distantia foci brevior sit, quo minor alicujus sphaeræ diameter fuerit, etiam cornea eo citius radios in focum colliget, & ad distantiam eo breviorum illum focum projiciet, quo minoris sphaeræ segmentum, seu quo convexior fuerit. Quodsi ergo respectu ceterarum oculi partium nimis convexa fuerit cornea, focus radiorum non in retinam, sed ante

hanc in humorem vitreum incidet. Et cum radii ex foco denuo dispergantur, imago nec satis vivida nec sat distincta, in retina pingetur; hinc visus confusus erit. Hæc myopum conditio. Vocantur autem *myopes* illi, qui objecta paulo remotiora non distinguunt, sed confusa vident, ea solum distincte percipiunt, quæ oculis valde vicina sunt. Ratio phænomeni vel in convexitate corneæ, vel in convexitate lentis majore latet, & in radiorum parallelismo vel divaricatione. Nam *primo*, quo cornea magis convexa est, eo focus habet brevior, ut mox dictum, & idem de lente valet; *secundo*, quo convexior est cornea, eo superficies ejus anterior, magis distat a retina; unde etiam ex hac ratione focus ante retinam cadet. *Tertio*, quo objectum ab oculo magis distat, eo radii minus divergunt, imo fere paralleli adveniunt; sed quo sunt parallelis propinquiore radii, eo facilius citiusque in focus colliguntur. Ergo quibus cornea, vel lens crystallina vel utraque solito convexior est, iis focus ante retinam cadit, quotiescumque objectum ab oculo paulo magis remotum aspi-ciunt. Dum vero objectum oculis ad parvam distantiam, quæ in variis varia est, admovent, tum demum illis focus & imago objecti in retinam cadit, atque tum distincte vident. Nam quo propinquius oculo objectum est, eo radii ab objecto ad oculum sub majoribus angulis, adeoque magis divergentes adveniunt; sed quo magis divergentes in segmentum sphericum incidunt, eo difficilius colliguntur, sive, ut distinctius loquar eo tardius accedunt ad perpendicularum, adeoque & focus ad majorem a superficie spherica distantiam formant; nunc hæc distantia foci major utilis est illis, quibus ex majore corneæ aut lentis convexitate focus alias brevior, & ante retinam formatur. Ergo necessario myopes ex fabrica oculi objecta remota confuse, propinqua

distincte vident. Nasci etiam myopia potest dum ab incumbente pondere humorum, & a majore horum affluxu cornea magis protruditur, ejusque a retina distantia longior fit. Et hæc ratio esse videtur, cur artifices, qui minuta opera tractant, quare etiam homines multa lectione occupati frequenter myopes sint. HALLER. Opposita conditio est *presbyopum*, quo nomine illi appellantur, qui remota objecta distincte, propinqua vero confuse vident. His solito planior est aut cornea, aut lens crystallina, aut utraque. Jam vero quo planior est cornea (& idem de lente valet) eo majoris sphaeræ segmentum est, adeoque & focus habet longius distantem, *secundo*, quo planior est cornea, eo minor est ejus a retina distantia, ergo cum corneæ a retina distantia in his alioquin minor sit, & cornea planior radios minus ad perpendicularum refringat, & focus habeat longius distantem, illis pariter focus non in retinam, sed retro retinam cadet, & radii nondum satis collecti in retinam incident; id vero tum maxime fiet, quando objecta propinqua intuentur; quoniam ex objectis propinquis radii ad oculum sub majoribus angulis adveniunt, & magis divergunt, atque adeo tardius ad perpendicularum accedunt, & focus longius projiciunt. Hinc presbyopes propinqua objecta confuse vident. Verum ex objectis longo intervallo ab oculo remotis radii fere paralleli adveniunt, qui adeo ex sua directione a perpendicularo minus deviant, & facilius refringuntur etiam a planiore cornea, & denique in focus minus distantem colliguntur. Hinc tunc illis focus in retinam cadit, & ideo remota objecta distincte vident.

§. D X X X V I I I.

Cornea refractionem radiorum inchoat, lens crystallina eam perficit radiosque magis cogit, &
in sup-

in supplementum corneæ data est. Quæ de cornea planiore vel convexiore dicta sunt, ea omnia etiam de lente tenenda sunt. Si cornea justo planior sit, tum quidem major convexitas lentis non obest, imo potest supplere defectum corneæ minus convexæ. Ita piscibus plana est cornea, lens crySTALLINA autem valde convexa & fere sphaerica. Iterum si lens justo planior sit, cornea autem in eadem proportionem convexior, pariter nihil visui officit. Verum si altera naturalem dimensionem habeat, altera autem justo planior, vel convexior sit, tum quidem aut myopia, aut presbyopia comes est. Ita pueri recens nati omnes myopes sunt, quia his non solum cornea magis protuberans, sed & lens admodum convexa est, & non multum a sphaerica figura abludit, ut suo loco monui. Senes contra fere omnes presbyopes sunt, utpote quibus & lens crySTALLINA, & cornea pariter, aucta per ætatem vi solidarum partium magis adplanatur, minusque jam cedit liquidis distendentibus. Lente crySTALLINA exempta, quod fit in depositione cataractæ, ægri quidem visum recuperant, sed minus distinctum, fiuntque presbyopes; licet enim humor vitreus in lentis depositæ locum succedat, tamen cum eam densitatem non habeat, quæ lentis fuit, etiam radios in focus adeo bene cogere non potest; hinc lente vitrea opus habent, ut distincte videant. Punctum visionis distinctæ myopi ad sex circiter pollicum ab oculo distantiam est, sæpe etiam ad minorem; presbyopi a sesquipedē ad tres pedes. Medius inter myopem & presbyopem oculus optimus est, talem censent vulgo, qui ad pedis distantiam distincte characteres non magnos legit.

§. D X X X I X.

Vitra dioptrica concava vel ex utraque parte, vel plano-concava, etsi ratione densitatis suæ

radios refringant ad perpendiculum superficiei refringentis, tamen ob figuram concavam radios sic refractos cogunt ab axi divertere, atque adeo radios divergentes reddunt, & dispergunt. Hinc facile patet, cur myopes juventur a vitris concavis. Cum enim cornea, vel lens crySTALLINA, in his convexior, radios magis confringat, & in focum breviorum colligat; cum præterea radii ab objectis remotis advenientes fere paralleli, & facile refringendi veniant, cumque hæc sit causa confusæ visionis objectorum remotorum in myopibus, cum porro vitra dioptrica radios etiam parallelos dispergant & divergentes reddant, radii autem divergentes minus cito in focum coeant, facile patet, nimiam corneæ, aut lentis vim refractilem sic attemperari ope vitri concavi; seu vitrum concavum, si rectam ad oculum proportionem habeat, mutando radiorum ductum parallelum in divergentem, id efficere, ut imago objecti, quamquam longe ab oculo remoti, tamen in retina pingatur, quæ alias ante retinam picta in humorem vitreum incidisset. Hinc ope vitrorum concavorum distincte etiam remota objecta vident myopes, at simul parva vident, quia vitrum concavum multos radios, certe exteriores omnes dispergit, qui adeo ad oculum non perveniunt; unde etiam quantitate radiorum imminuta, focus admodum exiguus & pictura minima in retinam incidit. Sed anima ex magnitudine imaginis judicat de magnitudine objecti, hinc etsi distincta videant objecta remota, simul tamen hæc illis minora apparent ob minus latam in retina objecti picturam. Etiam hoc advertunt Clarissimi Viri, licet myopes ab ejusmodi vitris juventur, non ideo tamen vitium oculi per hæc emendari, sed potius augeri. Cum enim vitro concavo applicato focus fiat multo minor & radii in punctum fere concurrant, eo fortius ab ejusmodi exiguo

foco retina afficitur, hinc oculi ab ejusmodi vitrorum usu dolent, & sensilitas retinæ paulatim obtunditur. — Nunc etiam facile intelligetur ratio, cur presbyopes & senes juventur a vitris aut perspicillis convexis, dum objecta propinqua recte discernere volunt. Nempe his minus convexa lens & cornea radios ab objectis vicinis valde divergentes non satis bene colligit, nec in focum alios unire potest, quam qui ex objecto remoto fere paralleli & facile refractiles adveniunt. Lente vero convexa, oculo præposita, radii ab objecto vicino valde divergentes, priusquam in corneam incidant, ab hac ipsa lente vitrea colliguntur, & franguntur, unde jam multo minus divergentes & rectiores in corneam illapsi, facilius ab hac & a lente crystallina in focum colliguntur. Necessè autem est, ut perspicillum illud ea convexitate sit, in qua ratione lens & cornea justo planiores sunt, ut perfecte minorem istarum partium convexitatem vitri convexitas suppleat. Ita fiet, ut focus in retinam cadat, utque objecta propinqua distincte videant, quæ sine eo auxilio discernere non potuissent. Facile hinc etiam ratio patet, cur non omnium oculis idem perspicillum opportunum sit. Ceterum myops oculus fere constantior est, & saltem per ætatem potest emendari, dum aucto robore solidarum oculi partium, earundem convexitas diminuitur, modo ceterum & retinæ sensilitas non in eadem ratione imminuatur, nec etiam pelluciditas humorum mutetur, quod tamen fere semper fit. Presbyops oculus nullam omnino spem habet emendationis per ætatem, cum per eam vitium continuo augeatur.

Quin & vitia hæc emendantur adductione lentis crystallinæ &c. Hanc hypothesin præcipue jatro-mathematici excogitarunt, ut distinctam ejusdem objecti in diversa distantia visionem explicarent,

Nempe crediderunt, non posse intelligi, quâ fiat, ut idem objectum in diversis ab eodem oculo distantibus distincte percipiatur, ut reapse ab oculo bono percipitur, nisi distantia justo major fuerit. Posito enim oculo eodem, posita vi refringente oculi eadem, distantiam foci a cornea & lente crystallina variare necesse est, & aliam esse, si propinquius, aliam si remotius fuerit objectum; cum enim radii ab objecto remotiore venientes minus, a propinquiore magis divergant, & illi citius, hi tardius in focum coeant, necessario radii ab objecto remotiore radiantes, ante retinam in focum coibunt, neque adeo focus in retinam incidet, neque ergo objectum, quod ad pedis ab oculo distantiam distincte percipiebatur, nunc in distantia dupla, vel tripla, distincte percipi poterit, nisi in oculo ipso interea temporis quamdam mutationem fieri supponas. Atqui tamen experientia docet, objectum, quod ad pedis ab oculo distantiam distincte percipiebatur, etiam ab oculo eodem, si ceterum rite constitutus fuerit, percipi in distantia pedum duorum. Ergo necessario in ipso oculo aliqua potentia adesse debet, quæ hujus figuram mutare eumque diversis objectorum distantibus accommodare possit. Verum cum anatome nil certi promitteret, hypotheticis solum opinionibus nixi, in diversas sententias abiverunt, & alii quidem a rectis quatuor musculis bulbum oculi comprimi, sic eum elongari, lentemque & corneam magis antrorsum urgeri crediderunt, qua ratione, aucta corneæ convexitate, aucta ejusdem & lentis a retina distantia, fieri putarunt, ut objecta propinquiora æque distincte ac remotiora percipi possint, utque radii, etsi magis divergentes, aucta tamen vi refractili oculi, ad idem retinæ punctum in focum coeant. Sed neque defuerunt alii, qui ab iisdem musculis & una ab obliquis, bulbum oculi breviorē reddi & latefcere, corneæ convexi-

tatem minui, ejusdem etiam & lentis a retina distantiam minui scripserunt, & hujus mutationis beneficio, radios minus divergentes objecti remotioris ad idem retinæ punctum confringi, ad quod antea iidem, ex objecto propiore magis divergentes, sine hac mutatione inciderant. Alii, quibus ea musculorum actio aut minus probabilis, aut insufficiens visa est, a processibus ciliaribus, melius phænomeni rationem repeti posse existimarunt; eas enim strias, cum pone lentis crystallinæ circulum maximum undique humori vitreo incumbant, ejusque membranæ adhæreant, premendo humorem vitreum in omni ambitu lentis, id efficere, ut lens magis versus pupillam corneamque antrorsum urgeatur, sic vero augeri lentis a retina distantiam, atque ita fieri, ut si alias radii ex propinquiore objecto valde divergentes tardius in focus, & retro retinam cadentem coivissent, nunc in retinam focus incidat. Contraria ratione alii processuum ciliarium actione capsulam lentis extendi, sic lentis convexitatem minui, atque ita objectis remotioribus adaptari voluerunt, ne pronissimi in focus radii nimis cito & ante retinam confluant, dum eminus posita speculatur oculus. Illustris HALLERUS, prioribus opinionibus enervatis, credidit solam pupillæ dilatationem aut constrictionem sufficere. Videamus jam, quid veri sub sit speciosis hisce opinionibus, & num reapse tanta difficultas hæc sit, quantam fecerunt jatro-mathematici.

Atque primo quidem, musculos esse, qui bulbum oculi aut elongent, aut planiorem reddant, quique mechanica pressione lentem corneamque aut magis admoveant retinæ, aut contraria ratione ab eadem avertant, id quidem omni verisimilitudine destituitur. Etenim si te ipsum in speculo consulas, si bulbum oculi figas, & vehementer etiam intendas (quod certe

simultanea omnium oculi muscutorum actione peragitur) nihilo corneam aut magis gibbam, aut planiorem fieri advertes. Neque etiam muscutorum nixus tibi conscius es, dum oculum ad objectum quoddam distincte videndum dirigis. Neque rationi consentaneum est, oculum sanum humoribus æquabiliter turgidum, adeo facile obedire pressioni tenuium muscutorum, ut inde notabilem figuræ mutationem patiatur. Cavum sphaeroideum, densis factum membranis, plenum aqueo latice, non parum resistit vi comprimenti etiam majori, quam sit illa muscutorum oculi. Exemplo sunt hydatides, aqua seu lymphæ turgidi cystici tumores, qui nonnumquam eam duritiem præ se ferunt, ut facile pro scirrho medicis imponant. Imo etiam vi externa adhibita, si bulbum oculi digito premas, citius hunc loco suo dimovebis, quam ut aliquam figuræ mutationem huic inducas, tametsi ita multo majorem, quam ab omnibus oculi musculis exerceri possit, pressionem experiaris. Magis vero adaucta pressione, & ea vi oculo illata, quæ hujus figuram tantillum mutare possit, adeo visum non perfici, ut potius inde obscuretur, propria experientia, quoties lubet, experieris. Nec mirum, cum ea vis ad interiora oculi propagata, mollissimam retinam comprimat, nervisque fibrillis hoc ipso sensum demat. Id ipsum autem consequi necessum esset, si tanta foret muscutorum pressio, ut oculi figura, quacunque demum ratione, inde mutetur. Denique in avium pisciumque gente, quibus animalibus cartilagineæ & ossæ sunt scleroticæ, certum est, nihil quidquam in figura oculi mutare musculos posse, dum interim exquisitissimo visu aves gaudere, omnibus constat.

Non minus infirma illorum hypothesis est, qui a corpore ciliari lentis crystallinæ figuram

aut situm mutari scripserunt. Etenim nihil omnino musculosæ fabricæ his inesse processibus, credendum est illis auctoribus, qui intimam oculi fabricam rimati, & ab omni studio partium liberi, non quod imaginatio suggessit, sed quod natura commonstravit, in lucem edidere. Atqui nec Accuratissimus ZINNIUS, nec alii Clarissimi Viri, quantumcumque armatis oculis, quidquam musculosi in hisce striis deprehendere potuerunt. Et veram esse choroideæ propaginem, mire plicatam, totamque vasculosam, anatome accuratior demonstrat. Novi de iride argumentum retorqueri posse; sed ingens fabricæ diversitas est; ad iridem præterea nervi copiosi veniunt, nulli, quantum hætenus constat, veniunt ad corpus ciliare. Iridis præterea motus certus ac manifestus est; certa igitur formari conclusio potest, aliquam hujus motus causam adesse, sive ea musculosæ, sive alterius naturæ sit. Quodsi motus processuum ciliarium certus esset, idem omnino de his, quod de iride argumentum valeret. Verum ille motus corporis ciliaris ex hypothesis solum ponitur, & huic semel posito aliquam imaginatio causam fingit, fingit musculosos hos processus, ut motus illius hypothetici ratio habeatur sufficiens. Sed etiam pone moveri processus ciliares, pone eos vi musculari præditos, non ideo sequetur, quod voles. Etenim si subtilitatem horum processuum expendas, facile adparet, eos non futuros pares umquam lenti crySTALLINÆ dimovendæ, cum certe capsula lentis decies robore superet membranam corporis ciliaris, observante HALLERO *El. phys.* V. p. 514. Itaque si vi musculari processus agereingas, sive receptis subito majore copia humoribus turgere velis, quidquid statuas, citius semper ipsas processuum horum strias rumpi necesse est, quam ut multoties magis resistens lentis capsula, ipsaque durior lens, loco cedant, vel aliquam figuræ

mutationem patiantur. Sed neque capsulae lentis nectuntur, folique vitreae membranae ope mucii nigri agglutinantur, & finibus liberis ultra lentis circulum maximum producti fluctuant. Neque expectes aliquam in premendo humore vitreo efficaciam, tum quod rationes mox dictae hanc pressionem non admittant, tum quod nimia obliquitate humori vitreo applicentur. Si denique oculi plenitudinem perpetuam, si aquei humoris resistantiam, & resistantiam corneae una perpendas, tanto magis inertiam imbecillimae hujus machinae ciliaris perspicias necesse est. Denique nulli sunt processus ciliares piscibus, in quibus tamen eadem, quae in aliis animantibus, ad diversas distantias videndi necessitas est.

Ergo nec in musculis oculi, nec in processibus ciliaribus ratio latet phaenomeni, quod objecta in diversa distantia posita videamus, modo distantia non nimis remota, aut nimis propinqua sit. Videamus an latet in pupilla? Novimus pupillam ad objecta remotiora ampliari, ad propinquiora constringi. Sic utique ad distinctiorem visum aliquid confert, dum arctata radios objecti propinqui nimis obliquos divergentes & visum turbaturos excludit, dumque contraria ratione radiis pluribus aditum praebet, quum alioquin pauci & fere paralleli ex objecto remotiore veniunt. Atque de hoc pupillae officio jam dictum est. Sed an ideo pupilla in mutanda foci distantia aliquam vim habet? Nam in eo omnis difficultas est. Patebit ex sequente consideratione. Ab objectis remotioribus veniunt radii parum divergentes, hos pene omnes, a cornea confectos, patula tunc & ampla pupilla admittit; ab objectis vicinis veniunt radii valde divergentes, hos constricta & arctior pupilla excludit, eos solum admittit, qui axi propiores sunt, & minus ceteris divergunt. Sed ita fere eadem ratio ma-

net in utrovis casu, five objectum ad pedis unius, five ad duorum pedum distantiam remotum aspicias, qui enim a propinquiore objecto nimis divergunt radii, quique tarde confringerentur, & focus retro retinam projicerent, ii ab arc-tata pupilla excluduntur. Ergo in utroque casu radii minus divergentes solummodo intra oculum admittuntur; in illo, quia ex ipso loco remotiore minus divergentes veniunt; in hoc, quia solum minus divergentibus arctior pupilla patet, obliquiores excludit; ac proinde in utroque casu distantia foci a cornea erit eadem fere; nisi ipsius corneæ aut lentis figura præter solitum plana vel convexior sit, aut objecti distantia vel nimis remota, vel nimis vicina. Felices certe essent myopes & presbyopes, imo nulli essent, si quædam potentia esset, quæ lentis crystallinæ aut corneæ figuram mutare posset; nunc vero ipsa hæc vitia demonstrant, nullam esse machinam in oculo, quæ aut figuram dictarum partium, aut distantiam a retina mutare possit. Pupillæ etiam contractio aut dilatatio, etiamsi in aliis hominibus, quorum oculi recte conformati sunt, ad distinctiorem visum omnino conferat, etiamsi conferat ad visum in diversa distantia, myopiam tamen vel presbyopiam emendare non potest, cum hæc vitia non ex radiorum obliquitate, sed ex corneæ & lentis crystallinæ majore vel minore vi refractili oriantur.

Nunc possum videri satisfecisse problemati, neque tamen videor mihi ex omni parte satisfecisse. Multum hac super re medidatus, quæstionem resumo, cur nimirum idem oculus recte conformatus idem objectum in diversa distantia positum videat? Quid quæritur? An, cur *simpliciter videat*, an cur *distincte* videat? Si quæritur, cur idem oculus objectum idem in diversa distantia positum distincte videat, nego suppositum, distincte videri in diversa distantia nego; illud

phanomen verum non est. Nam experientia docet, in certa omnes distantia distinctissime videre, in omni alia, etsi videat objectum, tamen minus distincte videre. Jam vero punctum distinctæ visionis est, dum objectum eam ab oculo distantiam servat, ex qua radii emissi in oculi retina imaginem pingunt possibilem minimam, sive dum ipse focus in retinam cadit. Ergo infero, quodcumque objectum minus distincte video, focus perfectus non cadit in retinam. Atqui in omni alia distantia, præterquam in unica, objectum minus distincte video per experientiam; ergo in omni alia distantia, extra punctum distinctæ visionis, focus non cadit in retinam, sed radii plus minusve concentrati, plus minusve foco propinqui. Ergo inutiliter omnes mathematici, & jatro-mathematici, quæsi-verunt potentiam, quæ faceret, ut in diversa objecti distantia focus perfectus in retinam caderet; inutiliter, inquam, laborarunt, cum res ipsa falsa sit. Porro si quæretur, cur idem oculus objectum idem in diversa distantia positum simpliciter videat, nullo habito respectu distinctioris visionis, respondeo nullam esse difficultatem, sed iis solum difficultatem apparere, qui credunt ad visionem objecti requiri, ut focus perfectus in retinam incidat, cum tamen id solum requiratur ad visionem perfectam & distinctissimam. Imago enim objecti in retina etiam pingitur, licet non ipse focus, sed radii foco propinqui jam valde concentrati in retinam incidant; distinctissime autem pingitur, cum imago illa spatium possibile minimum occupat, sive dum ipse focus in retinam incidit; minus distincte si fasciculus radios latior, & paulo serius focum factururus incidat. Cum jam, si omnia stricte expendantur, unica tantum distantia objecti sit, in qua distinctissime videtur, minus distincte videatur in omni alia distantia, patet, tunc solum perfectum

focus in retina formari, dum corpus in puncto distinctæ visionis situm est, in omni vero alia distantia focus formari minus perfectum, neque ad simplicem visionem absolute requiri, ut perfectus focus in retinam cadat. Hinc etiam licet corpus aliquod in diversa distantia videamus, dum tamen illud distincte cernere volumus, aut nos propius accedimus, aut illud oculis admovemus, donec hæreat in puncto visionis distinctæ, quo labore non esset opus, si oculus propriam potentiam nactus fuisset, qua se diversis objectorum distantis accommodaret. Et nunc demum puto problemati satisfactum, in quo tantopere se torserunt, maxima physiologorum ingenia.

§. D X L:

De his omnibus egi suo loco. Vulgo corneæ densitas eadem circiter, quæ aquæ; & lentis crystallinæ eadem, quæ vitri, assumebatur. Sed nimis laxa hæc computatio est. Cornea enim non solum majorem aqua densitatem habet, hinc magis quam aqua radios ad perpendicularum refringit, sed etiam vis ejus refractilis augetur ex particulis inflammabilibus, quibus aqua caret. Lens autem crystallina, quæ hic cum vitro fere ejusdem densitatis ponitur, certe multum infra vitri densitatem est, unde etiam radii ex aqueo humore in lentem crystallinam illapsi, minus refringuntur, quam refringerentur, si ex aqua in lentem vitream inciderent.

Unde necessitas humoris vitrei videtur ea esse, ut lens libere moveri potens, oculum diversis distantis recte accommodet &c. Hanc hypothesim jam expendimus, & insufficientem, & experientia anatomica destitutam vidimus.

§. D X L I.

Quomodo radii in corneam illapsi, refracti, per humorem aqueum, per pupillam trajecti, a lente crystallina denuo refracti, convergentes per humorem vitreum in retinam incidant, inque illa totidem distincta puncta minima pingant, ex quot distinctis objecti punctis radii ad corneam appulerunt, quomodo denique sic ex infinitis foculis nascatur focus aliquam latitudinem habens, & imaginem objecto externo similem referens, omnia hæc jam satis pertractavi. Quomodo autem præcise mens afficiatur ab hac imaguncula, id nos auctor naturæ penitus celavit, & sufficere debet medico, eo usque explicationem perduxisse, quousque intra corporeas affectiones actio objecti continetur. Interea, licet modum, quo mens percipit, non assequamur, hoc tamen certo scimus, animæ judicia de qualitatibus objectorum visibilibus certis legibus adstricta esse, & ex proportionem imaginis in retina depictæ, ex diversa proportionem radiorum lucidorum & ejusmodi conditionibus oriri, ut mox exponam. Judicat autem anima de *magnitudine, loco, distantia, figura, situ, colore, motu vel quiete* objectorum externorum.

Magnitudinem objectorum æstimamus ex angulo, quem lineæ intercipiunt, ex foco visionis ad fines objecti sensibilis ductæ. Quo major hic angulus est, eo majus nobis adparet objectum, & contra. Jam vero quo propius objectum est puncto distinctæ visionis, eo angulus visus major est, quo remotius objectum, eo minor est idem angulus, & in valde magna distantia minimus. Hæc ratio est, cur objecti magnitudo apparens continuo decrescat, quo magis id ab oculo removetur, & cur in maxima distantia, maxima objecta appareant valde exigua, vel minima. Porro corpora ejusdem magnitudinis habentur,

quæ sub eodem angulo optico comprehenduntur, etsi possint immenso differre magnitudine, si alterum horum immenso magis distet. Fallitur ergo mens quoties de magnitudine corporum diversorum comparata judicat, nisi diversa hæc corpora in eadem ab oculo distantia ponantur. Deinde, quia usu compertum habemus, corpora eadem, sive lucida, sive illuminata, quo propiora sunt oculo, eo lucem spargere vividior, eoque illustriora esse, cumque intensitas luminis decreseat in ratione duplicata radiorum a corpore radiante emissorum, sub eodem angulo necessario plures radii comprehenduntur in minore objecti distantia, quadruplo pauciores in distantia duplo majore, hinc etiam ex copia majore vel minore radiorum sub eodem angulo comprehensorum, seu ex majore vel minore luminis intensitate, de magnitudine corporum judicat anima. Et in hoc judicio iterum fallitur; nam quia ex habitu novit, objecta propiora etiam majora esse, esse etiam magis illustria propiora, quam remotiora, hinc quæ illustriora, eadem & propinquiora, & per consequens majora judicat. Ita sint in eadem ab oculo distantia duo objecta ejusdem magnitudinis, alterum vero multo illustrius, alterum multo debiliore luce radians, anima hoc in casu objectum illustrius multo majus, alterum multo minus esse judicabit, quia nimirum supponit in utroque æqualem luminis intensitatem, quæ non est, cum eadem ubique utrobique intensitate luminis posita illud objectum propius esse noverit, quod vividius radiat, propiora vero esse majora, hinc & illud multo majus esse existimat, licet illud sub eodem angulo optico videat, sub quo videt alterum. Hæc præcipua ratio est, cur lentes vitreæ convexæ, & microscopia magnitudinem objectorum adeo enormiter augeant. Cur etiam objecta licet remota, majora appareant,

quam sint, dum valde illustria conspiciuntur. Ita in incendio majore eminus viso, nocturno tempore, homines, qui prope incendium sunt, solito majores apparent, quia illustriores videntur. Cum porro sensilitas retinæ major suppleat intensitatem luminis minorem, etiam a sensilitate retinæ vividior magnitudinem corporum apparentem augeri mirum non est, cum idem sit, ac si objectum illustrius videretur. Hinc majora vident objecta, quibus antea usu oculorum privatis cataracta deponitur. Hinc sensilior oculus in eadem distantia minutias distincte percipit, quas alter minus sensibilis non advertit. Fallimur etiam in dijudicanda magnitudine corporum, dum idem corpus in diversa distantia positum esse credimus, licet reipsa non sit, sive quando in distantia dijudicanda fallimur. Ex hoc vera ratio reddi potest, cur sol & luna prope horizontem multo majores appareant, quam in ascensu suo zenith, seu puncto verticali cœli. Distantia enim cœli apparens verticalis nobis multo minor videtur quam distantia cœli horizontalis; nos interim credimus solem & lunam in hac apparente distantia moveri, & ideo sub minoribus continuo spatiis solem & lunam comprehendi cernimus, quo magis ab horizonte versus punctum cœli verticale ascendunt. Quæ autem sub minoribus spatiis comprehensa cernimus, ea nobis minora apparent. Igitur ex hac ratione etiam sol & luna nobis minores apparent, quo magis versus medium cœli spatium attolluntur. Eam demonstrationem debemus Celeberrimo SMITH Anglo, assumpsit eandem *Camperus de visu disert. in disput. anat.* HALLERI Vol. IV. pag. 255. Figuram vide in *Tab. IV. fig. 13.* Anguli optici hoc in casu æquales sunt, sed in spatiis minoribus distantiae cœli apparentis phænomeni ratio latet.

Locus objecti visibilis, æstimatur ex concursu axium opticorum, dum utroque oculo objectum intuemur; tunc enim axes optimi sese intersecant in eo puncto, quod utroque oculo intuemur. Dum vero unico oculo objectum respicimus, locus æstimatur ex linea recta, quam comprehendunt duæ lineæ rectæ ex parte retinæ sentiente ad ejus objecti fines ductæ. Et in loco quidem determinando mens sæpe fallitur; nam si dextro oculo objectum aspicias, id videbitur constitutum esse in fine axis optici dextri, si sinistro intuearis, transiliet in finem axis optici sinistri, ut facile quisque in se ipso experiri potest, intuendo objectum aliquod non nimis magnum. Hinc prout dextro vel sinistro oculo objectum aspicias, semper in alio loco videbis, etsi quietum in eodem loco hæreat. Certius de loco judicium formamus dum utroque oculo objectum intuemur; tum enim illud perpetuo in concursu axium opticorum invenimus. Sed & refraction & reflexio radiorum varia, priusquam in oculum incurrant, faciunt, ut objecta in alio loco, atque alio videamus, quod pleraque experimenta dioptrica & catoptrica evidenter confirmant. Reinum aut baculum aquæ immersum, intra aquam in alio loco videbis, quam reapse sit; nummum scaphæ impositum, quem in certa distantia non videbis scapha vacua, eundem videbis in eadem distantia, si scapha aqua fuerit repleta. Solem jam infra horizontem demersum adhuc supra horizontem putas existere in loco, quem dudum dereliquit, aut quem nunc primum occupabit &c. Denique etiam corpuscula, quæ intra oculum nostrum subinde conspicua fiunt, extra oculos in alieno videmus loco. Ita globulos, & lineas pellucas, & maculas subinde videmus extra oculum ex fortissimæ lucis intuitu, dum vascula retinæ solido magis dilatata & crassiores humores admittentia vicinas nerveas fibrillas afficiunt. Si-

milia etiam in morbis acutis contingunt, dum aucto sanguinis ad encephalon impetu etiam vascula oculi tenerrima solito magis distenduntur, & crassiores humores recipiunt.

Distantias objectorum metimur ex angulo, quem concurrentes axes optici in ipso objecto formant. Hic angulus eo magis semper minuitur, quo magis objectum ab oculo distat; eo magis augetur, quo objectum oculo vicinius est. Hinc ex magnitudine hujus anguli ad vicinitatem, ex parvitate ad longiorem objecti distantiam concludimus. Et duo corpora æqualibus intervallis a se mutuo remota in majore distantia minus distare putamus, quam in minore; & ex eadem ratione series arborum duplex, longa, etsi parallela, tamen convergere nobis videtur. Si vero unico oculo solum utimur, mensura distantiae est angulus, quem lineæ utrimque ab extremitate corneæ ad punctum radians ductæ comprehendunt. Accedunt alia adminicula usu comperta, e. g. decrementum magnitudinis, quia minora ea novimus apparere, quæ remotiora sunt. Porro visu distantiam alicujus corporis metimur ex distantia jam cognita aliorum corporum, dum distantiam apparentem illius, cum distantia jam cognita horum conferimus. Sed hæc omnia per usum addiscimus; reapse enim per visum nullam habemus distantiae notionem. Ita cæcus ille, cui deposita cataracta visum restituit Clarissimus CHESELDEN, cum a nativitate sua ad id usque tempus visu caruerit, etiam nullam habuit distantiae notionem sensu hoc restituto, sed omnia corpora, quæ videre cœpit, oculos suos contingere credidit, sive propinqua, sive remota, donec multo demum usu edoctus errorem agnoverit. Et in universum quidem, etiam multa experientia edocti, in distantia ex visu dijudicanda passim fallimur. Ingens magnitudo objecti alicujus
facit,

facit, ut illud multo minus distare putemus, quam revera distet, quia quæ majora sunt, ea etiam propiora judicamus. Refractio etiam & reflexio radiorum varia facit, ut plus minusve corpora distare existimemus. Si speculum planum introspicias, videbis imaginem Tui tanto spatio retro speculum depictam, quanto spatio ipse a speculo distas. Id demonstrant mathematici fieri, quia in speculo plano quodlibet objecti punctum videtur in concursu radii reflexi cum catheto incidentiæ, seu in concursu radii reflexi cum perpendiculari a puncto incidentiæ demissa in planum speculi, & ultra speculum continuata. Sed hæc demonstratio phænomenon ipsum solummodo concernit non autem causam phænomeni attingit. Videtur autem anima computare radium utrumque & incidentem & reflexum, atque ita objectum in dupla videre distantia, quæ etiam HALLERI sententia est.

Figuram corporum, convexam, vel concavam, eminentem, vel depressam, ex umbris lateralibus, & puto etiam ex majore radiorum brevitate vel longitudine dijudicamus; extimam figuram, seu terminos corporis angulo visus metimur. Hæc non nisi multo usu discimus. Juvenis ille nobilis Clariss. CHESELDEN deposita cataracta nullas corporum figuras distinguebat, quas tactu optime noverat. Solida ipsi tamquam plana diversimode colorata apparebant; picturas vero mirabatur postea, quas sibi solidas imaginatus erat, cum planas inveniret. Atque hic a nativitate cæcus fuerat. Addit vero Clariss. CHESELDEN, se pluribus visum restituisse, cujus jam a longa die immemores erant, illosque perinde, uti juvenis ille, debuisse addiscere videre, seu visu objectorum qualitates discernere. Hinc patet figuras corporum, convexitates, concavitates, eminentias, depressiones, lævitates,

longe melius tactu, quam visu, nobis innotescere, multa denique experientia etiam visu dignosci posse; sed fideliorem semper in hisce discriminandis tactum esse. Juvenis ille memoratus, diu inscius, quis eum sensus deciperet, cum, quæ solida tactu perceperat, visu plana solum perciperet, non nisi tempore errorem animæ agnovit, & utrumque sensum consociare didicit. Quando semel assuevimus figuris corporum ex visu dijudicandis, minus quidem fallimur, quam non assueti, fallimur tamen etiam, & quidem in minutioribus facile, si extra punctum distinctæ visionis hæreant, in majoribus objectis, si valde magno ab oculis intervallo remota sint, ut anguli in sensus non incurrant; hinc quadrata turris eminus rotunda cernitur. Fallimur denique si per lentem microscopicam convexam objectum intueamur, qua non solum illud nobis inversum repræsentatur, sed etiam quæ in objecto concava sunt, convexa, & vicissim quæ convexa sunt, concava apparent. HALLERUS etiam a distortionem oculi idem fieri observavit. p. 527.

Situs objecti inversus in retina pingitur ob necessariam radiorum decussationem, ut alibi dixi, quæ non a lente crystallina pendet, nam antequam eam subeant radii, jam sese decussant, & exempta lente perinde imago inversa pingitur. Et tamen anima aliter judicat, neque objectum inversum, sed in eo situ videt, quem extra corpus nostrum habet. Aliqui ut hoc explicarent, crediderunt animam initio quidem inversa objecta videre, sed errorem hunc sensu tactus corrigere; alii animam objectum non in oculo videre, sed in loco illo, in quo reapse est, vel apparet, hinc etsi imago objecti inversa pingatur, animam tamen corporis illud in situ recto videre, contendunt. Mihi sic videtur concludi posse probabiliter; quando animam in

universum de qualitatibus corporum externorum per lineas rectas, seu radios, ab imagine objecti ad ipsum objectum ductos judicare, certum est, etiam de situ corporum per ejusmodi radios, seu lineas judicare, vero est simillimum. Jam vero lineæ, seu radii, a parte superiore imagunculæ depictæ, extrorsum ducti incurrunt in partem objecti inferiorem, radii vero seu lineæ a parte inferiore imagunculæ extrorsum ductæ incurrunt in partem objecti superiorem; si ergo anima secundum eas lineas judicat, semper objectum in situ erecto videbit, licet imago objecti inversa pingatur. Cur autem non judicaret secundum eas lineas? dum de magnitudine objecti & aliis qualitatibus visibilibus secundum lineas judicat. Si error esset mentis, consuetudine & sensu tactus emendatus, infantes omnia inversa cernerent, quod etsi aliqui scripserint ex hypothese, nemo tamen demonstravit. Certe pulli recens exclusi pabulum in terra quærunt, quod in aëre quærere deberent, si inversa viderent objecta; & homines a nativitate cæci, qui nullam umquam per visum ideam habuerunt, cataracta deposita, mox objecta in situ erecto vident, quæ inversa viderent, si secundum imaginem, & non secundum lineas ab objecto in imaginem ductas judicarent. Fit tamen subinde ut objectum inversum appareat nudo oculo, sine lente adhibita, si valde parvum & oculo proximum sit: e. g. si per foramen exiguum in charta densa colorata factum objectum aliquod satis clarum trans eam chartam positum aspicias, inter chartam vero & oculum aciculam ponas, videbitur tunc acicula inversa. Acicula enim illa interposita radiis ab objecto trans chartam posito advenientibus aliquam partem radiorum intercipit, & in retina umbram facit, ejusdem figuræ, cujus ipsa acicula est; verum umbra hæc recta transit per hu-

mores oculi ad retinam, & recto situ ibidem pingitur. Jam vero prout anima objectum erectum videt, quando imago objecti inversa pingitur, ita objectum contraria ratione inversum videt, quando imago objecti erecta pingitur. Hoc autem fit in experimento citato, quod descripsit & sæpius tentavit Clarissimus CAMPER. Vid. *disput. anat.* HALL. volum. IV. pag. 258. & figuram vide in *Tabul. 4. fig. 15.* Melius MUSCHENBROECK p. 587.

Colores objectorum externorum distinguimus per radios coloratos a superficie corporum reflexos & oculum subeuntes; lucidum aut illuminatum corpus videmus, quando lucidos radios indivisos reflectit, vel emittit. Colores enim non apparent, nisi lucis radii dividantur, & in primitivas suas lineas, quasi dissolvantur. Cum lux decreseat, quo magis objectum ab oculo removetur, facile etiam patet colores objectorum minus vivide percipi in distantia objecti majore a puncto visionis distinctæ. Sæpe etiam a causa interna retinæ fibrillas afficiente, lucem & colores varios ante oculos videmus, qui tamen extra corpus nostrum tunc non existunt. Ita ægri subinde ignem, aut scintillas sibi videntur videre, sæpe ante insultum epilepticum miram varietatem colorum dicunt se percipere, interdum spectra vident, & simulacra modis variantia miris, præcipue in morbis cerebri acutis, quæ quidem ideæ a vasculis arteriosis retinæ, impetu horum adaucto, solito magis dilatatis, aut præter naturam micantibus, & proximas nerveas fibrillas afficientibus, oriri videntur. Notum est, ab alapa inflicta, subinde illi, qui eam recipit, videri, ac si scintilla coruscans ex oculo emicaret; idem etiam fit, si in tenebris oculum digito premimus, aut si ex improvviso digito in oculum incurrimus. Videntur iis in casibus

ita fibrillæ retinæ moveri, ut alias moventur a radiis lucidis; hinc cum similes nervorum affectiones similes in mente natæ ideæ concomitentur, anima his in casibus putat se videre scintillas, ignem, &c. licet nihil horum reapse tunc lucidi extra oculos illius hominis adsit.

Motus & quies objectorum externorum etiam per visum nobis innotescit. Et quiescere quidem judicamus corpus, quando illius imago immoto oculo in eodem retinæ puncto manet, moveri autem quando successive imago objecti ex uno puncto in aliud retinæ punctum transfertur. Alii aiunt tunc nobis motum corporum innotescere, quando illa continuo in aliis & aliis punctis axis optici videmus. Ita etiam HALLERUS. Verum etiam corpus moveri cernimus immoto oculo, nec axi optico in alia atque alia puncta translato, quo in casu solum imago alium atque alium in retina locum occupat. Potest ergo utroque modo explicari. Fallimur autem sæpe, dum de quiete vel motu corporum ex visu judicamus. Ita si distantia ipsa, quod corpus intra datum tempus percurrit, imperceptibilis sit, corpus judicamus quiescere, etsi revera moveatur. Et corpus vicinum videtur majorem intra datum tempus motum describere, quam corpus valde ab oculis nostris remotum, etsi hoc multo celerius feratur. Per microscopia augentur spatia corporum apparentia, hinc multa moveri deprehendimus, nudo oculo non percipienda. Vicissim quiescentia nobis videntur moveri, dum nos ipsi immoto quidem corpore, in curru vel navi celeriter loco movemur. Ita littora recedere vel accedere videntur navigantibus, quando motum ipsius navis non advertunt. Ita dum curru vehimur, & ceterum immobiles præta respicimus, hæc a nobis fugere videntur.

Hæ sunt qualitates corporum, de quibus ex visu judicamus. Nunc his absolutis quædam problemata resolvenda supersunt. Et *primo* quidem

Cur duobus oculis unum objectum videamus, cum tamen duæ imagines, altera in dextro, altera in sinistro oculo, pingantur. Quæsierunt solutionem problematis in decussatione nervorum optidorum, & in eorundem conjunctione, alii, cum veram horum nervorum conjunctionem anatomici non admitterent, ad insensibilia recurrerunt, & nervos hos in origine sua uniri finxerunt, sic ultimo unicam perceptionem esse ex duplici imagine. Sed hæc figmenta facile refelluntur; nam paucis mutatis in oculo unicum objectum duplex apparet. Alii dixerunt hanc esse rationem, quia anima objectum non in oculo, sed in concursu axium optidorum videt; alii negaverunt utroque oculo nos videre, sed unico uti, quod certe nimium est: & si etiam de quibusdam hominibus verum sit, non tamen de omnibus dici potest. Alii aliter sentiunt. Verior autem ratio hæc est, quod anima similes impressiones non distinguat. Nam cum utroque oculo ita objectum intueamur, ut in eo puncto objecti, quod distinctissime cernitur, axes optici utriusque oculi concurrant, radii perfecte similes, & sub iisdem angulis ad utrumque oculum veniunt, & sub iisdem angulis in utroque refringuntur, & in utroque in eandem retinæ plagam incidunt, & imaginem pingunt simillimam in utroque. Cumque perfecte sibi quoad omnia similes sint hæ imagines, anima inter has discrimen non inveniens judicat unum esse objectum, etsi bis representatum. Sic etiam duabus auribus unicum percipimus sonum, quum simillimas impressiones mens non dijudicet. Hæc etiam Celeberrimi HALLERI sententia. Verum licet hæc sententia propius ad veritatem accedat,

non tamen totam difficultatem solvit, ut illustri Viro visum est. Neque enim semper simillimæ sunt impressiones, siquidem plerique homines altero oculo distinctius, altero minus distincte vident. In altero ergo imago vividior pingitur, in altero aut imago obscurius exprimitur, aut certe retina minus sensibilis etiam minus ab æque vivida imagine afficitur. Deinde vero, si etiam simillimas imagines in utroque oculo pingi dederò, & adeo simillimas, ut mens nullum prorsus discrimen inveniat, quod certe dici non potest, quando altera imago vividior, tamen si etiam hoc dederò, nondum mihi satisfactum est. Si enim anima simillimas impressiones non discriminat, & ideo objectum unicum habet, cur, si duos globos ex eadem materie factos, ejusdem magnitudinis, perfecte quoad omnia sibi simillimos videam, cur, inquam, anima non videt unicum globum? Certe cum ipsi globi sibi mutuo simillimi sint, erunt etiam simillimæ eorumdem in oculo pictæ imagines. Cur ergo non unicum globum videt, sed duos? Nempe ideo duos videt, quia singulum in alio loco positum videt, novit autem corpus unicum non posse simultanee in duobus locis diversis existere. Et ideo a contrario objectum unicum simplex videt etsi duplici pingatur imagine, quia, ob concursum axium opticorum in eodem objecto, illud utroque oculo in eodem loco videt, novit autem, duo corpora non posse in eodem perfecte spatio hære. Hanc veram esse rationem phaenomeni hujus inde patet, quod, si alteruter oculus sic distorqueatur, ut axis ejus cum axi alterius nequeat concurrere, objectum unico quidem oculo visum simplex, utroque autem conspectum duplex appareat. Nempe tunc neque simillimæ in utroque oculo imagines objecti pinguntur, quia radii non eadem directione, nec sub iisdem angulis ad utrumque

oculum perveniunt, nec sub iisdem angulis in utroque refringuntur, nec in utroque in eadem retinæ plaga imaginem pingunt. Sed præterea, quia ob distortionem alterius oculi axes optici concurrere in objecto nequeunt, fit, ut illud duobus oculis conspectum in duplici loco videatur positum, cumque noverit anima, unicum corpus non posse simultanee in duobus diversis locis existere, illud tamen in duobus locis videat, hinc necessario putat se duplex videre objectum, quod non nisi unicum est. Ergo utraque ratio conjungenda est, ut problema solvatur. Ejusmodi distortionem oculorum pressione digiti efficere possumus, ut duplicia videamus objecta, fiunt etiam a paralyti unius alteriusve musculorum oculi, aut a convulsione, aut a tumoribus variis in orbita, oculum ex situ naturali dimoventibus, aut a mala consuetudine; ita pueri luscis vel strabones dum imitantur, facile ipsi luscis aut strabones fiunt, tumque objecta duplicia vident, donec tactu & ratiocinio errorem corrigant. Etiam ab ebrietate duplicia apparere objecta expertis crediderim; sed & ratio evidens est: nam ut omnes alii muscoli in ebriis vacillant, ita etiam musculi oculi desinunt bulbum suum modo consuetum movere, hinc distorquentur oculi, & inde duplex objecti unius visio. Contraria ratione duo diversa objecta in uno videmus loco, quando unum horum in axi unius, alterum in axi alterius oculi jacet. Cur enim hi axes sic jaceant, ut extra oculum in aliqua demum distantia concurrant, etiam objecta intra dictos axes harentia concurrunt. E. g. Ponatur proxime ante oculum dextrum stylus aliquis, & ante oculum sinistrum annulus cavus, tum dirigantur oculi versus objectum aliquod remotum, & videbitur stylus in medio annuli, licet duos digitos transversos a se mutuo distent. HAM-

BÉRGER. *Physiol.* §. 952. MUSSCHENBR. §. 1186. *Tab.* 16. *fig.* 7. Ita etiam duplex candelæ duobus oculis per foramen tabulæ visa unica apparebit, quando alternæ candelæ alternis oculis ita respondent, ut in concursu axium videantur.

Sed reponit HALLERUS, insecta multis oculis prædita unicum tantummodo videre objectum, etsi illis axes optici non concurrant. Sed quis revera hoc tuebitur? aut quænam aranea HALLERO revelavit, se unicum tantummodo objectum videre. An quia directe ad prædam suam insectum accurrit, sequitur, unicum tantum objectum ipsi repræsentari? At non sequitur; nam illuc accurrit, unde distinctiorem impressionem recipit. Et denique ab insecto ad hominem, in tanta fabricæ diversitate, argumentum non quadrat. Unico oculo modo is recte fabrefactus sit, numquam duplex objectum apparet, quia semper in fine axis optici videtur, semperque in eandem retinæ plagam imago illius objecti incidit. Si vero fabrica oculi vitiata sit, etiam unico oculo duplex videtur objectum, quod unicum & simplex est. Imo etiam sæpius multiplicatum apparere potest, e. g. si cornea aut lens crySTALLINA polyædram superficiem habeat; tum enim in uno oculo plures pinguntur imagunculæ in diversis retinæ locis, idemque objectum in pluribus videtur locis, perinde ut unum idemque objectum multiplicatur per specula polyædra. A cicatricula in cornea post cataractæ depositionem relicta homo flammam candelæ unicam viderat duplicem, & in majore distantia etiam quadruplicem, teste Celeberr. HALLERO. Id fit si per duo vel tria foraminula sibi proxima objectum inspicias, quod totiplex apparebit, quot sunt foraminula, si extra punctum distinctæ visionis hæreat. Sed ista hæcenus suf-

ficiunt & fere nimia sunt. Nunc alia problemata resolvamus.

Secundo : An uno oculo ad visum utimur, an duobus? Est in nostra potestate utrumque; passim tamen duobus videmus & alter alteri adjumento est; duobus enim oculis semicircularem fere ambitum comprehendimus, unico non plusquam quadrantem circuli. Quibus vero alter oculus notabiliter imbecillior est, ii fere unico precipue utuntur. Unico etiam utimur ad distinctiorem visionem; quando punctum aliquod seorsim & distincte cernere volumus, alterum oculum claudimus, altero utimur, eoque adhuc connivemus, ut omnes ab aliis objectis advenientes radios excludamus & impressionem recipiamus simpliciore; ita uno oculo in metam collinant venatores, ita unico oculo spectacula microscopia lustramus. Plura autem semper objecta duobus oculis videmus. Denique & hæc utilitas ex duobus oculis resultat, ut altero casso, alter supersit, quo uti possimus.

Tertio : Quare dum ex magna luce oculos subito in locum obscuriorem convertimus, nihil fere videmus? Hujus phænomeni ratio in eo est, quod retina a magna luce paulo antea percussa a luce debiliore nunc non afficiatur. Altera ratio est, quod pupilla a vehementiore luce contractissima sit, & paucissimos radios admittat, unde nunc tanto minus a debiliore luce affici oculus potest, donec & sensus ille vividioris lucis adhuc aliquantulum superstes paulatim evanescat, & pupilla in obscuriore loco sufficienter dilatetur, pluresque radios admittat.

Quarto : Quare dum ex caligine subito in lucem vividam oculos transferimus, molestum in oculo sensum percipimus: nimirum in tenebris amplissima pupilla est, si nunc subita vividaque

lux adfulgeat, plurimi radii subito per amplissimam adhuc pupillam irruent, antequam hæc contrahi potuerit. Inde nimis vivida in oculo sensatio, & ob nimiam vividitatem molesta. Eo autem vividior hæc sensatio est, quod oculus antea nulla vel debilissima luce affectus fuerit.

Quinto : An impressiones quæ fiunt in retina momentaneæ sunt, an durant aliquo tempusculo? Durant omnino, & inde fit, ut e. g. dum baculus ignitus in circulum agitur, circulum ignitum videamus, etiamsi tantum baculi extremum, quo circulus describitur, ignitum sit. Quia nimirum in singulis punctis circuli igniti sibi succedentibus minima tempuscula intercedentia mens nostra distinguere non potest, & vestigia priorum impressionum non evanida cum succedentibus novis impressionibus confunduntur.

Sexto : Quare oculum alterius inspicies tuam imaginem in illo vides? Hanc imagunculam reflexi a cornea radii efficiunt; prout autem in speculo objectum retro speculum videtur, ita etiam oculum alterius inspicies imaginem tuam retro corneam in pupilla vides. Hanc imaginem pupillam solemus vocare, & inde quoque pupilla nomen suum obtinuit. Morientium oculi, quia non nitent, nullam reddunt pupillam.

Atque ita pleraque absolvimus; paucula supersunt dicenda paragraphis sequentibus, quos jam breviter pertractare licebit, cum ex prædictis fere intelligantur, excepto unico MARIOTTI experimento, de quo mox.

§. DXLII. & §. DXLIII.

Lis olim agitata fuit inter Clarissimos Viros, num retina sit organum sentiens, num vero choroidea membrana, ut contenderat Celeberrimus

MARIOTTI. Liti huic sequens experimentum originem dedit. Duas chartas albas in eadem fere cum suis oculis altitudine in obscuro pariete affixit Celeberrimus hic Vir, sic ut duos pedes illæ chartæ a se mutuo distarent, & altera charta aliquantum humilior esset. Tunc ipse e regione stans oculum sinistrum clausit, dextrum vero oculum in chartam sinistram direxit viditque tum oculo dextro chartam utramque; inde porro recta retrocedens vidit semper eodem oculo chartam utramque, donec ad novem pedum distantiam retrogressus fuit; eo in loco charta dextra evanuit nihilque præter parietem & chartam sinistram vidit. Cæcus ergo tunc erat oculus dexter respectu chartæ dextræ. Porro accurata indagine constitit, hoc in ea distantia fieri, quando radii ex charta dextra venientes & ab oculo dextro refracti imaginem in centro retinæ & nervi optici pingunt. Unde sic intulit MARIOTTUS. Si retina esset organum sentiens, deberet utique imago chartæ dextræ percipi etiam in centro retinæ, atqui dum ibi loci imago pingitur, charta non percipitur, ergo retina non est organum sentiens. Porro sic ratiocinabatur: quando imago objecti in aliam retinæ plagam incidit objectum percipitur, sed perceptio objecti non potest adscribi retinæ, alioquin in centro retinæ etiam fieret perceptio, ergo perceptio objecti, seu sensatio fieri debet in ejusmodi membrana, quæ quidem in aliis retinæ locis ubique adest, in centro vero retinæ deest. Atqui choroidea tunica undique retinam ambit, centrum vero retinæ, cui nervus opticus respondet, nulla ambit choroidea, ergo choroidea est organum visus, & ratio cur in dicto casu charta dextra evanescat, est, quia incidit ejus imago in locum choroidea destitutum. Experimentum MARIOTTI certum est; repetii idem aliquoties, repetierunt alii multi, & quisque repetere potest, nam nulla dif-

ficultas subest. Possunt chartæ albæ in tabula nigra, aut nigræ chartæ in pariete albo suspendi ea ratione, qua dixi. Semper altera charta evanescet ad aliquam distantiam, quæ quidem variat in variis hominibus, pro diversitate oculi. Sed ratiocinium MARIOTTI falsum est. Nam ut nihil dicam, quod choroidea nervis careat, retina vero ipsa nervi optici expansio sit, quod choroideæ fabrica multis modis variet in animalibus, retinæ fabrica constans sit, ut nihil hæc urgeam, ratio manifesta est, cur centrum retinæ insensile sit, cur insensile sit centrum nervi optici. Novimus enim ex anatome, per centrum nervi optici excurrere arteriolam rubram cum sua venula, quæ vascula centralia vocantur; hæc vascula etiam centro retinæ, seu illi plagæ respondent, in quam nervus opticus inseritur. Jam vero si imago objecti in centrum retinæ ac nervi optici incidat, utique non incidit in fibrillas nerveas sentientes, sed incidit in vascula rubra insensilia, ergo visum objecti disparere eo in casu mirum non est; neque inde sequitur, quod MARIOTTUS voluit, retinam nerveam insensilem esse. Et simul hinc ratio patet manifesta, quare natura nervum opticum non in centrum oculi, sed propius nasum inseruerit. Per centrum enim oculi transit axis opticus; nunc si nervi insertio responderet centro bulbi oculi, axis visus semper caderet in centrum & in axim nervi optici, cum vero hæc ipsa plaga non nervea, sed vasculosa ac proinde insensilis sit, perpetuo cæci essemus quoties oculos directe objecto obverteremus. Simile PICARDI experimentum erat: Ad latus chartæ albæ parieti affixæ duas notas fecit duobus pedibus distantes, inde e regione stans ad novem pedum distantiam digitum inter oculos sic ponebat, ut ille sinistro oculo dextram, dextro sinistram notam tegetet. Demum utrumque ocu-

lum in digitum dirigebat, ita tota charta alba evanuit. Sed ratio phænomeni hujus eadem est; per conversionem enim utriusque oculi versus digitum oculus respectu chartæ illius albæ eum situm accipit, ut radii ex hac appulsi in nervum opticum incidant; hinc disparet objectum.

§. D X L I V.

Perfectio visus in eo consistit, ut imagines objectorum & distinctæ & satis vividæ pingantur. Requiritur ergo ad perfectum visum, *primo* : pelluciditas perfectissima corneæ, humoris aquei, lentis crystallinæ, humoris vitrei; *secundo* : corneæ & lentis crystallinæ iusta proportio, & ea convexitas, ut refracti radii focum in retina faciant; *tertio* : sensibilitas retinæ nec nimis debilis, nec nimis vivida, *quarto* : objecti externi sufficiens illuminatio, *quinto* : ejusdem in debita ab oculo distantia, seu in puncto distinctæ visionis constitutio. *Sexto* : Obscuratio oculi interioris ex nigro choroideæ pigmento. *Septimo* : Pupillæ obsequiosa mobilitas, ut ad objecta remota & ad lucem debiliorem dilatetur, ad propinquiora & ad fortiorem lucis stimulum contrahitur. Lentis crystallinæ mobilitas hypothetica est, & frustra conficta, nam & sine illa mobilitate phænomena visus explicari possunt. Ceterum hæc ulteriora explicatione non egent.

Quæ imaginis illibatas per liberum bonumque nervum opticum ad sensorium commune usque deferat. Hæc verba non juxta sensum literalem accipienda sunt; non enim imagines ipsæ ad sensorium commune usque transferuntur, sed impressiones ab imagine fibrillis nerveis retinæ inductæ solummodo propagantur; & ex his anima judicat.

§. DXLV. §. DXLVI.

Cur objecta posita in distantia minima, quam fert oculus, ut distincte videat, apparent Clarissimi? quia in ea objecti distantia focus radiorum in retinam cadit, & imago in spatio minimo possibili pingitur, & pingitur distinctissime, & retina denique vividius afficitur, cum radii proxime collecti sint.

Cur remota inde in magna distantia distincte, sed languidius afficiunt? Languidius afficiunt remotiora, quia lucis intensitas eo minor est, quo distantia oculi ab objecto major & quidem in ratione duplicata distantiarum. Cur autem utcumque distincte videantur etiam si a puncto distinctæ visionis remota, alibi dictum.

Cur propius posita (id est intra punctum distinctæ visionis posita) tam confusa cernuntur? quia tunc nimis divergentes radii in focus satis minutum concentrari non possunt, hinc nec imago in spatio minimo possibili pingitur, nec distincte pingitur.

Quid requiritur ad distinctum, quid ad fortem visum? Ad fortem visum requiritur, ut multi radii oculum subeant, & satis vivide retinam afficiant; ad distinctum visum, ut imago objecti in parte retinæ sensilissima, quæ axi optico respondet, pingatur, utque in spatio possibili minimo pingatur; utque in illo spatio radii sese invicem non turbent, sed totidem distinctissima retinæ puncta distincte afficiant, quot sunt puncta distincta objecti, ex quibus radii illi emanarunt.

D E A U D I T U.

§. D X L V I I.

Sonus tripliciter considerari potest : *primo* quatenus est in corpore sonoro ; *secundo* , quatenus est in aëre, per quem propagatur ; *tertio* , quatenus a nobis percipitur. Constat ex physicis experimentis , sonum , quatenus in ipso corpore spectatur , consistere in vibrationibus & tremoribus celerrimis particularum ejus corporis , quod sonum edit. In campanis majoribus oculus attentus advertit, dum ictu mallei pulsantur, quasi exterior campanæ superficies ex ipso corpore profili-ret. In aliis etiam corporibus sonoris tremorem manifestum tactu percipimus, in multis visu distinguimus. Habet autem se vis soni , quatenus in ipso corpore sonoro spectatur, ceteris paribus, in ratione composita ex magnitudine corporis & numero vibrationum. Constat, corpora mollia , non, vel parum elastica, vix sonora esse; sed horum corporum particulæ etiam ad contremiscendum ineptæ sunt; contra vero eo magis sonora esse corpora , quo duriora & magis elastica ; atque adeo ad contremiscendum aptiora sunt. Hinc molliora metalla , ut plumbum , aurum , parum & obtuse sonora , ferrum autem , cuprum , argentum , ut magis elastica, ita & magis sonora , omnium maxime vero æs campanum , quod ex cupro & stanno colliquatis oritur , unde campanæ & machinæ bellicæ parantur. Porro notum est , non quamcumque corporum vibrationem ad sonum producendum aptam esse ; ita e. g. brachia forcipis elasticæ ad se mutuo appressa cessante causa comprimente sese restituent & vibrabunt , non tamen sonum producent , si vero ejusdem forcipis brachium baculo ferreo etiam leviter percutiatur, illico sonum edet manifestum , etsi minus valide vibrare conspiciatur , quam in casu
priori.

priore. Nempe requiritur ad sonum producendum, ut ipsæ particulæ corporis solidæ loco suo moveantur, & inter se contremiscant, tum præterea requiritur, ut intra datum tempus certum numerum vibrationum absolvant, ut nobis sonus perceptibilis fiat. Nam, ut infra patebit, si numerus vibrationum corporis alias sonori intra datum tempus justo minor sit, nullus oritur sonus, quem nos saltem distinguere possimus. Omnia ergo quæ corporum elasticorum vibrationes minuunt, vel impediunt, ea etiam soni intensitatem minuunt, aut ejus propagatione impediunt. Minuunt autem vibrationes corporum elasticorum alia corpora non elastica, illis contigua; hinc campana undique nive contacta parum sonat percussa, & omnis fere sonus supprimitur, si panno vel linteo contegatur. Hinc chorda licet exacte tensa nullum reddit sonum, si plectro percurritur, quod oleo vel sebo inunctum est loco colophonii. Hinc minuitur sonus in cubilo tapetibus exornato, dum vacua cubilia multo clarius resonant. Contra tremor ille corporis sonori propagatur in ambientia, & contigua corpora, si illa ad contremiscendum apta sint, & per illa desertur ad magnam sæpe distantiam. Ita hostium ad aliquot adhuc milliaria distantium adventum milites perceperunt auribus terræ applicatis, alii eodem adminiculo tormentorum ex pugna longe distita sonitum perceperunt. Surdi ipsi, aut surdastri certe, qui per aures externas nullum sonum distinguunt, audiunt tamen, si baculum inter dentes comprehendant sonitum percussi baculi, aut etiam sonum loquentis, si alterum baculi extremum loquens ore contineat, alterum furdus dentibus prehendat. Ita enim tremor communicatur baculo, ex baculo per contiguitatem communicatur dentibus, dentes præcipue superiores eum communicant ossi maxil-

lari superiori, hoc ossi jugali & sphenoideo, & denique ossibus temporum, in quibus nervus auditorius hæret. Quodsi nunc hic vitio caret, & surditas ex aliarum partium vitio nata est, tremor ille nervo sic per ossa communicabitur, ut alias per aërem, perque externum auditus organon illi tradetur. Ita novi etiam hominem a nativitate surdum, qui nullum sonum auribus percipit, ne sclopeti quidem explosi pone aures; & tamen strepitum vehementem in pavimento excitatum percipit, tremore nimirum ex pavimento per ossa communicato. Quam facile sonus hac ratione propagetur, quivis in se ipso experiri poterit. Dum horologii mei manubrium dentibus prehendo, etiam obturatis auribus sonum horologii, aut penduli percipio, & majorem percipio sonum, quam alias, dum per solum aërem communicatum recipio. Nempe non solum propagatur sonus per contigua solida elastica, sed etiam augetur, quandoquidem illa ipsa corpora, una cum illo, ex quo tremorem impressum receperunt, harmonice contremiscunt. Ob hanc rationem fides, & alia instrumenta musica ex materie maxime elastica paratur, qua fit, ut uni parti instrumenti impressus tremor per totum illud instrumentum diffundatur, atque ex vibrationibus totius instrumenti conjunctis vis soni augeatur. Etiam per aquam sonum propagari, & per aquam ab aëre repurgatam, Celebrissimi NOLLETI experimentis constitit, etsi plurimi negaverint per aquam transferri. Audiunt tamen piscatorum voces urinatores, & ipse NOLLETUS ad 18. pedes sub aqua vocem humanam distinxit; neque certe pisces auditu destituti sunt. Et licet non elastica sit aqua, summa tamen ejus fluiditas facere potest ut contremiscat. Et vides manifeste aquam in scypho vitreo contremiscere, si prope scyphum campanulam pulses, nempe tremores vitri tunc

in aquam transeunt; non videbis tamen oleum contremiscere, quod dentius & minus fluidum est. Sed præcipuum medium per quod sonus propagatur, aër est, quod fluidum maxime elasticum omnium corporum sonorum tremores suscipit, eosque ad maximam distantiam celerissime continuat. Campanæ horologii in vacuo antliæ recipiente positæ & sonantis nullus exauditur sonus, si recte factum est experimentum, & si horologium interposito corpore molli a pavimento recipientis arcetur, & si cavetur, ne ipsa recipientis latera alicubi contingat, alias enim per contactum solidi corporis huic ipsi, & ab hoc aëri externo tremor communicatur, & utique propagatur sonus. Si aër in recipiente solum rarior factus sit, aliquis omnino sonus percipitur, sed debilis. Hinc etiam in aëre pluvio & nebuloso, minus elastico, sonus campanarum obscurior. Contra augetur vis soni in aëre denso & magis elastico; multo intensius sonat campana in recipiente, in quo aër condensatus est; intensius etiam sonat, si pulsetur in vase cupreo undique clauso, & demum calefacto, MUSSCHENBROECK *du son, Essai de physique* T. II. quia sic non densitas quidem aëris, sed vis elastica augeatur. Et hæc ratio est quare ceteris paribus æstate soni in aëre producti fortiores sint, & longius exaudiantur, quam hyeme, cur etiam in calidioribus regionibus celeritas soni aliquanto major observata sit, quam in frigidis. Denique in ipso aëre sonus nasci potest absque prævio tremore, si vel ipse aër contra aliud corpus quiescens moveatur, & ad id allidatur, vel contra aërem quietum moveatur, vel si igne subito ex missione corporum nato rarefiat, expandatur atque exagitetur.

Propagatur autem sonus in aëre undique per lineas rectas in omnem ambitum ad æqualem a corpore sonoro distantiam, uti lux a corpore

luminoso; atque adeo sphaeram describit sonoram, cujus centrum ipsum corpus sonorum est, peripheriam ultimæ æris undæ ab hoc corpore in omni ambitu æquidistantes formant; ob hanc rationem etiam radiorum appellatione utimur, & radios sonoros vel phonurgicos vocamus seriem particularum ærearum rectilinearum a corpore sonoro in tremores & oscillationes alternas impulsam. Facile hinc patet, soni intensitatem eo magis decrescere, quo magis crescunt distantiae a corpore sonoro, ad quas sonus pertingit; adeoque soni intensitatem se habere in ratione inversa quadratorum distantiae a corpore sonoro, nisi aliæ circumstantiæ accedant, quæ vim soni etiam in spatio majore conservent, vel augeant, quales circumstantiæ multæ esse possunt. Notum enim est, sonum, quatenus in tremulis æris undis consistit, illapsum in corpora dura resistentia, perinde, uti de luce constat, ab his reflecti ad angulos æquales angulis incidentiæ, hinc fieri potest, ut sonus etiam in majus spatium diffusus denuo in locum aliquem minorem colligatur, & robore augeatur etiam in magna a corpore sonoro distantia. Ita sonus in cavum ellipticum incidens colligitur in focum ellipsios, & robore insigniter augetur; ita etiam a speculis politis parabolicis colliguntur undæ æris sonoræ in focum, & intenditur vis soni; quodsi duo ejusmodi specula sibi e diametro obversa in certa distantia ponantur, & alter in foco speculi A submissa voce loquatur, ille, qui foco speculi B aurem admoverit, distincte omnia alterius verba percipiet, etsi intermedii homines nihil audiant. Augetur etiam vis soni a tubis phonurgicis. Tubæ parabolicæ longæ ærem sonorum per minus orificium impulsam, & in latera incidentem sic ex proprietate figuræ parabolicæ reflectunt, ut per lineas parallelas per orificium tubæ majus exeat, atque ita directe in aliquem locum aga-

tur, unde minus dispersi radii phonici vim conservant integram; sed & præterea vim auctam acquirunt, quum ipsa tubæ latera ab aëre impulsæ simul contremiscant, & illapsum aërem validius repellant. Magis augetur soni intensitas, si tubæ parabolicæ ostio minori adaptatum sit cavum ellipticum, sic ut alter focus ellipsis oriloquentis respondeat, alter cum foco parabolicæ tubæ coincidat; tum enim sonus ex cavitate illa elliptica undique repercussus in focum parabolæ ex concentratione vim accipit majorem, atque inde demum in parabolæ latera majore vi incurrit, ea vehementius exagitat, & ab iisdem vehementius repercutitur, & rectis parallelis lineis expellitur. In tubis retortis, spiralibus, itidem per repetitas reflexiones & auctos tremores vis soni intenditur. Conus spiralis retortus ita muro adaptatus, ut orificium ejus amplius extramurum in locum alium promineat, alterum autem minus orificium in conclavi pateat, administriculum est, quo voces etiam submissas hominum extra illum parietem loquentium ille percipere potest, qui in conclavi auscultat. Hoc artificio DIONYSIUS Siculorum tyrannus voces, & colloquia incarcerationum hominum percepit. Denique etiam per simplices tubos cylindricos vis soni augetur. Illi enim cavent, ne sonus, quem receperunt, in sphaericum spatium diffundi possit, atque adeo hac ratione vim soni integram conservant; sed & ipsius tubi cylindrici contremiscentia accedit, unde non solum vis soni conservatur, sed etiam aliquantum intenditur, etsi multo minus, quam in tubis spiralibus, in quibus reflexiones intra datum tempus multo plures fiunt. Hinc patet ratio, cur in aquæductibus Romanis, licet 500., etiam 600. pedes longis, vis soni integra conservetur observante KIRCHERO, adeo ut homo in fine aquæductus constitutus clare percipiat verba loquentis alterius

in altero aqueductus extremo. Porro ad augmentum soni conferunt omnes contremiscentiæ corporum vicinorum, quæ intra sphaeram corporis sonori posita dum undas sonoras aëris illabentes excipiunt, in similes vibrationes concitantur & tremores aëris multiplicant, ut multi omnino similes soni ab unico sono primitivo nascantur. E. g. dum in cubiculo vocem pronuncio, sonus ex ore meo exiens per lineas rectas, incidit in omnem cubiculi hujus superficiem, superiorem, inferiorem, lateralem &c. incidit in omnia corpora in hoc cubiculo locata, & ab omnibus hisce denuo repercutitur, fortius ab elasticis & duris obstaculis, debilius a laxis, mollibus, non elasticis. Singulus talis radius percussus sonus est, similis sono primitivo. Sed omnes hi soni secundarii, vel reflexi, ex unico sono primitivo nati adeo celeriter ad meam aurem revertuntur, ut inter sonum primitivum & hosce reflexos nullum sensibile tempusculum intercedere animadvertam. Hinc omnes isti soni reflexi a tabulato, a pavimento, a porta, a muris lateralibus, a fenestris, a scamnis percussi, coincidunt cum sono primitivo; adeoque non unicum sonum, sed millenos recipio, omnes sibi similes, & in idem sensibile tempusculum coincidentes, etsi unicam tantum vocem audire mihi videor. Quod enim unicam tantummodo vocem audire mihi videar, ratio est in similitudine omnium illorum sonorum cum sono primitivo, & in illorum cum sono primigenio coincidentia, & in nervo acoustico, qui ut alii nervi, mutationem impressam non illico perdit, sed aliquo tempusculo retinet; nunc soni reflexi eundem nervum afficiunt, dum priorem mutationem a sono primitivo natam nondum amisit, & cum mens tempusculum nullum sensibile inter sonum primitivum & reflexum animadvertat, necessario tot sonos pro unico habet. Fa-

eile vero patet, vim soni, qualem nos percipimus, ex primitivo & reflexo compositi, eo majorem esse, quo plures soni reflexi eodem tempore cum sono primitivo confluunt, & coincidunt. Hæc ratio est, cur vocis humanæ sonus efficacior in cubiculo, quam in planitie; cur iterum efficacior in cubiculo clauso, quam in patente, cur efficacior in clauso simulque vacuo cubiculo, quam in cubili mobilibus instructo, quorum multa ejus naturæ sunt, ut sonum primitivum non satis repercutiant, neque una cum sono primitivo contremiscant. Hæc etiam ratio est, cur vox ad concionem dicentis insigniter minuatur in templo, aut palatio magna hominum frequentia stipato. Quando vero distantia corporis sonum repercutientis tanta est, ut non omnis sonus reflexus cum sono primitivo coincidat, sed tempusculum aliquod intercedat, tunc anima sonum reflexum a primitivo distinguit, nasciturque echo. Distantia pro echo requisita est 50. & aliquot pedum. Atque hæc echo monosyllaba est; de tota nimirum voce prolata ultimam solummodo syllabam repetitam audimus; primæ enim syllabæ coincidunt cum posterioribus prolatis, hinc seorsim non audiuntur, sed tamen quia dissimiles sunt, sonum primitivum aliquantulum turbant; posterior syllaba reflexa serius venit, dum jam vox integra prolata est, hinc ea tunc seorsim repetita auditur. In majore distantia etiam duæ syllabæ, & iterum in majore tres, ac denique plures, & voces integræ repetuntur. Imo vero per muros arte constructos fieri potest, ut eadem syllaba pluries repetita audiatur.

Nunc porro ea breviter in memoriam revocanda sunt, quæ de celeritate soni a physicis demonstrata sunt. Usi sunt Viri Clarissimi tormentis bellicis, atque in diversa distantia positi pendulo exactissimo numerarunt tempuscula, quæ inter

flammam tormenti explosi & inter sonum exauditum intercederent. Ita Academici *Florentini* repetierunt eam esse soni velocitatem, ut in minuto secundo pedes 1185. percurrat. Repetierunt hæc experimenta Galli, & Angli, & paulo minorem celeritatem viderunt. Ex calculo NEWTONI, & HALLEYI, FLAMSTEDII, ac DERHAMI experimentis pedes 1142. anglicos sonus percurrit intra secundum. Observatum tamen est eam celeritatem aliquantulum augeri vel minui ex aliis causis. Aliquanto major celeritas visa est in regionibus calidioribus; & vento secundo, dum contra adverso vento velocitas soni aliquantulum diminuitur, & nonnihil etiam a nebulis. Eadem autem celeritas est soni parvi & magni, fortis & debilis acuti, & gravis; semper uniformi motu fertur, & æqualibus temporibus æqualia spatia percurrit, & duplo tempore duplum absolvit spatium. Hæc solum differentia est, quod sonus fortior utique ad majorem distantiam excurrat, quam debilior; neque ea distantia determinari, nec limites poni potest; limites enim hi dependent a robore soni. Tormentorum bellicorum sonus ad 90. milliaria Italica, & si credimus ejusmodi historiis, etiam ad 200. Anglica ex pugna navali exauditus legitur; quæ si vera sunt, non tamen hæc maxima distantia est, ad quam sonus deferri potest, si sub iisdem conditionibus soni robur majus ponas.

Supereft, ut de discrimine soni dicam, quod mihi quidem multo difficillimum est, quia musicam non calleo. Et tamen hoc discrimen ad auditus explicationem necessarium, omitti non potest. Omnes soni bifariam dividuntur, & ad duos tonos revocantur, *acutum* nempe & *gravem*. Limes inter tonum acutum & gravem arbitrarius est, & ab auris judicio dependet, natura enim nullum limitem posuit, sed gravis tonus successive ascendendo fit acutus & acutior & acutif-

simus & vicissim ex acutissimo tono in minus acutum & in gravem ac gravissimum descensus datur. Nempe singulum corpus sonorum in particulis suis elementaribus contremiscit & vibrat, dum sonum edit; vibrat autem jam frequentius intra datum tempus, jam rarius, pro diversis circumstantiis, e. g. pro diversa qualitate materiae contremiscentis, pro diversa tensione, elasticitate &c. In eo numero vibrationum corporis sonori omne tonorum discrimen ponitur. Si fiant intra tempusculum exiguum, e. g. minuti secundi vibrationes plurimæ tonus acutus nascitur, eo acutior semper, quo plures fiunt vibrationes. Si vero pauciores fiant, sonus nascitur gravis, eo gravior, quo vibrationes fuerint intra hoc tempusculum pauciores; quodsi nimis paucae fiant, sonus nullus percipitur. Nullus auditur sonus, quando vibrationes chordæ intra minutum secundum oculo percipi & numerari possunt. Ex calculo summi mathematici L. EULERI tonus omnium gravissimus & audibilium minimus 30. in uno minuto secundo vibrationibus absolvitur, & omnium acutissimus est, dum intra idem tempusculum vibrationes fiunt 7520. Quæ ergo vibrationes intra minutum secundum pauciores sunt 30., non audiuntur. Patet simul inde, non esse limitem verum inter tonos graves & acutos, sed respectivé tantummodo tales esse, si ad se invicem comparentur. Ita oscillationes 32. facient sonum, qui seorsim spectatus aurium nostrarum judicio gravis est, & gravis etiam est, si conferatur cum tonis aliis plures oscillationes complectentibus; idem tamen tonus acutus erit respectu gravissimi, qui 30. solum vibrationibus absolvitur. Ergo incipiendo a tono gravissimo reliqui succedentes omnes continuo acutiores sunt, & habet se acumen soni in ratione directa numeri vibrationum intra æquale tempusculum, atque adeo limes, qui inter tonos graves &

acutos ponitur, arbitrarius est. Oportet autem cavere, ne acumen soni cum intensitate confundatur; intensitas enim soni pendet a vi percussionis & a numero particularum contremiscantium, nulla habita ratione numeri vibrationum. Observavit Cel. SAUVEUR (*Mem. de Paris*. 1700.) eandem chordam, eodem semper tono servato, adeoque numero vibrationum manente eodem, 72ies majorem minoremve sonum reddere posse. MUSSCHENBR. II. p. 711., adeoque intensitatem soni augeri & minui posse multis admodum vicibus, nec tamen tonum minui vel augeri, sed eandem manere soni acutiem vel gravitatem, variata interim ejusdem intensitate. Notum etiam est a gravissimis sonis, qui auribus difficulter percipiuntur, quique paucio numero vibrationum fiunt, muros ipsos & columnas templorum subflire & concuti, e. g. dum organa majora, qualia hinc inde habentur, inflantur.

Indagarunt porro Viri Celeberrimi in causam discriminis tonorum gravium & acutorum, ut scirent, unde nimirum fiat, ut nunc pauciores intra datum tempus vibrationes in hoc sonoro corpore, in alio frequentiores absolvantur. Atque experimentis in chordis musicis factis comperitum est, variare numerum vibrationum pro longitudine chordarum, pro earumdem crassitie varia, & pro varia tensione; idque perinde in chordis metallicis, ut in chordis, quæ ex animalium intestinis parantur; pro iis ergo conditionibus variatis etiam tonum, id est acumen vel gravitatem soni, variare. Sint chordæ duæ ex eadem materie factæ, ejusdem longitudinis, ejusdem diametri seu crassitie, & æqualiter tensæ, erunt *unisonæ* & æqualem numerum vibrationum æquali tempusculo absolverent & tonum reddent æqualem. Si inæqualiter tensæ sint, posita eadem longitudine & crassitie utriusque, tonum reddent

inæqualem. Chorda nempe magis tensa intra datum tempus frequentius vibrat, & sonum edit acutiorem, laxè tensa aut nullum edit, aut gravem admodum. Eadem chorda, quæ nunc tonum reddit gravissimum, omnes alios tonos continuo acutiores reddet, si continuo magis magisque tendatur. Experimentis constitit, positis ceteris iisdem, acutiem toni esse in ratione subduplicata ponderum tendentium. Sive ut radices quadratæ ponderum tendentium, vid. MUSSCHENBROECK *Essai* II. §. 1439. Quod tensio in chordis, id in solidis aliis corporibus major elasticitas & durities præstat; hinc acutius sonant corpora magis elastica & duriora. Si chordæ fuerint æqualiter tensæ, ejusdemque diametri, & ex eadem materie factæ, sed diversæ longitudinis, erunt numeri vibrationum in ratione inversa longitudinis; ergo duplo longior chorda tonum edet duplo graviolem, duplo brevior duplo acutius sonabit. Idem etiam de fistulis organi valet, si fuerint chordæ æqualiter tensæ ejusdem longitudinis, ex eadem materie confectæ, sed diversæ crassitie, numerus vibrationum est in ratione inversa diametrorum seu crassitie; duplo crassior nimirum duplo graviolem, duplo gracilior duplo acutiorem sonum reddet. Ergo minor tensio, longitudo, & crassities aucta chordarum tonis gravioribus; tensio major, longitudo minor, minor item crassities tonis acutioribus excitandis vel producendis apta est. Interea tamen & hoc perspicaciores advertunt, eandem etiam chordam, eandem tibiam, non ita unicum tonum sibi proprium habere, sed ob naturam particularum, non eodem prorsus modo tensarum, plures una tonos edere, quos auris acuta distinguere possit & acutos & graves, HALLER. *Elem.* T. V. p. 273. atque inter eos principem aliquem tonum dominari, quod quidem, ni fallor, ex-

perientiae videtur respondere. Observat etiam MUSSCHENBROECKIUS, chordam satis tensam & elasticam, si vi majore percutiatur, ex lege elasticitatis, initio, dum se restituit, frequentius vibrare debere, & cum acumen soni sit in ratione numeri vibrationum, etiam hanc chordam vehementius percussam, initio dum se restituit, altius seu acutius sonare debere, quam deinceps, aut quam sonaret, si mollius fuisset percussa. *Essai de physiq.* II. p. 711.

Ex varia proportionem numeri vibrationum observata inventae sunt harmoniarum variarum rationes, quarum praecipuas his nominibus insig-
nuerunt musici *primo*, *consonantiam* vocant, quando *unisonae* sunt chordae, & aequali tempore aequalem numerum vibrationum absolvunt; *secundo*, *octavam* vocant, quando chordae A vibrationum numerus duplo major est numero vibrationum chordae B duplo longioris. Et hanc speciatim *octavam superiorem* vocant; *octavam vero inferiorem*, quando numerus vibrationum in chorda A subduplus est. Et inter duas octavas 43. tonos diversos ab aure subtili distingui posse ajunt. *Tertio quintam* appellant, dum chordae A numerus vibrationum est ad numerum vibrationum chordae B ut 3. ad 2. *quartam* nominant, dum vibrationum numerus illius est ad numerum hujus, ut 4. ad 3.; *Tertiam majorem*, dum est ut 5. ad 4.; *Tertiam minorem*, dum est ut 6. ad 5. Hæc etsi non videantur huc pertinere, debebant tamen adduci, ut ea melius intelligantur, quæ mox dicentur de tremoribus sympathicis. Nimirum certum phaenomenon est, quod, dum chorda aliqua stricta sonum edit, eodem tempore omnes aliae unisonae chordae, quæ ejusdem toni sunt, licet non attactæ una contremiscant, & cum illa consonent, quod facile intelligitur

partim a tremore per solidum contiguum propagato, partim vero etiam ab aëre pendere, qui tremorem unius chordæ alteri communicat, & cum altera ejusdem toni sit, in similes & tot numero vibrationes eandem concitat. Nec necesse est, ut ejusdem generis instrumenta sint, in quibus hoc phænomenon se prodat, sed diversissima etiam instrumenta, & diversissima corpora una contremiscunt, quando unisona sunt. Ita chorda contremiscit ad vocem unisonam, scyphus aqua plenus cum tibia, vitrum cum tympano &c. Ad cymbalorum ictus pileum, quem sub axilla gessi, manifeste contremiscere sensi, non una vice. Et de omnibus omnino corporibus hoc valet, quorum particulæ aptæ sunt eundem intra tempus idem vibrationum numerum absolvere. Præter chordas unisonas etiam illæ sympathice contremiscere observantur, quæ octava & quinta distant, obscurius, quæ distant tertia & reliquis tonis. Quando octava a se mutuo distant, & brevior harum pulsatur, altera quæ duplo longior est, in medio quiescere observatur, vibrat autem utrimque citra medium; cum enim duplo longior sit, intra idem tempus duplo pauciores vibrationes absolveret, nec cum altera contremisceret harmonice, nisi medium ejus immobile esset; nunc vero dum hoc fit, chorda hæc æqualis fit duabus chordis unisonis cum chorda pulsata; hinc non una harmonice contremiscit, MUSSCHENBROECK. *Essai* II. p. 723. In aliis chordis octava magis distantibus plura ejusmodi puncta immobilia apparent, dum ceteræ portiones chordarum cum alia chorda pulsata harmonice contremiscere observantur, teste eodem. Intelligimus hinc, qui fiat, ut in nostro corpore nonnumquam ad certos sonos certam vibrationem sentiamus? intelligimus, cur a sonis valde acutis, e. g. dum ferra lima raditur, aut dum panis cultro scinditur succo acidulo

arroso, cur, inquam, ab ejusmodi sonis dentes nobis contremiscant & subsiliant? cur fenestrae, vitra, domus ipsae ad certos sonos titubent quasi & subsultent? Intelligimus inde, quomodo a solo sono vocis humanae scyphi vitrei disrumpi possint, dum subito ex gravi in acutum tonum sonus flectitur, de quo phænomeno peculiarem librum scripsit MORHOVIUS? Intelligimus inde etiam, sonum primitivum utique non leve augmentum capere ex his sympathicis tremoribus, qui iisdem omnes tempusculis cum sono primitivo conspirant. Atque hæc interea sufficiant. Num quid ad auditus explicationem hæc phænomena conferant, suo loco videbimus.

§. DXLVIII. §. DXLIX.

Nunc his absolutis exponenda est structura organi auditorii, quod melioris ordinis gratia trifariam divido, nempe in organum externum, quod auricula & meatu auditorio externo constat, & cujus finem constituit membrana tympani. *Secundo*, in partem mediam, quam cavum tympani constituit ossicula recondens auditoria dicta. *Tertio* denique in organum auditus intimum, quod in osse petroso reconditum, ex vestibulo, cochlea, & canalibus tribus semicircularibus componitur. Initium sumemus ab organo externo. Maximam attentionem meretur auricula, quo nomine appellamus cartilaginem in conchæ modum offi temporum adnexam, valde elasticam, cuti investitam, variis eminentiis & cavitatibus alterne sese excipientibus artificiosissime structam, quæ radios sonoros ex aëre allabentes excipit, exceptosque reflectit, & in meatum auditorium impellit. Debuit hæc pars nostri corporis ex cartilagine strui, siquidem cartilago maxime elastica est, & contremiscere apta, dum contra molles corporis nostri partes,

ut ad vibrationes harmonicas parum aptæ sunt, ita etiam propagationi soni parum favent, imo potius vim soni extinguunt. Debuerat tamen etiam cuti investiri auricula, siquidem nuda cartilago libero aëri exposita brevi exsiccaretur, & cum siccitate rigesceret; sic autem, etsi quidem vim contremiscendi non amitteret, sed utpote rigidior & magis tensa cum acutioribus sonis tantummodo contremisceret, & ingratiorem redderet sonum, uti novimus etiam chordam magis tensam acutius sonare, & nimis siccam tonum ingratum reddere. Ergo cutis undique auriculæ cartilagineæ superstrata fuit. Sed quia cutis multo molliore, laxiore, & minus elastica fabrica constat, quam cartilago, sic cartilagineæ auriculæ cutis erat inducenda, ut sonum nullatenus suffocaret, nec cartilaginis cum sonis externis harmonicas vibrationes impediret; quare natura cutim auriculæ primo teneriorem dedit, secundo hanc teneriorem cutim undique subjectæ cartilagini per fortem brevemque cellulosam telam arcte undique alligavit, & exacte supertendit, ut immobilis & æque fere tensa sit, ac ipsa cartilago, dum aliis in locis corporis ubique laxa cutis & mobilis, facile a subjectis partibus elevari potest. Hac teneritudine cutis majore, & majore tensione, id compensavit natura, quod fabricæ cutis deest. Lobulus quidem infimus auriculæ laxam cutim habet; sed is etiam cartilagine fere caret, & ad auditum nil videtur conferre. Porro cavendum erat, ne cutis hæc auriculæ supertensa ab aëre nimis exsiccaretur & rigesceret, perinde ut de cartilagine dictum est. Id poterat caveri, si cutim hanc pluribus vasculis ditasset, & majore copia humorum irrigasset natura; sed ex majore copia vasculorum, ex majore copia humoris imprimis aquosi, iterum laxitas nimia sequi poterat; ergo alio adminiculo natura usa est, & undique cuti huic glandulas substravit simpli-

ciffimas, pinguem sebaceum humorem præparantes, qui lente secernitur, lente excernitur, atque ita cutim auriculæ moderate lubricat & inungit, ut nec nimis laxetur, nec interim nimium ab aëre exsiccetur & rigescat, sed in justa semper ac requisita tensione conservetur. Porro sic ossi temporum nectenda erat auricula, ut sonos ex omni parte venientes possit excipere, & in meatum auditorium reflectere. Ergo prominentes natura fecit auriculas, & superius & posterius ab ossibus & a cuti capitis remotas, ad angulum quidem semirecto minorem, qui autem major esset, nisi mala consuetudo vinciendo caput in infantibus, auriculas naturaliter prominentiores adplanaret & magis ad ossa apprimeret. Hac auricularum prominentia id obtinetur, ut liberius cum sonis externis contremiscere possint, quam si posterius ipsam capitis cutim contingerent; deinde obtinetur, ut radii sonori ex quacumque plaga venientes necessario semper in aliquam auriculæ partem impingant, eamque in vibrationes harmonicas cieant. Pone auriculam planam, non alii radii in hanc incurrent, quam qui directe adveniunt, innumeri alii præterlabentur. Nunc vero dum auricula satis magno intervallo prominet, sive radii sonori directi veniant, sive obliqui, sive ex anteriori parte sive a posteriori, sive a superiori, aut ab inferiori, semper necesse est eorum plurimos in auriculam incurrere exstantem. Etiam si ponas radios sonoros a corpore sonoro retro aurem posito, in posterius solummodo auriculæ planum incidere, neque in ipsam cavitatem auriculæ allabi, tamen etiam in hoc casu perciperetur sonus; nam auricula a radiis in planum posterius allapsis in tremores acta cum aërem, quem in cavo suo continet, ipsa suis vibrationibus in similes tremores concitaret, & in meatum auditorium impelleret. Sed neque is casus poni potest,

test, quia sonus in sphaeram diffunditur, & undique a vicinis corporibus adeo celeriter reflectitur, ut reflexi radii cum primitivis coincident; & ex hac sphaerica diffusionem celerrimaque reflexione soni facile patet, omnes auriculæ partes simul & semel a radiis sonoris illabentibus concuti, & eodem tempore, quo alii in cavam auriculæ superficiem incidunt & interiora auris exagitant, alios in partes auris exteriores incidere easque agitare; ergo nullum punctum est auriculæ, quod non radium sonorum incurrentem accipiat, quacumque etiam directione auris corpori sonoro obvertatur. Fortior tamen est auditus, dum auris directe sonoro corpori obvertitur, quia tunc perpendiculariter fere illabentes radios accipit, quorum vis major est, quam qui obliquiore directione moventur. Quadrupedibus hinc datæ sunt auriculæ mobiles, ut eas antrosum, retrorsum, ad latera porrigere, atque ita sonum undecumque venientem directe excipere possint. Non ea mobilitas est humanis auriculis, sed eo majus artificium in harum structura collocavit natura, vi cujus radios phonicos exceptos in unum locum cogere & reflectere possunt, quod conicæ & simpliciores quadrupedum auriculæ non adeo bene possunt. Mira hæc auriculæ humanæ configuratio fecit, ut diversas in ea eminentias & cavitates peculiaribus nominibus anatomici insignirent, quæ jam exponendæ sunt. Ipsa nimirum auricula in universum spectata, ovali utcumque circumferentia terminatur, inferius tamen in mollem appendiculam prolongatur, quam lobulum auriculæ vocant. Posterius a fine hujus lobuli libero incipit eminentia reflexa, tenui principio, inde in gyrum circumflexa juxta limbum auriculæ, sensimque latefcens & magis retorta, circa superiorem auriculæ oram recurvatur antrosum, indeque in cavam auriculæ partem in-

trorsum, eminente & sensim extenuato limbo procurrit eamque cavitatem bipartitur. Hic extimus reflexus auriculæ limbus *Helix* vocatur, & cavum illud auriculæ, quod a fine recurvato helicis dividitur, *Concha* solet nominari. Inferior hujus conchæ pars sensim angustata ducit in meatum auditorium externum. Supra concham vero supraque finem retortum helicis, aliud jugum quasi eminens cartilagineum, duobus intercedente exigua cavitate sejunctis cruribus, oritur, quæ retrorsum tendentia surgunt & confluunt in unum eminentem aggerem, qui intra helicem deorsum recurvatus supra lobum graciliore fine terminatur. Is *Anthelix* est, & cavitas, quæ inter crura ejus secedentia interest, perexigua, *scapha* nominatur. Ita VALSALVA p. 55. & *Tab. I. fig. I. lit. G.* HALLERUS autem invertit nomina, & scapham nominat, quod VALSALVA cavum innominatum dixerat ac vice versa. V. p. 189. Retinet tamen ALBINUS antiquam denominationem & bene. fig. vid. apud eundem L. VI. *annot. acad. Tab. IV. fig. I. & II. & Tab. III. fig. II.* reliqua vallis, quæ inter helicem & anthelicem interest, *cavitas innominata* dicitur. Porro conchæ pars extima, quæ meatui auditorio obversa est, protegitur utrimque eminentia cartilaginea, quarum alia anterior, & minimis pilis hirta *Tragus* dicitur, altera posterior & Trago obversa *Antitragus* appellatur. Hæ eminentiæ vallesque sic factæ sunt, ut radios in quamcumque auriculæ partem illapsos omnes fere in meatum auditorium determinent, quod BOERHAAVIUS multa cura in cadaveribus investigans observavit; nempe quocumque angulo radius aliquis sonorus in auriculam incidat, si exacte mensurentur anguli reflexionis æquales angulis incidentiæ, credit BOERHAAVIUS se observasse, post omnes denique reflexiones radium

illum in meatum auditorium determinari. Certe vel ex accurata figuræ consideratione apparet, radios, qui in superiorem conchæ partem inter radicem helicis & anthelicem incidunt, ab eminente anthelicis jugo in partem inferiorem conchæ, & ab hac in meatum auditorium reperiuntur; eos, qui in cavum innominatum aut scapham incidunt, post varias reflexiones demum etiam in concham projici, & reliquis associari, & quicumque in concham propulsi & collecti sunt, eos a trago & antitrigo non solum arceri ne extrorsum diffugiant, sed recta fere via in meatum auditorium denuo impelli. Hinc intelligitur, auriculam, præterquam quod ad receptos radios phonurgicos una harmonice contremiscat, atque ita suis vibrationibus sonum augeat, multo magis intensitatem soni augere, dum radios sonoros lata adeo superficie exceptos fere omnes in angustum meatum auditorium cogit, adeoque intensitatem soni in meatu auditorio tanto majorem esse, quanto minor est area hujus meatus superficie cava auriculæ. Et inde porro intelligitur, cur ablatis auriculis, aut iis nimium adplanatis auditus hebes & obtusa soni perceptio sit.

§. D L.

Sic facta auricula necitur ossi temporum duplici ligamento, quorum aliud anterius ad radicem processus zygomatici supra articulationem maxillæ ortum anteriori parti meatus auditorii cartilaginei, & ipsius auriculæ cartilagini inferitur, alterum posterius supra processum mastoideum exortum ad radicem meatus auditorii inferitur. Denique ipsa auriculæ cartilago producta, quæ initium meatus auditorii format, ad asperum ambitum meatus auditorii ossei firmo celluloso nexu undique adhæret. Non suffecerat autem auriculam ossi temporum solummodo neci;

etiam muscoli requirebantur, qui sic nexam variis modis regerent. Eadem enim chorda etsi cum unisonis, & aliis una alterave octava distantibus harmonice contremiscat, non tamen cum omnibus aliis chordis sympathice vibrat; sed eadem chorda diversimode solum tensa omnibus sonis accommodari, & omnes a gravissimo ad acutissimum usque tonos reddere potest. Hinc neque auricula nostra cum omnibus sonis harmonice posset contremiscere posita tensione semper eadem. Ut ergo omnibus sonis accommodari posset auricula, & cum omnibus tonis harmonice vibraret, musculos nacta est, exiguos quidem & debiles, & a quibus frustra motum aliquem auriculæ notabilem expectes, sed ejusmodi tamen valoris, ut diversas auriculæ partes diverso gradu tendere possint, qui solus naturæ scopus videtur fuisse in aure humana. Rari enim sunt homines, qui evidenter auriculas movere possint. Musculi autem auriculæ præcipui sunt sequentes:

Primo : Posterior sive retrahor auriculæ dictus, pluribus & plerumque tribus aut etiam quatuor divisis crassiusculis fasciculis ad radicem processus mammillaris oritur ab aponeurosi cervicalium musculorum, inde transversus antrorsum fertur, & fasciculis in unum tendinem collectis in exteriorem convexam conchæ partem inferitur, e regione circiter eminentiæ helicis concham bipartientis. Concham non nihil retrorsum trahit & tendit, unaque aditum in meatum auditorium parumper ampliat. Si concham exterius digito appressio aliquantulum antrorsum urgeas, deinde eam coneris trahere, manifeste actionem hujus musculi advertes.

Secundo : Superior, sive attollens auriculam, tenuis attamen latus pro tenuitate sua musculus oritur supra auriculam ab aponeurosi cranii, de-

scendit supra aponeurosin musculi temporalis, & parti convexæ auriculæ inseritur exterius in ea circiter regione, quæ cavitati inter crura anthellicis relictæ respondet, tum etiam anthelici ipsi aut vicinæ helici. Obscura est ejus musculi actio; tendit utique eam auriculæ partem, ultra nihil in mea aure advertere possum. Forte in aliis, quibus robustior est, aliquanto plus præstat.

Tertio : Anterior, minor reliquis, & ipse ab aponeurosi temporalis musculi exortus retrorsum fertur fere transversus, & ad radicem helicis vicinæ conchæ inseritur, subinde duplex est & aliam portionem ad superiorem mittit. Vix quid aliud præstare potest, quam ut eam partem conchæ tendat; meatum auditorium aperire, a quo longe abest, numquam vel HALLERO crediderim. Figuram horum musculorum dedit VALSALVA *Tab. I. fig. III.*

Sunt præterea alii musculi minores cartilaginibus auriculæ proprii, & quidem.

Primo : Tragicus, exiguus, fere quadratus, ad marginem tragi oritur & versus principium meatus auditorii angustior coit & finitur in ipso trago antèrius & exterius (vide VALSALVA *Tab. I. fig. IV. B.* & melius SANTORINUS *Tab. I. num. 8.*) Si quæ est ejus actio tragus utique tendet, sed conchæ dilatandæ, ut creditur, vix videtur sufficere.

Secundo : Antitragicus, etiam exiguus a radice anthellicis ortus descendit, & in antitragi partem supremam inseritur. Tendit ergo antitragum versus anthelicem, plus non videtur posse, & nimii sunt auctores, qui plus ei tribunt; tendi antitragum agente hoc musculo experior manifeste, dum eam partem auriculæ inter duos digitos premo, & dein nixum edo; non vero adverto tanti momenti actionem hujus musculi esse, ut in concha, sive dilatanda sive arctanda, quidquam valeat.

Tertio : Musculus *transversus* auriculæ exterius a cavi superioris conchæ dorso ortus, inde retrorsum ex transverso fertur, aliis fibris etiam sursum, & inseritur cavo anthelicis dorso eminentique scaphæ. Eam partem auriculæ, quæ inter crus retortum helicis & anthelicis prominentem aggerem est, sive partem conchæ superiorem tendit, & hanc actionem utique percipio digito huic cavitati immisso & aliquantulum adpresso. Plurimumque tamen imperfectus est, carneæ naturæ expers observante ALBINO p. 186.

Quarto : Musculus *major helicis* oritur a processu cartilagineo acuto anteriore helicis, qui supra tragus est, & in denudata solum cartilagine videri potest; VALSALVA *Tab. I. fig. II. D.* ALBINUS *L. VI. Tab. IV. fig. I. o. fig. II. h.* inde ascendit oblongus, angustus, juxta helicis cartilaginem & tendineus in ea evanescit, qua parte a capite incipit deflectere. Tendit eam partem helicis, neque quidquam amplius præstat. Sæpe etiam omnino abest.

Quinto : Musculus *minor helicis* totus etiam in helice manet. Helix in origine sua juxta antitragum incisura quadam disjunctam habet cartilaginem; VALSALVA l. c. Lit. E. SANTORINUS *Tab. III. fig. 4. h.* optime & distinctissime ALBINUS *annot. acad. L. VI. Tab. IV. fig. I.* ab hujus incisuræ inferiore margine exortus hic musculus ascendit per exteriora helicis, & hujus margini inseritur, utrimque tendinosus brevisque. Tendit eam helicis partem & incisuram non nihil contrahit, multis Clarissimis anatomicis non visus, ab ALBINO tamen & HALLERO paucisque aliis describitur.

In universum omnes hi muscoli in figura auriculæ mutanda vix quidquam possunt, sed videntur unice eam tendere, atque ita diversimode ten-

ſam aptum reddere, ut cum diverſis ſonis harmonice contremiſcere, & in eundem tonum conſpirare poſſit.

§. D L I.

Conchæ continuatur meatus auditorius externus, tubus partim cartilagineus, pro maxima tamen parte in homine adulto oſſeus, compreſſe cylindricus, retortus, introrſum per os temporis verſus tympani cavum tendens. In fœtu & in infante recens nato totus ille meatus cartilagineus eſt, & annulo oſſeo imperſecto, cui membrana tympani connectitur, terminatur. Per ætatem dein ex annulo illo producto lamina oſſea educitur, & meatum oſſeum perficit. Anterior tamen & exterior pars meatus etiam in adulto cartilaginea manet, oriturque producta cartilagine a trago, & a concha anguſtata atque introrſum producta, quæ aſpero meatus oſſei limbo adnectitur. Hæc pars cartilaginea meatus ex tribus fruſtulis cartilagineis fit, quæ duabus inciſuris a ſe mutuo, non tamen penitus diviſæ ſunt, VALSALVA *Tab. I. fig. II. c. c.* illæque inciſuræ membrana intercedente complentur. Porro a media portione cartilaginea in tertiam majorem tranſeunt fibræ muſculares exiguæ, SANTORINUS *Tab. I. num. 9. & Tab. III. fig. 4. lit. c.* Ipſam inciſuram optime expreſſit ALBINUS *L. VI. Tab. IV. fig. I. q. fig. II. n. o.* quæ inciſuram eam non nihil arctare poſſunt, & hoc modo meatum cartilagineum magis elatiſticum reddunt. Vocant hæc fibras muſculum *inciſuræ majoris*. Ceterum hic meatus auditorius in univerſum ſpectatus, vera tuba phonurgica eſt, aptiſſima radiis ſonoris reflectendis, & cum augmento ſoni propellendis. Nam non ſolum vi ſtructuræ elatiſticæ aptus eſt contremiſcere cum radiis, quos recepit, ſonoris, ſed eoſdem etiam ſæpius reflectit intra ſe, ac recta demum via in membranam tympani

ni impellit. Figura hujus meatus intorta est, ea-
 que ipsa intortio plurimum ad repetitas soni re-
 flexiones, atque adeo ad augmentum soni con-
 fert. In principio parum ascendit, inde circa
 medium arcu seu flexu retorto curvatur deorsum
 VALSALVA *Tab. III. fig. I.* & nonnihil antror-
 sum, iterumque ascendit, & obliqua sectione
 finitur, sic ut inferius & anterius aliquanto lon-
 gius procurrat, superius vero & posterius citius
 desinat. Non penitus circularem habet aream,
 sed potius elliptico-cylindricus est. Longitudo
 totius meatus novem circiter lineas, altitudo
 quatuor, latitudo tres aequat; latior tamen est
 in principio, & amplior, & non nihil etiam cir-
 ca finem. Meatum hunc investit cutis auriculæ
 prolongata, tenera, & exacte ubique tensa,
 valde sensibilis ob ipsam tensionem; hinc dolo-
 res aurium intolerabiles. Cuti denique epider-
 mis supertenditur. Cellulosa autem tela brevis,
 quæ cutim ad meatum religat, folliculis ple-
 na est simplicibus, flavis, rotundis, qui bre-
 vibus tubulis excretoriis cutim pertundunt, &
 in cavum meatus auditorii liquorem excer-
 nunt oleosum flavum, initio tenuem, mora
 spissescentem, amarum, quem cerumen au-
 rium vocamus. Unguen hoc & exsiccationem
 cutis præcavet, & sensilitatem ejus temperat,
 & infecta quoque ab auribus arcet, aut illapsa
 retinet; nimia vero copia accumulatum impedit
 utique soni ad membranam tympani appulsum,
 & auditum hebetat; hinc sordidi homines, qui
 aures numquam repurgant, ex hac causa sur-
 dastri fiunt. Sed ea surditas facile curatur emol-
 lito per liquidum quoddam saponaceum, auri
 infusum, & dein expurgato cerumine. Cutis
 meatus auditorii plena est pilis tenuibus, bre-
 vibus, qui titillatione sua pruritum excitant,
 & de repurgandis auribus nos monent, maxime
 si quod insectum in meatum irrepserit. Forte

etiam dum una contremiscunt ad illapfos radios sonoros, vim soni aliquantulum adaugent.

§. D L I I.

In foetu, cui meatus auditorius totus cartilagineus, proprium est ossiculum, in formam annuli factum sed imperfecti, & a superiore ac posteriore parte deliquium patientis, *Icon. ossium foetus Tab. III. fig. 16. 17.* fulco exsculptum, cui membrana tympani adhæret. Per ætatem vero ille annulus osseus cum reliquo osse petroso, cumque meatu auditorio coalescit & confunditur, & ultimum meatus auditorii limbum constituit, arctiusque nunc etiam, quam olim, membranam tympani comprehendit. Cavum osseum quod retro meatum auditorium est, ob similitudinem, quam cum tympano bellico habet, cavum tympani vocatur, membranam autem tympani appellant, quæ meatum auditorium terminat & cavo tympani prætenditur. Hæc membrana sic fini meatus auditorii adhæret, ut cum superiore ejus parte obtusum, cum inferiore acutum angulum constituat, adeoque obliquum situm habeat, quod mechanica necessitate fit, quia, ut dixi, superius & anterius citius deficit meatus osseus, inferius & posterius magis procurrit. Circumferentiam habet utcumque ellipticam, qualis ipsius meatus est, superius tamen processum emittit, quo deliquium illud ab annulo osseo relictum complet, magis in foetu conspicuum, quam in adulto. Versus meatum auditorium concava est, versus cavum tympani convexa in modum fere clypei protuberat; duobus tamen locis a manubrio & a processu brevi mallei nonnihil extrorsum urgetur, ut pars ejus, quæ supra mediam est, versus tympanum cava, versus meatum convexa sit. Tenditur perpetuo a malleo,

& a musculis mallei, ut semper tremula, semper ad vibrationes apta sit, nec ulla fere alia pars corporis adeo tensa reperiatur. Hinc etiam inflammatio hic loci summe dolorifica, & omnis in eo casu intolerabilis ægris videtur sonus. Pluribus hæc membrana lamellis componitur, quam BOERHAAVIUS descripsit. Prima & extrema ab epidermide est, secunda a cute meatum auditorium investiente, tertia cellulosa vasculorum elegantissimo reptatu percursa, quarta splendida, tenuis, pellucida, a periosteo meatus auditorii nata, quinta denuo tenera cellulosa vasculis, uti prior, percursa, sexta denique & intima a periosteo tympani. Inter hanc & quartam manubrium mallei comprehenditur. Tensio tamen efficit, ut etiam ex pluribus lamellis composita hæc membrana, satis tenuis sit. Sensilitas ejus a lamella cutanea imprimis pendet, & sensilitatem tenuitas auget & tensio. In fœtu propria membrana pulposa exteriorem membranæ tympani superficiem obducit, quam alii pro muco solum habuerunt, HALLERUS autem ab epidermide deducit, quæ cum sebo collecto, & adhærente speciem peculiaris membranæ præbet. Rugis enim similibus, ut epidermis prædita est, & illi continuatur.

In hanc membranam radii sonori ab auricula excepti, reflexi, coacti in meatum auditorium, ab eodem alternis vicibus reflexi & robore aucti incidunt, eamque concutiunt, potissimum autem mediam ejus partem, cui mallei manubrium respondet; inde per officula tremor ulterius continuatur ad intimum auditus sacrarium, ut his expositis patebit.

An media ex expansione membranæ nervosæ?
Nihil horum. Ex acri sensilitate membranæ tympani in eam opinionem incidit BOERHAAVIUS. Sed media membrana nervea nulla intercedit, nisi

cellulosam cum nervea confundas. Acris vero sensilitas in cutanea lamella sedem habet.

§. D L I I I.

Quæ hoc paragrapho dicuntur, pleraque sub priore jam exposui. De mallei cum membrana tympani & reliquis ossiculis nexu seorsim infra dicetur. Duo igitur solummodo puncta hujus textus attingam, & primo

quod hæc membrana arceat aëris ingressum ex meatu auditorio in aurem internam. Creditum fuit olim membranam tympani foramine naturaliter perviam esse, per quam aër ex meatu auditorio in cavum tympani penetraret. Auxit eam opinionem RIVINUS & post illum alii, qui & foraminulum ipsum a se visum testati sunt, & locum ubi inveniretur indicarunt; addiderunt alii etiam valvula munitum esse, & aqua affusa posse demonstrari. Favebant huic opinioni etiam exempla non pauca, qualia hodiedum non infrequentia sunt, nempe puris aut saniei ex interiore aure effluxus, sive ex interioribus cerebri, sive aliunde manaverit; non posse autem saniem vel ichorem ex interiore aure effluere, nisi foramine pervia esset membrana tympani; adhæc visos esse homines, qui fumum tabaci per os haustum ex auribus emitterent &c. Verum recentiores anatomici illique expertissimi nullum unquam in membrana tympani foramen invenerunt, neque in foetu, neque in adultis hominibus; & illam fumi tabaci per aures explosionem aut fabulosam esse, aut ad agyrtarum imposturas pertinere, advertunt; saniem autem, ichorem, pus, & quæ ejusmodi sunt, per vias præter naturam factas effluere posse. Hodie nemo amplius litigat, & certissimum ab omnibus habetur, membranam tympani in statu naturali imperviam nulloque

foramine pertusam esse, non ergo aëri ex meatu auditorio per eam membranam in cavum tympani viam patere, sed motum solum tremulum sonorum ad interiora transmitti.

Et forsitan aliquid obscuri auditus hic exerceri. Ea fuit quorundam conjectura. Sed verum auditus organum profundius latet. In membrana tympani æque parum auditus etiam obscuri sedes est, quam parum in cornea vel lente crystallina sedes est visus.

§. DLIV. DLV. DLVI.

Retro membranam descriptam in osse petroso cavitas est, utcumque subrotunda, irregularis tamen, quam cavum tympani vocant. In ea cavitate hærent ossicula auditus quatuor, malleus, incus, ossiculum sylvianum & stapes, ea ratione inter se articulata, quæ mox dicetur, ubi tympani descriptio præmissa fuerit. Cavitas hæc mediam organi auditorii partem constituit, & retro se in parte interiore ossis petrosi habet labyrinthum, exterius membrana tympani terminatur; ab anteriore & superiore parte communicat cum faucibus, per tubam *Eustachianam*, canalem nempe suo loco describendum, qui ex cavo tympani antrorsum & introrsum deductus retro infimum narium meatum in fauces patet. Per eum canalem aër per os aut nares inspiratus cavum tympani subit, & per eundem vicissim ex cavo hoc expellitur. Interior paries ossis tympani, qui illud a labyrintho determinat, duo foramina continet, alterum utcumque ovalis, alterum rotundæ figuræ; illud *fenestram ovalem*, hoc *fenestram rotundam* appellant. Inter duas has fenestras medius paries ossis extrorsum in tympanum protuberat, & *promontorium* vocatur. Anterius & posterius & superius paries tympani ossis cellulosus, & præcipue posterius adsidet illi

cellula, quæ quasi tympani appendix est, denique totus processus mastoideus ossis temporum in adulto homine cellulis excavatus est, quæ cum tympani cavo communicant, & soni reflexionem multiplicant, adeoque & vim soni hac in parte augment. Totum tympani cavum suo investitur periosteo admodum vasculoso, quod cum faucium membrana per tubam *Eustachii* subeunte continuatur. In foetu cavum hoc aqua rubella viscida plenum reperitur, in adulto homine non infrequenter muco, teste HAL- LERO; muco certe ex tuba in tympanum aditus est. Præter cellulas osseas mox dictas, etiam periosteum ad ossicula productum varia format exigua sepimenta, & in membranaceas cellulas ipsum tympanum dividit. Nunc de ipsis auditus ossiculis dicendum est. Primum horum *malleus* appellatur a crassiore capite, quo cum incude articulatur. Hoc capitulum rotundum superiorem & exteriorem cavi tympani locum tenet, duabusque lineis eminentibus medio sulco divisus præditum est. Inde pars mallei angustior *cervix* dicta duos edit processus osseos, alium *brevem* crassiusculum, qui membranæ tympani innititur, eam paululum extrorsum urget; alium longum, planum, qui antrorsum & non nihil deorsum procurrens, sine plerumque in modum spathulæ dilatato in sulcum proprium tubæ Eustachianæ recipitur; hunc processum mallei *longissimum* vocant. Sed *manubrium* mallei dictum ex ejus cervice recta fere via descendit ad medium usque membranæ tympani descendit, huic accurate connexum, atque inter ejus lamellas comprehensum, sine latiore & nonnihil extrorsum incurvato terminatur. Alterum ossiculum *incus* vocatur. Hoc retro malleum ponitur, & capite suo crassiore, quod superiora tympani tenet, cum mallei capitulo articulatur. Incudis nimirum capitulum duos sulcos

impressos habet intercedente media linea eminente; mallei vero capitulum duas habet eminentes lineas intermedio fulco divisas, hinc ita adaptatur incudi, ut lineæ duæ eminentes capituli mallei fulcis duobus incudis, & hujus media eminens linea fulco mallei, vicissim committatur. Ex crassiore suo capite incus abit in duo crura, quorum alterum crus breve, alterum crus longum appellatur. Crus brevius introrsum versus parietem osseum tympani abit, & ex fine suo fisso membranulam seu ligamentulum educit, quo ad aliquam ejus parietis cellulam firmatur. Crus longius vero manubrio mallei fere parallelum descendit non penitus ad mediam tympani regionem, sineque introrsum recurvato, & exigua foveolas excavato nectitur officulo subrotundo sylviano, & mediante illo stapedi. Hoc officulum ex omnibus totius corporis minimum, inter crus longum incudis & stapedem intercedit. *Stapes* quartum officulum est. Hoc in media fere, & paululum tantum supra mediam tympani regionem hæret, & cum crure longiore incudis angulum fere rectum format; nam ut illud crus fere ad perpendiculum descendit, ita *stapes* horizontali directione introrsum versus parietem anteriorem tympani ad fenestram ovalem tendit. *Stapedem* autem vocarunt a similitudine figuræ, qua utcumque *stapedem* turcicum refert. Basim nimirum habet planam, eaque supra promontorium fenestræ ovali insistit. Ex hac basi duo crura curva inæqualia, longius alterum, alterum brevius emit, quæ ad se mutuo inclinata confluunt in exiguum capitulum, quod exterius membranam tympani respicit, & officulo sylviano, ac mediante hoc fini recurvato cruris longi incudis nectitur. Utrumque *stapedis* crus in latere interiore sulcatum est, & ex illo fulco undique educitur membranula, quæ crura hæc inter se conjun-

git, & ad basin stapedis adhærescit. Basis ipsa fenestræ ovali insistens non penitus ovalis est, uti neque ipsa fenestra, sed ambitum superiorem habet magis curvum, inferiorem rectiorem, & qua fenestram respicit, aliquantulum convexa, qua tympani, membranam spectat, aliquantulum concava est. Omnia hæc officula investuntur perioſteo, & præter articulationem, qua inter se necuntur, & membranulis, quæ quasi ligamentorum usum præstant, revinciuntur. Tale ligamentum inter crus longum incudis & mallei manubrium intercedit, & aliud simile inter processum mallei longissimum & stapedem ex tympano natum pariter ad manubrium descendit & illi adhæret; aliud incudis crus brevius, ut dixi, necit ad cellulam tympani; alia membranula stapedem a reliqua majore tympani cavea separat. Videntur autem hæ membranulæ non solum officulis necendis inservire, sed etiam ad sonos contremiscere, atque ita auditum etiam perficere.

Inter hæc officula malleus & stapes musculos nacti, quibus varie tendi, & variis tremoribus adaptari possunt. Vocantur hi muscoli auris interni ad distinctionem externorum, de quibus jam dixi. Sunt autem sequentes, qui ad malleum pertinent:

Primo: Tensor tympani, qui ponitur in sulco exterius & superius tubæ Eustachianæ adjacenti, oriturque a processu ossis multiformis, qui tubam cartilagineam recipit inter foramen caroticum & arteriæ meningæ. Hæc in ossibus denudatis & ficcis facile conspiciuntur, uti etiam sulcus, & sulci in tympanum continuatio. Inde in sulco suo tubæ parallelus, at exterior, pergit retrorsum, & in cavum tympani, in quod ipse ille sulcus producit, intrat; tumque circa finem hujus sulci, tamquam circa trochleam tendinem suum

circumflectit, qui mutata directione deorsum & extrorsum versus tympani membranam procurrens sub processu longissimo in principium manubrii mallei inseritur. Verus est musculus, deque illo nemo anatomicorum dubitat. Agens trahit manubrium mallei, cumque eo simul membranam tympani introrsum, sic eam tendit, & sonis acutioribus recipiendis ac propagandis adaptat, simulque cavitatem ejus versus meatum auditorium, convexitatem versus tympanum auget. Resecto eo musculo membranam tympani relaxari, VALSALVÆ observatio est.

Secundo : Musculus *mallei externus*, oritur ab acuto processu, quem os multiforme inter partem squammosam & petrosam ossis temporum interponit, subit dein rimam cavitatis clenoidæ, per eamque meatum subit auditorium, & juxta superius deliquium intimæ hujus meatus oræ retrorsum tendens inseritur processui mallei longissimo, si verus est musculus, poterit omnino malleum non nihil ad exteriora versus meatum auditorium trahere, atque adeo membranam tympani relaxare, ne a validioribus sonis nimium concutiat. Sed multi dubitant, num verus musculus sit, cum nil diversum a membrana habeat, nec fibris carneis præditus conspiciatur. Ita HALLERUS & alii Cel. Anatomici.

Tertio : *Laxator tympani*, inter musculos mallei minimus, a meatus auditorii ossi parte superiore & posteriore, qua jam cum membrana tympani cohæret, oriri dictus, tectusque membrana ipsius meatus introrsum ire per sulcum annuli, & gracillimo tendine inferi in manubrium mallei, juxta hujus processum brevior. Hinc agens mallei manubrium sursum, postrosum & extrorsum duceret, atque ita omnino membranam

branam tympani laxaret. Sed & de hoc dubitat HALLERUS, dubitant alii multi, num verus musculus sit, num potius ligamentulum quoddam. ALBINUS ipse aliquam prodit incertitudinem, etsi pro musculo omnino describit.

Quarto : Stapedius. In parte posteriore & inferiore tympani papilla ossea est, antrorsum emiens, intus excavata. Hanc cavitatem replet musculus verus, sed omnium totius corporis minimus, tendinemque ex foramine papillæ osseæ emittit, qui antrorsum fertur & stapedis capituli parti posteriori sub ejus cum incude articulatione nectitur. Hinc dum agit, stapedem inclinat & ita vertit, ut pars posterior profundius in foramen ovale adigatur, pars anterior vero basios ejusdem officuli e fenestra ovali exeat.

Notandum vero est, fenestram ovalem nulla membrana clausam esse, ut olim quidem credebatur, & a Celeb. BOERHAAVIO paragraphis 555. & 556. repetitum fuit; sed nuda stapedis basis huic fenestræ insistit tantummodo, & ea quidem mobilis ea ratione, ut mox dixi.

Nunc BOERHAAVIUS, exposita membranæ tympani & ossiculorum structura, pergit paragrapho sequente horum usum & functionem exponere. Sed melius me facturum opinor, si structuram reliquarum partium, quæ ad auditum concurrunt, & organi auditorii intimi fabricam describam, deinde his omnibus præmissis ipsam auditus theoriam collectam tradam. Superfunt autem multa adhuc ad fabricam organi pertinentia, & quidem cum historia tympani tubæ Eustachianæ descriptio conjungenda est, & fenestræ rotundæ, & chordæ tympani, demum labyrinthus cum suis partibus exponendus est.

Dixi cavum tympani suo periosteo investiri, admodum vasculoso, id periosteum septula varia producere, & membranulas, quibus tympanum subdividitur, & officula inter se nectuntur. Eas membranulas constanter exhalare humorem seu vaporem tenuem, qualis in omnes cavitates corporis exhalat, & analogia suadet, & aqua rubella, viscidula, quæ in foetu hic reperitur; & alioquin necesse est, partes has flexiles conservari, quod fieri vix posset, nisi perpetuo humectarentur. Sed præterea requirebatur in cavo tympani aër, qui cum aëre externo sonoro harmonice contremisceret. Cum vero membrana tympani meatum auditorium externum perfecte occludat, aër ex meatu auditorio non potest subire cavum tympani. Ergo aliam viam facere debuit natura, qua aër in cavum tympani subire posset. Hæc via per tubam Eustachianam est, ita dictam ab inventore B. EUSTACHIO. Incipit hæc tuba semicanali osseo in ipso tympani anteriore pariete ante promontorium, inde canalis integer osseus per substantiam ossis petrosi antrorsum & nonnihil introrsum fertur, continuo angustior, quo magis a tympano recedit, ac demum scabro fine cum ipso osse petroso terminatur; sed hic accipit adnatum alium canalem cartilagineum & pro parte etiam membranaceum, qui continuato ductu priore antrorsum & introrsum fertur, sed contraria ratione eundo semper magis dilatatur, ac demum in suprema faucium parte retro velum pendulum palatinum, retroque narium meatum infimum ostio amplo & obliquo, exterius longius procurrente in fauces aperitur. Hæc tuba cartilaginea est, & in fine tumidum annulum membranaceum habet, in quo folliculi mucosi sedent, & quem ipsa faucium membrana efficit. Univerſa ergo tuba Eustachiana duos quasi coenos refert, qui apicibus suis sibi mutuo appli-

cantur. Latera hujus tubæ aliquantulum complanata sunt, ut sectio potius ellipsin, quam circulum referat. Membrana faucium in eam aliquo spatio intrat, hinc mirum non est, subinde aliquid muci in tympani cavo reperiri, sed plurima pars tubæ interna a periosteo tympani investitur. Tuba hæc perpetuo patet, atque hinc etiam via aëri ad cavum tympani patet constanter, sive per os respiremus, sive per nares. Non quidem ipse aër in aurem inspiratur, sed dum aër cavi tympani exhalante vapore minus elasticus fit, sponte sua aër, per os aut nares inspiratus, tubam subit, & defectum aëris in cavo tympani refarcit. Vicissim aër in cavo tympani aut nimis rarefactus, aut a membrana tympani magis tensa & introrsum tracta propulsus per eandem viam ex tympano exit. Per eandem viam tympanum humoribus suis repurgari potest, ne nimium accumulentur & auditum obtundant. Per eandem viam noverunt chirurgi recentiores, tubulis in ostium tubæ intrusis, liquores medicatos in cavum tympani injicere, & sic aurium quibusdam morbis mederi. Nisi via esset, per quam aër tympani cedere posset tremoribus membranæ tympani & ossiculorum, nisi via esset, per quam idem renovari posset, auditus esset nullus. Id evidenter confirmat duplex Cel. VALSALVÆ observatio, altera facta in homine, cui polypus narium indies increscens sensim tubarum orificia compressit, & tandem penitus occlusit, cui magis magisque indies auditus minuebatur sic, ut tandem surdus evaserit. Altera ejusdem observatio certius adhuc idem confirmat. Hæc autem est; homo erat ulcere uvulæ affectus, quod non solum eam partem uvulæ, quam occupabat, exederat, sed etiam ad usque sinistrae tubæ orificium proserpserat. Quoties jam homo ille mollem turundam remediis imbutam in ulceris cavitatem intrudebat,

toties illico sinistra aure evadebat surdus, talisque permanebat toto eo tempore, quo turunda in ulcere relinquebatur, statim vero ac removebat, pristinum auditum recuperabat. VALS. Cap. V. num. X. Ex his utilitas & necessitas hujus tubæ manifeste patet.

BOERHAAVIUS descripsit tubam Eustachianam paragraphis 558. & 560. interrogat, *an tuba actione musculi interni seu tensoris tympani aperiat eodem tempore, quo adducta membrana tympani ardeatur cavitas ipsius tympani?* Respondeo, hunc musculum, qui in sulco osseo decurrit, nihil omnino in parte cartilaginea tubæ mutare posse; & si etiam a parte cartilaginea tubæ oriretur, ut male credidit BOERHAAVIUS, tamen vel sic etiam imparem futurum gracillimum musculum tubæ cartilagineæ mutandæ. Porro interrogat BOERHAAVIUS, *an os tubæ circa palatum claudatur adducta valvula cartilaginea per contractionem musculi cephalopharyngei, impediens in deglutitione ingressura huc deglutienda.* Primo animadverti debet, nullam in ostio tubæ adesse valvulam. Secundo, musculus cephalopharyngeus in claudenda tuba nullas omnino partes habet, quod facile ex decursu & origine hujus musculi patet, jam in deglutitionis historia dicti. Tertio denique, tuba vi elasticæ cartilaginis semper aperta manet, neque necesse est, eam aut aperiri a musculis aut constringi. Neque metus est, ne sub deglutitione cibus potusve in apertam tubam subeat, quia tubæ ostium non ori, sed narium meatui inferiori obvertitur, tum etiam, quia a velo palatino protegitur. Ita nunc duos paragraphos absolvi, 560. & 558., in quos nihil amplius dicam. Supereft in cavo tympani fenestra rotunda, quam BOERHAAVIUS paragrapho 559. describit, de ovali enim jam dixi.

Fenestra ovalis, ut vidimus, in medio fere parietis interioris tympani mox supra promontorium ponitur, fenestra vero rotunda locum inferiorem & posteriorem in imo promontorii recessu tenet. Fenestra ovalis nulla membrana occlusa est, & basin stapedis recipit, fenestra autem rotunda in proprio sulco membranulam continet, qua occluditur. Fenestra ovalis directe fere membranae tympani obversa est, rotunda oblique eidem obvertitur. Hæc interim de fabrica; reliqua enim, quæ in textu habentur, ad theoriam pertinent, & seorsim dicentur, ubi de functione harum partium agam.

Supereft nunc *chorda tympani*, quæ funiculus est nerveus a portione dura nervi acoftici abscendens, & retro tympani membranam inter malleum & incudem excurrens; sed cum præsupponat historiam nervi acoftici, rectius alio loco dicetur.

Ita absolutis his pervenimus ad partem intimam organi auditorii, quæ ob miras osseæ fabricæ circumvolutiones generali nomine *labyrinthus* appellatur, dividiturque in vestibulum, canales tres semicirculares & cochleam.

Vestibulum cavitas est subrotunda in medio osse petroso, retro tympani cavum, retroque fenestram ovalem, quæ in eam ipsam cavitatem ducit. Minutius inspectum vestibulum tres exhibet recessus, lineis osseis eminentibus diremptos, quorum inferior orbicularis, superior ellipticus, tertius fulciformis est. Hoc vestibulum suo periofteo investitum repletur pulpa nervea mollissima nervi acoftici, sic tamen, ut inter parietes vestibuli & eam pulpam vapor intercedat, qui in humorem colligitur, per observata CASSEBOHMII, MORGAGNI & Cel. COTUGNI. In hoc vestibulum *canales tres semicirculares* quinque ostiis patent. Canales hi in foetu tenui crusta fac-

ti, & intercedente offea cellulari fabrica a reliquo offe petroso separati, jam perfecti tamen, quando homo in lucem editur, per ætatem cum reliquo offe petroso ante concrefcunt & quasi conferruminantur. Tenent fedem offis petrosi fuperiorem posteriorem & anteriorem, numquam nifi fracto eo offe confpiciendi. Singulus horum flexum abfolvit femicirculo majorem. Singulus in vestibulum aperitur, oftio partim rotundo, partim elliptico, fed ampliore, quam media ipfius canalis cavitas fit. Singulus periofteo fuo, eoque vasculoso investitur, & repletur pulpa nervea, & hamore inter periofteum & pulpam eam intercedente, obfervante Celeberr. COTUGNO. Nomina acceperunt a magnitudine, alius *maximus*, *medius* alius, alius *minimus*; rectius alii a fitu dividunt, in *fuperiorem*, *inferiorem*, & *exteriolem*. Superior fimul anterior eft, & magnitudine medius, & fere ad ductum offis petrosi perpendicularis. Inferior fimul posterior eft, & maximus, & idem verticaliter fitus. Exterior minimus eft, & horizontalis. Singulus horum canalium duo habet oftia, fed interius oftium fuperioris canalis cum oftio posteriore canalis inferioris in unum commune oftium confluunt, hinc tres ifti canales femicirculares quinque folum oftis in vestibulum aperiuntur. De his BOERHAAVIUS egit paragrafo 561.

Supereft machina artificiofiffima *cochlea*, ita dicta ob maximam fimilitudinem, quam cum cochlea limacum habet. Ea fedem offis petrosi anteriorem tenet, ante canales femicirculares, & tranfverfa fere ita ponitur, ut basis ejus tota interior fit, apex vero extrorfum & antrorfum, & nonnihil deorfum inclinetur. Duos cum dimidia fpirales gyros abfolvit, non diremptos, ut vulgo pinguntur, perfecte fimiles gyris cochleæ limacum, & verfus apicem diminutos. Hi gyri circa *modiolum* circumvolvuntur, qui quafi axia

cochleæ format. Est autem modiolus hic conus osseus, cujus basis latior apicem cochleæ tenet, apex secundum axin cochleæ amplioris versus hujus basin descendit. Non tamen totam cochleæ longitudinem emetitur, sed ad medium secundi gyri definit & apice suo in *infundibulum* abit. Has partes bona icone illustravit Cel. BRENDLIUS in *programme de auditu in apice cochleæ, disput. anat. Halleri Vol. IV. Tab. IX. fig. 1. fig. 2. lit. a. & fig. reliq.* Hoc denuo ex parte angustissima dilatatur, & conum format cavum apice suo apici modioli obversum, & basi sua ad basin cochleæ descendit. Hinc si modiolum cum infundibulo pro axi cochleæ sumas, is axis duobus osseis minimis conis, apice sibi mutuo obversis & cohærentibus, seu concretis compositus est. Modiolus medio sulco exiguo a basi ad apicem excavatus est; basis modioli aliquantulum cava multis foraminulis pertusa est, per quæ & vascula sanguifera, & furculi a nervo acoustico molli ipsum modiolum subintrant, & per ejus sulcum excurrunt, etsi ad infundibulum usque deduci non possint. Porro exterior modioli superficies, quæ ad cavum cochleæ pertinet, minimis plurimis foraminulis, duplici serie dispositis, perforatur, & ex apice modioli in infundibulum foraminulum unum majus, & plura minutissima hiant. Huic ergo axi, ex modio & infundibulo composito, circumvolvitur paries cochleæ spiralis, ipsumque cochleæ canalem perficit. Sed ex eodem modio & ex infundibulo a latere educitur lamella ossea, ad ipsius cochleæ modum gyrata, & duas cum dimidia spiras efficiens, vocant *laminam spiralem cochleæ*. Non autem in integrum, sed pro maxima solum parte ossea est, deficit versus parietem cochleæ, & prope basim infundibuli. Sed ille defectus laminæ osseæ suppletur membranula osseæ laminæ continuata, & in parietem cochleæ pro-

ducta, orta a periosteo vasculoso ipsius cochleæ. Subtiliore indagine constitit, & osseam hanc lamellam, & illi continuatam membranam duplicem esse, exiguo spatiolo intercepto, in quo nervi & vascula decurrunt, & huic interstitio respondent foraminula modioli observante COTUGNO. Hæc jam lamina tenuissima per mediam cochleæ cavitatem in spiras ducta canalem cochleæ, unicum alias futurum, in duos cochleiformes canales dividit, quos *scalas* cochleæ vocant. Harum altera ostio suo in vestibulum aperitur, eademque exterior, & anterior est; vocatur *scala vestibuli*: altera posterior & interior e fenestra rotunda oritur, & omnino in tympanum pateret, nisi ea fenestra membranula occlusa esset; hæc vocatur *scala tympani*. Icones harum partium pulcherrimas dedit ALBINUS, *annot. Acad. Lib. IV. Tab. I. II.* Consulatur præcipue *Tab. I. fig. 6.* Utraque porro scala, observante ZINNIO in infundibulum aperitur; utraque suo periosteo investitur. Aquulam etiam in cochlea reperit Cl. COTUGNUS, ut in vestibulo. De fabrica cochleæ BOERHAAVIUS egit §. 562.

Nunc dicendi sunt nervi organi auditus & vasa. In parte interiore & superiore ossis petrosi processum basilarem ossis occipitis respiciente, retro labyrinthum, *meatus auditorius internus* est, quem etiam *sinum auditorium* vocant, obliquo foramine versus calvariæ cavum patulus, & dura matre investitus, quem nervi auditorii subeunt. Finis hujus ductus ossei stylo intruso cæcus & impervius videtur, & pro maxima parte omnino obturatus est; sed si effringatur, vel dissecetur, duos in fundo recessus habet, alium superiorem & minorem, alium inferiorem majorem, eminente linea ossea a se divisos. Uterque recessus foraminulis pertusus est, inferior pluribus, paucis superior, & tribus tantummo-

do, quæ hætenus innotuerunt. ALBINUS *lib. IV. Tab. II. fig. III.* In hunc meatum vel sinum auditorium intrat nervus acousticus duplex, alter mollis, alter portionis duræ nomine insignitus, ille ex medulla oblongata & ex quarto ventriculo, hic e cruribus cerebelli ortus, ponti VAROLII proximis. Nervus acousticus mollis petit sinus auditorii recessum inferiorem majorem, perque foraminula hujus recessus ramulis suis penetrat in vestibulum & cochleam. Et in vestibulo quidem nervuli hi tres formant pulposos colliculos, & ab istis pulposis tuberculis, atque ab utraque meninge, pia nimirum matre & arachnoidea, formatur membrana in vestibulo expansa subtilissima, quæ vestibulum in partem superiorem & inferiorem dividit, & quam *septum nervosum* vestibuli vocat COTUGNUS. Ab ea porro membranula pulpa nervea continuatur, atque in tres canales semicirculares recipitur. Alius nervi mollis trunculus, anterior, & ille satis notabilis, cochleam subit, & videtur omnino per sulcum modioli ad infundibulum usque penetrare. De hujus nervi distributione ac decursu HALLERUS & alii exercitatissimi anatomici nihil certi reliquerunt, imo desperarunt. Sed Clar. COTUGNUS affirmat, se certo vidisse, filamenta hujus nervi per foraminula egredi, tum in scalam tympani, tum etiam in intervallum laminæ spiralis duplicis, & ratio id ipsum utique suadet, cum foraminula illa modioli perfecte respondeant interstitio lamellarum septimenti spiralis cochleæ, ut supra notavi. Atque ita confirmata est conjectura BOERHAAVII, qui dudum credidit nervulos per laminam spiralem rectilineos extendi, cumque ea lamina resolvi possit in triangulum rectangulum, & cum in triangulo rectangulo lineæ ad basim trianguli parallelæ duci possint infinitæ, quæ continua proportionem decrecant, & longitudines possi-

biles omnes a maxima ad minimam exprimant, fibrillas nerveas per triangularem laminam spiralem rectis lineis ad cochleæ parietem extensas, & ad basim cochleæ parallelas, continua proportionē versus apicem cochleæ decrescere, atque adeo chordas formare innumeras, alias aliis continua proportionē minores seu breviores, cumque ceteris iisdem positis chordæ quo breviores, eo acutioribus, quo longiores, eo gravioribus sonis recipiendis opportuna sint, fieri sic hac artificiosissima structura, ut chordæ nerveæ habeantur, quæ cum innumeris sonis possint contremiscere, sive graves illi fuerint, sive acuti, & quibuscumque demum gradibus a se diversi; semper enim alicui sono aliquam ex illis innumerabilibus chordis nerveis responsuram. Hanc sententiam BOERHAAVIUS paragrapho 563. proposuit. Sequentē autem paragrapho 564. in modum problematis ponit, *an extrema filamenta nervi mollis per labyrinthum distributa, & officio suo fundā iterum redeant in cerebrum?* Ita nimirum olim SIMONCELLIUS, qui filamentum nerveum gracile per proprium foramen in cavum cranii ex canalibus semicircularibus reduct, in duram matrem ramulis suis expansum, ac demum ad superiorem cerebri superficiem glandulamque pinealem distributum, videre sibi visus est; & per hunc nervum, quasi venosum, soni impressionem ad cerebrum deferri credidit. Sed accuratiores anatomici demonstrarunt, filamentum illud nerveum SIMONCELLIO visum propaginem esse quinti paris, neque duræ matri ramos dare, sed illa tectum venire in aquæductum FALLOPII, & cum portione dura nervi acoustici conjungi. Sic absolvimus historiam nervi acoustici mollis, restat dicendus decursus portionis duræ.

Nervus igitur acousticus durus eundem sinum auditorium ingressus cum nervo molli, ubi ad fundum sinus pervenit, a portione molli abscedit & recessum sinus superiorem petit. In hoc recessu offendit foramen, quod in canalem peculiarem osse petroso inclusum ducit. Is canalis initio nonnihil ascendens, deinde rectus fere & transversus incedit, inde posterius retro tympanum & stapedem descendit, atque inter processum styloformem & mastoideum ad exteriora prodit, foramine, quod a vicinis hisce partibus stylomastoideum appellatur. Ipse autem hic canalis *aquæductus* FALLOPII dicitur. Hunc igitur canalem ingreditur portio dura. Sed supra sinum auditorium in osse petroso aliud exiguum obliquum foramen cernitur, in cavitatem cranii patulum, quod producto brevi canaliculo in aquæductum Fallopii mox dictum abit. VALSALVA *Tab. VII. fig. IV. d. fig. V. A.* Per hoc foramen arteriola a meningeæ orta, & furculus nervus a ramo secundo quinti paris, qui SIMONCELLIO imposuit, in aquæductum veniunt, & nervulus quidem ille cum portione dura conjungitur. Porro autem dura portio in aquæductu progressa, dum is ductus jam ad perpendicularum descendit, ramulum edit in hoc ipso canali, qui per foraminulum musculo stapedis vicinum in tympani cavitatem posteriorem venit, & antrorsum ascendens inter mallei manubrium & incudem excurrit, atque per rimam, quæ retro articulationem maxillæ inferioris in cavitate cleinoidea est, exit e cavo tympani, & paulo post exitum ad rami tertii quinti paris lingualem nervum accedit, cum eoque unitur. Hunc nerveum funiculum chordam tympani appellant non inepto nomine, quia rectus excurrit, cylindricus, æquabilis absque contorsione, & chordam extensam refert utcumque. Ab ejus cum nervo linguæ nexu credunt Viri Clariss. consensum re-

peti posse, qui inter aurem & dentes observatur. Reliquus nervus durus, dum per aquæductum descendit, ramulum largitur musculo mallei interno, seu tenfori tympani, & alium musculo stapedis, denique per foramen stylo-mastoideum ex aquæductu exit, & late per faciem, tempora & occiput ramis plurimis spargitur, cum ramis quinti paris, & octavo ac intercostali nervo, multis anastomosibus (si ita dicere licet) conjunctus. Ab eodem duro nervo jam egresso etiam auricula ramos accipit, & alios ramos a quinto pari & cervicalibus.

Nunc breviter vasa organi auditorii perstringamus. Auriculæ externæ imprimis prospiciunt *temporalis* arteria, & *auricularis posterior*; ex hac stylo-mastoidea nascitur; quæ nervum durum comitatur, & furculum dat, alium quidem membranæ tympani, alium ipsi cavo tympani, & cellulis etiam mastoideis. A temporali arteria, præter ramos auri externæ prospicientes, furculus per fissuram cavitatis clenoideæ, chordam tympani comitans, in tympanum venit. *Maxillaris interna* furculum ad tubam Eustachii & meatum auditorium mittit. Alii a *meningeæ* arteria, & alius a carotide, dum per os petrosum subit, in eandem cavitatem veniunt, & ramulis suis periosteum perreptant. Sed præcipua arteriola *acoustica*, quæ intimo auditus organo prospicit, ex ramo aliquo arteriæ *basilaris* nascitur, & comes nervi mollis adit sinum auditorium. Inde trunculo præcipuo vestibulum adit, & per canales semicirculares distribuitur, & circellos format in se ipsos redeuntes, observante Clar. CASSEBOHMIO. Eadem acoustica arteriola ramulum edit ad cochleam, qui in sulcum modioli subit perque foramina modioli minima ramulos in scalas cochleæ distribuit, & denique in infun-

dibulum modioli penetrans, stellatis in eo furculis finitur.

His arteriis suæ respondent venæ. Venulam principem acousticam, nervi mollis & arteriolæ suæ sodalem vidit Cel. HALLERUS, venulam vestibuli & cochleæ Cl. COTUGNUS, tympani venulas CASSEBOHMIUS; atque hæ venulæ omnes intra cranium ad sinus venosos redeunt. Venæ auriculæ externæ ad venam temporalem revertuntur. Præter hæc vasa Celeb. COTUGNUS venulas lymphaticas bibulas, non tamen valvulosas invenit, quæ ex vestibulo & cochlea humorem nervos alluentem resorbent, & quæ per canalem seu rimam ossis petrosi peculiarem, in proprium exiguum sinum, & inde porro in sinum lateralem duræ matris se exonerant.

Ita nunc universam organi auditorii fabricam absolvimus; jam ad explicationem auditus transeamus.

§. D L V I I.

Radii ergo sonori, cum primitivi, tum etiam ex vicinis obstaculis reflexi, tum & illi, qui ex aliis corporibus harmonice cum sonoro primario contremiscentibus nati sunt, incidentes in omnem auriculæ elasticæ superficiem, eam in similes tremores agunt, ita numerus particularum contremiscentium augetur, atque adeo etiam intensitas soni; nec refert in quamcumque auriculæ superficiem incidant, excepto forte lobulo laxiore. Semper enim suas vibrationes auriculæ imprimunt, & in eadem similes novas concitabunt, quod ut melius fieri possit, musculi auriculæ dati sunt, qui quidem ad motum manifestum non satis apti, tamen variis auriculæ partibus vario gradu tendendis omnino sufficiunt, sicque eam sonis diversissimis accommodant. Atque hoc primum est. Illi vero radii sonori, qui in cavam externam auriculæ super-

ficiem incidunt, reflexi ad angulos æquales angulis incidentiæ, vi structuræ artificiosissimæ auriculæ ita determinantur, ut omnes fere in meatum auditorium externum conveniant. Hic ergo denuo crescit intensitas soni, & in tantum quidem, in quantum sectio meatus auditorii minor est tota superficie exteriori auriculæ. Verum idem ille meatus partim cartilagineus, partim osseus, & ipse vi fabricæ suæ cum illapsis radiis sonoris contremiscere aptus est; ergo denuo augetur numerus particularum vibrantium, & in idem sensibile tempusculum coincidentium. Præterea meatus hic ut suo loco dictum est, nequaquam recto, sed intorto ductu fertur; ex hac ipsa intorsione multiplicantur reflexiones soni, & vis adeo soni denuo increscit, cum vibrationes istæ accessoriæ, etsi non simultaneæ prorsus, tamen nullo sensibili intervallo distent. Ergo sonori radii, qui in cavam auriculæ superficiem inciderunt, ab hac collecti, reflexi, in meatum auditorium projecti, ab eodem aliquoties percussi, tandem recta fere via in membranam tympani, quæ finem meatus auditorii terminat, impelluntur, adeo non debilitati, ut potius continuo intensitate aucti sint. Ea membrana versus meatum cava quasi focus ipsius meatus constituit, & vim soni accipit maximam hætenus. Sed hæc membrana semper tensa est, & ad contremiscendum aptissima; ergo dum radii sonori in hanc ex meatu auditorio incidunt, necesse est, ut eadem ad illapsos sonos contremiscat; nec id solum, sed etiam, ut cum iisdem harmonice contremiscat. Cum enim figuram habeat ellipticam, concipi possunt in eadem figura utrimque lineæ aliæ aliis longiores & vicissim breviores certa proportionem; adeoque concipi possunt in ea membranæ chordulæ innumeræ diversæ longitudinis, atque adeo sonis accommodatæ diversis, & longiores

quidem gravioribus, breviores acutioribus sonis respondentes. Præterea cum hæc membrana recipiat insertum mallei manubrium, malleus autem musculis regatur, poterit eadem membrana varie tendi aut relaxari, & ita omnino adaptari pro diverso gradu tensionis aut relaxationis, sonis possibilibus omnibus, quos scilicet mens nostra advertere queat, ut hinc non solum contremiscat, sed etiam cum omnibus sonis harmonice contremiscat. Quodsi etiam musculus mallei externus & laxator tympani, veri musculi non sint, ut Clariss. Viri existimant, tamen musculus mallei internus sive tensor tympani verus est musculus, & is solus mihi ad id officium sufficit, nec indigeo musculis peculiaribus, qui membranam tympani relaxent. Cum enim, ut alibi dixi, eadem chorda ex laxitate maxima per successivos gradus tensa, possit omnes possibiles tonos edere inter gravissimum & acutissimum, etiam membrana tympani, quæ sibi relicta, licet tensa semper, tamen respective laxissima est, poterit, inquam, hæc membrana agente musculo mallei interno per successivos gradus tensa omnibus accommodari sonis inter gravissimum & acutissimum mediis possibilibus, atque adeo ope hujus solius musculi ita adaptari, ut cum omnibus sonis harmonice etiam contremiscat. Quomodo vero id fiat, an per voluntatem mentis, an spontanea hujus musculi actione, ut membrana hæc ad sonos graviores minus, ad acutiores magis tendatur, & quo mechanismo id fiat, quis dixerit? Non videtur a voluntate mentis pendere, cum etiam nobis insciis hoc fiat; & licet aliquomodo distinctius audiamus, quando distincte audire volumus, distinctio illa melior soni tantummodo ab attentione mentis eo in casu pendet, quæ tunc alias ideas negligit, & ad hanc impressionem solam advertit. Sed quis adhuc dixit mechanismo, quo fiat, ut pupilla ad lucem vivi-

diorem contrahatur, ampliatur ad debiliorem? id tamen fieri certum est, etsi modum quo fiat, non assequamur. Non ergo neganda est tensio illa harmonica membranæ tympani ex eo capite, quod modum non intelligamus, quo musculus mallei ad tendendam variis gradibus eam membranam determinetur. In oculo lux ipsa vividior vel debilior causa est motus variabilis pupillæ; an non ex analogia concludere liceret, in aure ipsum sonum esse, acutiorem vel graviorem, qui eum musculum determinet, etiam citra mentis conscientiam, ad varios tensionis gradus. Mihi quidem hoc summe probabile videtur, & placet imprimis Clariss. COTUGNI sententia, qui chordam tympani a membrana tympani & a mallei manubrio agitatum, causam esse credit majoris vel minoris tensionis membranæ tympani. Et certe alia ejus chordæ utilitas ignoratur; ad soni enim perceptionem nihil facere, ex eo clarum est, quod nervo molli vitio, licet chorda tympani illibata, nulla fiat soni perceptio. Neque ratio alia esse videtur, cur eam chordam per typanum trajecerit natura, & quidem proximam membranæ tympani ac mallei manubrio? Præterea musculus ille tensor tympani & stapedius etiam, non aliunde, quam ab hac ipsa chorda furculos nerveos habet. Hinc admodum probabile a sonis acutioribus agitatum celerius membranam tympani chordam tympani in similes tremores conjicere, & inde pro numero vibrationum ejus chordæ musculum eum plus minusve contrahi, membranam tympani plus minusve intendi, atque adeo ad sonos possibiles omnes adaptari, ut cum iis harmonice contremiscat. Nec opponi debet, contradictorium videri, quod vibratio membranæ tympani prius chordam tympani afficere debeat, & ex hac demum affecta membrana tympani mutetur. Nam hæ mutationes fere instantaneæ sunt; & in oculo utique

utique idem fit, non enim contrahitur pupilla, nisi prius vividior lux in oculum illapsa, retinam affecerit. Et analogia quidem hæc, præter alias rationes, me plurimum movet, ut hanc Clariss. COTUGNI sententiam probabilissimam credam.

Igitur, ut ad priora redeamus, radii sonori ad membranam tympani appulsi, eandem in tremores concitant Harmonicos, & similes tremoribus corporis sonori, unde illi radii primum profecti sunt. Jam vero contremiscens membrana tympani, suos tremores & aëri cavi tympani imprimit, & malleo, cujus manubrium inter lamellas ejus membranæ comprehensum est. Aër cavi tympani tremoribus agitato, ex parietibus tympani ossis repellitur, repellitur ex cellulis mastoideis tympani cavum augentibus; ita denuo vis soni intenditur; & ille demum aër tremoribus suis ferit membranam fenestræ rotundæ. Sed malleus a membrana tympani exagitatus & ipse contremiscit, & tremores suos incudi reddit, hæc partim parieti osseo tympani per crus brevius, partim & pro maxima parte ossiculo Sylviano per crus longius, hoc ossiculum stapedi, stapes denique basi sua tremores defert in fenestram ovalem inque vestibulum. Stapes vero ipse tendi per suum musculum potest, ut malleus, atque adeo sonis diversis accommodatur, & musculus stapedis perinde, ut mallei internus a chorda tympani ramulum habet nerveum; hinc etiam uniformiter cum malleo & membrana tympani tendi videtur. Jam vero sub fenestra ovali, pulpa nervi acoustici in vestibulo expansa hæret, nec fenestra ovalis membrana occluditur, sed in vestibulo membranula est illud dividens, quam septum nerveum appellari dixi. Inter pulpam autem nerveam vestibuli & parietes ejus ossis aquula intercedit, interque pulpam nerveam & basin stapedis. Nunc dum stapes tremores hætenus receptos conti-

nuat, partim ipsos parietes ossæos vestibuli, & canalium semicircularium, & cochleæ, una contremiscere necesse est, partim stapes aquulam vestibuli impellit & in tremores concitat, & parietes ossæi quoque similes huic aquulæ tremores impertiunt. Ea igitur aquula contremiscit in vestibulo & in canalibus semicircularibus & in cochlea, & proxime ubique nervo acoustico molli suos imprimit tremores. Nunc quidem mollißima pulpa nervea vestibuli ad contremiscendum videtur inepta esse, recipit tamen tremores ipsius aquulæ & inde mutationem qualemcumque patitur, quæ propagata ad sensorium commune ideam corporis sonori, & soni animæ exhibet, vel gravis vel acuti, grati, ingrati; pro diversa nervi acoustici affectione. Fibrillas autem nerveas cochleæ per laminæ spiralis interstitium expansas contremiscere, mechanica necessitate sequitur, quoniam ipsa lamina spiralis contremiscit. Et cum fibrillæ illæ a basi cochleæ versus apicem continuo proportionaliter minores fiant, seu cum ipsæ lineæ laminæ spiralis continua proportionem versus apicem cochleæ fiant minores, habentur sic omnino chordulæ innumeræ diversissimis sonis accommodatæ, quarum aliæ cum aliis possint harmonice consonare. Ultima ergo propagatio soni ad intimum auditus organum fit per tremorem contiguorum ossiculorum, & per aquulam labyrinthi; ær enim & a vestibulo & a cochlea abest; fieri tamen potest, ut, quando stapes per suum musculum ex una parte altius in fenestram ovalem descendit, ex altera vero inde egreditur, ut, inquam, ipse ær tympani sub basin stapedis in aquulam vestibuli arietare eamque exagitare possit, numquam tamen ipsam nerveam pulpam proxime afficere, a qua per eandem aquulam arceatur. Eadem aquula, præterquam quod ærem arceat, simul nervum acousticum constan-

ter humectando ad minimas impressiones recipiendas aptum & sensilissimum conservat. Quomodo autem anima ex impressionibus nervo acoustico communicatis & ad sensorium commune propagatis, de qualitate soni extra nos positi judicet, hoc scire neque medici est, neque hominis cujusquam. Sufficit nobis eousque deduxisse explicationem, quousque corporea est affectio. De nexu spiritualis illius principii cum corpore, & de mentis a corpore affectione ultima, mirum non est, mentem nostram nihil quidquam rescire, quæ se ipsam ignorat. Videtur id solum propius vero esse, animam ex numero vibrationum de soni acuti vel gravis, & ex vi percussi nervi acoustici, de robore vel debilitate soni judicare, idque modo nobis incognito ex lege a conditore præscripta, etsi ipsa neque conscia sit ejus numeri vibrationum, neque plagas nervo acoustico illatas distinguat; uti in oculo non videt pictam imaginem, neque inversam picturam discernit, neque radiorum lucidorum in nervum opticum ictus distinguit.

His absolutis quæstio superest, de sede propria auditus, quam alii in vestibulo, alii in canalibus semicircularibus, alii in his & in cochlea, aut in apice præprimis cochleæ, statuerunt. In intimo organo sedem auditus esse certum est, quoniam etiam surdi stridorem baculi dentibus intercepti audiunt, & sonos acutos graveisque distinguunt, tremore nunc per sola ossa ad nervum acousticum propagato; & hic sensus etiam officulis & tympani membrana destructis, aut usu suo carentibus superest. Unde patet aurem externam & meatum auditorium solum ad perfectiorem soni remoti collectionem, & officula, & tympani membranam & alia adminicula ad faciliorem & distinctiorem, cujusque etiam soni perceptionem, fabricata esse. Vicissim nervo acoustico vitiato, etiam cum aliis partibus orga-

ni auditorii integerrimis, furdus nullum percipiet sonum, ne quidem per solidum corpus perque ossa propagatum. Cum vero nervus mollis & in vestibulo & in canalibus semicircularibus, & in cochleæ scalis, & denique in modiollo distribuatur, cumque omnia hæc ossa una contremiscere necesse sit, utpote ex materie ossea durissima & fragilissima composita, atque adeo ad contremiscendum aptissima, videtur sedes auditus per omnia hæc loca diffusa esse. De canalibus semicircularibus & vestibulo eo minus dubitari potest, quod tantum non in omnibus animalibus reperiuntur; de cochlea dubitatum est, quum aves cochlea destituantur; sed illæ cavum cochleatum capiti circumductum habent, canoræ aves etiam amplius, quod a labyrintho ad labyrinthum communicat. Et si cogitemus singulare illud artificium, quo cochlea structa est, si cogitemus filamentorum nerveorum per scalas cochleæ distributorum symmetriam elegantissimam, & chordulas chordulis proportionales velut in instrumento musico, forte non solum auditus, sed distinctissimi auditus sedes, in cochlea erit reponenda. Via autem in cochleam facile patet, nam & vestibulum, & cochleæ scalæ suam aquulam habent; aquula vestibuli a stapede concitata tremores communicat æquulæ, quæ scalam vestibuli tenet, sed hæc scala, ut diximus, per infundibulum communicat cum scala tympani, unde etiam tremores ex vestibulo in scalam tympani per aquulam propagantur.

Quæstio alia est, an per fenestram rotundam tremores aëris ex tympano in scalam tympani propagentur, & an illa fenestra aliquid ad auditum conferat. Cel. HALLERUS credit, non facile per eam viam tremores aëreos ad organum auditus venire posse, quia hæc fenestra non e directo respondet membranæ tympani, sed inferiore ac posteriore loco ponitur, dum contra fe-

nestra ovalis e directo membranæ tympani obversa est, & propagatos per officula tremores recipit; deinde credit etiam mucum, cujus aliqua semper quantitas in tympano reperitur, omnino eos tremores infringere, qui ab aëre tympani repeti possent. Sed hæc, ni fallor, nimia sunt; non enim frustra crediderim hanc fenestram tympano obversam; quod autem non e directo obvertatur membranæ tympani, quod solos aëris tremores recipiat, quod nullis officulis pulsetur, ut fenestra ovalis, inde quidem non sequitur, nullos ad eam fenestram tremores propagari, sed minus facile, minus validos, minusque distinctos propagari, quæ etiam BOERHAAVII sententia fuit paragrapho 559. Sed etiam in aliis organis sensoriiis alia loca minorem impressionem recipiunt, ut in oculo, in lingua, in naribus, in cuti.

§. DLVIII. DLIX. DLX. DLXI. DLXII.
DLXIII. DLXIV.

Omnibus hisce paragraphis fabrica organi auditorii describitur, quam conjunctam uno loco tradere malui. Aliqua hinc inde intersperguntur de usu partium harum, quæ etiam explicui mutato tantum ordine, cum sic mihi vobisque compendium laboris facerem. Supersunt nunc solummodo quædam problemata, ex prædictis fundamentis resolvenda.

§. D L X V.

Cur auditus acuitur, manu cava auriculæ applicata versus corpus sonorum? Dudum animadversum phænomenon est, jam GALENO memoratum L. XI. de us. part. cap. 12. ubi Hadrianum Romanorum consulem citat, qui, cum auditum læsum haberet, manus cavas, quo audiret facilius, a posterioribus ad anteriora, auribus obtendebat. Ratio vero phænomeni in eo est, quod manu

cava versus objectum sonorum auriculæ applicata, nunc plures radii sonori in meatum auditorium colligantur; præter eos enim, quos cava auriculæ superficies excipit, & in meatum colligit, etiam illi radii, qui in cavam manum auriculæ obtensam incidunt, ex hac cavitate in aurem & inde in meatum auditorium reflectuntur. Unde necessario robur soni increfcit, & acuitur hoc modo auditus.

Quare contra abscissis auriculis gravis auditus? Auricula externa radios sonoros excipit, & in meatum auditorium reflectit, quorum nunc vis tanto major est, quanto minor est sectio meatus auditorii superficie auriculæ cava. Abscissis vero auriculis nulli alii radii membranam tympani ferunt, quam qui in meatum auditorium incidunt, adeoque multo pauciores, quam ab auriculæ cava superficie in eundem meatum projiciuntur. Hinc abscissis auriculis auditus debilis. Nimis planæ auriculæ eodem fere vitio stipantur; nam & pauciores radios excipiunt, quam magis concavæ, & quos excipiunt, horum magnam partem ob nimiam planitiem extrorsum reflectunt, neque in meatum auditorium determinant. Ejusmodi autem homines, machina spirali cava auriculæ applicata juvantur. Talem olim Cel. WINSLOWUS, ob debiliorem auditum, familiarem habuit.

Quam ob rem intenditur auditus, si planum auris sonoro obvertitur ad obliquitatem quadraginta quinque graduum? Surdaſtri non faciem obvertunt loquenti, sed eam detorquent in latus; ita vero auricula radios sonoros rectiores excipit, & plures. Non in eo cardo rei versatur, ut angulus ille præciſe quadraginta quinque graduum sit, sed ut auris & præcipue meatus auditorius radios sonoros recta via illapſos accipiat. Accipit vero rectiores, dum planum auris ad ejusmodi obliquitatem sonoro obvertitur corpori.

Ore diducto & pendula maxilla quomodo fit clarior auditus? Aperto ore radii sonori non solum in auriculam illabuntur, sed etiam per tubam Eustachianam in tympanum ipsum simul penetrare possunt. Hinc qui difficulter audiunt, os diducunt & pendula maxilla auscultant.

Flanti, oscitanti, acute loquenti, canentive, cur est bombus in aure & hebetior auditus? Dum quis valida vi aërem efflat, aut multum oscitat, aut altiore tono loquitur canitve, bombum subinde in auribus percipit, nec distincti quid audit. Phænomeni hujus rationem Clarissimi Viri ex aëre repetiverunt, qui sub oscitatione tubam Eustachianam majore copia intraret, per loquelam vero aut cantum altiorem, acutiorem, perque sibilum ac flatum, pleno flumine in eandem tubam & in tympanum irrueret, ibique sonum ejusmodi obscurum & confusum excitaret. In oscitatione vero etiam meatum auditorium cartilagineum, ex nimia maxillæ inferioris depressione comprimi & complanari monuit Cel. WALTHERUS, & hanc alteram bombi causam esse. Mihi, fateor, hæ rationes non satisfaciunt. Nam dum e. g. buccas inflo & aërem per exiguam rimam labiorum expello, hoc in casu certum est, aërem undique a buccis compressum in ore reperi, & tubæ patulæ ostium subire debere. Neque tamen ego bombum in auribus percipio. Deinde non video cur in oscitatione aër necessario tubam Eustachianam subeat. In oscitatione magna & lenta inspiratio fit, & maxilla inferior ingenti rictu a superiore abducitur, multum adeo volumen aëris hauritur, & ore recipitur; & concedo etiam eodem tempore tubam a musculo salpingostaphylyno dilatari; his tamen omnibus positis, nihil est, quod aërem in tubam aut impellat, aut alliciat, qui potius a superiore faucium pavimento, in quo tubæ patent, deorsum in

tracheam attrahitur. Denique bombus in auribus perceptus manifeste gravis sonus est; non video autem quomodo ex loquela aut cantu altiore, ex sonis acutissimis per tubam in tympanum irruentibus, sonus possit produci gravis. Præterea alia, plura enim addi possent, & imprimis quod directio tubarum, si faveat etiam aëri recipiendo per oscitationem, minime tamen faveat aëri recipiendo, qui in cantu & loquela per rimam glottidis expellitur. Mihi potius videtur causa bombi percepti in ejusmodi circumstantiis potius ab encephalo repeti debere. In morbis acutis capitis, dum sanguis majore copia & impetu ad vasa encephali fertur, adeoque & major sanguinis copia per arteriam acousticam ceterasque organi auditorii arterias distribuitur, ægri continuum susurrum & bombum & tinnitum aurium percipiunt. Ipsæ nempe arteriolæ nervo acoustico accumbentes, dum solito fortius & crebrius micant, suos tremores nervo imprimunt, & sonum excitant, aut certe ideam soni, non nunc existentis extra corpus, prout arteriolæ retinæ solito fortius & crebrius micantes, & fibrillas retinæ afficientes, ideas excitant variorum simulacrorum, nunc extra corpus non existentium. Sed jam videamus, an in cantu, loquela acutiore, flatu, oscitatione cerebrum afficiatur. Non ea repetam, quæ de cerebri motu & turgescencia tempore expirationis alibi dixi, sed jam cognitum suppono; quod in expiratione validiore, aut in expirationibus multis, brevibus, celerrime se subsequenter, aut in magna & diuturna aëris inspirati retentione, non solum sanguis circa cor dextrum sese libere evacuare non potens, accumuletur, in jugularibus venis, imo & in prioribus casibus ex sinu & auricula in venas jugulares contraria directione repellatur. Jam vero in cantu acutissimo, in loquela acutissima, plurimæ bre-

ves eaque celerrimæ fiunt expirationes aëris per rimam glottidis arctissimam; parum ergo aëris expellitur, maxima ejus quantitas in pulmonibus retinetur, & celerrimis ac brevissimis expirationibus concutitur. Hinc sanguis in vasis pulmonalibus extremis accumulatur, accumulatur in venis jugularibus, & in encephalo, imo & repellitur motu contrario. Hinc sanguis in capite accumulatus majore copia ad aures, oculos aliasque partes distribuitur, dum interim ea quantitate redire non potest. Hinc dum acutissimo tono loquimur aut canimus facies tota intumescit, rubore suffunditur, nec solum auditus hebetatur, sed etiam visus, & lacrymæ ex oculo exprimuntur, & denique si diutius persisteret ille status, apoplecticum hominem concidere necesse esset. Sed summa in pectore percepta anxietas cogit nos, dum ultra ferendæ molestiæ pares non sumus, tonum ejusmodi cito abrumpere, & magnum novumque aëris volumen haurire, thoracem dilatare, quo facto sanguini liber denuo per pulmones transitus patet, & cerebrum pressione liberatur, & symptomata dicta evanescent. In oscitatione, si recte attendimus post magnam lentamque inspirationem per aliquot minuta secunda aërem retinemus in pectore, sed nimium retentus aër, aut inspiratio nimis protracta, ut alibi dictum, perinde sanguinis per pulmones transitum sufflaminat; hinc a magna & diuturna oscitatione, quales imprimis infantibus frequentes sunt, sanguis in cerebro accumulatur, & inde non auditus modo, sed & alii sensus hebetantur, & bombus in auribus percipitur; sed non nisi in magna & diuturna oscitatione, uti ipse bene de me memini, cum infans essem, & diutissime oscitarem, bombum me in auribus percipisse, quem nunc brevius oscitando, non possum percipere etsi velim. Quodsi in aëre tubam subeunte ratio esset, bombus omnem osci-

tationem comitaretur, quod utique non fit. Denique in flatu, siquidem is diu continuatur, eadem ratio latet. Qui tubas & buccinas inflant, iis manifeste etiam rubescit facies, si diutius absque inspiratione intermedia inflatum protrahant. Tunc bombum in auribus nasci, & auditum hebetari mirum est; sed non a quovis flatu oritur, prout oriri deberet bombus, siquidem huius causa esset aër in tubas Eustachianas impulsus.

Cur surdi stridulum corpus dentibus continentes ejus stridorem percipiunt? Ratio dicta est. Communicatur sic tremor baculi ipsis ossibus cranii, ad labyrinthum usque, & ibi nervum mollem acousticum afficit, qui si vitio caret, mutationem hanc ad sensorium commune propagat, atque ita soni perceptio in anima nascitur, ac si nervus per auriculam externam, ut alias, affectus fuisset.

Cur sæpe bene audiunt voces ori immixtas? Hoc iis in casibus accidit, ubi causa surditatis solummodo in aure externa hæret, aut in meatu auditorio sordes accumulatae aëris sonori ad membranam tympani appulsam prohibent. Aperto vero ore, radios sonoros per tubam Eustachii recipiunt in ipsum tympanum, a quibus nunc officula contremiscunt, & tremores suos labyrintho imprimunt. Hinc, aperto ore, surdastrit utcumque audiunt. Ejusmodi surditates sunt, quas agyrtæ sæpenumero curant, & maximam inde famam apud plebem ignaram acquirunt.

Cur surditas, si hiatus tubæ Eustachianæ quomodocumque obstruitur? Exemplis supra allatis ex VALSALVA, constitit surditatem ex polypo tubas Eustachianas comprimente, natam esse, & in alio casu, cum turunda in ulceratam tubam immitteretur, hominem illico in ea aure obsur-

duisse, recuperasse vero auditum exempta turunda. Videtur igitur ad auditum necessarium esse, ut aër internus tympani libere cum externo aëre communicet. Alii hanc phaenomeni rationem dant, quod, tuba obstructa, aër internus tympani calore rarefiat, & rarefactus membranam tympani extorsum urgeat ac relaxet. Sed non videtur ab æquabili calore plus posse rarefieri, quam antea fuerit, utpote jam prius in tympano existens aër. Et si rarefieret magis, potius sonum intendi oporteret, cum in eadem ratione fiat magis elasticus. Alii contra aërem hunc inclusum a vaporibus tympani elasticitate sua privari, & hinc ad soni propagationem ineptum fieri, crediderunt. Hoc dici posset, nisi statim ab oclusa tuba, surditas succederet. Videtur igitur oclusio tubæ aëri, in cavo tympani incluso, libertatem contremiscendi adimere, & hac ratione inducere surditatem. Ceterum hinc intelligimus cur in morbis catarrhosis, fauces occupantibus, auditus minuatur, quem diarrhoea suborta nonnumquam restituit.

Cur eadem a membrana tympani rupta? Officulis destructis perit auditus, perit etiam destructa tympani membrana. Sed an rupta vel perforata membrana tympani, surditas superveniat, disceptatum est. Experimenta in utramque partem habentur. WILLISIUS cum in cane membranam hanc perterebrasset, tertio demum mense elapso, surditatem supervenisse vidit, & similes aliorum observationes sunt. Perstat nimirum aliquo adhuc tempore auditus, donec liberiore externi aëris ad cavum tympani accessu, officula siccescant, aut ipsa membrana corrupta penitus defluat. Quod vero a leviori hujus membranæ ruptura aut punctura, ut in aliis experimentis accidit, auditus persisterit, id Cei. VALSALVA facili consolidationi ejusmodi vulnusculi, quam sæpius ob-

fervavit, tribuit. Atque ita experimenta etiam dissona conciliari poterunt.

Qua via fumos ore haustos nonnulli auribus emittunt? Hoc fieri non potest, nisi in illis, quibus membrana tympani præter naturam, foramine aliquo pervia est, sive exulceratione, sive aliunde ejusmodi via facta sit.

Undenam fit, ut binis auribus unus, nec confusus sonus? Sonus, quem audimus, non est unicus, & simplex, sed compositus ex primitivo, & innumerabilibus reflexis. Et tamen unicum audimus sonum. Nempe soni isti reflexi, quotquot sunt omnes similes sunt sono primitivo, & tanta velocitate reflectuntur, ut anima inter primitivum sonum & reflexum nullum sensibile tempusculum intercedere animadvertat. Ex hac similitudine omnium sonorum reflexorum cum sono primitivo, & ex eorundem in idem sensibile tempusculum coincidentia, fit, ut unus nobis videatur sonus, qui reipsa ex innumerabilibus compositus est. Nisi ea celeritate ad aurem redeat sonus reflexus, ut adhuc cum primitivo coincidat, jam duplex, aut multiplicatus sonus percipitur, ut echo docet. Sed alia quaestio est, cur duabus auribus, unicum sonum percipiamus. Idem hic dici potest, quod de visu diximus. Impressiones a radiis sonoris factæ in aure dextra, similes sunt impressionibus factis in aure sinistra; auris dextra radios sonoros ita prorsus malleo communicat, ut sinistra; in dextro labyrintho eadem fenestra ovalis pulsatur, & pulsatur eodem tempore ut in sinistro; nervi utrimque in iisdem locis afficiuntur & afficiuntur similiter. Dum ergo nullam discrepantiam soni in auribus invenit mens, unicum sonum judicat. Opponi quidem potest, eo in casu, qui sæpe incidit, quando altera auris directe sonoro corpori obversa, altera averfa est, in illam om-

nino plures, in hanc pauciores radios incidere, adeoque sonum in altera fortiozem, in altera necessario debiliozem esse. Atque id verissimum est. Sed robur soni majus vel minus non mutat similitudinem tonorum. Cum ergo manet similitudo tonorum eadem, hoc est, idem numerus vibrationum in utraque auricula, etsi una fortius, altera debilius percellatur, non nisi unus sonus percipi potest duabus auribus. Et item si discrepantia ratione roboris parva est, ne ipsa quidem a mente adverti potest; si autem magna esset discrepantia, tum quidem sonus harmonicus debilior non potest peculiarem soni ideam in mente excitare, quum eodem tempore percepta similis idea vividior, debiliozem quasi deleat. Ita e. g. diurno tempore stellas non videmus, etsi omnino radii ab his ad nostros oculos ferantur, quia nimirum luce solari multo vividiore afficimur. Alii Clarissimi Viri addiderunt his rationibus, quod nervi molles acoustici in encephalo, & quidem in calamo scriptorio uniantur, quod quidem dudum adnotatum est, neque tamen extra omnem dubitationem positum, etsi non repugnet HALLERUS.

Quæri adhuc potest, cur soni valde acuti adeo intolerabiles? Videtur ratio latere in celerissimis vibrationibus, quibus ferendis nervi nostri impares sint. Nam ut soni non exaudiuntur, quando nimis paucæ in minuto secundo vibrationes peraguntur, ita a contrario, quando nimis multæ intra idem tempusculum vibrationes nervum acousticum feriunt, ille nimis vivide afficitur. Hoc fit a sonis acutissimis. Omnis vero nimis vivida sensatio molesta, dolorifica & intolerabilis est. Quanta sit vis ejusmodi acutissimi soni, experimur omnes, cum dentes nobis subsiliant, & ingratiſſimus tremor ossa pervadat, e. g. dum ferra lima raditur, aut dum

panis cultro scinditur humido, aut alii ejusmodi soni, nam varii homines aliter atque aliter ab iisdem etiam sonis afficiuntur. Memini me olim in pueritia hos sonos ferre non potuisse; nunc facile perfero sine omni molestia; forte ab hoc tempore aliqua in meo organo mutatio facta est.

DE SENSIBUS INTERNIS.

§. D L X V I.

Ex hæcenus dictis evidenter patet, omnes quinque sensus externos esse speciem tactus, & consistere in certa mutatione superficiei nervi ab objecto externo inducta motu & contactu, vel immediato, vel mediato. Radii lucis ab objectis externis emissi vel reflexi, ut ideam externorum objectorum excitent, superficiem nervi optici attingere debent, & hanc ferire, huic aliquem imprimere motum. Radii sonori, ut ideam soni excitent in aure, dum ipsi nervum acousticum profunde conclusum ferire non possunt, tremoribus per officula propagatis hujus nervi pulpam & fibrillas debent emovere; hoc si intercipiatur, nullus erit auditus etiam a sonis fortissimis. Sapidum corpus insipidum est, nisi ipsas linguæ papillas attigerit, & certam his mutationem impresserit. Nullus erit ab odorato corpore olfactus, nisi volatiles odoræ particulae, fibrillas olfactorii nervi tetigerint, & quocumque modo emoverint, omnes ergo sensus externi consistunt in mutatione superficiei nerveæ, & ea ipsa mutatio fit per contactum physicum, vel immediatum ut in tactu proprie dicto, vel mediatum, ut in reliquis quatuor sensibus.

§. DLXVII.

Mutatio hæc superficiei nervi inducta produ-
 citur, sola mechanica actione corporis sensibilis,
 & varia est, pro varia corporis mole, figura,
 duritie, motu. Quid aliud sonus in corpore so-
 noro est, quam tremulus, oscillatorius particu-
 larum motus, qui ad nervum nostrum acousti-
 cum propagatus, eidem definitum aliquem mo-
 tum imprimit. Pone corpus A. quod determina-
 tum vi fabricæ suæ sonum edit; semper eum-
 dem edet sonum, quamdiu eadem hujus corpo-
 ris moles, durities, figura, motus, erunt. Sed
 jam pone corpus hoc, manente eadem duritie,
 eademque figura, mole duplo augeri, motu au-
 tem impelli eodem, quo antea; omnibus iis-
 dem manentibus sola mole mutata, corpus hoc
 jam alium & fortiozem quidem sonum edet,
 quam antea. Iterum manentibus iisdem omnibus,
 pone duritiem ejus corporis augeri vel minui,
 & hac sola qualitate mutata jam frequentius,
 aut parcius intra datum tempus vibrabit, & so-
 num edet acutiores, gravioremve quam antea.
 Maneant iterum omnia alia eadem, sed sola fi-
 gura corporis hujus mutetur, & denuo alium
 edet sonum. Ita idem æs in unam solidam mas-
 sam fufum resonabit aliter, ac dum eadem mas-
 sa in campanam cavam efformatur. Denique ite-
 rum omnibus iisdem positis solus motus huic
 corpori impressus varietur, & iterum erit ma-
 nifesta soni diversitas. Ita in omnibus aliis sensi-
 bus res se habet. Manente eadem mole, aut
 manente eadem massa, ex eodem metallo con-
 fice diversæ figuræ corpora, globulos, aciculas,
 cultros & singulum horum pro ratione figuræ
 suæ, aliter corpus nostrum afficiet. Separa radios
 lucis conjunctos, & alios videbis colores; eos-
 dem lucis radios, quos antea facile tolerasti,
 speculo Villetiano in focum collige, & intole-

rabile oculis tuis jubar orietur. Eadem tamen lux nunc est, quæ fuit antea; solum densitas ejus in exiguo spatio aucta est. Sed non esset finis exemplorum, si diutius his inhærere vellem. Ex dictis autem hoc sequitur necessario, corpora iisdem qualitatibus sensibilibus prædita, ejusdem nimirum magnitudinis, figuræ, motus, densitatis, duritiei & modo prorsus eodem eundem nervum afficere; his autem qualitatibus mutatis, imo harum unica solummodo mutata, jam aliter nervum eundem affici, aliamque sensationem sequi. Unde si corpora omnia sensibilia iisdem qualitatibus prædita essent, easdem omnino sensationes in nobis excitarent, nec proinde ulla nobis differentia corporum innotesceret.

§. D L X V I I I.

Constat innumeris observatis, nervo inter organon sensorium & cerebrum compresso, obstructo, vel aliis modis, sic vitiato, ut commercium organi sensorii cum encephalo cesset, nullam sensationem percipi, etiamsi organum ipsum omni vitio careat. Qui amaurosi laborat, nihil videt, licet oculi fabrica integerrima sit, licet humores omnes pellucidissimi sint. Sensatio ergo non fit in ipsa nervi superficie, cui mutatio inducitur, nec in organo, in quo is nervus explicatur, sed in encephalo; ergo necesse est ad perceptionem objectorum externorum, ut mutatio illa superficiei nervi in organo sensorio inducta, aut strictius loquendo, mutationis illius effectus, per totum nervum usque ad encephalon in sensorium commune propagetur. Idque fieri necesse est in singula fibrilla nervea, quum singula fibrilla ab alia sejuncta sit, & distincte singula afficiatur. Illud autem, quod per nervum ad sensorium commune propagatur, est tantummodo effectus illius mutationis, quæ superficiei nervi inducta fuit. Non
imago

imago in oculo picta per nervum opticum ad cerebrum deferitur, tremor non per acousticum, odor non per olfactorium, sapor non per lingualem, nec per tactus nervos, asperitas aut lævitas superficiei. Sed nervus in sua superficie mutatur ab objectis externis, & ex hac mutatione, semper aliquis determinatus, & certæ mutationi respondens motus, per eum nervum ad sensorium commune propagatur.

§. DLXIX.

Tam parva, tamque simplex &c. Dum video objectum aliquod extra me positum, imaguncula illius objecti pingitur in oculo meo, infinite quidem minor objecto externo, sed illi quoad omnia proportionalis etiam in tanta minutie. Et in hac tamen adeo minutula imagine tot distincti lucis radii continentur, imo tot distincti radiorum fasciculi, quod distincta objecti puncta video. Rursus radii ex puncto A emanantes distinctam retinæ fibrillam feriunt, & aliam ac distinctam radii a puncto B, & C, & sic porro. Quæ omnia ut recte & sine confusione fiant, multæ admodum conditiones in oculo requiruntur, de quibus dictum est. Non ergo videretur sensus prima fronte adeo simplex res esse, ut BOERHAAVIUS proponit. Verum hæ conditiones adeo multiplices solummodo requiruntur, ut nitida objecti ac distincta imago pingatur, utque fibrillæ nerveæ retinæ quævis, distinctæ in superficie sua mutantur. Hæc autem mutatio nondum sensus est, sed necesse est, ut aliquid ejus mutationis propagetur usque ad sensorium commune. Quid vero transfertur illuc? non certe imaguncula, nec ejus imagunculæ partes, sed ut singula fibrilla nervea retinæ, distinctum imagunculæ punctum excipit, & a radiis lucidis id punctum imagun-

culæ formantibus distincte afficitur, ita motus aliquis, superficiei fibrillæ impressus, qualiscumque, at semper suæ causæ respondens, per fluidum nerveum ad sensorium commune propagatur, & ex re adeo simplici, adeo parva, qualis ille liquidi nervei motus est, in mente idea nascitur, coloris, figuræ, distantiae, magnitudinis aliarumque qualitatuum objecti externi. Nil nisi motus est liquidi nervei, & ille infinite parvus, & simplicissimus, qui mihi ideam soni, coloris, odoris, saporis, tactus, imprimit; eoque motu tantillum variato, alia atque in mente idea orietur. Sed motus ille fibrillis retinæ impressus, res est longe simplicior imagine, quæ in retina pingitur, & motus ille, qui per acoustici nervi fibrillas ad sensorium defertur, multo simplicior est tremore officulorum, & tot soni reflexionibus & vibrationibus, quas in organo auditorio tamen fieri necesse est. Et idem de ceteris sensibus ostendi potest. Recte ergo BOERHAAVIUS impressionem illam, quæ in sensorio communi fit, & secundum quam mens nostra de qualitatibus externorum corporum judicat, rem vocat simplicissimam.

§. D L X X.

Motus aliquis, ex affectione nervi in organo suo explicati productus, propagatur ad sensorium commune, ad originem nempe nervi, unde is ex substantia corticali prodit. Eo motu mutatur status animæ, qui paulo antea fuerat, novumque aliquid animæ repræsentatur, quod extra illam agitur in universo rerum territorio. Non tamen id ipsum animæ repræsentatur, quod agitur, sed aliquid illi analogum, & hujus effectus, motus nempe aliquis liquidi nervei sensorio communi impressus. Sed illa impressio cum ipsis rebus, a quibus oritur, stabili & perpetua

lege ita connexa est, ut semper certam impressionem, in sensorio communi factam certa animæ mutatio sequatur, utque easdem impressiones eadem animæ mutationes, diversas impressiones, etiam diversæ & certæ semper ac constantes animæ mutationes sequantur. Anima nihil novit de illo motu, qui per nervum ad sensorium commune defertur, & tamen ille ipse motus animæ statum mutat, & ex illo motu anima quiddam percipit & a nervi mutatione, & ab illo motu distinctissimum, quæ perceptio, vel ut alii vocant, *apperceptio*, quandoquidem cum conscientia mentis conjuncta esse debet, *sensatio* est. Illud autem, quod anima percipit, effectus hujus sensationis est, & *idea* appellatur, quæ adeo, tamquam effectus ad suam causam, certam semper & constantem relationem habet, ut ab iisdem in sensorio communi impressionibus eadem, a diversis diversæ, semper tamen determinatæ, in mente ideæ nascantur. Cum vero impressiones in sensorio communi natæ, effectus sint mutationis inductæ nervo in organo sensorio, & hæ mutationes iterum effectus sint objectorum externorum organa nostra afficientium, cumque effectus certam semper & constantem relationem habeant ad suam causam, patet, etiam certam semper relationem esse inter impressionem sensorio communi inductam & inter objecta externa, adeoque certam semper relationem esse inter ideas, & objecta, a quibus illæ ideæ in mente oriuntur, nullo tamen in fabrica nostra corporea præsentis vitio. Adeoque, quia ideæ se habent, ut impressiones factæ in sensorio communi, & impressiones hæ se habent, ut actiones objectorum in organum sensorium, etiam ideæ se habent ut objecta externa, & hinc ab eodem objecto eadem semper idea, ab objecto diverso, idea diversa nascitur, semper tamen determinata, & ad objectum suum relativa. Er-

go primum, quod in textu dicitur clarum est, nempe *ideas variare pro varietate objecti*. Et hoc experientia convincimus.

Sed variant etiam *ideæ pro varietate ipsius nervi affecti*. Nempe *ideæ* se habent, ut impressiones factæ in sensorio communi; sed nervi diversi, diversas in sensorio communi impressiones producant, ergo & *ideæ* pro varietate nervorum variæ sunt. Experientia hoc confirmat. Papillas cutaneas, sive ablata epidermide denudatas, sive hac relictas defensas imbue falso, sapido, liquore, qui facillime per poros epidermidis transeat, easque adficiat: non tamen saporem percipies, non ideam falsi aut sapidi habebis. Admove iisdem liquorem odoratissimum, at simul nares comprime; nullam habebis odoris ideam. Et certum tamen est, ejusmodi odoratas particulas facile intra corpus suscipi, & dum suscipiuntur, necessario papillas tactiles offendere. Ergo *ideæ* omnino variant pro varietate nervi affecti.

Alia varietas idearum pro *discrimine fabricati organi* est. Pro diversa organi fabrica diversæ fiunt in sensorio communi impressiones, hinc & *ideæ* diversæ. Tremor aëris sonori non colligitur ab oculo, nec per oculum idea soni nascitur. Vicissim auris lucis radios non colligit, nec separat, hinc neque per aurem idea lucis aut colorum nascitur. Et forte ea diversitas idearum, quam BOERHAAVIUS a varietate nervorum repetit, & de qua mox dixi, tantummodo pendet a diversitate organi, in quo nervus exponitur, & ab ultimæ superficiei nervi in organo explicatione, & a ceteris conditionibus, quas quilibet nervus peculiares habet. Nam admodum probabile mihi videtur, inter ipsos nervos nullam, quod ad horum substantiam & naturam attinet, diversitatem intercedere, & omnino persuadeor, per-

inde nos qualitates corporum visibiles per acousticum nervum percepturos esse, & sonos vicissim per opticum, si hic in organo auditorio eadem prorsus ratione ut acousticus, & ille in oculo, eodem quo opticus modo, explicatus hæreret.

Alia varietas idearum pendet *a varietate loci in medulla cerebri, unde ille nervus.* Hoc quidem demonstrari non potest, & solum inter opiniones locum habet probabiliore. Omnes enim nervi, ut ex anatome constat, ut distinctum finem in organo, ita etiam distinctissimam in medulla encephali originem habent. Debet ergo non minor ratio esse hujus distinctissimæ originis nervorum, quam sit ratio finis distincti eorundem. Videtur ergo admodum probabile, singulam fibrillam nerveam, ut determinate in fine suo adficitur, ita motum aliquem determinatum adusque originem suam in sensorium commune propagare, adeoque in sensorio communi distinctas esse provincias, pro diversis sensibus ac diversis ideis, & circa cujusvis nervi sensorii originem unicam tantum idearum „speciem habitare, soni ideas circa originem nervi acoustici, „lucis & colorum circa orientes opticos, ut „BOERHAAVIUS & alii Clarissimi Viri suspicantur. „

Variant denique ideæ pro *vario gradu motus, quo applicatur objecti actio.* Nempe eo impressio in sensorio communi erit fortior, vel debilior, adeoque idea etiam fortior vel debilior. Id quoque experientia constat. Lux modica oculum haud moleste afficit, & opportuna est objectis distincte videndis, lux vero solito major nimio fulgore nervum opticum percellit, & intolerabilis est. Sonus gravis & acutus sola velocitate vibrationum corporis sonori differunt, omnia ceterum eadem sunt, solus ille numerus vibratio-

num auctus, & motus intra datum tempus celerior, aliam menti ideam imprimit &c.

Nihil repræsentans, quod est in actione objecti vel in passione organi. Id evidens est. In idea soni acutissimi nihil continetur de celerrimis intra tempusculum minimum vibrationibus, nil de membranæ tympani tremoribus, nil de affectione ossiculorum auditus, aut nervi acoustici. In idea corporis rubri nil continetur de radio omnium difficillime refringibili, nil de celeritate lucis, nil de ejus refractione in humoribus oculi, nil de pictura imaginis &c. Idea doloris ex ambustione nati non involvit motum perturbatum particularum ignearum &c. Ignarus rusticus, tenellus infans, nihil in his discrepat a sapientissimo philosopho.

§. D L X X I.

Hoc ideo scripsit BOERHAAVIUS, quia RAVIUS ejus amicus crediderat, etiam alium quemcumque nervum alteri posse substitui, & acousticum omnino visui aptum fore, si in oculo locaretur, & perinde, ut opticus, in retinam distribuere-
tur. Profecto sola ultima distributio nervi in organo aliquo non absolvit sensationem, neque certe ex hac sola conditione certarum idearum perceptio pendet. Si ergo RAVIUS de ultima solum nervi expansione disputavit cum BOERHAAVIO, omnino erravit; si vero RAVIUS contendit, e. g. acousticum nervum in oculum insertum, positis omnibus iisdem conditionibus, quæ nervo optico propriæ sunt, aptum fore qualitatibus visibilibus animæ repræsentandis, recte videtur dixisse, nec video, quomodo convincente aliquo argumento contrarium tueri possit BOERHAAVIUS, nisi etiam nervos quoad substantiam differre demonstraverit, quod ultra hominis cap-
tum est.

§. D L X X I I.

Omnem ideam sequitur determinata mentis affectio, eamque ipsam affectionem mentis passim comitatur aliqua determinatio voluntatis animæ. Vel enim placet idea, vel displicet, vel neque placet, neque displicet, sed prorsus adiaphora, seu indifferens est. Indifferentes ideæ nihil mutant animæ voluntatem, placentes autem & displicentes hanc confestim mutant & determinant. Quando nimirum idea placet, anima eam ideam cupit retinere, & rem ipsam, a qua hæc idea excitata est, amat, eo ardentius, quo magis in idea sibi complacuit. Contra vero, dum ideæ rei displicet, anima illam ideam averfatur, & rem ipsam, a qua hæc idea excitatur, odit, eo vehementius, quo magis ingrata sensatio aut idea illius rei fuerit. Omnes sic facti sumus, ut bonum amemus physicum, malum aversemur. Boni autem, vel mali aestimatio, sæpe quidem a sensatione pendet, ut e. g. dolor, anxietas, nervorum affectio validior; sæpe tamen etiam ab imaginatione nostra, ab ideis dudum præconcep-tis, ab attentione mentis, ab idearum majore vel minore simplicitate, distinctione, & aliis ejusmodi conditionibus pendet, & hinc quæ alteri placet idea, displicet alteri, quod alter amat, alter averfatur. Nunc cum ideæ sint effectus rerum perceptarum, si idea placeat, & a mente ad suam causam, seu ad illud objectum, quod hanc ideam excitavit, referatur, necessario idem illud objectum placet, adeoque ut primum voluntas mentis circa ideam determinata est, eadem etiam necessario circa rem illam, quæ ideam excitavit, determinata est, nec potest anima averfari rem, cujus idea placet, & eo minus illam rem averfari potest, quo magis ejus idea menti placuit, sed necessario voluntas animæ in amorem ejus rei flectitur, imo rapitur. Vicissim

non potest anima amare ideam displicentem, neque adeo potest amare rem illam, a qua hæc displicens idea excitata est, sed necessario & ideam, & causam ideæ, objectum nimirum averfatur. Ex hoc duplici fonte *Amor* & *Odium*, & ex his reliquæ affectiones, quas vulgo animi affectus vel pathemata vocant, oriuntur. Amamus quod placet, odimus quod displicet. Amor rei præsentis *lætitiâ* excitat, amor objecti præteriti *lætitiâ memorem*, amor boni futuri *desiderium* ejus obtinendi, & si hoc nobis possibile videtur, etiam *spem*. Idea mali præsentis, quod amoliri non possumus, *tristitiâ* parit, mali magni ex improvviso ingruentis *terrorem*, idea mali futuri cum impotentia præconcepta illud avertendi, *metum* incutit. Idea præsens odiosa cum summo conatu eam amovendi, *iram*; idea rei odiosæ præteritæ *iram memorem* ciet. Idea mali, conjuncta cum idea objecti, quod amamus, *commiserationem*; idea mali præteriti, cujus ipsi auctores existimus, *pudorem*; idea denique mali præsentis & maximi, & cujus auferendi nulla possibilitas affulget, *desperationem* parit, omnium animi affectuum sævissimum.

§. DLXXIII.

Omnes hæc mutationes in mente natas sequuntur certæ mutationes corporis, certique motus musculorum, quorum ratio in intimo illo mentis cum corpore nexu latet. Levis etiam, vel certe mediocris animi affectus, motus quorundam musculorum comites habet, aut motus alios a sanguinis per vasa quædam mutato fluxu pendentes, quibus intima animi sensa produntur, ne homo homini facile possit imponere, adeo, ut iram, pudorem, tristitiâ, timorem, lætitiâ &c. in facie alterius legere possis. Sed validiorem animi affectum etiam majores & vali-

diores & plurium partium in corpore mutationes sequuntur, ne vitalibus quidem exceptis. Ira motum cordis & arteriarum, & robur musculorum auget, sanguinem in vasa minora impellit, calorem naturalem auget. Tristitia vim cordis & arteriarum, & musculorum omnium minuit, pallorem, frigus inducit, respirationem labefactat. Pudor vultum etiam alias pallentem sanguine suffundit. Metus vires cordis, arteriarum, musculorum, minuit, minuit perspirationem insensibilem, inhalationem auget, pallorem & frigus inducit. Terror contra vires corporis immaniter auget. Amor, spes, gaudium sanguinis motum incitant, perspirationem augent. Quo vehementior affectus animi, eo etiam hi motus vehementiores sunt. Hinc mirum non est, a vehementissimis animi affectibus corpus pessime affici & subinde morte mulctari, quandoque vero etiam morbos pertinaces, & remediis non cedentes, animi gravissimis pathematibus cedere, & repente tolli. Quomodo hi motus ab affecta anima oriantur, non possumus explicare. Per nervos id omne peragi probabile est, & omnino nervorum non solum in musculos, sed etiam in vasa minora imperium alio loco dudum ostendi, dum de arteriarum actione dictum fuit.

Nunc etsi hæ mutationes corporeæ ex nexu illo & commercio intimo animæ pullulent, & necessario sequi videantur, probe tamen advertendum est, non ideo libertatem actionum humanarum tolli, quod ideo imprimis moneo, ne quis aut de me malam opinionem concipiat, aut ipse ex nunc dictis, veris tamen principiis, si liberiore ratiocinio progrediatur, in errorem incidat, nam hæc certe materies omnium delicatissima est, & in bivio veritatis ac erroris constituta. Etsi enim motus hi ex stabilito semel com-

mercio fluant, tamen ratio eos aut impedire potest, nisi ipsa prævertatur, aut certe refrænare. Hoc fieri posse, docent innumera exempla, non inter christianos modo, ea moderatio quibus præcepta est, sed etiam inter ethnicos populos & barbaros obvia, quorum historiæ plenæ sunt. Verum, dicet aliquis, si motus hi fiunt ex lege stabilita, impossibile est, ut anima legem illam evertat. Recte hoc; idem & ego tueor; non potest anima amare, quod ipsi displicet, nec potest odisse, quod placet; & cum lex stabilita sit, ut gratam illam vel ingratham ideam certi in corpore motus sequantur, sequentur illi necessario, velit nolit anima. Hoc & meum argumentum est. Sed cardo rei alibi vertitur. Nimirum ratio humanæ mentis intenta facere potest, ut illud, quod primo impetu gratum videbatur, meliorem indagine gratum non videatur, & vicissim. Nam certe placens illud vel displicens, aut boni malive æstimatio, ut supra monui, plerumque ab imaginatione nostra, ab intellectu non satis puro, ab ideis dudum præconceptis pendet, aut ab aliis ejusmodi conditionibus, & hinc displicet sæpe alteri, quod alteri placet. Atque his conditionibus mutatis, mutatur etiam illud placens vel displicens, illa boni malive æstimatio. Verum illud ipsum causa est ejusmodi motuum & turbarum in corpore; mutata ergo hac causa, effectus mutetur necesse est. Si ergo id possis efficere ratione, ut idea alias summopere displicens tibi nunc fiat adiaphora, aut saltem minus displicens, jam affectum animi aut penitus suppressere poteris, aut certe refrænare. Id autem fieri posse, docet unum quemque propria experientia, qui umquam rationem actionum suarum legislatricem constituit. Hodie suadeo iracundo homini, ut legat SENECEÆ moralia opera, deciesque relegat; hoc si fecerit, & si nunc vo-

luerit hujus philosophi præceptis in rem suam
uti, certus sum, illum ab eo tempore iræ mi-
nus obnoxium futurum. Si autem his præceptis
uti nolit, hoc ipso clarum est, eum nolle af-
fectui suo dominari, dum tamen posset. Atque
hoc est, in quo omne meritum vel delictum ac-
tionum nostrarum versatur. Dum enim affec-
tum inhonestum ratione suppressere prorsus
non possumus, quod in primo impetu acci-
dit, pro eo quidem tempusculo culpa vacamus.
At, cum primum ratio affectum refrænare po-
test, nec refrænare tamen, jam hoc ipso, rei
sumus, & ipsa ratio nos damnat. Difficile esse
hos impetus refrænare, id quidem omnes ex-
perimur; at sufficit, possibile esse. Difficultatem
posuit legislator, ut esset ratio, cur puniret &
coronaret. Hæc ipsa difficultas, est illa lucta
carnis cum spiritu. Nos vero adeo parum in
his pathematibus ratione utimur, adeo parum
iis oblectamur, ut sæpissime etiam manifesta
mentis voluntas juncta sit. Qui primo iræ im-
petu proximum suum lædit obvium, delinquit
insanus, eo impetu prætergresso si lædit, jam
lædendi voluntatem habuit. Acute hæc du-
dum & eleganter animadvertit L. ANN. SENE-
CA *de ira* Lib. II. cap. III. dum ait: „Nihil ex
„his, quæ animum fortuito impellunt, affectus
„vocari debet. Ista, ut ita dicam, patitur ma-
„gis animus, quam facit. Ergo affectus est non
„ad oblatas rerum species moveri, sed permit-
„tere se illis, & hunc fortuitum motum perse-
„qui. Nam si quis pallorem & lacrymas proci-
„dentes, & irritationem humoris obscœni, al-
„tumve suspirium, aut oculos subito acriores,
„aut quid his simile indicium affectus, animique
„signum putat, fallitur, nec intelligit hos cor-
„poris esse pulsus. Itaque & fortissimus plerum-
„que vir, dum armatur, expalluit, & signo pug-
„næ dato ferocissimo militi, paululum genua

„tremuerunt; & magno imperatori, antequam
 „inter se acies arietarent, cor exsiluit, & oratori
 „eloquentissimo, dum ad dicendum componi-
 „tur, summa riguerunt. &c. &c., *Op. T. I. p. 27.*

§. D L X X I V.

De sensorio communi jam suo loco dictum
 fuit, hinc nunc supersedeo.

§. D L X X V.

*Quo distinctior actio objecti in sensorium commu-
 ne, eo nitidior & distinctior idea inde orta.* Ideæ
 se habent ut impressiones factæ in sensorio com-
 muni; illæ autem se habent, ut mutationes su-
 perficie nervi in organo sensorio inductæ. Ergo
 quo distinctius superficies nervi in organo senso-
 rio exposita ab objecto afficitur, eo etiam idea
 in mente distinctior & nitidior nascitur. Quando
 radii lucis ab objecto externo reflexi sic refrin-
 guntur in oculo, ut in spatium possibile mini-
 mum in retina colligantur, ita tamen, ut alter
 alteri non confundatur, nec permisceatur, sive,
 quod idem est, quando imago objecti in retina
 distinctissime pingitur, etiam idea visi objecti
 distinctissima est, & contra. Dum objectum ali-
 quod microscopio lustrare & distinctissime vi-
 dere volo, ars tota in eo posita est, ut objec-
 tum ponatur supra lignum nigerrimum, ut ni-
 hil videam præter ipsum illud objectum, & ra-
 dii ab hoc solo reflexi, aliis non permisti re-
 tinam meam afficiant.

§. D L X X V I

*Quo vividior actio objecti in sensorium commu-
 ne, eo clarior idea excitata.* Hoc eodem funda-
 mento nititur, & experientiæ quotidianæ res-
 pondet. Luce meridiana ceteris paribus ob-

jecta multo clariora videmus, quam sub crepusculo. Sonum eundem in distantia duplo minore quadruplo clariorem audimus, quia in distantia minore ab objecto sonoro, in ea proportionem vividior est actio hujus objecti in organum nostrum auditorium, quam in maiore distantia.

§. DLXXVII

Quo sæpius renovatur actio objecti in sensorium commune, eo clarior idea. Et hoc ipsum experientia constat. Video plantam aliquam, video hominem, aut animal; id semel factum est; habeo quamdam adhuc ideam hujus plantæ, hominis, animalis, sed obscuram; & si post temporis intervallum iterum videro eundem hominem, idem animal, eandem plantam, subibit quidem mentem meam hæc objecta quondam vidisse, sed non sine quadam ambiguitate. Si vero decies aut pluries videro objectum, jam inde adeo familiaris mihi erit hujus idea, ut primo statim obtutu agnoscam, esse hanc plantam, hoc animal, hunc hominem. Nempe ideæ semel perceptæ, aut impressiones semel factæ in sensorio communi, sui quoddam vestigium relinquunt (neque enim aliis verbis hoc explicare possumus) id vestigium prima vice medullæ cerebri impressum leve est, & ideo obscurum. Verum dum per repetitas actiones objecti externi in sensorium commune impressiones illæ in eundem medullæ locum multiplicantur, videntur etiam vestigia illa jam relicta confirmari, & profundius medullæ imprimi, hinc dum sæpius renovatur objecti actio in sensorium commune, per repetitas illas impressiones, etsi non admodum vividas, idem fit, quod alias fieret ab unica, sed admodum vivida impressione; hinc idea tandem clarior.

§. DLXXVIII.

Quo magis aliena ab omnibus aliis ælio objecti in sensorium commune, & quo magis insolita, eo vividior idea. Res ipsa certa est. Ratio autem non adeo in ipsa illa insolita idea, quam quidem in curiositate & attentione mentis circa hanc ideam, posita esse videtur. Nam ad obvias ideas parum attendimus, consueta parum curamus, & plerumque negligimus. Insolita vero corpora, insolitas & numquam alias nobis notas res, aut nota phaenomena, dedita opera & attentione, ac curiositate ex omni parte lustramus aut versamus. Insolitam ergo ideam anima non protinus dimittit, sed diutius rerinet & expendit; inde fortior impressio in sensorio communi, & idea vividior. Deinde insolitæ ideæ plerumque, pro genio nostro, aut gratiores sunt aut magis odiosæ aliis consuetis, hinc mentem omnino vividius afficiunt. Puer ab homine larvato, cacodæmonem mentiente terrefactus, diutissime & vividissime ideam illius spectri retinebit, & cacodæmonis nomine appellato, continuo vividissima illius idea in mentem pueri recurret, quia nimirum ingratisima hæc & terrifica puero idea est, & ideo etiam fortius impressa sensorio communi.

§. DLXXIX.

Si ergo tam fortiter inhæret &c. Ideæ se habent, ut impressiones in sensorio communi factæ; si ergo impressio adeo valida in sensorio communi facta est, ut aliis supervenientibus mutari vel aboleri nequeat, idea ab hac impressione excitata, manebit præsens, & perdurabit, quamdiu ipsa impressio satis vivida manet. Homo, qui e manibus inimicorum suorum ægre elapsus est, dum per silentia tenebrasque noctis fugam capeffit, ad quemvis vel minimum strepitum exhorrescit; strepitum folii, quod vento rapitur, me-

tuit; jam se proditum, jam circumventum putat ab inimicis. Adéo fortiter nimirum idea primitus impressa, sensorio communi inhæret, ut actione superveniente aliorum objectorum, mutari nequeat, sed ipsa semper alias omnes ideas præcellat, mentemque sui impotem abripiat.

§. D L X X X.

Memoria est ideæ impressæ præsentia cum conscientia similis ideæ, seu ejusdem jam olim habitæ. Idea quæcumque olim habita, potest iterum in mente resuscitari actione similis causæ, quæ illam primum excitaverat. Imo vero quia raro unam ideam solam sine nexu & consortio aliarum percipimus, & vestigia omnium idearum in medulla sensorii communis impressa remanent, fit hinc, ut, quamdiu adhuc vestigia illa ab aliis causis oblitterata non fuerunt, ut inquam unica idea resuscitata, omnes aliæ, vel certe plurimæ, quæ olim huic ideæ associatæ fuerunt, in mente renoventur. Videntur sibi hæc vestigia in medulla cerebri infinite vicina esse, ut motu in unico horum excitato, in omnibus aliis successive similis motus redeat, & ideæ recurrant comites, ut olim sibi fuerant sociæ. Dum pensum aliquot memoriæ mandasti, illudque recitas, si forte contingat, ut in unico verbo hæreas, hærebis in omnibus subsequis; si quis tunc illud verbum tibi suggerat, jam sponte omnia reliqua verba tibi nullo dictante fluent & in mentem recurrent, quasi una idea causa esset alterius. Dum quis vestem patris defuncti videt, non solum vestis hujus ideam habet, sed etiam ideam mortis paternæ, & afflictæ familiæ, & verborum patris sui, quæ forte ante obitum fudit ultima, & aliarum circumstantiarum, quæ tunc aderant præsentis. Ille recursus idearum jam habitarum memoria est. Atque

ut ideæ sociæ recurrunt, ita etiam animi pathemata eadem, quæ olim cum his ideis connexa fuerant, recurrunt; subibit mentem commiseratio etiam nunc, dum intimi tui amici fato abrepti memoria redit. Subibit iracundia etiam nunc erga illum, qui vel tibi, vel amico tuo injuriam olim intulit. Id omnium pulcherrime & felicissime expressit divinus VIRGILIUS, quando prostrati & veniam precantis *Turni*, jamjam commiseratione tactum *Aneam* ex conspecto *Pallantis* balteo, quem *Turnus* olim occiderat, denuo in furorem actum describit, & non animum *Aneæ* *Turno* exitiosum fuisse, sed conspectum in *Turno* occisi amici sui insigne spoliū

————— ————— *stetit acer in armis*
Æneas, volvens oculos, dextramque repressit.
Et jam jamque magis cunctantem flectere sermo
Cœperat: infelix humero cum apparuit ingens
Balteus, & notis fulserunt cingula bullis
Pallantis pueri, victum quem vulnere Turnus
Straverat, atque humeris inimicum insigne gerebat.
Ille oculis postquam sævi monumenta doloris
Exuviasque hausit: furiis accensus & ira
Terribilis: tunc hinc spoliis indute meorum
Eripiare mihi? Pallas te hoc vulnere, Pallas
Immolat, & poenam scelerato ex sanguine sumit.

§. D L X X X I.

Mechanica dispositio. Hoc etsi directis experimentis demonstrari non possit, tamen severo ratiocinio ex phænomenis morborum & aliis evincitur. Non pauca enim sunt exempla memoriæ omnis, per morbos abolitæ, abolitæ per venena, denique & mutatæ per ætatem solam, exempla quotidiana sunt. Poëta insignis Italus, morbo correptus acutissimo, convaleuit, sed memo-

memoria ita privatus, ut omnium literarum elementa iterum addiscere debuerit, utque propria poemata ab aliis edita non nosceret. In peste Attica, a THUCYDIDE descripta, idem infortunium pluribus obtigit. Magis mirabilis est historia VALERIO MAXIMO relata de cive Atheniensi, qui lapidis ictu in capite percussus, omnium quidem aliarum rerum memoriam tenuit, sed literarum, quibus eruditus vacabat, penitus oblitus fuit. Ab ictu, cranio depresso, vulnere capitis memoriam sublatam alii viderunt. In Apoplexia perit omnium rerum memoria, & sæpe etiam post morbum obliviosi manent homines. Perit memoria in lethargo, epilepsia, in catalepsi passim. Sublata ea causa quæ cerebrum læsit, reddit memoria. In Actis Suecicis exstat historia (1757. Vol. XIX.) hominis, qui ex nimia adstrictione collaris, inter loquendum apoplectico insultu prehensus, & omni memoria privatus, dum relaxatione collaris & cito instituta venæ sectione ad se rediret, sermonem suum abruptum, quem ante apoplecticum insultum ceperat, continuavit, sic, ac si interea temporis nullam loquendi pensam fecisset, ipse nullius intervalli sibi conscius. Atque id ipsum catalepticis etiam accidere solet. Porro venena memoriam labefactant, & penitus tollunt, imprimis autem narcotica, opium, stramonium, hyoscyamus &c. Illustrissimus VAN SWIETEN, cum vim soporiferam seminum papaveris, quam multi medici hodie dum his tribuunt, nullam esse deprehenderit, etiam de seminibus hyoscyami, plantæ pariter narcoticæ, idem suspicatus, experiri voluit in proprio corpore, an quædam his seminibus vis narcotica inesset, vel non. Assumpsit igitur quartam partem drachmæ, gr. nimirum XV. seminum hyoscyami; sed paulo post omni memoria privatus est, ita, ut nihil ipsi de rebus externis constaret; dum quid legere voluit, etiam

litteras vidit, non potuit tamen litteras illas in summam unius verbi cogere; imo etiam proprii nominis sui oblitus est. In hac tamen miseria id unum retinuit in conscientia, quod mali quid fecisset, licet id ipsum, quod fecit experimentum, nesciret. Hæc phænomena, & his similia multo plurima satis evincere videntur, memoriam solummodo a mechanica dispositione sensorii communis pendere, quippe quæ a tot causis minui potest, aut tolli pro tempore, aut penitus deleri, quæ tamen causæ mechanicam solummodo actionem in cerebrum exercent. Videntur ergo omnino vestigia aut notæ semel impressæ retineri, aliæ minus diu, aliæ diutius, prout impressiones ipsæ minus vel magis vividæ fuerunt. Nunc autem facile fieri potest, ut a causa cerebrum comprimente, a nimio sanguinis ad encephalon impetu, variis aliis causis notæ hæ, aut vestigia idearum, minuantur, imo plane aboleantur, adeoque & memoria rerum pereat. Citissime vero earum obliviscimur rerum, quæ leviter nos affecerunt, quæ adeoque & leve sui vestigium reliquerunt, contra memori mente diutissime retinemus impressas ideas validiores, & sæpe per omnem vitam. Confirmant hanc ipsam opinionem varii gradus memoriæ pro varia ætate, variaque cerebri conditione. Tenellis infantibus vix ulla est memoria, sed perceptiones simplices, & cito evanidæ, licet validæ, ut ex ejulatu & clamoribus judicare possumus. Videtur in his nimia cerebri mollities, etsi valide afficiatur, non satis apta impressionibus diutius retinendis. Facile reconciliantur infantes irati, & post rixas & altercationes se mutuo blande iterum invitant ad crepundia, quod satis docet, quam facile obliviscantur prægressorum. Sensim vero crescit memoria crescente ætate, & aucta firmitate cerebri; viget maxime in adolescentibus & juvenibus,

in viris denuo minuitur, magis in senibus, qui fere obliviosi passim reperiuntur, & licet garuli, tamen potissimum facta juventutis suæ enarrant, quorum vestigia adhuc supersunt. Videtur in ætate senili cerebrum firmitus, minus profundas impressiones admittere, quæ proinde multo facilius deleantur.

Ceterum memoria fulcrum est omnium artium & scientiarum, & actionum humanarum. Sine ea nil nisi præsentia nosceremus, futura numquam prævideremus, quia omne quod ad futurum concludimus ex comparatione præteritorum cum præsentibus, aut certe ex plurium idearum nexu concludimus, quarum aliæ alias necessario præcedere debent. Nunc vero sine memoria numquam possent ideæ præcedentes, jam elapsæ, necti præsentibus. Ergo deliri perpetuo essemus. Et propriam existentiam nostram tantum pro momento nosceremus, essemus adeo entia unius momenti.

Memoria stupenda quorundam hominum ad raritates naturæ pertinet. Exempla ejusmodi portentorum collegit Cel. HALLERUS V. p. 548. *elem. physiol.*

§. DLXXXII. & DLXXXIII.

Imaginatio est perceptio in mente nata, a causa interna sensorium commune afficiente, similis tali perceptioni, qualis olim a causa externa in sensorium commune agente excitata fuit. Sive est repræsentatio sensationis olim habitæ, a causa externa, nunc vero citra causam externam producta. Differt igitur a memoria, quod hæc signa solum & characteres rerum resuscitet, imaginatio vero ipsas revocet sensationes. Alii memoria præcellunt, alii imaginatione, ut sensationes dudum habitas sibi veluti præsen-

tes fingere & renovare possint. Hæc vis imaginandi poëtas imprimis format. Nam ut feliciter & ad naturam describere possis actionem aliquam, necesse est, ut illam ita menti tuæ repræsentares, ac si nunc hæc ipsa coram sensibus tuis absolveretur. Hoc si nequeas facere, recte ages, si in perpetuum Heliconi renuncies. Dum VIRGILIUM attente legis, dum sensum & nexum & naturam verborum recte penetras, videbitur tibi, ac si ipsæ illæ actiones, quas Poëta descripsit, coram te existerent; atque eandem prorsus repræsentationem, imo vividior sibi poëta, dum hæc scripsit, repræsentare debuit. Et de pictoribus idem quod de poëtis valet. Illustrissimus VAN SWIETEN aderat pictori, qui heroëm furem depicturus, ipse prius furere incepit, ut haberet prototypum, juxta quod imaginem sui herois depingeret. Jam vero imaginatio varios gradus habet, jam debilior, confusior, jam vividior, distinctior, pro varia dispositione sensorii communis. A causis internis quidem semper oritur, non tamen illæ causæ semper corporeæ sunt; nam & per voluntatem animæ possum mihi repræsentare sensationem aliquam dudum habitam, aut possum mihi fingere rem aliquam nunc extra me non existentem, imo possum mihi res numquam existentes ex diversarum rerum combinatis ideis producere, & quasi vere existentem repræsentare, e. g. ex idea hirci & cervi hircocervum. Est ergo in ipsa mente incorporea potestas, imagines rerum sibi formandi, si modo debita adsit dispositio sensorii communis; sed præterea a causis corporeis in nervis, in sensuum organis, in sensorio communi latentibus, sæpe admodum citra animæ voluntatem rerum absentium imagines repræsentantur, & repræsentantur adeo vividæ, ac si res illæ vere nunc extra corpus nostrum existerent. Ita in morbis acutis cum

delirio conjunctis, aut & in chronicis, ut in melancholia, mania &c. ægri ignem, incendia, spectra varia videre, sonos hos illosve audire, sibi videntur; ita in somno, dum somniamus, rerum quarumdam imagines sæpe vividissimæ nobis repræsentantur. Nimirum quando vel a motu sanguinis per vascula cerebri, vel ab aliis ejusmodi latentibus causis, tales nervis nostris & sensorio communi mutationes imprimuntur, quales alias ab objectis externis in sensus nostros agentibus oriuntur, eadem omnino ideæ, eademque rerum imagines menti repræsentantur, quales illa alias ab objectis externis, similes mutationes producentibus, percipit. Hujus vero imaginationis effectus multo validiores sunt, quam illius, quæ a voluntate nostra dependet. Hinc imaginationem BOERHAAVIUS divisit in *primam*, & *secundam*, licet illam admodum obscure descripserit, & fere cum altera confuderit. Nec illa divisio in *primam* & *secundam* satis distincta est. Rectius meo judicio divideretur in imaginationem *sanam*, seu *naturalem*, & *morbosam* seu *præternaturalem*. Priorem nos ipsi propria voluntate excitare possumus, & licet nobis res præteritas & rerum imagines actu non existentes repræsentemus, quasi coram nobis essent, tamen semper conscii nobis sumus, eas res nunc non extra nos existere. Hæc est alia imaginatio poëtarum & pictorum, seu vulgo dicta *phantasia*. Verum altera imaginatio *morbosa*, quæ non a voluntate nostra dependet, sed a causis physicis in corpore latentibus, & sensorium commune afficientibus oritur, hæc longe vehementior est, nec ullo ratiocinio everti potest; sed illa præsentem animam firmissime persuadetur, eas imagines, eas res, quæ nunc ipsi repræsentantur, reipsa extra corpus existere. Delirans dicat se videre incendium domus proximæ, e regione oppositæ, irritum agent omnes

amici & consanguinei, & sacerdos & medicus, si ipsi hanc ideam velint ratiocinio evertere. Nempe ideæ, ut sæpius dixi, & iterum repetito, se habent, ut impressiones in sensorio communi factæ; si ergo impressiones a causa interna in sensorio communi fiant æque vividæ, ac alias fiunt a causis extra nos positis, & per sensuum organa in sensorium commune agentibus, mens illius hominis æque parum poterit huic impressioni fidem denegare, quam parum oculis fidem denegare poterit, si reapse videat incendium. Tolle illam vividissimam impressionem in sensorio communi factam, tolle causam illam physicam hujus vividissimæ impressionis in corpore latentem, & mox rationis capax erit miser, seque delusum sentiet.

§. D L X X X I V.

Quando anima ideam aliquam in sensorio communi excitatam diutius retinet, eamque seclufis omnibus aliis considerat & expendit, actio hæc animæ vocatur *attentio*. Hæc omnis scientiæ, omnis judicii boni rectique mater est. Quo diutius enim anima ideam aliquam versat, & quo magis eam ab aliis omnibus secludit, eo hæc idea clarior, distinctior, vividior erit. Cum porro *judicium* sit combinatio idearum duarum, quæ inter se comparantur, ut harum similitudo vel dissimilitudo elucescat, erit judicium eo certius, & vis judicandi ipsius animæ eo efficacior, quo attentius singulæ ideæ seorsim antea expendæ fuerint, & distinctius repræsentatæ. Non potest enim anima eodem tempore duas ideas distincte percipere, sed unam post alteram si examinaverit, poterit utramque distincte percipere, & distinctione utriusque recte percepta, solidum formare judicium. Hinc judicii & ratiocinii, quod plurium judiciorum concatenata

series est, certitudo, & veritatis inventio vel maxime a lento idearum seorsim ponderatarum examine pendet; error vero & fallacitas iudicii ac ratiocinii vel ex plurium idearum simul consideratarum insufficiente distinctione, vel ex idearum etiam singularum nimis celeri examine, scaturit: Hinc in viris & senibus iudicium, in junioribus passim ingenium prævalet. Ingenium enim res est a iudicio diversissima; iudicium enim in distinguendis, ingenium vero in apte uniendis ideis versatur. Potest res falsissima etiam, in qua parum vel nihil sit veri iudicii, summo cum ingenio proferri; & ingeniosam vocamus cogitationem, quæ apte unitis etiam dissimilibus ideis constat. Ingenium cum celeritate idearum conjungitur, dum iudicium lentum idearum examen postulat. Itaque etiam homines dantur iudiciosi, sed qui ingenio careant, & vicissim. Possunt tamen hæc duo conjungi, & non parum hominem ornant. Liber summo cum iudicio scriptus, siccus est, & facile lectori fastidium parit; liber ingeniosus delectat, at parum prodest; si utrumque contineat, proderit simul & delectabit. In hoc magnum latet artificium, sed plerisque hominibus, etiam literatis incognitum. Interim iudicium semper ingenio præferendum est, utpote fundamentum omnis veri, omnisque scientiæ, & sapientiæ. Ceterum ut memoria, ita & iudicium, & ingenium a bona dispositione cerebri pendent. Vitiato per morbos cerebro, etiam iudicium & ingenium vacillant, imo pereunt, uti memoria. Cum vero iudicium certum sine attentione formari non possit, patet hinc quanti momenti in omnibus scientiis addiscendis attentio sit. Ea enim neglecta continuo sequitur idearum distinctissimarum confusio, & ex ea confusione error pedisequus. Nimia vero attentio etiam nocere potest; sic enim fit, ut una idea quandoque adeo perti-

naciter sensorio communi inhæreat, adeoque fortem impressionem relinquat, ut aliis subsequiis debilioribus deleri non possit, & delirium inducat, quod exemplo suo confirmant melancholici, qui perpetuo circa unam eandemque ideam intenti sunt.

§. D L X X X V.

Usu obtinuit, ut *memoria*, *imaginatio*, *affectus animi*, & *attentio sensuum internorum* nomine appellentur. Ego quidem his adderem *conscientiam*, & rescinderem attentionem. Primum certe est, dum cogitamus, vel reminiscimur, vel imaginatione afficimur, ut conscii simus idearum & sensationum; sine ea conscientia ceteri sensus interni stare non possunt. Deinde attentio utique ex classe sensuum internorum eximenda est, cum illa manifeste a voluntate mentis pendeat, & actio ipsius animæ sit.

Fames & *sitis* a quibusdam adnumerari solent sensibus internis, sed præter rationem, cum manifeste affectiones sint tactus, perinde ut dolor, anxietas, calor febrilis, horripilatio &c. quæ omnia perinde ad sensus internos referri deberent, ut fames & sitis, si nomine sensuum internorum eas perceptiones definiremus, quarum causæ in nostro corpore existunt.

§. D L X X X V I.

Cur corporea signa &c. Corporea ejusmodi signa, quibus ideas nostras exprimimus, sunt voces, soni, literæ &c. Hæc nihil omnino cum ideis commune habent; interim tamen ad determinatas voces, sonos, literas, determinatæ in mente ideæ oriuntur. Si pronunciem vocabulum *panis*, omnibus vobis nascitur idea cibi farinacei solidi, igne excocti; si hoc vocabulum scriptum inveniatis ubicumque, eadem in vobis idea excitatur. Fuit tamen olim tempus, cum

hoc vocabulum nullam in vobis distinctæ cujusdam rei ideam excitaret, & hodie nullam, nisi simplicis soni ideam habebit homo, linguæ latinæ ignarus ex hoc vocabulo prolato. Si dixerò *Friendship* pauci ex vobis intelligent, quid sibi velit hic sonus, hæc vox, si vero dixerò *amicitia*, continuo omnes intelligitis, & una eademque idea in omnibus vobis excitatur. Nempe etsi signis mere arbitrariis, & quæ nihil prorsus aut cum ideis, aut cum rebus ipsis commune habent, ideas nostras alter alteri communicare solemus, tamen, quia sic inter homines conventum est, ut certis ideis certa & eadem semper nomina connecterent (quod ipsum dura necessitas postulavit, cum alias confusio plusquam babylonica inter homines esset) dum inquam sic in certis nationibus usu stabili obtinuit, ut certis rebus certa nomina assignentur, hinc signa ista, etsi primo arbitraria, cessant ipso usu arbitraria esse, & infans, qui primum cogitare incipit, dum audit, eodem semper sono, eodem vocabulo, eodem signo, hanc unice & non aliam rem denotari, usu repetito necessario adeo stabilem ideam hujus determinatæ rei cum hoc determinato sono necessitudinem contrahit, ut dein quoties hoc vocabulum proferri audit, non alia in ipsius mente, quam hujus præcise rei, idea nasci possit. Id autem variat pro diversitate nationum & linguarum. Eadem quæ nominum etiam literarum potestas est, ex eodem fonte nata, & illa quidem magis stupenda. Nam cum nomina rerum propemodum innumera sint, literæ tamen in plerisque linguis non sunt plures tribus & viginti. Et his 23. characteribus, diversa ratione inter se consociatis, ingens ille numerus nominum, & idearum confurgit. Hieroglyphica signa veterum non aliam ob rationem deserta sunt, posteaquam a Phænicibus characteres mobiles inventi fuissent, quam quia

singulæ rei peculiare signum destinandum erat, & numerus adeo signorum in immensum augeri debuisset, dum contra pauci hi characteres mobiles sola transpositione innumeris ideis rerum exprimendis sufficiunt.

Secundo : Cur impossibile est imaginationem alteram emendare ullo ratiocinio? sed quidem violento motu? Sermo est de delirio, seu de imaginatione morbosa. Ratio vero phænomeni clara est. Anima enim semper judicat secundum impressiones in sensorio communi factas. Quando hæ impressiones vividissimæ sunt, anima non potest non ab iis affici, iisque suum præbere assensum vel dissensum. Si sanus homo apertis oculis videat incendium, quod revera extra ipsum existit, frustra omnes illi contrarium probare conabuntur, omnes videbit, & insanientes appellabit; nimis enim vivida ipsi idea repræsentatur, cui non potest non fidem adhibere, quidquid in contrarium dicatur. Nunc in ægris, quorum imaginatio depravata est, a causa interna in sensorio communi excitantur imagines rerum simillimæ, & æque vividæ, quam umquam per sensus externos repræsentari possint. Si ergo idea a causa interna nata in sensorio communi æque vivida est, ac esset, si reapse per sensus externos objectum in sensorium commune ageret, anima æque parum huic ideæ fidem denegare poterit, quam parum potest, dum ipsum illud objectum, reapse extra corpus existens, per sensus externos perciperet. Ratio ergo in vividitate sensationis posita est. Cumque nullum ratiocinium, etiam demonstrativum, adeo vivide mentem percellat, ut sensatio, hinc patet, cur nullo etiam ratiocinio imaginatio morbosa corrigi queat. Imo vero male agit medicus, si ejusmodi hominibus contradicat, & ratiocinio ipsos velit corrigere; iram enim & indignationem illorum in se concitat, & cum ipsi sibi recte sentire & sapere vi-

deantur, medicum contraria dicentem necessaria consequentia stultum existimant. Quin & medicamenta sæpe detrectant sumere, cum sibi videantur sanissimi. *Violento tamen motu*, id est, idea alia, contraria, & fortiori subito ac præter opinionem excitata, subinde ad se redeunt, quia validior idea priorem denique delet. Refert BOERHAAVIUS in propriis prælectionibus historiam hominis, qui firmissime persuasus, se crura habere straminea, numquam se loco movit, metu, ne pondere corporis rumperentur. Frustra amici hunc errorem ipsi eripere conati sunt, nil attactus sui ipsius, nil proprii oculi juverunt, multo minus ratiocinia. Ergo tandem adsentientes misero persuaserunt, ut, quoniam crura haberet adeo subtilia & delicata, illa firmissimis ocreis muniret, atque ita munitis cruribus in carpento rus peteret animi relaxandi causa. Id factum; eo enim munimine fretus, nullum sibi periculum imminere prævidebat. Interea duo larvati homines ab amicis constituuntur, qui in insidiis positi, tamquam latrones, in currum ab altero latere districtis gladiis irruerent, altero latere libero relicto. Ille ubi ex improvviso, quos putabat, latrones hac ex parte irruentes conspexit, oblitus per terrorem crurum stramineorum, celerrime ex altera parte currus desiliit, & effuso cursu, quantum potuit, profugit. Tum vero ab amicis exceptus agnovit errorem suum, & ex effectu ipso delirium suum intellexit; siquidem facile nunc perspexit ipse, saltu adeo impetuoso, cursuque adeo effræni centies rumpenda sibi crura fuisse, si fuissent straminea. Alius, ceterum doctissimus homo, nolebat urinam mittere, metu, ne totam urbem inundaret. Irrita sunt consilia omnia. Negat sibi licere facinus adeo horrendum. Ergo subito excitatur in domo tumultus ingens, currunt ad ipsum delegati, ejulant, clamant, incendium ingens per urbem graf-

fari, nullam opem humanam huic extinguendo sufficere, domos omnes pabulum ignis futuras. Ille misericordia commotus, jamque se officio teneri reputans, ut ruinæ imminenti succurreret, mox sine hæsitatione urinam mittit. Tum vero, ut vidit quantitatem ejus adeo exiguam, quæ ne quidem matulam implevit, facile convictus fuit, non utique ab hoc nilo inundationem urbium agrorumque timendam. Similes historias plures hinc inde reperies, quas recensere non vacat.

Tertio : Cur ceteris paribus sensus externi internique vigent, cessante motu muscolari ? Si inter ambulandum, cum sodali tuo colloquens, illi quæstionem moveas quamcumque difficilem, ad quam non illico respondere possit, primum statim videbis illum ab ambulando desistere, gressum figere, & in propositam difficultatem speculari. Hoc nobis commune est. Videtur autem anima eo in casu omnes alias actiones seponere, ut minus occupata, minus distracta, id unum, quod nunc illi objectum fuit, accuratius expendat. Hinc mox motum voluntarium musculorum sistit, cum duabus actionibus simul non æque distincte vacare possit.

Quarto : Attentus, reminiscens &c. quare sopit sensus externos ? Non potest anima eodem tempore duas ideas distincte percipere; dum ergo vel distinctam ideam quærimus, vel imaginem rei absentis distinctam nobis repræsentare volumus, omnes aliæ ideæ & imagines rerum excludendæ sunt, ut anima, unicum id, quod quærit, seorsim percipiat, & ex omni parte perpendat. Id vero optime fit, dum sensus externi sopiuntur, ut objectorum externorum impressiones in sensorium commune evitentur. Hinc cubilia a strepitu vulgi remota studiis opportuna; hinc nocturnum silentium adeo musis amicum, etsi tem-

pus matutinum passim præferri solet, ob majorem sensuum alacritatem.

Et undenam his anaesthesia ? Quo magis quis profundis meditationibus deditus est, eo minus recipit impressiones objectorum externorum, & fere obliviscitur rerum extra se positarum. Hæc anaesthesia est, viris profundi ingenii familiaris. Nempe in his, cum plurimam vitæ partem in meditationibus terant, abstracti a rerum externarum impressionibus, tandem hæc animæ facultas pene in consuetudinem abit, ut etiam in mensa, in convivio, in cætu amicorum, ejusmodi homines, taciturni, meditabundi, & subinde inscii colloquiorum, quibus interfunt, reperiantur. ARCHIMEDES adeo meditationibus erat abreptus, ut ne quidem tumultum expugnatae urbis audiret, & militi Romano stricto ense irruenti præciperet, ne circulos suos turbaret.

Quinto ; Unde tanta debilitas in corpore, ubi sensus interni valide & diu exercentur ? Causa hujus phænomeni non est in dispendio spirituum, cum meditabundi minus perspirent observante SANCTORIO, cumque ceteræ in his actiones corporeæ fere omnes sileant, & ipsa circulatio paucior sit. Et tamen a profunda meditatione, eaque diu protracta & familiari reddita, corpus totum debilitatur, muscoli suo vigore privantur, omnium maxime vero labefactatur ventriculus. Causam phænomeni hujus Clarissimi Viri hanc reddunt, quod spiritus nimis diu in sensorio communi retineantur, & veluti suspendantur, dum mens cogitando ideas illi imprimit, & impressas servat ; hinc suspendi ceteras actiones corporeas (KAW *imp. fac.* p. 314. 315. & BOERHAAVE in *prælect.*) Verum neque hæc ratio penitus mihi satisfacit. Cum enim supersint spiritus, non video, cur necessario tanta debilitas corporis sequatur. An forte vis muscularis elan-

guescit, dum liquidi nervei influxus suspenditur? Ita videtur ex principiis alibi dictis concludi posse, & ex contrario phænomeno, quo constat, vim musculorum per exercitium corporis frequentius, perque labores validos, insigniter augeri. Et passim ratio reciproca obtinet, ut cum valido robore corporis vis ingenii judiciiue, & sensuum internorum vividitas minor conjuncta sit.

Sexto : Qua autem ratione variata sæpe objectata adeo exhilarant? Studium severum per aliquot horas protractum etiam hominem assuetum non parum fatigat, & denique in fastidium cedit. Studium vero variatum, interpolatis rebus minus severis, exhilarat, & diu protrahi potest sine insigni molestia. Si continuo eidem studio pertinaciter inhæseris, brevi melancholia erit pedissequa, quam nemo bene novit, nisi expertus. Parum timendum est a studio licet multo, licet diuturno, si crebra variatione interrumpatur. Da horas aliquot studio severiori, cum delassari incipis & fastidium sentis, omitte illud, lege poëtam excellentem, vel historicum, nullum senties laborem, imo vires novas recuperabis, iterumque dein ad severius studium redire poteris; imo poteris ita diem integrum in studio agere sine molestia, dum alias brevior multo tempore deficeres. Porro etiam severius studium, si cum animi affectu grato conjunctum est, minus delassat, omnium vero maxime studium severum, in quod nullo incitamento feraris, vel traharis invitus. Rationes autem horum phænomenorum faciles sunt, & ex prædictis patent.

Septimo : Quare cibi, potus &c. Omnia enim hæc varie sensorium commune mutare possunt, unde & sensuum internorum non eadem semper vis aut integritas est.

Cibi, potus. Homo laute pastus, ad studia multo ineptior est jejuno vel alio, qui frugaliter vixit. Hinc adeo philosophi omnes antiqui frugalem diætam suis inculcarunt discipulis. Vinum modice sumptum acuit ingenium; largius haustum aufert memoriam, ingenium judiciumque hebetat, delirium inducit.

Medicamenta, Venena. Sit homo, qui majorem dosin opii assumpserit, & inde deliret; medicus valido emetico venenum e ventriculo excutiet, eo excusso jam sane ratiocinabitur ille homo. &c.

Quies, motus. Si profunde meditari velis, cessandum est ab omni motu, cogeris residere, aut certe parum efficies.

Aër. Multum admodum huc confert, & plus quam vulgo credatur. Aëre puro, sereno, elastico, ingenium passim acuitur, obtunditur aura levi, nebulosa, & calor, frigus, consuetudo &c. Æstivis caloribus torpemus hebetes, etiam ad leviora studia inepti, ignavi. &c.

Octavo: Quænam est in corpore conditio, unde judicium affirmans vel negans, ratiocinium & methodus, ordinate cogitandi pendet? Multa de judicio disputant philosophi sine judicio. Tota logica non docet artem cogitandi, aut ratiocinandi. Hæc enim in unoquoque homine adest, sive logicam calleat, sive non. Mens hominis etiam imperiti confert ideam circuli cum idea trianguli, & dum alias notiones percipit in idea circuli, alias in idea trianguli, novit circulum a triangulo differre. Ita judicium mentis peractum est. Nec alia re opus est, quam ut singulæ ideæ seorsim examinentur, dein inter se conferantur, ut similitudo harum vel dissimilitudo elucescat. Si plura judicia simplicia inter se nectas, ut alterum ab altero dependeat, ratiocinium est, quod cuilibet homini natura dedit. Ea logica naturalis est. Bene judicamus, bene ratiocina-

mur, dum ideas singulas seorsim lente expendimus, donec habeantur distinctissimæ; id fit attentione mentis sola, nec ullo alio artificio. Inde etiam pendet *methodus ordinate cogitandi*, qualis mathematica est, dum nulla idea prius assumitur, nisi clare distincteque percepta, inde definitio clara ac distincta formatur; ex definitionibus combinationes deducuntur simplicissimæ, illæque severissime examinantur, ut de earum certitudine nullum dubium supersit. Ita nascuntur propositiones fundamentales, a quibus combinationes difficiliores, minus simplices & obscuriores transitus, ea lege, ut hæ posteriores ex prius demonstratis principiis constanter sequantur.

DE VIGILIA.

§. DLXXXVII. DLXXXVIII. DLXXXIX.

DE SOMNO.

§. D X C.

Somnus est ille status corporis viventis animalis, in quo actiones illæ, quæ ab animæ cum corpore commercio pendent, penitus silent, perdurantibus actionibus vitalibus, quæ a sola fabrica & vi corporea pendent. Hinc somnus perfectus, mors animalitatis est, aut certe quies perfecta functionum animalium. Non enim opus erat, ut anima perpetuo ageret in corpore; vitales vero actiones perpetuæ esse debebant; his enim sublati, mors adest perfecta, nisi forsitan adhuc resuscitari possint. Est autem inter ipsum somnum differentia, & alius naturalis, alius morbosus, alius perfectus, vel imperfectus. In somno perfecto omnes silent actiones animæ, adest quies perfecta musculorum omnium voluntariorum, adest perfecta quies sensuum externorum, imo & internorum. Nec dicere li-

cet,

cet, num in ejusmodi somno anima omnino nihil cogitet; certe ex ejusmodi somno resurgentes nihil scimus, quid interea temporis aut extra nos, aut intra nostrum corpus actum fuerit. Si tamen animæ vis cogitandi essentialis est, utique etiam in somno perfecto cogitabit, sed unice in vestigiis rerum, sensorio communi interdum impressis, occupabitur, sed sine *apperceptione*, sine conscientia, sine memoria, adeo ut resurgentes ex somno perfecto, nihil eorum sciamus, quæ per somnum cogitavimus. In somno vero imperfecto, plurimæ quidem actiones animales quiescunt & silent, aliquæ tamen harum vigent, tumque imagines rerum quarundam, vel pridie, vel olim perceptarum animæ repræsentantur, & subinde adeo vividæ, ut earum vestigia somnus delere non possit, sed mens perfecte sibi conscia sit harum imaginum & idearum, & somno præterlapso, memoriam harum distinctissimam sæpe retineat. Hæ repræsentationes nocturnæ *insomnia* vocantur, & reipsa deliria sunt, siquidem ideæ illæ non respondent causis externis, sed internæ sensorii communis dispositioni. Imo verò, si repræsentatio in somno admodum vivida sit, etiam motus certi musculorum has repræsentationes subsequuntur; hinc alii in somno loquuntur, alii ingemiscunt, rident, alii dormientes e lecto surgunt, & quædam negotia peragunt; & lascivas ideas actio lasciva etiam in somno sequitur. His in casibus quædam solum animæ actiones vigent, ceteræ silent. Est ergo magna differentia inter somnum perfectum & imperfectum. Sed jam phænomena somni expendenda sunt, quæ hoc paragrapho recensentur, ut ex his causam eruamus, quæ admodum obscura & profunde recondita latet.

Numero 1. 2. 3. 4. Omnium primo incipiunt obtundi sensus omnes externi, homo sentit in
Tom. III. G g

toto corpore gravitatem, languorem, torporem; paulatim sensus magis hebetantur per gradus, primumque visus, viget adhuc aliquamdiu auditus. Ut primum illa inexpugnabilis gravitas adest, fluit statim per omnia membra torpor, muscoli quasi paralytici resolvuntur; cum autem flexores semper prævaleant extensoribus, utpote his validiores, & pondere partium insuper adjuti; hinc corpus collabitur, nec jam se erectum sustinere potest. Incipit autem ille collapsus a superioribus, & omnium primo musculus levator palpebrarum resolvitur; inde orbicularis palpebrarum prævalens, frustra reluctante anima palpebras contrahit, provido naturæ consilio, ne oculi inter dormiendum ab externis injuriis læderentur, si nudi manerent. Ita visus penitus cessat. Paulatim & auditus obdormiscit, jamque sonum in vicinia prolatum & colloquentium amicorum voces non audit somnolentus. Mox resolvuntur muscoli capitis, cervicis, colli; tum caput non amplius sustentatum mutat, procumbit antrorsum maxilla inferior, proprio pondere delabatur, & a superiore abscedit, hiator; resolvuntur & reliqui spinæ dorsi, & totius corporis muscoli, truncus corporis suapte, pondere antrorsum aut in latus proruit, labuntur manus & brachia, &, si quid his comprehensum fuit, nunc inscio elabatur. Interim nullis per externa sensuum organa ad commune sensorium delatis impressionibus, ultimæ adhuc ideæ aliquantulum vigent, sed jam non cohærentes, aut aliæ excitantur a causa interna novæ, etiam dissonæ; eæ solæ nunc animam occupant; inde species delirii, insomnium, a quo in somnum perfectum transitus fit imperceptibilis, quando etiam illæ ideæ a causa interna excitatæ conquiescunt, & anima se ipsam, suasque facultates nunc penitus ignorat.

Numero 5. & 6. Phænomena hæcenus recensita in omni homine obdormiscente deprehenduntur; de iis autem quæ nunc sequuntur, lis est non mediocris. Sanguinis circulationem in somno quidem retardari, ac proinde etiam respirationem, quæ semper certam aliquam, ad velocitatem circulationis in statu naturali, proportionem habet, extra dubium positum est. Pulsus dormientium manifeste tardior, seu lentior est, lentior item respiratio. Et facile intelligitur multas in vigilantibus causas esse, ex quibus velocitas circulationis augeri debet, & quæ in somno placido locum non habent. Ut enim nihil dicam de liberiore spirituum ab encephalo in organa etiam vitalia influxu, certe motus muscularis vim velocitatemque motus circulatorii auget in omni homine; cum nemo utique sit, etiam vitam quam maxime sedentariam agens, qui non aliquot musculos moveat; sola loquela circulationem notabiliter auget; augent eam animi affectus multi, & cibus potusque assumptus, & aliæ circumstantiæ suo loco dictæ. Istiusmodi autem conditiones a somno naturali & placido absunt; unde facile intelligitur, cur circulatio humorum in somno lentior simulque æquabilior sit, cur pulsus & respiratio minus frequentes, æquabiles? Recte etiam dicit BOERHAAVIUS, eum lentorem pulsus gradatim augeri, ut augetur somnus, & ita porro de respiratione. Dixi enim alias naturaliter vespertino tempore pulsuum velocitatem augeri in singulo homine, eundemque hominem febricitare, respectu sui ipsius tempore matutino. Nunc id incrementum pulsuum cum somni initio coincidit; verum sub ipso somni tempore paulatim ita decrescit velocitas pulsuum, ut matutino tempore, dum homo evigilat, iterum eundem numerum pulsuum habeat, quem habuit pridie hoc ipso tempore. Ergo manifestum est pulsuum numerum in somno decrescere.

Si jam talis homo consueto tempore non evigilet, sed ulterius dormiat, & post quatuor aut quinque horas ultra solitam periodum expergefiat, ille numerum pulsuum minorem habebit, quam alias haberet, si maturius & solito tempore evigilasset. Ergo non solum pulsus in somno lentior fit, sed etiam augetur lentor ille pulsuum in ratione somni protracti. Et cum inter pulsuum & respirationem aliqua conspiratio sit, etiam respiratio in ratione somni protracti lentior fit. Verum BOERHAAVIUS addit: pulsuum simul *fortiorem*, respirationem quoque *robustiores*, *profundiores* fieri. Id non satis respondet experientiae. Quin contra in principio somni pulsus validior decrescit continuo in ratione somni protracti, ut quidem pulsus celeritas. Et respiratio initio somni profundior & robustior diu protracto somno adeo placida est, ut vix advertatur. Animalia, quæ somnum dormiunt longissimum (sunt enim aliqua, quæ totam hyemem dormiunt) nullum omnino vitæ signum dant; adeo in illis motus humorum circulatorius & respiratio conticescunt, donec vernus calor ea quasi a morte resuscitet. Somnus est, qui organa etiam vitalia paulatim sopit in his animantibus; non ergo a somno augentur vitales actiones, non pulsus, non respiratio increfcit robore, in ratione somni protracti, quin plane contrarium fit. Ne vero putes id animantibus proprium esse; est enim & in hominibus deprehensum, qui somno nimio & immoderato indulgent. Adhæc homo dormiens pallet, saltem magis, quam vigilans, & certis observatis etiam minus calet, nisi stragulis contactus dormiat; verum pallor ille somno superveniens & diminutio caloris, quæ pro ratione somni augentur, cum aucto robore pulsus & respirationis conciliari non possunt. Denique & tot alii stimuli accessorii, qui vim circulationis augent per vigi-

lias, in somno naturali penitus absunt. Ergo ex omni parte sententia BOERHAAVII cadit. Bene vero advertendum est, nos hic de somno naturali solummodo agere; in somno morbofo, aut in somno etiam naturali, morbis aliis conjuncto, nihil repugnat, actiones animales consopiri, motum vero cordis a stimulo morbofo etiam somni tempore fortiozem excitari, ut fit in apoplexia calida & variis ejus speciebus; quod exemplum in sui defensionem attulit BOERHAAVIUS, sed inde numquam sequitur, id augmentum virium vitalium ab ipso somno nasci. Imo & in somno naturali fieri subinde potest, ut motus circulatorius & respirationis, pro tempore robore incrementum, si talis causa in somno adest, qualis etiam in vigilia circulationem augeret, e. g. si quis laute pastus dormiat, aut si quis ex multo vino in somnum prolabatur. Tunc vero augmentum circulationis & robur pulsus ac respirationis auctum non debet pro effectu ipsius somni haberi, nec inter phaenomena somni constantia recenseri. Ex eodem capite deduco illud augmentum pulsus, quod BOERHAAVIUS in pueris dormientibus facile observari, ait; nempe pueri tenelli, infantes, voracissimi sunt, & plus quam saturi continuo obdormiscunt; cibus itaque, & ex pastu largior chylus, est, qui in his circulationis vim adauget, non somnus. Dictum etiam alibi est, in somno perspirationem minorem esse, maxime si vestibus suis solum, nullis vero coopertus stragulis obdormiat homo; & minorem esse perspirationem in somno placido, quam in vigiliis interrupto, & inquieto, a quo corpus reipsa levius fit, observante contra SANCATORIUM Cel. DE GORTER. Verum perspiratio somni tempore minor iterum conciliari non potest cum augmento virium vitalium; in somno diu protracto plane cessat perspiratio; quomodo hoc, si pulsus constanter robore augetur in ratione

somni protracti? Imo vero & aliæ secretiones minuuntur, somni tempore, minuitur certe urinæ secretio, minuitur secretio salivæ, quod omnibus notum. Et non vitales solum motus, sed & naturales, imminuuntur, exemplo motus peristaltici intestinorum, quem in somno multo debiliorem esse vel inde conjicias, quod fæces somni tempore in intestinis accumuluntur, nec nisi rarissime ad excretionem rectum stimulent; etiam diarrhœæ admodum profusæ, in quibus peristalticus motus valde adauctus est, per somnum conticescunt. Ex omnibus hisce satis patet, motuum vitalium ut & naturalium in somno augmentum, nequaquam experientiæ respondere, nec esse in phænomenis & si subinde cum pulsu fortiore, & respiratione magis profunda, validiore, somnus conjunctus sit, hosce effectus non ab ipso somno, sed aliunde pendere. BOERHAAVIUM autem hypothesis abripuit, ut contrarium scriberet. Nempe somnum a sola cerebri affectione repetiit, quum cerebrum solis animalibus functionibus crediderit præesse; somni tempore ergo fluxum spirituum per fibrillas medullæ cerebri interceptum esse; cordis vero & vitalium actionum fontem a cerebello scaturire, quumque vitales actiones in somno perdurent, fluxum spirituum per fibrillas medullæ cerebelli semper liberum esse, conclusit; neque in hoc substitit, sed cum somni tempore spirituum in cerebro secretio imminuta sit, aliis vero secretionibus imminutis, aliæ vicinæ augeri soleant sæpe, hinc etiam nunc per medullam cerebelli plus spirituum, quam in vigiliis & libera cerebri medulla, secerni existimavit, adeoque plus spirituum nunc ad organa vitalia deferri, & hinc vitalium actionum robur augeri. Sed ea cerebri & cerebelli partita officia dudum alibi ostendimus non respondere phænomenis, & ex imaginatione ficta esse.

Numero 7. Itaque omnia, quæ ex his duobus fiunt, perfectius exercentur &c. Quæ hoc numero recensentur, non ad phænomena somni pertinent, sed ejus effecta sunt, de quibus posthac melius agetur. Et alioquin aliqua, minus vera, confectaria hic immista sunt, de perspiratione uberiore, ut de motu humorum per vasa majora celeriore, quæ ex principio antea dicto fallaci fluunt, quæque illo subverso sponte ruunt, & refutatione jam non indigent. Reliqua seorsim expenduntur, necesse enim est causas somni novisse, antequam de effectibus agatur.

Numero 8. Plerumque evigilamus excitati sensu aliquo ab objectis externis percepto, strepitu, sono exaudito, aut percepta molestia decubitus ex parte nimis compressa, cui incumbimus, aut percepto stimulo excrementi, quod rarius, subinde etiam post insomnium vividius, & cum vehementi animi motu conjunctum. Num quis sua sponte excitetur, dubitari potest; etsi enim ita prima fronte appareat, re tamen accuratius perpenſa, omnino aliquam mutationem in nostro corpore factam esse advertemus, quæ nos excitavit. Nempe etiam levissima impressio sufficit, ut evigilemus, dum per somnum ita jam reſecti sunt nervi, ut functionibus suis denuo præesse possint. Qui statutum certumque somni tempus observant, illi etiam passim determinato tempore evigilant. In his enim & determinato tempore nervi reficiuntur, ut post certam periodum ea his sensibilitas redeat, quæ requiritur etiam ad stimulum exiguum percipiendum, eoque percepto somnus evanescit. Quo plus vero dormitur, eo magis augetur somnolentia, ut jam multo difficilior vincatur, & denique etiam nimius somni abusus in lethargum transeat. Si consuetum somni tempus absolveris, & evigilans denuo obdormiveris, jam multo difficilior excitaberis, difficilior lectum re-

linques, minusque aptus eris ad functiones sensuum & animæ exercendas. BOERHAAVIUS novit „ medicinæ doctorem, satis eruditum, qui „ mirabilem voluptatem in somno quærebat; recepit se in locum silentem & obscurum, & „ dormiit ita pene perpetuo, ut destructa animalitate, fatuus in nosodochio perierit. „ Nempe certus tantummodo somni gradus est, qui spiritus reparat, ultra eum gradum protractus somnus, vitales actiones continuo magis magisque diminuit, cordis & arteriarum contractiones continuo fiunt non lentiores modo, sed etiam debiliores. Ita demum humores per vascula extrema minus minusque propelluntur, ex attractione mutua particularum lentescunt, cordis motu interim magis diminuto, denique fere stagnant. Id fit perinde in vasculis cerebri, ut aliis omnibus; hinc ineptitudo ad sensus & motus eo major, quo diutius præter modum somnus protrahitur. Mensura autem somni naturalis & proficui determinari debet ex vigiliis & laboribus prægressis, unde regulæ vulgo receptæ, quibus certum tempus, 5, 6, aut 7 horas somno præfigunt, nullius frugis sunt. Qui prægressa nocte justo minus dormivit, illum altera nocte plus dormire, & æquum est, & naturæ debitum. Qui alias quietus hodie validos labores toleravit, ille quidem non satis reficietur, nisi subsequentem noctem somno longiore protrahat. Ergo non quinque horas dormisse sat est juvenique senique.

Numero 9. Convellitur. Quando ex improvviso expergescimus, aut excitamur, convellimur per momentum. Id fit, quia nunc motu in sensorio communi resuscitato, continuo spiritus animales per nervos in musculos influunt, & majore quidem impetu, quam tempore somni. Ergo necesse est aliquam in musculis agitationem, ali-

quem motum produci, & hos aliquantulum concuti, donec anima penitus sui compos & sibi reddita pristinum in musculos imperium resumat.

Palpebras aperit. Eodem fere ordine, ut primo pars quæque sopita est, ita expergescit. Primo fere somni tempore palpebræ clauduntur, & visus perit; primo tempore vigiliarum aperiuntur palpebræ, redit visus. Auditus tardius somno vincitur, sed etiam aliquanto tardius evigilat. Excitat me famulus & me alloquitur, continuo diduco palpebras & video, quid sit, audio etiam loquentem, sed nondum satis distincte verba percipio, iterum interrogo, ut intelligam, quid velit.

Expandit membra, oscitat, dormiturit. Jam restitutis sensibus adhuc in musculis quidam torpor est. Nempe quia per somnum circulatio humorum diminuitur, & humores in vasculis minoribus lateralibus accumulatur; hinc fibræ musculares minus ad agendum aptæ sunt; homo plethoricus certe ex eadem ratione torporem percipit in musculis, quem superare nequit, nisi dempto sanguine superfluo. Verum ille torpor, qui post somnum adest, facile superatur *pandiculatione*, quæ motus automatici species est. Omnes nimirum musculos successive & lente extendimus; hoc motu humores superflui in vasis musculorum accumulati, propelluntur in vasa majora, atque ita muscoli onere hoc liberantur, suamque recuperant agilitatem. Similis automaticus motus oscitatio est, dum os lato hiatus diducimus, magnumque aëris volumen adducimus & lente inspiramus. Ita pulmo expeditur, & humores per somnum in hoc viscere nimis congesti ad cor sinistrum propelluntur. Ita demum omnes functiones redeunt, quales pridie fuerant.

§. D X C I.

Primo : Cibi solidioris &c. Videmus passim post largiorem pastum homines non modo, sed & animantia obdormiscere. Jejunus vix dormiet, nisi ex alia causa somnus accesserit. Iterum quo tenacior & difficilius subigendus cibus ingestus fuerit, eo citius, eoque profundior somnus superveniet. Rationem hujus phaenomeni reddiderunt aliqui, ex compressa a ventriculo tumente aorta, quo fiat, ut minor sanguinis quantitas nunc per truncum aortae inferiorem deferatur, major ad cerebrum veniat, atque ita illud opprimat, ut fluxus spirituum per fibrillas medullares cerebri intercipiatur. Verum non posse a tumente ventriculo aortam comprimi alio loco dictum est. Alii, quos inter Celeberr. HALLERUS, „a stimulo ciborum, & sapiente naturae „instituto, plus sanguinis & spirituum, dum fer- „vet digestio, ad abdomen mitti statuunt, ut „facta quasi revulsione, secretio spirituum in ce- „rebro deficiat, *Comment. in BOERH. instit. med. not. 1.* Verum & hæc sententia suis premitur difficultatibus. Etsi enim aliquam revulsionem fieri admittam a stimulo ciborum, non tamen tantam fieri intelligo, ut inde materies spirituum in encephalo deficiat. Et si tanta fieret, non intelligo, cur non semper post largiorem pastum somnus necessario sequatur. Quin contra ventriculo cibus largius impleto, & ejusmodi præcipue cibus, qui duræ concoctionis in ventriculo diutius manent, sanguis potius in encephalo accumulatur, non quia aorta comprimitur, sed quia diaphragma nunc minus in abdomen descendere potest, pulmo ergo minus explicatur, sanguis per hoc viscus difficilius trajicitur, hinc neque cor dextrum, neque venæ jugulares adeo libere se evacuare possunt; hinc necesse est sanguinem in capite & in encephalo magis accumulari, quod ipsum rubor faciei in

ejusmodi casu docet. Posset ergo somni a cibo largiore & solidiore oriundi causa omnino repeti a majore sanguinis copia in vasculis cerebrialibus accumulata, qua vascula hæc solito magis expansa, fibrillas nerveas premant sic, ut liquidum nerveum nunc minore copia fecernatur, quam quæ ad exercendas sensuum & motuum functiones requiritur. Plethorici certe non ex alia causa somnolenti sunt. Accedit alia ratio, quod multum repleto ventriculo & intestinis, dum distentum turget abdomen, omnino, si etiam aorta nihil patiatur, tamen aortæ ramificationes abdominales comprimantur, & diametris minuantur, adeoque & sanguinis quantitatem minorem admittant, unde iterum plus in encephalo sanguinem accumulari necesse est. Denique si ex nimis repleto ventriculo ob dictas rationes apoplexia oriri potest, uti reipsa non rarissime oritur, non video cur ex iisdem rationibus somnus repeti non possit, qui cibum largiorem subsequitur? Apoplexia enim somnus est profundissimus. Quæ autem causa sufficit majori effectui producendo, eadem & minori effectui producendo par censerī debet, nec est cur ad causas obscuras confugiamus.

Secundo : A potu copioso liquoris vegetabilis, fermentati &c. Constat experientia, potus spirituosos fermentatos, vinum, spiritum vini, frumenti &c. largius haustos ebrietatem & somnum inducere, majore etiam copia apoplexiam veram. Notum est, spiritum illum inflammabilem, qui fermentatis liquoribus inest, a minimo calore admodum expandi, quæ etiam ratio est, cur ad thermometra adhibeatur alcohol vini. Dum ergo largiore copia ejusmodi potus assumuntur, admixti nostris humoribus ab horum calore rarefiunt & expanduntur, totumque liquidorum nostrorum volumen augent, etsi sinceri non admiscantur. Sed præterea ejusmodi liquida spirituosæ

admodum vehementer stimulant, actionem cordis & arteriarum incitant, augent; hinc pulsus frequentior simul & fortior, & major; sed inde etiam attritus major, & major perinde calor oritur, calore vero majore massa humorum nostrorum magis expanditur; ergo vasa ipsa nunc magis dilatantur, idque ut ubique in toto corpore, ita etiam in cerebro contingit. Dilatatis ergo ab expanso sanguine vasculis cerebralibus, medulla cerebri sic premitur, ut minor nunc per eam spirituum copia fluere possit, quam quæ ad functiones sensuum & motuum animalium exercendas requiritur; inde somnus, si vascula cerebralia magis dilatarentur, aut etiam rumperentur, ut sanguis effusus medullam penitus comprimat, apoplexia foret, & somnus lethalis.

Tertio : Ab aromatibus penetrantibus, fragrantissimis, croco &c. Hæc solo odoratu temulentiam & soporem inducunt, perinde ut intus assumpta. Qui majore copia crocum assumpserit, temulentus fiet, & ebrio similis, & somnolentus denique. Facile hoc in casu ratio redditur, cum perinde agant, ut spirituosius fermentati liquores, & aucto calore massam humorum rarefaciant. Verum cur etiam halitu solo stuporem & somnum inducant, id quidem ratione non assequimur, jam in effectu nobis acquiescendum est, quæ enim hinc inde afferuntur rationes, ejusmodi sunt, ut nullo negotio refelli possint.

Quarto : A lacte papaveris, succo cynoglossæ, lactucæ sylvestris &c. Omnia narcotica somnum inducunt, inter quæ principem locum tenet opium, succus nempe papaveris Asiatici, qui de incisuris hujus plantæ capitibus stillat, & calore solis inspissatis, ad nos deferitur, licet etiam ex nostro papavere parari posset. Hoc venenum est, si paulo majori dosi sumatur. Semi-granum ab homine non assueto sumptum, exhilarat, &

miram animi tranquillitatem inducit, gr. I. aut paulo amplius, jam stuporem & somnum inducit, major dosis etiam paralyfin & apoplexiam lethalem. Turcæ & Persæ majorem dosin ferunt ex assuetudine, cum loco vini, opio abutantur; sed eosdem etiam hi ex opii abusu effectus experiuntur, quos nostri ab immoderata vini ingurgitatione. De modo vero, quo opium somnum inducit multum disputatum est; alii solo stimulo agere contenderunt, inter quos princeps est Celeb. TRALLES, alii aliter sentiunt. Id certum est, opium vehementer stimulare, quod vel sapor igneus, linguam exurens, docet; certum etiam est, opium ut vinum agere, cui certe nemo vim stimulandi denegat; certum est, opium calorem corporis naturalem augere, sudorem provocare, & in morbis inflammatoriis gangrænam accelerare; quæ omnia stimuli effectus sunt. Porro animalia, ab opio enecta, vasa cerebri habuerunt sanguine turgida, infarcta, dilatata & varicosa. His argumentis nititur Cel. TRALLES, ut omnem opii actionem unice a vi stimulante, & inde nata sanguinis rarefactione repetendam esse evincat, cui Cl. HALLERUS & alii nostri ævi medici, pene omnes adstipulantur. Verum opium etiam solo halitu soporem inducit, per certa observata; ubinam hic est ille stimulus acer? opium solummodo in ventriculo hærens effectus suos producit, etiam nondum resolutum, nondum in sanguinem resorptum, observante Ill. VAN SWIETEN. Opium etiam vim irritabilem musculorum delet, per certa experimenta, quæ ne HALLERUS quidem ipse negaverit, etsi de corde neget; vinum autem irritabilitatem musculorum non destruit, nec alii stimuli. Hinc mihi opii vis duplex esse videtur, altera quidem vehementer stimulans, altera peculiaris narcotica, stupefaciens, specifica, qua motum liquidi nervei immi-

nuere vel suspendere possit. Inde intelligo, cur adeo parva dosi efficax opium sit, & cur solus etiam halitus opii, stuporem & somnum inducat. Et id quoque de ceteris narcoticis animadvertendum est.

Quinto : A lassitudine ex labore valido, diu sustentato. Labore enim valido diuque protratto dissipatur magna copia liquidi nervei, unde deficiente copia hujus liquidi requisita, quies sensuum & motuum voluntariorum necessario sequi debet. Hinc mirum non est, hominem validis & diu toleratis laboribus exhaustum, etiam inter maximos tumultus & strepitus in somnum prolabi, exemplo militum, qui post aliquot dierum vigiliis & labores continuos non raro visi sunt humi procubuisse, & inter horribiles bombardarum fragores interque belli tonitrua obdormiisse, quin a tanto tumultu excitarentur, donec spiritus viresque recuperassent.

Sexto : A quiete pacatissimæ mentis &c. Pone hominem sanum, pacatissimæ mentis, curis omnibus vacuum, nulli meditationi intentum, nullo affectu agitatam, pone eum in loco silentioso, a quo omnis strepitus absit, & obscuro, ut simul per visum nullas ideas recipiat, aut divertatur, certum est, eum hominem brevi dormitutum, etiam nulla alia causa somni præsentem. Sufficit animam sensu nullo excitari externo, nullo interno affici.

Septimo : Ab excessu æstus, aut frigoris, nimium aucti &c. Ita passim observamus, homines fere omnes per ardores meridianos, sæviente sirio, in somnum proclives esse, multos etiam obdormiscere, omnes certe torpidos, ignavos, & ad corporeos, & ad mentis labores, ineptos esse. Nempe per eum ingentem calorem valde expanditur massa humorum, nec fere spatium in vasis invenit, vasa omnia præter modum dilatantur;

idem fit in cerebralibus vasculis; unde his expansis fibrillæ medullares cerebri premuntur, liquidi nervei fluxus imminuitur; inde somnus. Multum huc temperies & ætas confert. Calidi temperamenti homo ab aëris calore tali jam in somnum rapietur, qui phlegmaticum potius excitabit; seniculi bene se habent diebus æstivis calidis, quos juvenes molestissime ferunt. Ratio ex alibi dictis patet. Sed etiam frigoris excessus somnum inducit, & lethalem quidem, apoplecticum, si nimium, & quiescenti corpori applicatum fuerit. Quotannis talia exempla occurrunt; si homines sub intensissimo gelu in plateis e. g. quieti obdormiscant, somnum dormiunt perpetuum, qui in apoplexiam transit. Ratio hujus phænomeni est, quod frigore intenso solida nostri corporis vehementer constringantur, hinc humores undique a superficie corporis repellantur versus interiora; ita in cerebro accumulatur sanguis, vascula dilatant, medullam comprimunt, spirituum motum intercipiunt; hinc somnus; si vero causa agere pergat eadem, vascula demum cerebralia nimis dilatata rumpuntur, sanguinem effundunt, qui medullam intra cranium comprimunt, nulla jam arte auferendus; hinc apoplexia ex frigore. Unicum remedium, dum quis in frigore somnolentiam sibi obrepere animadvertit, in eo est, ut corpus valide commoveat, quo motu fluida exagitata magis in parietes vasorum agunt, ea fortius percutiunt, magis dilatant, ita nimiam eorundem a frigore constrictionem præcavent; præterquam, quod universum corpus ex ejusmodi motu valide incalescat, atque hac ratione simul frigoris actionem eludat. Verum quies summe perniciofa est, maxime vero seniculis, quibus externa corporis alioquin minus calent; quibus tardior alioquin humorum circulatio, & vis vitalis cordis minor est.

Octavo : Ab omni tali causa , quæ impedit &c.
 Exempla abunde suppetunt.

§. D X C I I.

Impeditur somnus , primo potu aquoso calido &c.
 Potus thée calidus , larga copia assumptus , uti notum est , somnum jam imminentem arcet , & corpus aptum vigiliis reddit. Potus caffèe tenuis , aquosus eundem effectum præstat. Nempe ejusmodi potus calidi aquosi sanguinem diluunt , & materiem restitunt , ex qua liquidum tenue nerveum facile restitui possit. Hinc non raro ad impediendum somnum in magnis negotiis ejusmodi potu largo assumpto somnum arcemus. Id semel iterumque tentari potest , at cavendum est a crebriore usu , ne vis naturæ inferatur , & consuetudine inducta corpus demum somno fere privetur.

Secundo : Nervorum cerebroforum vellicatione acri qualibet. Quamdiu spirituum agitatio vehementior in sensorio communi obtinet , somnus locum non habet. Hinc etsi aliæ omnes ad somnum requisitæ conditiones adsint , sola vehemens nervorum affectio somnum impedit. Hinc nullus somnus , sed perpetuæ vigiliæ in morbis cum valido dolore conjunctis. Hinc ægros somno morbooso correptos excitare conamur acribus , vesicam cientibus emplastris , cuti applicatis ; aut fortibus odoramentis , aut sternutatoriis acribus &c. quibus omnibus nil aliud , quam motus vehemens nervis imprimitur , qui si ad sensorium commune deferatur , animam sopitam excitat.

Tertio : Forti animi affectu , nec refert , qualis sit , modo sit satis vehemens. Gratum tibi hoc die quid accidit , ex quo magnam lætitiā percepisti ; diu hæc idea menti inhærebit , & multam partem noctis somno furabitur. Recordaris injuriæ tibi illatæ ; multas horas in eo affectu consumes ,

consumes, alias jam dudum dormiturus. Speras aliquid te obtenturum magna cum verisimilitudine, ea spes diu quietem interrumpet. Jam dormis, venit, qui te excitet, qui nunciet, proximam domum ardere, periculum in mora summum esse. Illico perterritus, lecto exsilies, teque & res tuas, dum licet, salvabis, omnis jam somni expers, quo prius adeo profunde vinctus tenebaris. Nempe vehementes ideæ cum vehemente spirituum motu conjunctæ sunt, is autem cum vigiliis. Tristitia tamen præ aliis affectibus minus somnum interrumpit, imo vero non raro in somnum transit, dum aliquo tempore perduravit. Nam in tristitia motus cordis & arteriarum minuitur, respiratio admodum sufflaminatur, ut per intervalla necesse sit, imo pectore suspiria ducere. In tristitia ergo cerebrum, accumulato sanguine, tandem magis magisque premitur, & non advertenti somnus obrepit. Ceterum animi affectibus etiam addere oportet profundas meditationes, quibus anima pertinaciter inhæret, & quæ perinde somnum fugant.

Quarto : Cerebro irritato a causa quacumque externa vel interna. Hinc in inflammatione encephali, seu in phrenitide, vigiliæ perpetuo, donec morbus aut in mortem transeat, aut in abscessum perinde lethalem, aut in sanitatem. *Coma agrypnodes* causas somni & vigiliarum conjunctas habet, in eo morbo ægri somnolenti sunt, sed simul ob præsens continuum cerebri irritamentum, continuo ex somno expergiscunt, cum concussione corporis a terrificis ideis, & mox denuo in somnum inscii relabuntur.

§. D X C I I I.

Non tam copiosum, nec tam fortem. Hoc recte tenendum est, ne somnum naturalem cum mor-
Tom. III. H h

boſo, aut cum aliis cerebri vitiis confundamus. Non enim omnis ſecretio ſpirituum in ſomno ceſſat, nec ita premitur encephalon, ut omnis liquidi nervei per fibrillas medullares tranſitus intercipiatur. Id ſi fiat, apoplexia erit, & paralyſis omnium muſculorum totius corporis. Verum in ſomno naturali muſculi ſolum inertes ſunt, inactivi, relaxati, ſed certo gradu relaxati, non paralytici, aut penitus reſoluti. Ergo in ſomno pergit quidem ſecretio ſpirituum in encephalo, pergit influxus liquidi nervei ſecreti in muſculos & organa ſenſuum, ſed illa ſecretio adeo parca eſt, & influxus ille adeo parvus adeoque debilis, ut ad exercendas motuum & ſenſuum functiones non ſufficiat.

§. D X C I V. D X C V.

12
 Omnium motuum animalium origo eſt a ſenſorio communi, ut alibi eviſum eſt; omnium quoque perceptionem ſedes eſt in ſenſorio communi; ſomnus eſt quies motuum animalium & ſenſuum externorum; igitur in ſomno quies adeſt ſenſorii communis, non perfectiſſima quidem, ſed motus ſpirituum adeo placidus & parvus, qui non ſufficit ad exercendas motuum animalium & ſenſuum functiones. Cauſa proxima ergo ſomni eſt dicta ſenſorii communis diſpoſitio, & quidquid eam diſpoſitionem ſenſorio communi inducere poteſt, id omne cauſæ remotæ vice fungitur. Vidimus autem ex prædictis, omnes eas cauſas tales eſſe, ut vel medullam cerebri aliquanto magis premendo ſecretionem fluxumque ſpirituum imminuant, vel liquidi nervei diſſipatione defectum ſpirituum in encephalo producant. Itaque cauſa ſomni naturalis erit id omne, quod hæc duo vel alterutrum horum producere poteſt. Si quædam ſunt venena, quæ halitu ſuo, forte peculiari modo in liquidum nerveum agunt, ejuſque fluxum ſuspendunt, atque ita ſomnum

inducunt, vel alia nobis incognita ratione, id quidem parum refert, cum ille somnus morbosus sit, de quo hic nulla quæstio est.

§. D X C V I.

Considerandi nunc sunt effectus somni, inter quos primo statim occurrit minor partium solidarum consumptio & detritus. In somno enim quiescunt organa motus voluntarii & sensuum, solæ actiones vitales & naturales permanent; hæ autem æquabiles, minus violentæ, minus celeres exercentur, & continuo decrescunt magis, quo somnus diutius protrahitur. Verum detritus se habet in ratione composita ex impetu humorum circulantium, & superficie vasorum. Cum ergo impetus circulationis in somno minor sit, quam in vigiliis, etiam detritus partium erit minor. Præterea multæ admodum causæ vigiliarum tempore circulationem alioquin vividiores intendunt, & motus musculorum voluntariorum omnino detritum auget. Hæ autem conditiones a somno absunt.

§. D X C V I I.

Sed in somno augetur motus cordis pulmonum arteriarum &c. Hoc falsum esse, jam demonstratum est; hinc, hoc fundamento subverso, etiam corollaria inde deducta ruunt.

Primo : Humor vitalium circuitus validior, æquabilior; validiorem esse repugnat experientiæ. Et si validior esset, non video certe quomodo ea explicare posset BOERHAAVIUS, quæ mox subjungit, & quæ perpetuis observationibus confirmata sunt, nempe : hinc impulsus in vasa lateralia minor quidem & æquabilior, per vasa majora validior & æquabilior; itaque fistulæ laterales sensim replentur, minus trajiciuntur, tandem fere

quiescunt cum collectis suis liquidis &c. Quomodo inquam, impetu humorum in vasis majoribus adaucto, vascula minora & lateralia minorem quam alias impetum recipient? quomodo hoc cum legibus circulationis & arteriarum alibi dictis combinari poterit? Constanter enim video in omnibus phaenomenis, aucto impetu humorum per vasa majora, etiam in minoribus impetum augeri; & constanter video aucto impetu humorum circulationem nullatenus retardari, nec certe in vasis minoribus & lateralibus humores accumulari, & denique stagnare, nisi impedimentum præter naturam adsit. Quomodo porro cum BOERHAAVII opinione conciliari poterit, quod numero 3. hujus paragraphi dicitur: *Partium in solidis cohærentium detritus sensim lenior?* quomodo ab impetu humorum circulantium adaucto, minor detritus repeti poterit, qui constanter crescit pro ratione aucti illius impetus? quomodo denique quod numero 4. dicitur, *secretio ad cutim aucta reliquis imminutis* intelligetur? Aucto impetu humorum circulantium in vasa majora, augetur etiam impetus in vasa minora, & augetur secretio humorum? cur nunc in solis cutaneis vasis augeretur secretio materiae perspirabilis, & cur augeretur eadem impetu humorum in vasculis hisce diminuto, & magis diminuto quam in aliis, minus a corde remotis, dum ex eadem ratione in ceteris omnibus secretionibus minuuntur? sed etiam falsum est, perspirationem in somno majorem esse ea, quæ tempore vigiliarum fit, ut suo loco demonstravi. Et quomodo demum impetu humorum per vasa majora adaucto, *optima refectio perditæ* (numero 5.) explicabitur, dum potius detritum crescere oportet? Quum ergo adeo multa BOERHAAVII opinioni repugnent, amor veri postulat, ut eam deferamus. Missis itaque hisce, veros som-

ni naturalis effectus, eorumque causas breviter exponam. Primo itaque in somno minor fit partium solidarum detritus, quod jam supra ostensum est, inde intelligitur in somno vel ex hac ratione nutritionem melius absolvi, quam tempore vigiliarum. Sed magis adhuc id intelligitur sequentibus consideratis: Nempe in somno circulatio æquabilior est, & minus impetuosæ, quam in vigiliis; vis ergo cordis non adeo valide agit in vascula minora & longius a corde remota; ergo hæc vascula nunc multo minus deteruntur. Sed quia simul vis cordis & articularum diminuta minus valide in vascula minora agit, etiam humores per ea vascula minus velociter trajiciuntur, imo quia vis circulationis diminuitur in ratione somni protracti, etiam trajectus humorum per vascula minora diminuitur in eadem ratione; interim velocitate diminuta vascula hæc, quibus vis exigua est, humores quidem ex vasis majoribus appulsos recipiunt, non tamen in eadem ratione propellunt; ergo humores in extremis vasculis accumuluntur, congeruntur, vascula hæc extenduntur, dilatantur, quod omnia phænomena docent; hinc a somno refurgens faciem tumidulam, palpebras inflatas, musculos torpidos habet. Hinc somnus frequentior aut diutius protractus auget molem corporis, auget obesitatem. Jam porro dum humores in vasculis minoribus accumuluntur, cum multo lentius moveantur, quam tempore vigiliarum, etiam major opportunitas datur succo nutritio, ut interstitia fibrarum subeat; iisdemque adhærescat, dum contra per validiorem & rapidiorem circulationem particulæ succi nutritii, alias elementis solidis adhæsuræ, a torrente validiore succedentis liquidi abripiuntur. Ergo nutritio somni tempore major est, & æquabilior & melior, quam in vigiliis. Hinc patet simul cur somnus diu-

turnus, cujusmodi non rarissima exempla sunt, diu vitam sustineat sine cibo potuque, & cur a contrario per nimias vigilias corpus emacietur, & nutritio in decrementum vertatur.

Alter somni effectus est digestio melior, & assimilatio perfectior. In somno etiam motum peristalticum minui dictum est, ex hoc autem videretur potius sequi digestionem ciborum somni tempore minus bene peragi. Verum omnia simul considerari debent. Motus peristalticus præcipua causa propulsione ingestorum e ventriculo & intestinis, itemque propulsione chyli in vasa lactea. Nunc motu illo per somnum minus frequente & minus vegeto, ingesta multo diutius in ventriculo & intestinis hospitantur, macerantur ergo diutius, perfectius humoribus nostris penetrantur, resolvuntur. Actio quoque diaphragmatis & musculorum abdominalium in somno, placida, & æquabilis & lentior est, ergo chylus vi minore, & lentius in vasa lactea propellitur. Minor ergo intra datum tempus chyli quantitas in sanguinem influit, & ille humoribus inquilinis multo magis & æquabilius permixtus; sed quo minor chyli quantitas in sanguinem influit, quo idem majori humorum inquilinorum copia permixtus est, eo facilius eoque perfectius idem ille chylus actione viscerum & vasorum in humorum inquilinorum indolem permutatur. Ergo & in primis viis & in secundis coctio somni tempore melius & perfectius absolvitur. In vigiliis multæ aliæ causæ se admiscent, quæ variis modis coctionem labefactant, aut perturbant.

Tertius somni effectus est, reparatio liquidi nervi per vigilias prægressas exhausti. Pergit enim in somno utique secretio spirituum, sed multo minor est, & determinato tempore opus habet, donec fibrillæ nervæ iterum eam liquidi co-

piam receperint, quæ ad sensuum & motuum animalium functiones cum constantia quadam exercendas requiritur. Et videtur omnino maxima pars hujus liquidi, somni tempore, ipsis nervis & musculis nutriendis impendi.

§. DXCVIII. DXCIX.

Primo : Cur capite calido, pedibus frigidis &c. Aut a sanguinis majore ad encephalon appulsu, & inde aucta spirituum secretionem, ut multis placet; aut a sensatione vivida frigoris, quæ eo vividior est, quo ceteræ partes magis calent; omnis autem vividior sensatio somnum arcet, dum sensorii communis quietem interturbat; aut ab utraque ratione simul; etsi posterior mihi præplacet.

Secundo : Cur ebrietas & somnus a spirituosiss? Ratio suo loco dicta est, inter causas somni remotas.

Tertio : Unde insomnia? unde motus in somniantibus? Quandocumque a causa interna in somno menti repræsentantur ideæ, easque mens adpercipit, insomnium nascitur, veri delirii species. Quo vividius ideæ hæ menti repræsentantur, eo insomnium distinctius, vividius, fortius est. Ut vero uni ideæ plures aliæ, occasione hujus olim habitæ, sese associare solent in vigiliis, ita idem in somno fit; & si ideæ illæ legitimo nexu sibi succedunt, insomnium habetur ordinatum; inde fit, ut subinde in somno æque distincte & ordinate cogitemus, reminiscamur, ratiocinemur, ac alias in vigiliis soliti fuimus. Dum vero a diversis causis internis diversæ, & dissonæ, nullo nexu cohærentes ideæ excitantur, insomnium nascitur confusum; qualia pleraque sunt. Porro si ideæ hæ in somno excitatæ satis vividæ fortesque sunt; oriuntur etiam determinati in corpore motus, quales alias in vigiliis similes ideas consequuntur. Hinc aliqui in

somno loquuntur, gemunt, suspirant, rident, verberant manibus objectum imaginarium &c. Sed omnium maxima admiratione digni sunt motus somnambulorum. Dari enim ejusmodi homines, res confecta est, & per innumeras historias, quarum auctoribus fides denegari non potest, confirmata. Sunt qui dormientes e lecto surgunt, per tenebras incedunt sine mora, sine errore, variis muniis & difficilibus perfunguntur. Visi sunt, qui pensum integrum dormientes scripserunt; alii scalas descendunt ascenduntque; certum aliquem cubiculi locum petunt, ibi, quod volunt, peragunt, iterumque dormientes in lectum redeunt. Morbosa est hæc cerebri constitutio, & ex insomniis originem habet. Interim facile patet, insomnium ejusmodi cum ideis vividissimis connexum esse debere; nec solum ideam rei agenda, sed & delineationem topographicam cubiculi, jam aliunde noti, vividissime illis repræsentari debere, cum obstacula adeo solerter evitent, neque facile impingant alicubi, & negotia sua accurate peragant. Et tamen, quod mirandum, profundissime dormiunt, & postquam mane evigilarunt, nullius circumstantiæ ejusmodi actionis memoriam habent, quodsi autem in ipsa actione excitentur, etsi non excitantur facile, tum quidem ad se redeunt, & insomnii sui, quod hanc actionem produxit, conscii sunt. Patet hinc posse somnum profundissimum cum ideis validissimis, & cum similibus actionibus conjungi; & posse etiam ejusmodi impressiones vividissimas per somnum gravem subsequentem ita deleri, ut nulla illarum vestigia supersint. Hæc ipsa sibi contraria sensorii communis dispositio vel maxime admirationem nostram movet, ut incredibiles fere videantur historiæ somnambulorum, licet veræ. Ita autem rem se habere, & unice insomnium vividissimum cum somno

profundissimo conjunctum hos motus efficere, paucis exemplis adductis demonstrabo. PETRUS SALIUS DIVERSUS *Lib. de affect. particul. C. XVIII.* mirabiles aliquot historias somnambulorum refert. „Juvenem novit, qui somnians, se propter negotia sua equitaturum esse, e lecto surgens, indutus vestimentis propriis, cothurnisque & calcaribus apposis, super fenestram (nam in tabulato degebat) conscendit, & hinc indeque divaricatis cruribus parietem, perinde ac si equus esset, & voce & calcaribus ad cursum incitabat. Hic ex somno expergefactus tanto horrore correptus est, cogitans se per somnium mortem fere sibi ex precipitio conscivisse, ut me (SALIUM) die sequente consuluerit ad prohibenda hæc insomnia, quæ ipsum ad obeunda vigilantium munia deducebant. Alterum idem auctor citatus curavit, qui cum natura jurgiosus & contentiosus cum aliis foret, ut plurimum somniabat, se cum aliquo manum conserere, indeque surgens e lecto arma capiebat, gladiumque evaginato furiose vibrabat, perindeque ac cum inimico pugnans undique parietes & circumstantia loca percutiebat. „ Nolo plura adferre, quæ apud hunc aliosque auctores legi possunt.

Quarto : Somno posito laudabili &c. cur perspiratio duplo major &c.? Hoc falsum esse demonstratum est. Nam per experimenta Clariss. DE GORTER corpus post somnum placidum plus ponderat, minus post irrequietum, & omnia alia phænomena contrarium docent, ut *cap. de persp.* ostendi.

Quinto : Qui fit ut protractio nimis somno caput grave, sensus hebes &c. quo diutius protrahitur somnus, eo semper magis vis cordis & arteriarum diminuitur, humores lentius propelluntur, in vasculis minoribus accumuluntur, stagnant fe-

re, & ex motu tardiore lentescunt, crassescunt, attrahentibus nunc sese particulis fluidorum, quas antehac motus validior & celerior coire non sivit. Idem fit in cerebri vasculis, perinde ut in aliis omnibus. Et hinc omnia illa phænomena intelliguntur necessario sequi.

Sexto : Undenam protrahitur assiduo somnus vitam diu sustinet, sine cibo & potu? Nempe quia in somno nutritio major est, quam in vigiliis, detritus autem minor, & ille quidem in ea continuo ratione magis imminuitur, in qua ratione somnus augetur seu protrahitur. Dumque adeo in somno, assiduo protrahito, solida vix deteruntur ob circulationem placidam & lentissimam ac debilissimam, etiam cibo potuque opus non est. Ceterum historiæ extant hominum, qui per plurimos dies, per septimanas, & menses, sine cibo potuque somnolenti vitam transegerunt. De animalibus quibusdam res nota est.

Septimo : Quamobrem a somno bono expansio musculorum omnium, oscitatio &c. Ratio dicta est alibi.

Octavo : Quo effectu foetus semper &c.? somnus ex ante dictis vel maxime refectioni destinatur a natura, eoque præsentē optima fit nutritio. Hinc intelligimus, quare foetus in utero matris adeo velox & adeo magnum incrementum capiat. Hic enim toto novem mensium spatio dormit; nam certe ideas foetui nullas esse, nisi tactiles forte excipias, inde patet, quod per cetera sensuum organa nullas impressiones accipiat. Quinto mense, aut serius, interdum motum aliquem foetus in utero matris percipiunt; eo in casu vigilem posses suspicari foetum; & tamen nulla ratio est, cur vigilet, motusque illos etiam in somno peragere potest. Pueri minus, quam foetus, sed magis quam adolescentes dormiunt; sed & pueri plus nutriuntur ado-

lescentibus, minus foetu. Iterum adolescentes plus viris dormiunt; & plus etiam incrementi capiunt.

Nono : Et cui bono resurgentes ex morbis validissimis dormiunt longe magis &c. Dum homo gravi morbo conflictatus convalescere incipit, sentit primo lassitudinem a morbo inductam, sentit virium defectum, ex prægressis vigiliis, ex evacuationibus humorum, detritu partium solidarum natum; hæc ratio est cur convalescentes longe magis dormiant, quam ubi perfectam valetudinem adepti sunt. Hoc ipso vero longiore somno, satis cito vires amissas & pristinum corporis habitum recuperant.

§. D C.

Ratio cur somni tempore vitales actiones persistant, unice pendet a stimulo & influxu sanguinis venosi in cava cordis, qui ab encephalo non pendet, nec animæ imperio subjectus est. BOERHAAVII speculationes nullius frugis, dudum a nobis refutatae sunt. Nullam prærogativam habet cerebellum, nec *solidius* est cerebro, imo vero mollius, unde argumentum contra BOERHAAVIUM inverti potest. *Ventriculos cerebri* ad somnum quid conferre mera hypothesis est, nullo nixa fundamento; sed & quartus ventriculus medullæ cerebri & cerebelli communis est; nil ergo boni lucratur BOERHAAVIUS etiam transmissa hypothesis. *Nervos cardiacos* a cerebello originem habere, non ex anatome scriptum est, non ex libro naturæ. *Arteriæ coronariæ* ad motum cordis nihil conferunt, ut alibi ostendi, nec oppositas habent systoles & diastoles vices. Spiritus autem cerebelli *crassiores* esse spiritibus cerebri, crassa speculatio est.

§. D C L

Hanc materiem breviter absolvam, tum quia temporis angustia vela contrahere præcipit, tum quia multa, quæ ad respirationem pertinent, jam in *Cap. de act. Pulmonis* pertractavi. Neque adeo difficilis est hæc materies, præcipue illis, qui physicis principiis recte imbuti. Duæ solummodo difficultates occurrent, quæ hætenus physiologos omnes divexarunt, & quas neque ego enodare ausim: nimirum quæ sit causa primæ inspirationis, dum foetus in lucem editur, tum quæ ratio sit, cur alternæ inspirationis & expirationis vices continuo pergant etiam nobis non advertentibus, etiam citra conscientiam animæ in somno & apoplexia? Has quæstiones suo loco attingemus. Nunc interim notare oportet, respirationem ex BOERHAAVII & omnium fere physiologorum sententia bifariam dividi, in *voluntariam* & *vitalem*. Vitalem respirationem vocant, quæ citra animæ voluntatem peragitur, quæ perpetuo pergit etiam in somno, dum ne sui quidem conscia est anima; voluntariam autem vocant, quæ ab animæ imperio pendet. Possumus enim per voluntatem respirationem augere, minuere, accelerare, retardare, pro tempore suppressere. Hinc respiratio mixta actio est ex vitali & animali. Nunc quidem Clariss. HALLERUS hanc distinctionem sustulit, & omnem respirationem mere voluntariam esse contendit, etiamque in somno & in apoplexia e sensu anxietatis ab anima percepto, respirationem superstitem pendere credit. Non potest hic loci ea quæstio dirimi; videbimus infra, quid vero propius sit. Alio sensu Clar. SCHREIBER respirationem vitalem pro motu pulmonum accepit, qui a solo sanguinis in pulmonem influxu pendeat, & qui ab experimento sequente innotuit. Nempe „ si ex animali recens mac-

„tato partibus adhuc flexilibus, pulmonem utrum-
 „que integrum cum aspera arteria & larynge &
 „corde eximas; si porro sectæ arteriæ pulmonali
 „immittatur aqua tepida, & adducto propulso-
 „que embolo, pulmones per vices agantur, uti
 „fit in respiratione, tunc glottidi appensus lanæ
 „anserinæ flocculus, modo nutare, modo hauri-
 „ri, modo repelli, omnibus pulmonum motibus
 „obsequi videtur.„ Inde concludit Vir Clariss.
 pulmones aliquo exiguo motu agitari a sanguine
 per arteriam pulmonalem, vi cordis dextri alter-
 natim influente, & hunc motum pulmonum se-
 qui aliquam aëris adductionem, vel repulsionem.
 Atque hanc ipse respirationem vitalem appellat
 (*Almagest.* p. 316. L. v. §. 87.) Verum etsi hæc
 ita se habeant in pulmonibus e corpore exemp-
 tis, tamen iisdem in thorace locatis, & in omni
 ambitu ubique thoraci ossæo exactissime applica-
 tis, hic motus locum non videtur habere, nec
 certe videtur id posse efficere, ut costæ ex situ
 suo dimoveantur, totusque thorax ossæus dilate-
 tur. Et si aliquantulum posset, id ipsum foret in-
 sensibile, dum tamen respiratio vitalis, quæ in
 somno pergit, valde sensibilis & manifesta est.
 Non multum ergo tribuo sanguinis in arteriam
 pulmonalem influxui ad ciendam respirationem
 vitalem, & nihil omnino ad ciendam respiratio-
 nem sensibilem.

§. DCII. DCIII. DCIV. DCV.

In homine vivente sano, in animali vivo & sa-
 no, pulmones in thorace multo majus volumen
 occupant, quam e thorace exempti & aëri ex-
 terno expositi. Imo etiam in cadavere, nisi ex
 morbo pulmonali mors secuta fuerit, majus pul-
 monum volumen est, quam sit, dum ex cada-
 vere eximuntur, licet is status pulmonis, qua-
 lis in cadavere est, sit status perfectissimæ &
 maximæ expirationis. Nempe cum inter pulmo-
 nem & pleuram nihil intercedat, necessario aër

cavum pulmonis inhabitans hoc viscus ita expansum servat, ut exactissime semper omnem pleurae superficiem internam expleat. Dum autem musculis intercostalibus rescissis, ipsa thoracem succingens pleura perfoditur, ut aëri externo in cavum thoracis aditus pateat, mox inter aërem hunc extrinsecus illapsum & eum, qui cavos pulmones inhabitat, æquilibrium restituitur, & pulmones in exiguum volumen collabuntur. Sic collapsi pulmones; inflato per glottidem aëre, si distendantur denuo ad eam magnitudinem, quam in thorace integro habuerunt, imo & ad majus volumen expansi, tamen cessante aëris impulsu, sponte denuo se contrahunt, vi fibrarum mesenchondriacarum & membranularum elastica, quæ sola nunc in mortuo pulmone superest, & in exiguum denuo volumen redeunt. Si pulmones cum larynge ita adaptes recipienti antliæ pneumaticæ, ut larynx cum aëre externo communicet, tum porro si aërem recipientis, pulmonei incumbentem exhaustas, statim aër externus per laryngem irruens, pulmonem ad crepaturam usque extendet; ut primum vero aëri externo aditum denuo in vas recipiens concedis, mox viscus hoc ex maxima capacitate in exiguum, quam antea habuit, molem collabitur. Ex omnibus his evidens est, pulmones, dum inspirando expanduntur, esse in statu sibi violento, non posse ergo pulmonem vi propria expandi, adeoque nec inspirationem a motu proprio pulmonis repeti posse, cum hic potius vi fibrarum mesenchondriacarum & membranularum suarum perpetuo in contractionem nitatur, & reipsa mox contrahatur, dum æquilibrium aëris externi & interni restituitur. Verum quia status pulmonum, qualis in cadavere est, est status expirationis possibilis maximæ, & quia etiam in hoc statu pulmones majus volumen habent, quam naturaliter in aëre

libero habere soleant, & quia etiam perfosso thorace cadaveris, pulmones statim in minus volumen contrahuntur, etiam hoc evidens est, ne quidem in expiratione, summa pulmones in statu naturali hærere; & licet continuo propria contractilitate in spatium minus se recipere nitantur, licet in expiratione magis ad statum naturalem accedant, quia tamen numquam sua contractilitate pressionem aëris interni superare possunt; nisi hic cum externo ad æquilibrium redigatur, quod quidem neque durante vita, neque in cadavere fit, nisi externo aëri aditus in cavum thoracis aperiatur, hinc pulmones etiam sub expiratione in statu sibi violento hærere, manifestum est. Atque adeo omni tempore respirationis in statu distractionis violentæ sunt. Ergo uti ad inspirationem ciendam pulmo vi propria non concurrat, ita neque exspiratio propria pulmonis actione peragitur. Ergo pulmo unice obsequiosus est pressionem aëris inspirati, & pressionem aliarum potentiarum, quæ receptum aërem, per tracheam denuo expellunt, & viscus hoc expansum, undique in minus volumen coarctant.

§. DCVI. DCVII.

Nullus inter extimam pulmonum & interiorem pleuræ thoracem investientis superficiem aër est; hinc pulmo semper exactissime pleuræ undique applicatur in omni stadio respirationis, imo etiam in cadavere, nisi aut aqua extravasata, aut pus, aut ichor pulmonem a pleura dimoveant, & spatium intermedium expleant. Facile patet eam pulmonis expansionem, quæ etiam in cadavere adest, ut pleuram undique contingat, unice ab aëre pendere, qui cavum pulmonis occupat, & cum externo aëre communicat. Nam cum thoracis capacitas multo major sit volumine pulmonum collapsorum, & e thorace exemptorum, necessario vacuum spatium inter pul-

mones & pleuram intercederet, siquidem pulmones intra thoracem adeo collapsi essent, ut sunt e thorace exempti. Nunc autem impossibile est inane spatium intercedere, quia aër internus, qui cavum pulmonis occupat, & cum tota atmosphæra communicat, nullam resistantiam invenit; hinc pulmonem expansum servat, eumque perfectissime ubique pleuræ applicat, ut omne spatium inter hoc viscus & pleuram exacte deleatur. Aër enim, qui thoraci exterius incumbit, hoc spatium delere non potest, costæ enim vi figuræ suæ arcuatae nihil cedunt pressioni aëris externi; utique & vitrum arcuatum pressionem totius atmosphærae incumbentis sustinet, vitrum planum orificio recipientis antiliæ pneumaticæ applicatum, illico rumpitur, exhausto aëre. Ergo ex his patet, aërem externum costas prementem, nullam vim in ipsum pulmonem exerere posse, hunc itaque neque ad inspirationem, neque ad expirationem quidquam conferre, & quod pulmo omne thoracis cavum perfecte expleat, unice ab aëre interno, qui cavum pulmonis occupat, pendere. Nunc his positis, quandocumque thoracis cavum dilatatur, necesse est ex eadem ratione pulmonem dilatari; aër enim pulmones inhabitans, dum resistantia thoracis ab exteriori pulmonum superficie aufertur, gravitate & elasticitate sua protinus pulmones urget in locum non resistantem, & in tantum hos expandit, in quantum cavum thoracis augetur. Non ergo causa respirationis in aëre hæret, nec aër externus in pulmonem irruit, nisi thorax dilatetur, & pulmo minus, quam antea resistat. Vicissim neque causa expirationis in aëre latet, hoc est, non ipse aër sua vi expirationem perficit, sed ipse, diminuta thoracis capacitatem, diminuto pulmonum volumine cedere cogitur, & per tracheam expellitur. Thorax autem & ampliari & minui potest

potest in omnem dimensionem, secundum longitudinem quidem, dum diaphragma a pulmonis inferiore superficie recedens in cavum abdominis descendit; antrorsum vero & ad latera, dum costæ per suas potentias alibi dicendas, una cum osse sterni elewantur, itidemque a pulmone recedunt, & vicissim. Ea tamen dilatatio, quæ a costis per suos musculos adductis fit, multo minor illa, quæ fit per descensum diaphragmatis, & ita pariter diminutio thoracis, quæ fit per costas in statum suum naturalem restitutas minor est illa, quæ fit per diaphragma a musculis abdominalibus in thoracem repulsum. Hinc apparet præcipuum respirationis organum esse diaphragma & musculos abdominales, deinde musculos intercostales & reliquos, qui thoraci osseo movendo destinantur. Fæminæ tamen thorace liberius respirant, quam viri, quod ob graviditatem factum est, quia tunc, ob uterum in abdomen assurgentem, diaphragma parum descendere potest; hinc thoracem mobiliorem nactæ sunt. Hæc interim de respiratione generatim sufficiant. Quales mutationes pulmoni inducantur, tum ab inspiratione, tum ab expiratione, cum suo loco fuisse dixerim, hic non repetam. Sed nunc revertendum est, & id probandum, quod BOERHAAVIUS in textu adfert, nempe nullum esse inter pulmonum exteriorem & pleuræ interiorem superficiem aërem; id enim hætenus solummodo assumpsi. Et præterea auctoritas contraria Clariss. Virorum postulat, ut sententiam nostram recte stabiliamus. Nam & GALENUS pulmonem a pleura aliquo spatio distare scripsit, & alii idem docuerunt, & recentissimis temporibus Clariss. HAMBERGERUS aërem thoracicum resuscitavit, qui inter pulmonem & pleuram contineretur, quique ab aëre inspirato compressus elatere suo resiliret, & expirationem adjuvaret. Cum-

que Clarissimus HALLERUS eam sententiam refutasset, acerrima inter hos duos viros lis orta est, morte solum HAMBERGERI terminata. Sed & Ill. HALESIUS aërem thoracicum admisit, eumque experimentis suis evictum credidit. Igitur omnia sollicitè expendenda sunt, ut videamus, num verosimilis sit aëris thoracici præsentia, num experimenta contrariæ partis decretoria sint. Et primo quidem pro aëre thoracico facit, quod pulmonis membrana porosa sit, quod aquam omnino transmittat, hinc & aëri videatur patere; deinde quod pulmones etiam inflati ligata quamvis aspera arteria detumescant, & aërem receptum denuo perdant, dimittant per vias insensibiles, atque hinc difficillime siccentur inflati. Hoc argumentum tamen nihil probat; nam si etiam dentur pori & vascula ex cavo aëreo pulmonis in thoracem ducentia, quæ nemo negat, non ideo tamen continuo sequitur, ea vascula aëri elastico naturaliter pervia esse. Jam alio loco demonstratum est, aërem elasticum non subire poros liquido specificè graviore occupatos, idque ex ipsis HAMBERGERI principiis. Deinde si etiam post mortem e thorace exemptus pulmo aërem elasticum transmittit, dum vascula inanita aëri aditum concedunt, non inde sequitur, idem in vita, & statu naturali fieri, dum eadem vascula liquidis aëre gravioribus repleta sunt. Denique si integer pulmo in aqua demergatur, & aër per tracheam infletur, nullæ in aqua excitantur bullulæ, quæ necessario apparerent, si aëri adeo facilis per pulmonem transitus esset. Atque hoc primum est. Adduxerunt etiam exempla avium, in quibus certum est, aërem per poros pulmonum libere penetrare in cellulas his animantibus proprias. Sed neque hoc quidquam ad hominem valet; avibus enim hoc adminiculum natura dedit, ut

multum aërem haurire, atque ita corporis levitatem augere possent, ad volatum necessariam. Homines non volant, neque eam fabricam habent. Sed experimentis etiam fortioribus pugnatum est; & Cel. quidem HALESIUS in junioribus animalibus diversis sequens tentamen instituit. Inciso abdomine diaphragma secuit & detraxit, costas quoque, quantum satis erat, abstulit, ut pulmones nudi in conspectum darentur, sollicitè cavendo, ne vasa pulmonum, aut ipsa visceris substantia læderetur. Tunc rescisso animantis capite asperam arteriam ad siphonem vitreum recurvum alligavit, thoracem animalis cum pulmonibus vasi vitreo aqua repleto imposuit, & in recipiente antliæ pneumaticæ ita locavit, ut crus alterum siphonis extra recipiens protensum cum aëre externo communicaret. His factis aërem recipientis ope emboli exhaustit. Continuo aër per siphonem extrinsecus irruens pulmones inflavit & expandit; imò vero distinctè vidit HALESIUS aëreas bullulas minimas per substantiam pulmonis penetrasse & ad superficiem aquæ ascendisse. Hoc ita factum esse concedi potest, sed factum est in mortuo pulmone, factum est in spatio re ipsa vacuo; cum tamen in statu naturali animantis, dum respirat, re ipsa spatium vacuum non nascatur, sed nasceretur solum, nisi continuo aër pulmonem pleuræ exacte apprimeret. Primum autem hoc ipsum est, ut ablata resistētia aër pulmonem inhabitans expandatur, & pulmonem expandat; neque enim in vacuo etiam, neque in citato HALESI (Veget. Statik's exp. 112.) experimento aër statim per poros pulmonis penetrat, sed omnium primo pulmonem expandit, deinde per expansi pulmonis poros penetravit, cum nihil obsisteret. Verum quia primus effectus aëris, dum inspiramus, expansio pulmonis est, pulmo statim pleuræ applicatur,

& ad illam ita semper apprimitur, ut nihil intercedat; non potest ergo aër inspiratus in cavum thoracis penetrare, cum nullum cavum tale inter pulmones & pleuram adsit, quale in vacuo antliæ est, & cum ipse aër primo suo effectu, qui expansio pulmonis est, tale spatium nasci prohibeat. Aliud HALESII experimentum, *Hæmastatik's* p. m. 79. & argumentum est, quod si animalia perfosso pulmone in vacuo enecentur pulmones sanguine coagulato pleni & infarcti reperiantur, si vero in vacuo simpliciter enecentur thorace non perfosso, nec vulnerato pulmone, viscus hoc album & compressum invenitur; inde deducit, evidenter aërem thoracicum adesse, & ideo integro thorace pulmones albos exsanguies & compressos deprehendi, quia ablato per antliam aëre pulmonico aër thoracicus valde expansus pulmones undique comprimit, perfosso vero pulmone & thorace, simul thoracicus aër exhauritur, vascula ergo pulmonalia tunc non comprimuntur, sed omnino sanguinem recipiunt. Hoc argumentum valde captiosum est, & si plura experimenta consentirent, omnino aëris thoracici existentiam evinceret. Sed cum directa experimenta, ut videbimus, contrarium demonstrent, alia longe hujus diversi phænomeni ratio subest, & genuinam rationem HALLERUS reddidit. Nempe „perfosso thorace vis antliæ „multo potentius in tota superficie non interiore solum, sed & exteriori pulmonibus applicatur, & exhausto aëre recipientis, non solum aër, qui in cavo pulmonis habitat, sed aër etiam sanguinis pulmonalis extricatur & in statum elasticum reducitur. Ille vascula pulmonalia immaniter dilatat, imo etiam disrumpit; tunc vero in dilatata & rupta pulmonum vascula sanguis ex corde dextro admittitur, imo advocatur, & allicitur, & vascula hæc implet, grumofus tamen ille ex frigore lethali. Contra vero thora-

ce illæso, integris vasis pulmonalibus, dum aër pulmonalis aufertur, pulmones non amplius expansi statim in minimam molem collabuntur, vascula complicantur, corrugantur, nec jam sanguinem ullum admittere possunt; hinc eo in casu collapsi pulmones pallent, sanguine vacui, non autem quia aër thoracicus, nullo directo experimento evictus, sed solum ex supposito assumptus, superficiem pulmonum exteriorem comprimit. Sed neque verum semper est experimentum HALESIANUM, & perinde est, sive perfosso, sive non perfosso thorace animal in vacuo enecetur. Etiam non perfosso thorace perinde pulmones sugillatos & extravasato sanguine plenos in suis experimentis invenit HALLERUS, minime pallidos; videturque experimenti diversitas solummodo a diversa quantitate aëris exhausti pendere.

Aliud HALESII experimentum, pariter pro aëre thoracico stabiliendo, ut videtur, faciens, hoc erat: Catelli abdomen per medium dissecuit, capitique pondus grave appendit, & in aquam demersit, tum hoc apparatus in recipiente antliæ constituto, dum aërem recipientis exhaustit, vidit manifeste diaphragma in abdomen descendere, mox vero sursum denuo in pectus repelli, dum aër externus denuo in recipiens admitteretur. Necessario ergo aërem in thorace aesse debere, qui ablato externo aëre diaphragma deprimat. Verum non advertit Vir Illustris, aërem, qui a cavo pulmonis latebat, ablato aëre externo, pulmonem expandisse, & diaphragma depresso, maxime cum caput catelli intra aquam demersum fuerit, quæ aëri pulmonico obsistebat, quominus adeo facile per tracheam erumperet. Etiam hoc phænomenon videbatur aërem thoracicum demonstrare, quod, si acu triquetra vulnus thoraci animalis infligatur, continuo aër cum impetu de pectore profiliat, imo & ipsa per vul-

nus pulmonis substantia prorumpat, per observata Clariss. Virorum HOUSTON, HOADLY, DE BREMOND, HALESI. Sed hoc experimentum valde infidum est; *primo* enim potest in eo tentamine, dum acus triquetra inter costas adigitur, simul ipse pleuræ contiguus pulmo pertundi, & qui per vulnus erupit aër, omnino e cavitate pulmonis, non thoracis, erupisse; *secundo* etiam non læso pulmone potuit aër externus illico, dum vulnus infligebatur, in thoracem irruisse, & dein summo nixus animalis per idem vulnus fuisse propulsus. Nam parva thoracis vulnera non illico respirationem supprimunt, potestque simili in casu animal etsi difficulter & maximo cum molimine spirare. Deinde pulmonis per vulnus prorupcionem ipse HALESIUS non pro effectu aëris thoracici, sed pro effectu sanguinis arteriæ pulmonalis, pulmonem extendentis habuit; quamquam verius ea pulmonis propulsio a diaphragmate pendet, quod nunc aucto molimine respirationis, pulmonem multo validius in thoracem repellit, & aliqua etiam portione per vulnus urget; nam pulmo in ejusmodi casibus solummodo in expiratione animantis prorumpit. Nempe hoc validissimo nixu expirationis & aër thoracem ingressus eliditur, & simul pulmo aërem illum sequens in hiatum vulneris urgetur. Ex omnibus hisce patet, & experimenta, quæ ab auctoribus pro stabilienda aëris thoracici existentia tentata sunt, indirecta esse, & argumenta ab experimentis deducta esse prorsus insufficientia & erronea. A contrario vero Illustr. HALLERUS, alique, directis argumentis & experimentis ostenderunt, nullum omnino in statu naturali thoracicum aërem adesse. Et hanc veritatem BOERHAAVIO recte perspectam demonstrent sequentia:

Primo : Anatome accurata. Nam ubique pulmo pleuræ exacte contiguus est, totumque cavum thoracis perfecte replet. Si in animali quadrupede vivo, vel mortuo, aut etiam in cadavere humano, in quo nullum thoracis vitium morbosum adsit, prudenter & sollicite muscoli intercostales, quacumque in parte thoracis auferantur, non externi solum, sed etiam interni, atque adeo pleura denudetur, cavendo tamen, ne ea vel tantillum lædatur, quod & patientiam magnam & multam in secando peritiam requirit, si hoc inquam fiat in quacumque parte thoracis, constanter per pleuram pulmo contiguus transparet, cærulescente suo colore conspicuus, nullo intervallo remotus, idque etiam diaphragmate denudato. De hac veritate per experimenta ALBINI, HALLERI, MECKELII, SCHREIBERI, certissime constat. Verum si quis in thorace aër containeretur, pulmo certe aliquo intervallo a pleura remotus esset; nec certe figuram cavitatis utriusque pleuræ exactissime exprimeret, uti exprimit. In avibus reipsa pulmo a pleura remotus est, & manifestis foraminibus pertusus, per quæ aër ex trachea in cavum thoracis penetrat, & vicissim ex hoc in tracheam exire potest.

Secundo : Productio & incrementum foetus in utero &c. Aër enim ille thoracicus jam corpori congenitus esse deberet, jamque adeo in foetu inter pulmonem & pleuram reperiretur. Unde autem potuisset foetui advenire ille aër, cum foetus numquam aërem hauserit, humores vero materni, quibus foetus alitur, non aliam, quam fixatum aërem continent? Sed neque in pulmone foetus aër thoracicus reperitur; neque pulmo foetus, ut quidem credi possit, aliquo intervallo a pleura remotus, sed huic ipsi perfecte contiguus est per HALLERI observata.

Tertio : Vulnera in cavum thoracis penetrantia
 &c. Si in cadavere humano pleura follicite inci-
 datur, cavendo ne una pulmo violetur, videbis
 mox pulmonem pleuræ antea contiguum ab ea-
 dem fugere, seque gradatim recipere, & colla-
 bi, spatiumque nasci inter pleuram & pulmo-
 nem, quod prius non adfuit. Alterius lateris
 pulmo similiter collabitur, vulnere in altero tho-
 racis latere inflicto; neque umquam fallit expe-
 rimentum, nisi pulmo præter naturam pleuræ
 adhæserit. Deinde hoc in experimento nullus
 omnino ex thorace prorumpit aër, qui certe
 mox per vulnus prorumperet, si præexisteret in
 thorace. Posset tamen etiam fieri, ut aër ex in-
 ciso cadaveris pectore prorumperet, licet non
 perfosso pulmone, si nimirum pars aliqua pul-
 monis aut pleuræ gangræna fuisset consumpta,
 aut si pus vel ichor in thorace putridus aërem
 elasticum generasset. Si istud experimentum in vi-
 vo animali instituatur, pulmo perinde collabitur,
 & vox perit, aut minuitur saltem, & respiratio
 difficillima fit; & si utraque thoracis cavitas inci-
 ditur, non læso pulmone, idem in utroque pul-
 mone fit, & animal suffocatum perit. Ergo quia
 aër in thoracem admissus adeo respirationi obest,
 eamque supprimit, male certe natura nobis &
 animantibus simili fabrica præditis consuluisse,
 si aërem inter pulmones & pleuram admisisset,
 qui certe tantum dilatationi pulmonum obstitif-
 set, quantum ipse in thorace spatium occuparet.
 Neque objici debet, quod aër in hoc experimen-
 to de thorace quandoque prorumpere visus sit,
 quod etiam pulmo ipse proruperit subinde per
 vulnus. Hujus enim ratio in ipso aëre ingresso
 per vulnus, & secuta valida ac laboriosa exspi-
 ratione latet, ut jam dixi; & necesse esset sem-
 per aërem prorumpere in hoc experimento,
 dum interim rarissime observatum est. Denique
 non rarissimum est, ejusmodi cadavera reperiri,

in quibus pulmones toti undique ad pleuram adherent, ut vi quadam inde separari debeant, quin tamen istiusmodi homines de difficili respiratione conquesti sint, nisi alio vitio pulmonum simul laborarint. Tales casus ipse novi. Ubinam autem hic aër thoracicus? aut ubi ejus necessitas ad respirationem, quam adeo adversarii urgent.

Quarto : Animalis vivi, cui thorax aperitur, intra aquam demersio. Hoc experimentum decretorium est. Animal vivum aquæ imponitur, sic ut aqua thoracem animalis notabili altitudine excedat; hoc facto sub aqua caute muscoli intercostales & pleura inciduntur scalpello, cavendo ne pulmo lædatur. Hoc in casu certum est, inflicto vulnere, aërem externum per vulnus in thoracem penetrare non posse, cum ejus accessum aqua prohibeat, interea tamen aqua, inflicto vulnere, in thoracem penetrabit, & si quis in thorace animalis contineatur naturaliter aër, eum sub forma bullæ expellet. Verum experimento rite instituto ab HALLERO & aliis Clariss. Viris, nulla bulla aërea prorumpit; ergo evidens est, nullum in thorace naturaliter contineri aërem. Excitatum tamen, & contrarium experimentum fuit ab HAMBERGERO paucisque aliis, & aër sub forma bullæ ex aqua prorupisse visus; sed in experimento illo pulmones una cum pleura læsos fuisse certum est, licet de hac re altum silentium tenuerit HAMBERGERUS, imo ne quidem pulmones examinaverit. SCHREIBERUS autem Vir Clariss. accurate adnotavit, aërem solum eo in casu prorumpere dum una cum pleura pulmo perfoditur, tunc enim aqua non solum in cavum thoracis, sed etiam in cavum aëreum pulmonis intrat, & aërem expellit. Illæsis pulmonibus numquam vel minima aëris bulla ex aqua prorupit. Ergo certum est, nullum inter pleuram & thoracem naturaliter aërem

hospitari. Qui ceterum plura hac de lite nosse desiderat, legere poterit HAMBERGERI de respirationis mechanismo dissertationem, una cum scriptis controversis ejusdem & HALLERI collectis editam Ienæ 1748.

§. DCVIII. §. DCIX. & §. DCX.

Inspiratio vitalis, placida, quæ nobis non advertentibus & in vigiliis & in somno non interrupta pergit, solum ope diaphragmatis & musculorum intercostalium peragitur. Diaphragma nimirum ex sua convexitate in planitiem contrahitur, & versus abdomen descendit, & contenta abdomine viscera deorsum antrorsumque urget, musculosque abdominis extendit. Sic vero augetur capacitas utriusque cavi pectoris secundum longitudinem & resistentia aufertur ab inferiore pulmonum superficie diaphragmati contigua; ergo aër in pulmonibus contentus mox elatere suo expanditur & non satis resistentes lobos urget deorsum atque antrorsum, ut septo perfecte contigui maneant, & omne inane spatium præcaveatur. Simul vero hac ratione aër pulmonicus expansus rarior sit aëre externo; ergo ille pro tracheam irruit simul in locum minus resistentem, donec ad eandem cum externo aëre densitatem redactus sit aër pulmonicus. Potissimum autem partes diaphragmatis laterales inspirando descendunt, quæ musculosæ sunt, pars media tendinea a mediastino utcumque retinetur, nec nisi in violenta inspiratione deprimitur, aut certe in inspiratione profundiore, ut jam alibi notavi. Patet autem ex hisce ratio, cur diaphragma situm obliquum habeat, & ab anterioribus versus posteriora descendat. Si enim horizontalem situm haberet, rectaque via in abdomen descenderet, contenta abdominis recta in pelvim osseam resistentem urgerentur, unde nec adeo commode nec adeo profunde diaphragma descendere posset & si nixu adhibito profundius de-

scenderet, contenta abdominis nimis valide comprimerentur. Nunc vero idem oblique deorsum & antrorsum depresso viscera abdominis versus laxos & facile cedentes abdominis musculos urget & respiratio multo commodius peragitur. Altero momento prævalent muscoli abdominales & contracti contenta abdominis contraria directione versus diaphragma urgent, ipsumque diaphragma in thoracem denuo repellunt, quod eo ipso tempore jam sponte relaxatur. Ita repulso intra pectus diaphragmate pulmones quoque repelluntur & in spatium minus compinguntur, diminutoque cavo pulmonali aëris inspirati excessus per tracheam expellitur; hæc exspiratio est. De causis alterni hujus motus hic nondum agimus. Cum diaphragmate conspirant muscoli intercostales, externi & interni, inter singulas costas locati; hi costas inferiores quasque ad superiores trahunt, easque non nihil vertunt ita, ut margines costarum inferiores aliquantum extrorsum ducantur, costæque ipsæ nonnihil sursum trahantur. Verum motus ille costarum exiguus est, in hac tamen exiguitate maximus in arcu maximo costarum, seu in lateribus thoracis, cum is arcus maxime ab hypomochlio costarum articulatarum distet. Cumque adeo exiguus sit hic motus, parva omnino thoracis dilatatio ea est, quam costæ per suos musculos placide elevatae efficiunt. Hinc præcipuum respirationis naturalis organon diaphragma est cum musculis abdominalibus; parum admodum intercostales muscoli conferunt; id quisque in se ipso attentus experietur. Neque tamen penitus a vitali respiratione excludere oportet intercostales, ut quidam auctores contenderunt; nam certe observamus utique in nobis placide respirantibus aliquem costarum ascensum & descensum & longe manifestior sit septi transversi motus. Et thoracem osseum per costas etiam dilatari reapse, docet cingulum, aut fascia thoraci circumducta, quam tempore

inpirationis manifeste magis tendi observamus. Deinde fœminæ omnes thoracem mobiliorem habent, iisque costæ evidentius moventur, quam viris. Non omnes autem costæ in inpiratione ascendunt, ut recte advertit BOERHAAVIUS. Suprema enim costa fere immobilis est, tum reliquæ ut sequuntur ordine mobiliiores, per suos musculos adductæ elevantur eo evidentius, quo magis obsequiosæ sunt. Ultimæ tamen tres quatuorve costæ aut omnino non ascendunt, aut etiam descendunt & introrsum trahuntur ex opinione BOERHAAVII, ALBINI & aliorum, sed id non perpetuum est & tunc potissimum fit, dum ope solius diaphragmatis fere inpirationis absolvi-
tur, cum fibris carneis diaphragmatis connexæ sint, ab eoque simul eodem tempore descendente deorsum trahantur, aut saltem per suos musculos retentæ, sursum moveri prohibeantur.

§. DCXI. §. DCXII.

Thorax, ut ex osteologia notum est, componitur crate ossæa, quæ antè sterno, posterius vertebris dorsi duodecim, lateraliter utrimque totidem costis ossæis & harum cartilaginibus clauditur. Costæ porro dividuntur in veras & spurias; veræ septem superiores vocantur, quæ cartilaginibus suis ad ipsum sternum pertingunt, quinque inferiores spurix appellantur, quæ cartilaginibus suis non ad ipsum sternum pertingunt, sed eas ceterarum cartilaginibus adiungunt socias, aut libero extremo fluctuant. Omnium costarum fundamentum in vertebris dorsi est. Et quidem vertebra dorsi suprema in suo corpore ossæo levem sinum insculptum habet, quo capitulum costæ primæ recipit; ita etiam undecimæ & duodecimæ costæ capitulum in foveolam, corpori sibi respondentis vertebræ, impressam, recipitur. Reliquarum vero costarum capitula inter duas quasque vertebrae, qua sese lateraliter harum corpora contingunt, articulantur. Effetque hæc articulationis species omnino

de genere gynglimi, nisi aliæ causæ mobilitatem admodum exiguam & obscuram costis concederent. Non longe ab ea articulatione costa quælibet tuberculum educit, duabus infimis exceptis, quod cum processu transverso sibi respondentis vertebræ committitur; jamque adeo duplici loco cum vertebris costæ articulantur, nempe cum harum corporibus & processibus transversis; & præterea per ligamenta validissima ad vertebrae revinciuntur. Nam non solum capitula costarum, ubi cum corporibus vertebrarum committuntur, capsula ligamentosa, ut omnes alii articuli, cinguntur, sed etiam a cujusque costæ capitulo interius bifidum aut trifidum ligamentum eductum ad superiorem & inferiorem quamque vertebra affigitur & a tuberculo cujusque costæ breve, validissimum ligamentum enascitur, quo tuberculum costæ ad processum vertebræ transversum firmissime religatur & sunt alia præter hæc numerosa costarum ligamenta a Cel. WEITBRECHT ex professo descripta in *Syndesmologia* quæ recensere longum foret. Inde a transverso processu costæ deorsum, mox antrorsum in arcum curvantur, utcumque sibi parallelæ, aliæ tamen aliis magis curvæ & longiores, sineque plano aspero terminantur, cui cartilago adaptatur, mediante qua cum osse sterni antè cohærent; atque ille finis anterior in omnibus costis humilior est earumdem articulatione cum vertebris. Sed tantummodo septem superiorum costarum cartilagines ad ipsum sternum perveniunt & foveas laterales hujus ossis ingrediuntur, ligamentis brevibus ad id revinctæ; octava cartilago ad septimam, nona ad octavam, decima ad nonam adhærescit & per ligamenta solum cum sterni, tum & inter se conjunguntur. Undecima & duodecima finibus liberis fluctuant, musculis nexæ & abdominalibus & carni diaphragmatis. Longitudo costarum a prima increscit continuo ad octavam usque & ita etiam mo-

bilitas; prima enim brevissima & firmissima, subsequæ & longiores & mobiliiores, octava omnium longissima; ab hac denuo longitudine decrescunt ad infimam; at mobilitas non decrescit, imo vero infimæ costæ, quia fines liberos habent, ceteris omnibus mobiliiores sunt. Inprimis autem notanda est directio costarum. Prima a vertebra versus sternum descendit, altera fere ad rectum angulum cum sterno concurrit, reliquæ omnes a vertebra deorsum antrorsumque recurvate cartilaginibus suis denuo versus sternum ascendunt, ut medius arcus origine & fine humilior sit. Patet hinc, cur in universum motus costarum exiguus sit? cur tamen mobilitas præcipua in arcu earumdem maximo? cur ea costarum pars ceteris altius & evidentius attollatur in inspiratione.

§. DCXIII.

Musculi intercostales a situ suo dicti, quia spatia inter duas quasque costas relicta occupant, duplices sunt, alii externi, cuti propiores, alii interni, quibus mox pleura subest, sola pinguedine & cellulosa tela intercedente. Externi singuli oriuntur a margine inferiori costæ superioris, initio sumpto ad articulationem costarum posteriorem prope capitulum & inseruntur in marginem superiorem costæ inferioris, non penitus usque ad nascentem ex costa cartilagineam, quod spatium usque ad sternum completur aponeurosi. Fibrarum autem ea directio est, ut omnes a superiore costa ad inferiorem oblique antrorsum tendant, adeoque origo fibrarum in superiore costa hypomochlio propior, in inferiore ab hypomochlio remotior sit. Primus a supremæ costæ margine inferiore exortus, in secundæ marginem superiorem inseritur; & ita porro subsequi; hinc duodecim costis in singulo latere musculi intercostales undecim respondent, externi, totidemque interni, estque numerus omnium intercostalium in universum 44. Interni intercostales id habent cum externis commune, quod pa-

riter a superioris costæ inferiore margine exorti, in superiorem oram costæ inferioris descendant; sed in maiore distantia ab articulatione costarum & fere cis tuberculum oriuntur & dum externi costarum cartilagine non attingunt, interni ad sternum usque producuntur. Deinde fibrarum directionem contrariam habent & a superiore costa ad inferiorem oblique retrorsum descendunt, propiusque hypomochlio inferuntur, quam sit earumdem fibrarum origo.

§. D C X I V.

Musculus subclavius oritur longe a parte media exteriori & inferiore claviculæ & ab ejus tuberculo prope acromium, carneus oblique introrsum & fere transversus incedit & inseritur planiore tendine in finem osseum anteriorem costæ primæ, aut etiam in cartilaginem ejusdem. Claviculam sursum ductam detrahit in priora; hac firmata ulterius agens costam primam ad claviculam si adducere non potest, saltem firmare, licet hæc alioquin omnibus aliis costis firmior sit. Ceterum in respiratione placida, ordinaria, vix videtur agere; & si intercostales musculi vere vitales sint, ut BOERHAAVIUS credit, non oportebat his admiscere muscolum manifeste voluntarium, eumque in subsidium respirationis vitalis advocare.

§. D C X V.

Si ergo musculi intercostales omnes simul agunt, trahentur costæ mobiliiores ad firmiores, cumque costa prima omnibus aliis firmior sit & maxime renitatur, costæ vero omnes subsequæ continuo aliæ aliis mobiliiores sint, hinc costa prima punctum fixum erit respectu omnium intercostalium musculorum; atque adeo costa secunda adducetur ad primam, tertia ad secundam, quarta ad tertiam & sic porro, servato semper earumdem parallelismo. Verum quia arcus costarum maximus ab articulatione plurimum remotus est, erit etiam motus costarum maximus in arcu hoc

maximo, etsi in universum mobilitas exigua sit. Præterea non simpliciter ad se mutuo adducuntur costæ, nec totus thorax simul elevatur, siquidem costa prima fixa & immobilis manet in naturali & placida inspiratione. Neque si simpliciter ad se multo adducerentur costæ, thoracis cavitas augetur; sed dum attolluntur costæ, simul inflectuntur, leniterque veluti rotantur, ut margo earum inferior extrorsum vertatur; ita vero a pulmone removentur & cavum thoracis aliquantulum augment, licet fatendum sit, illud augmentum exiguum esse. Versio hæc costarum mechanica necessitate fit, quia enim costæ a vertebra descendunt in arcum ampliorem & ex eo arcu cartilaginibus suis denuo ascendunt versus sternum ad angulos valde acutos & quia in medio arcu mobiliiores sunt, quam in articulationibus suis ad vertebra & ad sternum, adducto eo arcu maximo vis infertur cartilaginibus costarum, quæ cum versus sternum in plerisque costis angulo admodum acuto ascendunt, costarum elevationi directe elatere suo & directione maxime renituntur. Vi ergo intercostalium musculorum prævalente, cartilagines illæ prope sternum inflectuntur, iisque demum inflexis costæ posterius ad vertebra circa sua capitula modice rotantur & arcu suo toto extrorsum sursumque moventur. Sic a pulmone recedunt & capacitatem thoracis augment; simul vero & sternum ipsum a cartilaginibus costarum antrorsum urgetur. Motus hic costarum per experimenta numerosa, in vivis animalibus capta ab Ill. HALLERO confirmatus; apparet autem maxime in costis inferioribus, quæ mobiliiores & longissimæ sunt. Supremam costam ab hoc motu penitus excipere oportet, quæ fere transversa ponitur & ad sternum descendit & ob brevitatem suam nexumque firmissimum vix mutationi alicui, certe non evidenti subiecta est, nisi in violenta inspiratione, a validioribus potentiis

tentiis trahatur. Infimæ pariter costæ, cum car-nibus diaphragmatis nexæ, aliquam exceptio-nem patiuntur, quas subinde, validius contracto diaphragmate, introrsum trahi observavit HALLE-RUS; sed id non perpetuum est, ut multi volue-runt; quin contra in aliis experimentis aucto ro-bore intercostalium muscutorum & easdem cos-tas ascendisse manifeste vidit & tunc solum, vel plerumque introrsum trahi, dum solo fere dia-phragmate, absque intercostalibus musculis, ani-mal inspiravit.

Nunc vero hætenus supposuimus tantummo-do, musculos intercostales internos externosque simul agere & ab utroque costas elevari, dum contra Cl. HAMBERGERUS externis solum hoc of-ficium tribuit, internos vero externorum anta-gonistas esse statuit & ab his costas in expira-tione deprimi. Rationes præcipuæ hæ fuerunt: primo, quod intercostales interni directionem observent contrariam & quod a costa quaque su-periore in costam quamque inferiorem oblique retrorsum descendant, adeoque ex puncto mo-biliore in punctum fixius & hypomochlio pro-pinquius inferantur. Sed omnis musculus dum contrahitur, punctum mobilius ad fixius addu-cit, ergo & intercostales interni agentes costas superiores ad inferiores adducent, non vice ver-sa, cum fibræ horum muscutorum in superiore quaque costa longius ab hypomochlio distent. Addidit etiam intervalla costarum in elevatione dilatari, in depressione autem ab his musculis minui. Denique machinulam curavit fabricari per fila mobilem, qua ostendit, a filo directio-nem intercostalis externi imitante trabeculam inferiorem, ad superiorem elevari, a filo vero, contrariam habente directionem, trabeculam su-periorem ad inferiorem deprimi. Verum omnia hæc, utut speciosa videri possunt, facillime & ex veris principiis refelluntur & licet acerrime suam

sententiam defenderit HAMBERGERUS, vicit tamen veritas. Nam primo quidem neque directio contraria internorum musculorum, neque insertio hypomochlio propior quidquam HAMBERGERI sententiæ favet, quandoquidem costa prima, reliquarum omnium fundamentum, adeo fixa est, ut deprimi nullatenus possit. Costa suprema omnium firmissima est, costa quæque inferior, mobilior est proxima superiore; musculus agens trahit utrumque suum extremum vi eadem, tumque pars mobilior accedit ad minus mobilem; ergo agentes intercostales interni, perinde ut externi, constanter inferiores costas, utpote multo mobiliiores adducent ad superiores minus mobiles. Neque jam directio fibrarum contraria hic exceptionem facere potest; nam quæcumque sit fibrarum musculi directio, semper tamen pars mobilior ad minus mobilem adducitur. Esto, quod fibræ intercostalium internorum in superiore costa ubique magis ab hypomochlio distent, quam in inferiore, si tamen excessus ille distantiae ab hypomochlio in superiore quaque costa minor est, quam sit excessus mobilitatis in costa quaque inferiore, numquam alius poterit effectus a contractis hisce fibris sequi, quam ut inferiores costæ ad superiores adducantur, etsi in superioribus ab hypomochlio longius distent. Atqui certissimum est, excessum distantiae ab hypomochlio fibrarum intercostalium internorum in superiore quaque costæ esse multo minorem, quam sit excessus mobilitatis in costa quaque inferiore, ergo fundamentum HAMBERGERI penitus corrui. Sed etiam falsum est, fibras intercostalium internorum in superioribus costis longius ab hypomochlio distare; nam licet ita omnino appareat, quia directio fibrarum retrograda est, tamen quia costa inferior, exceptis infimis, semper notabiliter longior est proxima superiore, ob hanc longitudinem costarum inferiorum sit,

ut reipsa retrogradæ intercostalium internorum fibræ in inferioribus costis nullatenus hypomochlio propiores sint, sed, licet contrarium prima fronte videatur, magis omnino ab hypomochlio distent, quam in origine sua superiore; atque id exactis dimensionibus Ill. HALLERUS invenit. Ita nervus Hambergeriani systematis rescissus est. Denique experimentis in vivis animalibus capitis Cel. HALLERUS manifeste vidit, ablatiis externis intercostalibus, internos in inspiratione contrahi & ab his perinde ut ab externis costas elevari. Machinula HAMBERGERI id vitium habuit, quod tota sursum & deorsum mobilis fuerit, quemadmodum etiam totum thoracem sursum deorsumque moveri HAMBERGERI opinio erat, sed arbitraria opinio & a veritate longe remota, cum tota thoracis elevatio a primæ costæ immobili firmitate dependeat.

§. D C X V I.

De mutationibus diaphragmatis, quas hic musculus inspirando & expirando patitur, jam alibi dixi. Notavi partes laterales carneas, pulmonibus utrimque subjectas, maxime in inspiratione deprimi, partem mediam tendineam a mediastino utcumque retineri, minusque descendere; in profundiore tamen & violenta inspiratione & hanc ipsam in abdomen detrahi, ut etiam cor inde sede sua moveatur, per experimenta in vivis animalibus capta. Costas quoque inferiores in validiore respiratione & abdominali potissimum a septo introrsum trahi, paulo antea dictum est. In expiratione omnia his contraria fiunt.

§. D C X V I I.

In placida respiratione & quæ sua sponte pergit, hi soli muscoli operantur, intercostales nimirum, diaphragma & abdominales. Si hominem dormientem respicias, omnibus aliis musculis quietis, vides thoracem solum & abdomen moveri; idem in apoplectico vides. Solis ergo his

musculis respiratio ea, quam vitalem BOERHAAVIUS vocat, debetur.

Intercostalibus nervos accipientibus &c. Jam alio loco dictum est, nervos dorsales a medulla spinali oriundos, per interstitia vertebrarum egredientes, postquam singuli ramulum dederunt ad nervum intercostalem magnum accedentem & cum eo in ganglion intumescens, deinde inter duas series musculorum intercostalium transversos antrosum excurrere ad sternum usque & in hoc itinere musculis intercostalibus prospicere. Diaphragma proprios habet nervos, *phrenicos* dictos, ortos ex furculo noni & octavi paris in collo, accedentibus aliis furculis a secundo & tertio pari cervicalium & præcipuo ramulo a quarto pari, subinde etiam a quinto, sexto, septimo & a primo dorsalium, inde natus per thoracem, cellulosa tela obvolutus, descendit, dexter rectior & paulo anterior, sinister posterior & circa pericardium inflexus, communicat etiam cum intercostali magno & vel accipit ab eo, vel illi impertit ramulos; accedit ad carnes diaphragmatis prope limites tendineæ substantiæ, ramulosque suos per id distribuit, quorum alii in superiorem, alii in inferiorem diaphragmatis partem sparguntur. Alii nervi diaphragmati adveniunt exigui ab octavi paris plexu stomachico, exque plexu nervi splanchnici circa ortum arteriæ celiacæ, alii ad capita diaphragmatis accedunt ab infimis dorsalium & supremis lumborum nervorum. Nervis phrenicis ligatis, compressis vel rescissis in animali vivo, sive id in collo, sive in thorace fiat, diaphragma continuo paralyticum fit & respiratio supprimitur, animal anxie anhelat, respiratio, si quæ superest, solo thorace fit, si is integer relictus est; sed hæc respiratio insufficiens est ad vitam; simul tunc abdomen in expiratione tumet, jam paralytico diaphragmate & in inspiratione introrsum pellitur, cujus phænomeni ratio evidens est. Irrita-

to autem nervo phrenico diaphragma contrahitur, convellitur, descendit in abdomen. Si medulla spinalis infra sextam vertebam præscindatur, cessat respiratio thoracica, manet adhuc abdominalis, quæ per diaphragma fit, quia nervorum phrenicorum altior origo est; hæc omnia demonstrant, a nervis phrenicis potissimum motum diaphragmatis pendere.

§. DCXVII.

Hæc dudum in actione pulmonis explicata sunt & præcedentibus paragraphis repetita.

§. DCXIX. §. DCXX.

Inspirationem sequitur exspiratio, dum, diaphragmate jam cessante agere, muscoli abdominales contrahuntur & viscera abdominis sursum ac postrosum agunt, diaphragma in pectus repellunt, quod ipsum pulmonem in minus spatium compellit & aërem ex hujus cavo superfium ejicit. Similiter eodem tempore dum agere cessant intercostales muscoli, cartilagine costarum, prægressa inspiratione distractæ, atque inflexæ, nunc elatere suo sese restitunt, resiliunt, ac costas deprimunt; ita etiam transversa thoracis diameter minuitur; nec opus est antagonista musculo. Neque tamen penitus verum est, nullos intercostalibus antagonistas musculos esse; nam certe abdominales muscoli, obliquus externus & internus & rectus denique, pluribus capitibus ad inferiores costas adhærescunt, dum ergo illi in exspiratione contrahuntur, utique costas inferiores, ac per consequens etiam superiores elevatas detrahunt, idque eo facilius, quod & elatere cartilaginum adjuvantur & quia simul eodem tempore intercostales agere desinunt. Atque hæc quidem extra controversiam posita sunt. Sed imprimis disputatur de causa alternæ inspirationis & exspirationis & cur hic motus etiam nobis insciis in somno pergat. Vanæ sunt omnes physiologorum hypotheses, quæcum-

que adhuc ad hoc phænomenon explicandum excogitatae fuerunt. BOERHAAVIUS ita hoc explicari posse putavit, quod scilicet protracta inspiratione, tempore illo intermedio inter inspirationem & expirationem, aër in pulmone retentus & rarefactus vascula sanguinea comprimat, hinc transitus sanguinis per pulmonem ad cor sinistrum impediatur; sanguinem ergo minore copia ad cor sinistrum venire & proinde etiam minore copia venire ad encephalon, ac præcipue ejus affluxum ad cerebellum minui; ergo etiam influxum spirituum in musculos intercostales & diaphragma minui, hosque musculos relaxari & sequi expirationem; tum vero per ipsam expirationem sanguinis ad cor sinistrum transitum accelerari, sanguinem ergo & copiosius ad cerebellum affluere, itaque mox etiam spiritus a cerebello copiosius influere in musculos respirationis; ergo musculos intercostales denuo contrahi & expirationi inspirationem succedere; & eundem ordinem redire perpetuo. Facile videtis quam hæc omnia inania sint. Cerebelli prærogativa nulla est & penitus arbitrarie assumitur. Sanguinem minore quantitate ad cor sinistrum & ad encephalon venire & inde influxum spirituum in musculos minui, eosque relaxari, gratis pariter assumptum est & si de his musculis valeret, perinde valeret de omnibus, atque adeo ex hac causa, quæ in aucto alterne & minuto sanguinis ad encephalon affluxu ponitur, omnes totius cordis muscoli alterne relaxari deberent & contrahi. Deinde sanguinis fluxum per pulmones ad cor sinistrum adeo notabili effectum intercipi, id quidem fingi non potest sine maxima præsentente anxietate; atqui in respiratione placida naturali nullius omnino anxietatis nobis conscii sumus. Cadunt ergo sponte sua hæc ædificia hypothetica. Omitto alias hypotheses perinde infirmas omnes; sed omitti non potest Cel. HALLERI sententia. Hic ut nodum gordium non solubilem

rescinderet, negavit primo respirationem vitalem, aut spontaneam actionem esse, sed omnem respirationem & in brutis & in hominibus ab anima pendere statuit. Hanc molestiæ & anxietatis impatientem ciere musculos & nunc thoracem diducere, nunc arctare; addidit & in somno & in apoplexia eandem animæ potestatem supereffe, eandemque esse causam primæ respirationis; neque enim aërem sponte sua in pulmonem foetus exclusi irruere, sed hanc voluntarie inspirare & demum ex voluptate percepta motum hunc alternum continuare. Certum est, sic difficultates omnes rescindi posse, si modo vera esset hæc sententia. Sed nobis insciis, nobis non advertentibus, nec expresse volentibus pergit alternus inspirationis & expirationis modus & pergit in sanitate sine omni molestia, sine percepta etiam anxietate. In somno vero & in apoplexia, dum anima neque rerum externarum, neque sui ipsius conscia est, consciam esse anxietatis in pulmone natæ & ex illa anxietate percepta respirationem continuare, quis credat? Manifeste nimia hæc sunt. Nimium est etiam, omnem soli arbitrio respirationem subicere & cum amphibio hominem in eadem classe collocare. Non est ita voluntati subjecta respiratio, ut illam penitus tollere possimus, longeque providentissime cavit creator, ne ex voluntate nostra unice & spiritus, quem trahimus & vita cum spiritu penderet; siquidem ea potestate lata nullis coerceri legibus posset audax Japeti genus, riderentque justitiæ rigorem malefici, flagitiosi nebulones, parricidæ, patriæ proditores, securi poenarum, quippe qui etiam comprehensi, facili negotio, sublato per voluntatem spiritu, ut violentam mortem effugiant, arbitrarie vivere desinerent. Non debet fervorum Angolensium exemplum ab HALLERO in medium adferri, qui revoluta & in asperam arteriam impulsâ lingua, spiritum & vitam sibi adimunt, cum ita arti-

ficio respirationem sufflaminent, quo non foret opus, si solius voluntatis determinatio sufficeret. Ut primum mihi dederit exemplum HALLERUS, posse ab homine solo voluntatis imperio, citra instrumentum, citra artificium aliquod, respirationem penitus tolli, dicam etiam atque etiam, a sola voluntate animæ respirationem pendere. Nunc tale exemplum non dedit, nec daturus est; plus ergo asserit, quam probari possit. Deinde si ab animæ arbitrio pendet respiratio, cur nunc primum, dum in lucem editus est foetus, organa spiritalia movet? quid est, quod voluntatem animæ recens nati pueri, aut catuli, ad aërem hauriendum determinare possit, quem ne quidem novit? Nimium certe & hoc est, quamcumque in partem versetur. Nam ignoti nulla cupido. Neque dici potest foetum in lucem editum anxietatem insolitam percipere & nunc, ut ab ea sese liberet, pectus dilatare. Patulum foramen ovale & foramine ovali multo amplior ductus arteriosus, sanguini liberrimum & expeditum concedunt transitum, ut non sit ratio, cur ad anxietatem recurras. Ligatis umbilicalibus arteriis verum est, majorem in aorta resistantiam nasci & hanc etiam in ductum arteriosum reniti magis, quam antea; sed etiam sæpe, antequam funiculus umbilicalis ligetur, dum capite suo ex vagina emergit infans, jam aërem haurit & vagit. Et vicissim non raro foetus debilis & quasi attonitus, in quo maximam anxietatem præsentem esse suspicari posses, in lucem editus non respirat, nisi stimulis excitatus. Porro quod HALLERUS adjicit, foetum hætenus in utero suctioni liquoris amnii assuetum nunc suctione familiari continuata pro amnii liquore aërem sugere, atque ita inspirare, id quidem ab HALLERO dici potuisse mirum est. Aliud suctio est, aliud deglutitio; suctio sine aëre & sine inspiratione locum non habet; non ergo proprie loquendo foetus in utero liquorem amnii sugit,

sed deglutit; & si nunc ejus loco aërem deglutiat, eum quidem ad ventriculum, non in pulmones deducet, neque ideo necessario inspirabit. Missis itaque hisce opinionibus videamus, numquid verosimilius statui possit.

Fœtus maturus in utero hærens omnibus ad respirationem requisitis instrumentis præditus est, neque tamen respirat, hoc est, ne quidem illa instrumenta movet. Ergo omnia ea instrumenta nondum sufficientem rationem respirationis continent, sed necesse est, ut aliqua causa excitans accedat. Ea causa excitans vel erit voluntas animæ, vel nova quædam conditio superveniens, quæ prius non aderat. Sed a voluntate animæ, cur repetatur, nulla sufficiens ratio est; ergo excitans illa causa in nova quadam conditione quærenda est. Quæ vero est illa nova conditio. Fœtus capite suo ex vagina emergens continuo respirat & vagit. Nihil hic novi video, nisi quod fœtus, qui antea intra aquas hærebat, aëri inaccessus; nunc aëris contactui libero exponatur. Causa igitur respirationem primam excitans erit in ipso quærenda aëre. Neque video, quid impediat, quominus aër illico per os naresque subeat tracheam infantis & bronchia aëre vacua, sed si etiam hoc fiat, non ideo ab illabente aëre pectus dilatabitur, imo ne quidem pulmo explicabitur, alioquin pleuræ undique applicatus. Sed potest & videtur aër, nunc primum sensilem tracheam invadens, stimulus esse, respectu instrumentorum respirationis, ut sanguis venosus stimulus est respectu instrumentorum circulationis; & videntur nunc affectis ab aëre illapso pulmonum nervis, nervi musculorum respirationi servientium per consensum nobis ignotum affici, ipsique hi musculi in contractionem cieri, ut cavum pectoris dilatetur, sicut ciliares nervi in consensum trahuntur affecta retina, aut sicut iidem respirationi inservientium musculorum nervi in consensum manifeste cientur ab olfactoriis nervis affectis. **Esse**

autem multum consensum inter pulmonis nervos & nervos musculorum respirantium, pluribus experimentis ostendi posset. In peripneumonia dolente, in tussi ex acri halitu sulphuris, in asthmate spasmodico. Si hoc ponatur, esset ratio primæ inspirationis inventa mechanica, quam exspiratio naturaliter sequetur, remittente actionem musculorum thoracem dilatantium. Forte etiam aër minus elasticus factus, cessat irritare nervos pulmonum. Forte id ipsum quod in aëre elasticum est, nervos pulmonis unice irritat? Forte hinc ratio patet, quare imminuta aëris elasticitate, licet manente gravitate ejusdem, difficilior fiat respiratio?

§. D C X X I.

In respiratione violenta aliæ potentiae thoracem dilatantes accedunt. Musculi *scaleni*, *serratus anticus major & minor*, *serratus posticus superior* & alii adhuc in textu non descripti. Sed necesse est tunc partes horum musculorum mobiliiores, spinam dorsi, collum, scapulasque figi, tum demum hi musculi costas poterunt elevare & juvare actionem intercostalium in dilatando thorace. Hanc respirationem videre licet in ægris paroxysmo asthmatico prehensis & maxime in agone, dum ingenti omnium musculorum costis insertorum, nixu thorax dilatatur, ut aliqua adhuc sanguinis portio per pulmonem trajiciatur & vita quantacumque protrahatur. Ceterum musculi hi in textu descripti sunt satis bene ex VESALIO & EUSTACHIO & qui minutiora desiderat, ex anatome petere debet. Recensetur etiam in textu *serratus posticus inferior*, sed is manifeste costas detrahit; neque adeo ad inspirationem quidquam facit.

§. D C X X I I.

Exspiratio placida & naturalis fit potissimum actione elastica cartilaginum costarum resilientium & musculorum abdominalium contra diaphragma reactione; cumque musculi abdominales obliqui & rectus costis inferioribus plerisque

nectantur, etiam dum agunt, elaterem cartilagineum sese restituentium adjuvant & costas deprimunt. Neque placet, quod BOERHAAVIUS hos musculos cum iis confundat, qui expirationem violentam cient; nam abdominales muscoli perinde necessario in naturali expiratione agunt, ut diaphragma agit in naturali inspiratione. In violenta vero expiratione aliæ vires accedunt a sacrolumbali, longissimo dorsi, quadrato lumborum & serrato postico inferiore. Et tamen certum est, etiam sine his viribus a solo diaphragmate inspirationem violentam, naturali fortiorē & a solis etiam abdominalibus musculis violentam expirationem fieri posse, quoniam hosce musculos variis gradibus movere in arbitrio nostro est.

§. DCXXXIII.

In foeminis thorax antèrius planior est ob incumbentes mammas, quæ in illis molem habent multo quam in viris majorem. Cum ea planitie thoracis natura majorem in foeminis costarum mobilitatem conjunxit, ut liberius thorace respirare possint, quam viri, quod imprimis tempore graviditatis necessarium erat.

§. DCXXXIV.

Voluntati obnoxios. Hæc distinctio jam sublata est, siquidem diaphragma & abdominales muscoli & intercostales, a quibus tamen solis vitalis illa BOERHAAVIO dicta respiratio pendet, manifeste voluntati subiecti sunt. Volo diaphragma fortius movere & possum, dum volo. Volo idem relaxare & possum, volo ejus actionem coeptam in medio opere abrumpere & suspendere, nihil vetat; volo æquilibratis viribus diaphragma & abdominales musculos contra se mutuo urgere; etiam in hoc obsequuntur voluntati meæ, citra alterius potentiæ concursum.

§. DCXXXV.

1. *Hinc intelligitur &c.* Hæc in actione pulmonis fusc dicta sunt, nec repeti debent.

2. 3. 4. Potentia antagonista muscutorum intercostalium est elater cartilaginum costarum, quæ sponte resiliunt & se restitunt, dum illi agere cessant; non tamen omni antagonista musculo carent intercostales, siquidem abdominales musculi obliqui & recti etiam in placida inspiratione costas, quibus nectuntur, detrahunt.

5. *Concentus quidam &c.* Passim intra tempus unius inspirationis & expirationis quatuor pulsus absolvuntur, in quibusdam hominibus etiam plures. Diminuta circulatione etiam diminuitur respiratio, aucta circulatione sanguinis augetur & respiratio.

6. *Necessitas repetendæ respirationis &c.* De hac in actione pulmonis dictum est. *Quamdiu vero persistere possit, quoad efficaciam vitæ sine repetitione?* Hoc certo determinari non potest & variat in variis hominibus. In syncope subinde diu intermittit; dantur & homines, qui notabili tempore sub aquis sine respiratione vivere possunt.

7. His in casibus summum in pulmone obstaculum est sanguini trajiciendo, nec sufficit respiratio placida ordinaria ad expediendum pulmonem, ergo vis omnium muscutorum augetur, seu natura maximos impendit conatus & alios musculos, alias ad respirationem non concurrentes, in subsidium advocat, unde tunc inspiratio violentissima, ut magno excessu thorax dilatetur & pulmo summa illa anxietate saltem quomodo-cumque levetur.

8. 9. Hæc patent ex dictis, siquidem respiratio & circulatio sanguinis inter se consentiunt & conspirant. 10. 11. 12. Hæc in pulmonis actione pertractata sunt.

FINIS TOMI TERTII

